

Ն. ԱՐՈՎՅԱՆԻ ԱՆՎԱՆ ԳԱՅԱԿԱՆ ՊԵՏԱԿԱՆ ՄԱՆԿԱԿԱՐԺԱԿԱՆ ԳԱՄԱԼՍԱՐԱՆ
ԳԱՅՈՑ ՊԱՏՄՈՒԹՅԱՆ ԱՄԲԻՈՆ
ՏԱԹԵՎ ԳԻՏԱԿՐԹԱԿԱՆ ԳԱՄԱԼԻՐ

Մ. Ս. ԿԱՐԱՊԵՏՅԱՆ

ՀԱՅԱՍՏԱՆԸ
1912-1920
ԹՎԱԿԱՆՆԵՐԻՆ

*Ուսումնական չեռնարկ
բուհերի համար*



ԵՐԵՎԱՆ — 2003

Հաստատված է ՀՀ կրթության և գիտության նախարարության կողմից որպես բուհական ուսումնական ձեռնարկ

Հրատարակության է երաշխավորել Խ. Աբովյանի անվան հայկական պետական մանկավարժական համալսարանի գիտական խորհուրդը

ԵՐԿՈՒ ԽՈՍՔ

Հայոց նորագույն պատմության 1914–1920 թվականների ժամանակահատվածը լի է բարդ ու խճճված իրադարձություններով, պատմագրության մեջ երկար ժամանակ գրեթե մոռացության մատնված, պարզապես չլուսաբանված կամ թերի մեկնաբանված շատ հիմնահարցերով, իրարամերժ, հակասական ու վիճահարույց գնահատականներով:

Ներկա ուսումնական ձեռնարկի շարադրմանը ձեռնամուխ ենք եղել՝ նշված հիմնահարցերը հնարավորինս համակարգելու, տրամաբանական հաջորդականությամբ միմյանց փոխկապակցելու, անհրաժեշտ պարզաբանումներ կատարելու և ուսանողության կողմից նյութի յուրացումն առավել մատչելի դարձնելու մտահոգությամբ:

Շարադրանքի ընթացքում ձեռքի տակ ունեցել ենք կարևորագույն իրադարձությունների վերաբերյալ հրատարակված փաստաթղթերը, դեպքերին ժամանակակից քաղաքական, պետական, կուսակցական գործիչների աշխատությունները, ականատեսների հուշագրությունները, փաստավավերագրական բնույթի այլ նյութեր:

Լայնորեն օգտագործել ենք Հայաստանի Առաջին հանրապետության պետական գործիչների և սփյուռքահայ մի շարք այլ հեղինակների աշխատությունները:

Շարադրանքի ընթացքում ուղեցույց ենք ունեցել և ըստ ամենայնի հենվել ենք հայ պատմաբանների հիմնարար աշխատությունների վրա՝ առաջին պլան մղելով հատկապես վերջին շրջանում հրատարակված մի շարք հետազոտություններ, որոնք այս կամ այն չափով զերծ են գաղափարական-քաղաքական սահմանափակումներից:

Հույս ունենք, որ ներկա ձեռնարկը օգտակար կարող է լինել ոչ միայն բուհերի ուսանողների, ասպիրանտների, հայցորդների, հանրակրթական դպրոցի պատմության ուսուցիչների համար, այլև կհետաքրքրի ընթերցող լայն շրջաններին:

Պատրաստ ենք սիրով ու շնորհակալությամբ ընդունել բոլոր դիտողություններն ու ցանկությունները, որպիսիք անպայման հաշվի կառնվեն ձեռնարկը վերահրատարակելիս:

Հեղինակ

Հեղինակը երախարագիտությանը խորին շնորհակալություն է հայտնում «ՏԱՅԵՎ ՊԿՀ»-ի փնտրեն, կրթական գործի անշահախնդիր հովանավոր Սոկրատ ՄԿՐՏՉՅԱՆԻՆ՝ սույն ձեռնարկի հրատարակությունը սեփական միջոցներով իրականացնելու համար:

Խմբագիր՝ պրոֆ. Վ. Ա. Դիլոյան

Կարապետյան, Ս.Ս.

Կ 294 Հայաստանը 1912–1920 թվականներին: /Ուսումնական ձեռնարկ բուհերի համար,– Եր., «Ձագակ–97», 2003.– 400 էջ:

Կ 0503020913 2003
0003(01)–2003

ԳՄՂ 63.3(2Հ)Գ73

ISBN 99930–2–455–4

© Կարապետյան Ս Ս, 2003 թ
© «ՏԱՅԵՎ ՊԿՀ», 2003

ԲՈՎԱՆ ԴԱԿՈՒԹՅՈՒՆ

Երկու խոսք 3

**Թեմա առաջին
ՀԱՅ ԺՈՂՈՎՈՒՐԸ ԱՌԱՋԻՆ ՀԱՄԱՇԽԱՐԴԱՅԻՆ
ՊԱՏԵՐԱԶՄԻ ՏԱՐԻՆԵՐԻՆ**

Պատերազմի նախօրյակը. Հայկական հարցի վերաբացումը:
1914 թ. հունվարի 26–ի ռուս–թուրքական համաձայնագիրը 8
Առաջին համաշխարհային պատերազմի սկիզբը 18
Ռազմական զործողությունները Կովկասյան ճակատում
1914–1916 թթ. 21
Սարիղամիշի օպերացիան 21
Ալաշկերտի օպերացիան 25
Էրզրումի օպերացիան 31
Տրապիզոնի օպերացիան 34
Օղնուտի օպերացիան 36
Հայկական կամավորական դրուժինաները և կանոնավոր
զորամասերը Կովկասյան ռազմաճակատում 37

**Թեմա երկրորդ
ՀԱՅՈՑ ՄԵՃ ԵՂԵՌՆԸ**

Արևմտահայության բռնազաղթն ու կոտորածները և հայ
զինվորականության ոչնչացումը 61
Արևմտահայ մտավորականության ոչնչացումը 64
Ջարդերը նահանգներում 66
Հայերի բնաջնջումը աքսորավայրերում 78
Եղեռնի հանցավորները: Տերությունների դիրքորոշումը 81
Աշխարհի ականավոր մարդիկ դատապարտում են հայոց
ցեղասպանությունը 86
Երիտթուրքերի դատապարտումը: Հայ վրիժառուների արդար
դատաստանը 92

**Թեմա երրորդ
ԻՆՔՆԱՊԱՇՏՊԱՆԱԿԱՆ ՀԵՐՈՍԱՄԱՐՏԵՐԸ**

Վասպուրական և Շատախ 103
Վանի հերոսամարտը 105
Շատախ 112

Մուշի և Սասունի հերոսամարտը 120
Մուշ քաղաքի հնգօրյա դիմադրությունը 129
Մշո դաշտի դիմադրական կռիվները 132
Սասունի հերոսամարտը 135
Շապին–Գարահիսարի ինքնապաշտպանությունը 141
Մուսա լեռան հերոսամարտը 147
Ուրֆայի հերոսամարտը 156

**Թեմա չորրորդ
ՀԱՅ ԺՈՂՈՎՈՒՐԸ 1917 Թ. ՓԵՏՐՎԱՐՅԱՆ
ՀԵՂԱՓՈՒՆՈՒԹՅԱՆ ԺԱՄԱՆԱԿԱՇՐՋԱՆՈՒՄ**

Օգակոմի ստեղծումը 166
Ժամանակավոր կառավարության 1917 թ. ապրիլի 26–ի
կարգադրությունը Արևմտյան Հայաստանի մասին 172
Արևմտահայերի 1–ին համագումարը 174
Հայկական ազգային զորամասերի ստեղծումը 175
Հայ եկեղեցական համագումարը 178
Հայոց ազգային համախորհրդակցությունը: Հայոց Ազգային
խորհրդի ստեղծումը 179

**Թեմա հինգերորդ
ՀՈԿՏԵՄԵՐՅԱՆ ՀԵՂԱՓՈՒՆՈՒԹՅՈՒՆ ԵՎ ՀԱՅԱՍՏԱՆԸ**

Հոկտեմբերյան հեղափոխության հաղթանակը 183
Իրադրությունը Անդրկովկասում հեղափոխությունից հետո 185
Անդրկովկասյան Սեյմի և Կոմիսարիատի ստեղծումը 187
Ռազմաճակատի քայքայումը 190
Հայկական կորպուսի կազմավորումը 191
«Թուրքահայաստանի մասին» դեկրետը 195
Իրադրությունը Կովկասյան ռազմաճակատում 1918 թ.
գարնանը 197
Տրապիզոնի բանակցությունները 199
Դրությունը ռազմաճակատում 203
ԱՂՏԳ ստեղծումը 204
Իրադարձությունները Բաքվում 207

**Թեմա վեցերորդ
ԹՈՒՐԵԱԿԱՆ ԶՈՐԵՆՐԻ ՆԵՐԻՆՈՒԹՄԱՆ
ԱՐԵՎԵԼՅԱՆ ՀԱՅԱՍՏԱՆ. ՍԱՐԿԱՐԱՊՄԱՏԻ ՀԵՐՈՍԱՄԱՐՏԸ**

Թուրքական զորքերի առաջխաղացումը, Կարսի և
Ալեքսանդրապոլի անկումը 214
Սարդարապատի հերոսամարտը 217
Բաշ–Ապարանի ճակատամարտը 224
Ղարաքիլիսայի հերոսամարտը 226

**Թեմա յոթերորդ
ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆԸ**

Հայաստանի Հանրապետության հռչակումը	232
Բաթումի հաշտության պայմանագիրը	236
Հայերի մասնակցությունը Բաքվի պաշտպանությանը	241
Հայաստանի Հանրապետության ներքին դրությունը: Իշխանության մարմինների ստեղծումը	246
Առաջին միջոցառումները	253
ՀՀ սահմանների ընդարձակումը	254
Հայ-վրացական պատերազմը	256
Մարդասիրական օգնություն ՀՀ-ին	259
Արևմտահայերի երկրորդ համագումարը	260
ՀՀ խորհրդարանի ընտրությունները	261
Ղարաբաղի հարցը 1918–1920 թթ.	262
Զանգեզուրը 1918–1920 թթ.	268
ՀՀ ներքին կյանքի ամրապնդումը	270
Կրթական-մշակութային ձեռնարկումները	280
ՀՀ զինված ուժերի կազմակերպումը	281
1920 թ. Մայիսյան ապստամբությունը	284
Թուրք-ադրբեջանական խռովությունների ճնշումը	292

**Թեմա ութերորդ
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱՐՏԱՔԻՆ ԶԱՂԱՔԱԿԱՆՈՒԹՅՈՒՆԸ**

Հայաստանի հարցը Փարիզի կոնֆերանսում	299
Հարբորդի առաքելությունը Հայաստանում	305
Սան Ռեմոյի կոնֆերանսը	307
Սևրի պայմանագիրը և Հայաստանը	314
ՀՀ հարաբերությունները խորհրդային Ռուսաստանի հետ	321
Իրադարձությունները Զանգեզուրում, Նախիջևանում և Ղարաբաղում Ադրբեջանի խորհրդայնացումից հետո	329
1920 թ. օգոստոսի 10–ի համաձայնագիրը	343
1920 թ. օգոստոսի 24–ի ռուս-թուրքական պայմանագրի նախագիծը և Հայաստանը	348

**Թեմա իններորդ
1920 թ. ՀԱՅ-ԹՈՒՐԿԱԿԱՆ ՊԱՏԵՐԱԶՄԸ:
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԽՈՐՀՐԴԱՅՆԱՑՈՒՄԸ**

Պատերազմի դիվանագիտական նախապատրաստությունը	355
Պատերազմի սկիզբը և ընթացքը	358
Պատերազմի երկրորդ շրջանը	364

Հայ-ռուսական բանակցությունները Երևանում: Հաշտության պայմանագրի իրկտեմբերի 28–ի նախագիծը	371
Պատերազմի ավարտական փուլը: Հայաստանի պարտությունը	377
Պարտության պատճառները	382
Կառավարության փոփոխությունը	383

**Թեմա տասներորդ
ՀԱՅԱՍՏԱՆԻ ԽՈՐՀՐԴԱՅՆԱՑՈՒՄԸ: 1920 թ.
ՂԵԿՏԵՄԲԵՐԻ 2–Ի ԵՐԵՎԱՆԻ ՀԱՄԱՁԱՅՆԱԳԻՐԸ:
ԱԼԵՔՍԱՆԴՐԱՊՈԼԻ ԴԱՇՆԱԳԻՐԸ**

Հայաստանի խորհրդայնացումը	385
1920 թ. դեկտեմբերի 2–ի Երևանի համաձայնագիրը	388
Ալեքսանդրապոլի պայմանագիրը	390
<i>Օգտագործված աղբյուրների և գրականության ցանկ</i>	397
<i>Հապավումների ցանկ</i>	399

ՀԱՅ ԺՈՂՈՎՈՒՐԸ ԱՌԱՋԻՆ ՀԱՄԱՇԽԱՐՀԱՅԻՆ ՊԱՏԵՐԱԶՄԻ ՏԱՐԻՆԵՐԻՆ

ՊԱՏԵՐԱԶՄԻ ՆԱԽՕՐԵԱԿԸ: ՀԱՅԿԱԿԱՆ ՀԱՐՑԻ ՎԵՐԱԲԱՑՈՒՄԸ: 1914 Թ. ՀՈՒՆՎԱՐԻ 26-Ի ՈՒՒՄ-ԹՈՒՐՔԱԿԱՆ ՀԱՄԱՁԱՅՆԱԳԻՐԸ

1908 թվականի երիտթուրքական հեղափոխությունից հետո հայ ազատագրական շարժումը ժամանակավորապես վայրէջք ապրեց. հավատալով երիտթուրքերի կեղծ խոստումներին և թուրքական սահմանադրության հռչակած ազատության, հավասարության սկզբունքներին՝ հայ ֆիդայիների մեծագույն մասը իջավ լեռներից, զենքը հանձնեց իշխանություններին ու լծվեց խաղաղ աշխատանքի, որի հնարավորությունը, ի դեպ, նրանց տրվեց: Շատ քչերն էին միայն, այդ թվում և Անդրանիկը, չհավատացին թուրքական խոստումներին և խնամքով յուրելով զենքը՝ թաքցրեցին՝ գալիք ժամանակներում վերստին կռվի նետվելու համար:

1909 թվականի Ադանայի ապրիլյան կոտորածը, որին զոհ գնացին շուրջ 30 հազար հայեր, պետք է որոշ չափով սթափեցներ հայ ազատագրական շարժման գործիչներին և առիթ տար խորհելու հետագա գործելակերպի շուրջ:

Պատերազմի նախօրյակի ամենախոշոր իրադարձությունը թերևս Հայկական հարցի վերաբացումն էր՝ կապված Բալկանյան առաջին պատերազմում սլավոնական ժողովուրդների ձեռք բերած հաղթանակների հետ:

Պատերազմը մղվում էր մի կողմից Բալկանյան միության երկրների՝ Բուլղարիա, Սերբիա, Հունաստան, Չեռնոգորիա, մյուս կողմից՝ Թուրքիայի միջև: Բալկանյան թերակղզու ժողովուրդների առջև պատմական խնդիր էր կանգնած ազատագրվել թուրքական ստրկացնողների ազգային և ֆեոդալական ճնշումից և ստեղծել ազգային պետություններ: Պատերազմի առիթ ծառայեց Թուրքիայի հրաժարվելը եվրո-

պական տիրություններում ռեֆորմներ անցկացնելուց, որոնք պետք է ուղղված լինեին Մակեդոնիային և Թրակիային ինքնավարություն տալուն:

Թուրքիայի դեմ ռազմական գործողություններ սկսեց Չեռնոգորիան՝ 1912 թվականի հոկտեմբերի 9-ին, իսկ հոկտեմբերի 18-ին պատերազմի մեջ մտան Բուլղարիան, Սերբիան և Հունաստանը: Դաշնակիցները Թուրքիայի դեմ դուրս բերեցին 603 հազար մարդ, որի 2/3-ը՝ 230 հազարը բուլղարներ էին: Թուրքիան կարողացավ դուրս բերել 412 հազար զինվոր: Պատերազմի առաջին իսկ օրերին ի հայտ եկավ դաշնակիցների զորքերի բացահայտ առավելությունը թուրքականի նկատմամբ: Բալկանյան պետությունների բանակների զինվորներին ոգևորում էին պատերազմի ազգային-ազատագրական նպատակները: Նրանց օգնում էր տեղական բնակչությունը: Բացի այդ, դաշնակիցների զորքերն ավելի լավ էին կազմակերպված: Պատերազմի հիմնական ծանրությունն ընկավ բուլղարական բանակի վրա, որը Թրակիայում գամեց դեպի Ստամբուլ ճանապարհը փակող թուրքական ուժերի մեծ մասը: Առաջին խոշոր ճակատամարտը տեղի ունեցավ Ղարաքիլիսայի մոտ հոկտեմբերի 22-24-ին, որն ավարտվեց թուրքերի պարտությամբ: Բուլղարները պաշարեցին Ադրիանապոլիսը: Լյուլեբուրգազի մոտ տեղի ունեցած ճակատամարտում (հոկտեմբերի 29 — նոյեմբերի 3) թուրքական զորքերը ջախջախվեցին և դիմեցին խուճապահար փախուստի: Նրանց դժվարությամբ հաջողվեց ամրանալ Չաթալջիհի դիրքերում՝ Ստամբուլից մոտ 40 կմ հեռավորության վրա:

Դաշնակիցների կրկնակի առավելություն ունեցող զորքերը մեծ հաջողությունների հասան նաև Մակեդոնիայում, Ալբանիայում և Եպիրոսում: Սերբական զորքերը հոկտեմբերի 26-ին մտան Սկոպլե: Դուրս գալով Ադրիատիկի ափ՝ նրանք չեռնոգորական զորքերի հետ միասին պաշարեցին Շկոդերը (Սկյութար): Հունական զորքերը թուրքերից մաքրեցին Եպիրոսը, իսկ հարավային Մակեդոնիայում հունական և բուլղարական զորքերը նոյեմբերի 7-ին գրավեցին Սալոնիկը: Էգեյան ծովում հունական նավատորմը շրջափակել էր Դարդանեյի ելքը: Հունական ղեկավարողները գրավեցին նաև Խիոսը, Լեսբոսը և այլ կղզիներ:

Սակայն նոյեմբերի 17-18-ին թուրքերին հաջողվեց Չաթալջիհի դիրքերի վրա բուլղարների գրոհը հետ մղել, որով և Ստամբուլի վրա կախված անմիջական սպառնալիքը վերացավ: Դա հնարավորություն տվեց 1912 թվականի դեկտեմբերի 3-ին Թուրքիայի և դաշնակիցների միջև կնքել զինադադար: Սակայն հաշտության պայմանագրի կնքումը

չկայացավ՝ 1913-ի հունվարի 23-ին Ստամբուլում էնվեր փաշայի գլխավորած երիտթուրքերի պետական հեղաշրջման հետևանքով: Միայն թուրքերի նոր պարտություններից և Ադրիանապոլսի հանձնու-մից հետո 1913 թվականի ապրիլին ստորագրվեց զինադադար: 1913 թվականի մայիսի 30-ին Լոնդոնի հաշտության պայմանագրով Թուրքիան կորցրեց իր եվրոպական տիրույթները՝ բացի Ստամբուլից և Արևելյան Թրակիայի մի փոքր մասից:

Բալկանյան առաջին պատերազմի արդյունքը եղավ այն, որ մակեդոնական ժողովուրդն ազատագրվեց թուրքական ֆեոդալական ճնշումից, իսկ 1912-ի նոյեմբերի 28-ին հռչակվեց Ալբանիայի անկախությունը:

Պատերազմի հենց սկզբում Բուլղարիայում ծայր առավ կամավորական շարժում, որի մեջ ընդգրկվեցին նաև բուլղարահայերը: Մակեդոնացի և թրակիացի կամավորներից կազմվեց Մակեդոնա-Օդրինյան 16 հազարանոց աշխարհագորը: Առանձին կամավորական ստորաբաժանում կազմավորելու խնդրանքով հայերը դիմեցին բուլղարական կառավարությանը: Հայկական կամավորական վաշտը վերջնականապես կազմավորվեց 1912 թվականի հոկտեմբերի 8-ին, որում ընդգրկվեց 273 մարդ: Վաշտը մտցվեց Մակեդոնա-Օդրինյան աշխարհագորի 3-րդ բրիգադի Լոզենգրադյան 12-րդ դրուժինայի կազմի մեջ: Հայկական վաշտի հրամանատար նշանակվեց բուլղարական բանակի պահեստի սպա Գարեգին Նժդեհը, որը զինվորական կրթություն էր ստացել Բուլղարիայում, իսկ նրա տեղակալ նշանակվեց Անդրանիկ Օզանյանը, որը 1904 թվականի Սասունի ապստամբության պարտությունից հետո 1905-ի մարտից հաստատվել էր Բուլղարիայում: Հետաքրքրությունից զուրկ չէ այն փաստը, որ հայկական այդ վաշտի ու մասնավորապես Անդրանիկի մասին հողված է հրապարակել Լև Տրոցկին, որն այն ժամանակ զինվորական թղթակից էր:

Որոշ զինավարժությունից հետո հայկական վաշտը մեկնեց ռազմաճակատ, որտեղ մասնակցեց գրեթե բոլոր կռիվներին ու աչքի ընկավ իր քազում քաջագործություններով: Անդրանիկը պարգևատրվեց 4-րդ և 3-րդ աստիճանի «Քրիստի խրապուռզ» արծաթե խաչերով և 2-րդ աստիճանի «Քաջության խաչով»:

Հետագայում Բուլղարիայի Ֆերդինանդ թագավորի 1913 թ. հունվարի 16-ի հրամանագրով Անդրանիկը ստացավ բուլղարական քաղաքացիություն և բուլղարական սպայի աստիճան, նրան նշանակվեց ամ-

սական 600 ֆրանկ թոշակ: Լոնդոնի հաշտության պայմանագրի կնքու-մից հետո հայկական վաշտը կազմացրվեց:

Բալկանյան պատերազմների շրջանում Հայկական հարցը, որն, իբրև միջազգային դիվանագիտության հարց, ձևավորվել էր 1877-1878 թվականների ռուս-թուրքական պատերազմից հետո, կրկին դարձավ այդ մթին ու խութաշատ ոլորտի արծաթման առարկա:

Հայկական հարցը Արևմտյան Հայաստանի ճակատագրի հարցն էր, հայ կյանքի ամենասուր, ամենացավոտ հարցը, որն արդյունք էր թուրքական հրեշավոր բռնակալության, և որը հայ ժողովրդին կանգնեցրել էր ֆիզիկական բնաջնջման ռեալ վտանգի առաջ:

1878 թվականի փետրվարի 19-ին կնքված Սան Ստեֆանոյի նախնական պայմանագրի 16-րդ հոդվածը նախատեսում էր հետևյալը. «Նկատի առնելով այն, որ ռուսական զորքերի դուրս բերումը նրանց կողմից գրավված Հայաստանի՝ Թուրքիային վերադարձվելիք վայրերից կարող է առիթ տալ բախումների և բարդությունների, որոնք երկու պետությունների բարի հարաբերությունների վրա կունենան վնասա-կար ազդեցություն, Բարձր Դուռը պարտավորվում է անհապաղ կենսա-գործել հայաբնակ մարզերի տեղական կարիքներից հարուցվող բարե-լավումներ և բարենորոգություններ և զերծ պահել հայերի անվտանգու-թյունը քրդերից և չերքեզներից»:

Հողված 25-ը սահմանում էր, որ ռուսական զորքերի դուրսբերու-մը Ասիական Թուրքիայից կկատարվի վեց ամսվա ընթացքում՝ հաշված վերջնական հաշտություն կնքելու օրից: Իսկ հողված 27-ը պարտավո-րեցնում էր Բարձր Դռանը՝ չհալածել և թույլ չտալ հալածել այն թուրքահպատակներին, որոնք պատերազմի ժամանակ կապեր են ունեցել ռուսական բանակի հետ, ինչպես նաև արգելք չլինել այն անձանց, ովքեր իրենց ընտանիքներով կցանկանան հեռանալ ռուսական զորքերի հետ (Սան Ստեֆանոյի պայմանագրի լրիվ տեքստը տե՛ս «Հայաստանը միջազգային դիվանագիտության և սովետական արտաքին քաղաքա-կանության փաստաթղթերում», պրոֆ. Ջ. Ս. Կիրակոսյանի խմբագրու-թյամբ, Երևան, 1972, էջ 83-98):

Սակայն Բեռլինի կոնգրեսում (1878 թ. հուլիսի 1) գլխավորապես Անգլիայի և Ավստրո-Հունգարիայի ճնշմամբ 16-րդ հոդվածը փոխա-րինվեց 61-րդ հոդվածով, որտեղ անգլիական ձևակերպմամբ ասվում էր. «Բարձր Դուռը պարտավորվում է առանց հետագա հապաղման իրա-գործել հայաբնակ մարզերում տեղական կարիքներից հարուցված բա-

րելավուններն ու բարենորոգումները և ապահովել հայերի անվտանգությունը չերքեզներից և քղերից: Բարձր Դուռը տերություններին պարբերաբար կհաղորդի այն միջոցների մասին, որոնք ինքը ձեռք է առել այդ նպատակի համար, իսկ տերությունները կհսկեն դրանց կիրառմանը» (տես նույն տեղում, էջ 128): Հայկական հարցը որոշակիությունից անորոշության բավիղները նետող այս հողվածը, ճիշտ է, ապահովեց հարցի միջազգայնացումը, բայց և վերջին հաշվով աղետաբեր եղավ հայ ժողովրդի համար: Իսկ Բեռլինի դաշնագիրն ամբողջությամբ վերցրած ուժի մեջ մնաց մինչև 1912–1913 թթ. Բալկանյան պատերազմները և Առաջին համաշխարհային պատերազմը կանխորոշող փաստաթղթերից մեկը եղավ:

Հայկական հարցի վերաբացումը 1912–1914 թվականներին.

Բալկանյան առաջին պատերազմում Թուրքիայի պարտությունը Հայկական հարցի լուծման նոր հույսեր արթնացրեց: 1912–ի հոկտեմբերի վերջերին Թիֆլիսում գումարվեց խորհրդակցական մի ժողով, որին մասնակցում էին զանազան հասարակական, քաղաքական և մշակութային կազմակերպությունների ներկայացուցիչներ: Ներկա էին նաև պատգամավորներ Բաքվից, Երևանից, Ախալցխայից, Նոր Նախիջևանից, Արմավիրից, Բաթումից և այլ վայրերից: Որոշվեց մոտ ապագայում հրավիրել նոր ժողով և ընտրել ներկայացուցչական մարմին՝ Հայկական հարցի ուղղությամբ աշխատելու համար, ինչպես և խնդրել Ամենայն Հայոց կաթողիկոսին, որ նա հայության անունից դիմի Նորին Մեծնություն Ռուսաց Կայսրին՝ օգնության հասնելու արևմտահայ ժողովրդին: Մշակված բանաձևը ներկայացվեց կաթողիկոսին: Ընտրվեց յոթ հոգուց բաղկացած ժամանակավոր բյուրո՝ Ալ. Խատիսյան, Ս. Հարությունյան, Ա. Քալանթար, Յ. Առաքելյան, Ա. Պողոսյան, Հովհ. Թումանյան, Ն. Աղբալյան:

Կաթողիկոսին հասցեագրված դիմումի մեջ ասված էր, որ Թիֆլիսի հայ հասարակության պատկանող անձանց մի խումբ, որ բաղկացած էր Թիֆլիսի հայ կրթական և բարեգործական հիմնարկությունների, մանուկի և հասարակականը այլևայլ խավերի ներկայացուցիչներից, քննության առնելով թրքահայերի դրությունը, որ անտանելի է դարձել նրանց կյանքի, պաշարի և գույքի վրա գործադրվող անընդհատ բռնությունների հետևանքով, խոնարհաբար խնդրում է դիմում անել թագավոր կայսրին՝ հաստատապես հավատալով, որ ռուսական պետությունը առանց ուշադրության չի թողնի հայերի խնդրանքները և իր ուժեղ հովանավորությամբ և միջամտությամբ վերջ կդնի արևմտահայության

տանջանքներին (Լազյան Գաբրիել, Հայաստան և Հայ Դատը հայ և ռուս հարաբերություններու լույսին տակ, Երևան, 1991, էջ 154–155): Նույնների 25–ին Թիֆլիսում գումարվեց երկրորդ համագումարը, որը վերջնորեն նախորդ Բյուրոյի կազմը՝ ավելացնելով Կ. Ստեփանյանին, Ա. Ջամալյանին, Լեոյին, Կ. Արղությանին, Խ. Աֆրիկյանին, Ա. Սահակյանին և այլոց:

Մինչ այդ, 1912 թ. սեպտեմբերի 19–ին Թիֆլիսում տեղի ունեցավ հայ հասարակական գործիչների ժողով, որը որոշեց դիմել Ամենայն հայոց կաթողիկոսին՝ ցարի առջև արևմտահայության հարց բարձրացնելու խնդրանքով: Երկու օր անց՝ սեպտեմբերի 21–ին, Ս. Հարությունյանը և Յ. Առաքելյանը էջմիածնում հիշյալ դիմումը հանձնեցին կաթողիկոսին:

Կաթողիկոս Գևորգ 5–րդ Սուրենյանը դեռևս 1912 թ. հոկտեմբերի 2–ին Թիֆլիսի Բյուրոյի դիմումի հիման վրա փոխարքա Վորոնցով–Դաշկովի միջոցով խնդրագիր ուղարկեց Նիկոլայ 2–րդ ցարին՝ խնդրելով, որ Լոնդոնի կոնֆերանսում, որտեղ պետք է մշակվեին Բալկանյան պատերազմի հաշտության պայմանները, նկատի առնվեր նաև Հայկական հարցը:

1912–ի դեկտեմբերի 22–ին փոխարքա Վորոնցով–Դաշկովը կաթողիկոսի դիմումին պատասխանեց, որ ռուսական կառավարությունը հայերի շահերին բոլորովին անհամապատասխան է համարում, որ Թուրքիայի հայերի հարցը քննարկվի Բալկանյան ճգնաժամին նվիրված առաջիկա կոնֆերանսում, որովհետև լիակատար հիմքով կասկածում է Հայկական հարցում եվրոպական պետությունների միակամությունը: Փոխարքան խորհուրդ է տալիս կաթողիկոսին՝ իր ծերունազարդ հեղինակությամբ հայերին հեռու պահել անժամանակ հավաքական դիմումներից, որոնք սոսկ բարդացնում են կայսերական կառավարության համար արևմտահայերի վիճակի բարելավման խնդիրը (Նշվ. աշխ., էջ 157):

Հիշյալ պատասխանը դեռ չստացած՝ Կաթողիկոսը 1912–ի դեկտեմբերի 27–ին ցարի անունով նոր խնդրագիր է ուղարկում փոխարքային, որը և խոստանում է այն ուղարկել Պետերբուրգ, ավելացնելով, որ այդ խնդրում ռուս–հայկական շահերը համատեղվում են:

Միաժամանակ կաթողիկոս Գևորգ 5–րդը 1912 թ. նոյեմբերի 10–ին հատուկ կոնդակով Փարիզում գտնվող եգիպտահայ մեծահարուստ, հասարակական–քաղաքական նշանավոր գործիչ Պողոս Նուբար Փաշային նշանակեց իր լիազորը՝ Բեռլինի դաշնագիրն ստորագրած պետությունների հետ բանակցություններ վարելու համար: Կազմ-

վեց հայոց ազգային պատվիրակություն՝ Պողոս Նուբարի նախագահությամբ, անդամներն էին Եվրոպայի հայոց հոգևոր առաջնորդ Վերոգ արքեպիսկոպոս Ութունյանը, Յաղուբ Արթին փաշան, Մինաս Զերազը և Լոնդոնում գտնվող Զարություն Մոստիճյանը:

Միջազգային շիկացած մթնոլորտում Զայկական հարցը դարձավ մեծ պետությունների՝ Ռուսաստանի, Գերմանիայի, Անգլիայի, Ֆրանսիայի, Ավստրո-Հունգարիայի և Իտալիայի բանակցությունների առարկա:

Ղեռնս 1912 թվականի դեկտեմբերի 21-ին Կ. Պոլսի Զայոց Ազգային ժողովը որոշում ընդունեց Զայկական հարցը բարձրացնել Բալկանյան առաջին պատերազմի արդյունքներին նվիրված Լոնդոնի հաշտության կոնֆերանսում: Այդ նպատակով ընտրվեց Ապահովության հանձնաժողով, որի մեջ մտան Եղիշե արքեպիսկոպոս Դուրյանը, Գրիգորիս վարդապետ Պալաքյանը, Լ. Տեմիրճիպաշյանը և Մ. Ոսկանյանը:

Պետությունների միջամտությունը կամխելու նպատակով թուրքական կառավարությունը շտապեց հրապարակ նետել հայկական բարենորոգումների սեփական նախագիծ, որը ներառում էր սոսկ Վանի, Բիթլիսի, Դիարբեքիի, Տրապիզոնի նահանգները, դուրս էր թողնում Սեբաստիայի ու Էրզրումի նահանգները և, ընդհանուր առմամբ, աչքակապություն էր:

1913 թվականի ապրիլի սկզբին արևմտահայերը Կ. Պոլսում ռուսական դեսպան Գիրսին ներկայացրին բարենորոգումների իրենց նախագիծը: Այն նախատեսում էր Վանի, Բիթլիսի, Էրզրումի, Սեբաստիայի, Խարբերդի և Դիարբեքիի նահանգներից կազմել մի երկրամաս՝ օտարերկրացի գերագույն կոմիսարի կառավարմամբ: Կոմիսարի թեկնածությունը հաստատելու էր սուլթանը՝ պետությունների առաջադրմամբ: Երկրամասի բարձրագույն ժողովի անդամների կեսը պետք է լինեին մահմեդականներ, մյուս կեսը՝ քրիստոնյաներ: Գերագույն կոմիսարին առընթեր ստեղծվելու էր վարչական խորհուրդ, որի կազմի մեջ մտնելու էին օտարերկրացիներ՝ որպես բաժինների պետեր և խորհրդականներ: Ոստիկանական և ժանդարմական պաշտոնները պետք է հավասարապես բաժանվեին քրիստոնյաների և մահմեդականների միջև, իսկ բարձր հրամանատարությունը տրվում էր եվրոպացի սպաներին: Զայերից բռնագրավված հողերը պետք է վերադարձվեին իրենց տերերին: Պետք է պաշտոնապես ճանաչվեին հայերի եկեղեցական, ազգային և կրթական իրավունքները: Զայերենը պետք է գործածվեր թուրքերենին հավասար:

Բարենորոգումների գործը պետք է դրվեր բոլոր պետություններին վերահսկողության տակ՝ իրագործման ընթացքի ռուսական հսկողությամբ:

1912-ի դեկտեմբերին Ռուսաստանի արտգործնախարար Սազունովը հրահանգեց Լոնդոնի և Փարիզի ռուսական դեսպաններին՝ Զայկական հարցի շուրջ պաշտոնական բանակցություններ սկսել ֆրանսիական և անգլիական կառավարությունների հետ: Առաջարկվում էր հանձնարարել Կ. Պոլսի երեք երկրների դեսպաններին՝ համատեղ մշակելու հայկական բարենորոգումների կոնկրետ նախագիծ: 1913 թվականի սկզբներին Անգլիայի և Ֆրանսիայի կառավարությունները հայտնեցին, որ իրենք պաշտպանում են Ռուսաստանի դիրքորոշումը Զայկական հարցում և այդ առթիվ համապատասխան հրահանգ են տվել Կ. Պոլսի իրենց դեսպաններին:

Բայց ահա առաջացավ բոլորովին անկանխատեսելի մի լուրջ խոչընդոտ. 1913-ի հունվարի 10-ին Թուրքիայում կատարված պետական հեղաշրջման հետևանքով վերստին իշխանության գլուխ անցան երիտթուրքերը, որոնք դեն նետեցին իթթիլաֆականների նախագիծը և հրապարակ հանեցին ամբողջ կայսրության մեջ բարենորոգումներ մտցնելու սեփական նախագիծ:

1913 թ. հունիսի 8-ին ցարական կառավարությունը վեց պետությունների դեսպանների քննարկմանը ներկայացրեց հայկական նահանգներում բարենորոգումների ռուսական նախագիծը, որը Կ. Պոլսի ռուսական դեսպան Գիրսի հանձնարարությամբ կազմել էր դեսպանատան առաջին դրագոման (թարգման) և խորհրդական Անդրեյ Մանդելշտամը՝ հիմք ունենալով 1895-ի մայիսյան ժրագիրը: Նախատեսվում էր Էրզրումի, Վանի, Բիթլիսի, Դիարբեքիի, Խարբերդի և Սվազի վիլայեթներից կազմել մեկ Զայկական մարզ կամ նահանգ, որը պետք է բաժանվեր սանջակների, կազաների և նահիեների: Մարզը պետք է կառավարեր թուրքահպատակ քրիստոնյա կամ եվրոպացի գեներալ-նահանգապետը, որը հինգ տարի ժամկետով պետք է նշանակվեր սուլթանի կողմից՝ տերությունների համաձայնությամբ: Գեներալ-նահանգապետը պիտի մարմնավորեր մարզի գործադիր իշխանությունը, նրան էր վերապահվում բոլոր պաշտոնյաներին ու դատավորներին նշանակելու կամ հեռացնելու իրավունքը, նրան անմիջականորեն ենթակա էին ոստիկանությունը, ժանդարմերիան և զինված ուժերը:

Հայկական մարզի օրենսդիր մարմինը լինելու էր մարզային ժողովը, որն ընտրվելու էր 5 տարով, գաղտնի քվեարկությամբ և պիտի ունենար հավասար թվով քրիստոնյա և մահմեդական անդամներ: Ժողովի ընդունած օրենքները վավերացնելու էր սուլթանը: Սահմանվում էր թուրքերենի, հայերենի և քրդերենի իրավահավասարություն, մայրենի լեզվով դպրոցական կրթության ազատություն՝ թուրքերենի պարտադիր ուսուցմամբ: Համիդիե գնդերը վերացվում էին, զինծառայությունն անցնելու էր մարզում: Արգելվելու էր մուհաջիրների բնակեցումը մարզում, իսկ հայերից բռնագրաված հողերը պետք է վերադարձվեին:

Բարենորոգումների իրականացման հսկողությունը դրվում էր տեղությունների վրա:

Չնայած ռուսական նախագիծը արմատականորեն չէր լուծում Հայկական հարցը, այնուամենայնիվ, այն հանդիպեց ուժեղ դիմադրության:

Նախագիծը քննարկվեց 1913 թվականի հուլիսին՝ Ռուսաստանի, Անգլիայի, Ֆրանսիայի, Գերմանիայի, Ավստրո-Յունգարիայի և Իտալիայի ներկայացուցիչների՝ Կ. Պոլսում իրավիրված խորհրդակցությունում: Գերմանիայի անմիջական աջակցությամբ Թուրքիան կտրակամապես մերժեց ռուսական նախագիծը և ներկայացրեց իր նախագիծը, որը փաստորեն ի չիք էր դարձնում հայկական բարենորոգումները: Այդ նախագծով ամբողջ կայսրությունը բաժանվում էր վեց սեկտորների, որոնք պիտի գլխավորեին սուլթանի կողմից նշանակված օտարերկրացի գլխավոր տեսուչները և որոնք ոչինչ չպետք է փոխեին, այլ սոսկ պետք է վերահսկեին թուրք պաշտոնյաների գործունեությունը: Թուրքիային անվերապահորեն պաշտպանում էին Գերմանիան, Ավստրո-Յունգարիան և Իտալիան, իսկ Անգլիան և Ֆրանսիան միայն ձևականորեն էին պաշտպանում ռուսական նախագիծը՝ փաստորեն Ռուսաստանին դնելով մեկուսացած վիճակում: Նրան մնում էր մեկ ճանապարհ՝ բանակցություններ վարել անմիջականորեն Թուրքիայի հետ: Դիվանագիտական համառ պայքարից հետո վերջապես 1914 թվականի հունվարի 26-ին ստորագրվեց ռուս-թուրքական համաձայնագիր՝ հայկական բարենորոգումների մասին: Ռուսաստանի կողմից այն ստորագրեց դիվանագիտական հավատարմատար Կ. Գուլկնիչը, որը փոխարինում էր Պետերբուրգ մեկնած դեսպան Գիրսին, իսկ Թուրքիայի կողմից՝ օսմանյան կառավարության մեծ վեզիր Սայիդ Հալիմ փաշան: Համաձայնագրում Հայկական մարզ չէր հիշատակվում, այլ խոսվում էր Արևելյան Անատոլիայի մասին, որը պետք է բաժանվեր երկու սեկտորի: Դրանցից

մեկի մեջ մտնում էին Էրզրումի, Տրապիզոնի ու Սվազի վիլայեթները՝ Էրզրում կենտրոնով, իսկ մյուսի մեջ՝ Վանի, Բիթլիսի, Խարբերդի և Դիարբեքիրի վիլայեթները՝ Վան կենտրոնով: Սեկտորները պետք է կառավարեին Բ. Դռան նշանակած օտարահպատակ գլխավոր տեսուչները: Թուրքական կառավարությունն իրավունք ուներ ցանկացած ժամանակ պաշտոնանկ անել վերատեսուչներին:

Համաձայնագրում ոչ մի խոսք չկար եվրոպական որևէ պետության վերահսկողության, ընդհանուր օրենսդրական օրգանի՝ Մարզային ժողովի մասին: Յուրաքանչյուր սեկտորում պետք է լիներ գլխավոր խորհուրդ՝ թուրք նահանգապետի գլխավորությամբ: Խորհրդի իրավասություններն էլ սահմանափակվում էին հասարակական աշխատանքների շրջանակներում: Համաձայնագրում չէր արտացոլված նաև դատական բարեկարգության հարցը, այսինքն պահպանվելու էր հին թուրքական դատակարգը:

Սահմանափակված էին նաև գլխավոր տեսուչների իրավունքները. նրանք սոսկ հսկելու էին գործող վարչական, դատական ու ոստիկանական ապարատի վրա: Նրանք կարող էին ազատել միայն ստորին պաշտոնյաներին, իսկ բարձրաստիճան մարդկանց փոփոխելու համար պետք է ստանային թուրքական կառավարության համաձայնությունը:

Համաձայնագրում ոչ թե խոսվում էր հայերից ապօրինաբար բռնագրաված հողերի վերադարձի, այլ հողային վեճերը գլխավոր տեսուչների հսկողությամբ կարգավորելու մասին:

Համիդիե գնդերը ոչ թե ցրվում էին, այլ վերածվում էին պահեստային հեծելազորի:

Ընդհանուր առմամբ ռուս-թուրքական համաձայնագիրը չէր բավարարում հայերի պահանջները և չէր արդարացնում նրանց սպասելիքները: Այնուամենայնիվ, իր պակասություններով հանդերձ, այն մի դրական քայլ էր Հայկական հարցի հետագա լուծման ճանապարհին և նույնիսկ բուռն ոգևորություն առաջացրեց արևմտահայության որոշակի շրջանակներում: Սակայն, դժբախտաբար, այդ խիստ չափավոր ծրագրին վիճակված չէր իրականանալ: Երկար որոնումներից հետո, ի վերջո, գտնվեցին եվրոպացի երկու գլխավոր տեսուչները՝ հոլանդացի Վեստենենկը, որը Կոնգոյի նախկին փոխարքան էր և նորվեգացի գնդապետ Յոֆը, որոնք ժամանեցին Կ. Պոլիս և 1914 թվականի մայիսի 10-ին ստորագրեցին իրենց կոնտրակտները Թուրքիայի ներքին գործերի մինիստր Թալեաթի հետ: Սակայն Յոֆը հազիվ էր հասել Վան, իսկ Վեստեն-

ճնկնը դեռ չէր մեկնել Կարին, երբ սկսվեց Առաջին համաշխարհային պատերազմը: Թուրքիան անմիջապես չեղյալ հայտարարեց իր ստորագրած համաձայնագիրն ու երկրից հեռացրեց եվրոպացի գլխավոր տեսուչներին:

Հայ ժողովրդի պատմական ճակատագրի հեռապատկերում բարձրանում էր Մեծ եղեռնի չարագուշակ ուրվապատկերը:

ԱՌԱՋԻՆ ՀԱՄԱՇԽԱՐՀԱՅԻՆ ՊԱՏԵՐԱԶՄԻ ՍԿԻՋՐԸ

Առաջին համաշխարհային պատերազմն սկսվեց 1914 թվականի հուլիսի 19-ին (օգոստոսի 1-ին), իմպերիալիստական պետությունների երկու խոշոր խմբավորումների՝ Քառյակ միության (Գերմանիա, Ավստրո-Հունգարիա, Թուրքիա, Բուլղարիա) և Անտանտի (Եռյակ համաձայնություն՝ Անգլիա, Ֆրանսիա, Ռուսաստան, որին հետագայում միացան Ճապոնիան, Իտալիան, ԱՄՆ-ը, Ռումինիան, Բելգիան, Սերբիան, Չեռնոգորիան, Պորտուգալիան, էստոնիան և այլ երկրներ):

Պատերազմը տևեց չորս տարուց ավելի և ընդգրկեց 33 պետություն՝ 1,5 միլիարդ բնակչությամբ: Ձորակոչվեց 74 միլիոն մարդ, որից մոտ 10 միլիոնը սպանվեց: Պատերազմի բուն պատճառը իմպերիալիստական պետությունների միջև գոյություն ունեցող հակասություններն էին՝ կապված գլխավորապես աշխարհի վերաբաժանման հետ: Սակայն պատերազմի անմիջական առիթ ծառայեց սերբերի կողմից Ավստրո-Հունգարիայի թագաժառանգ Ֆրանց Ֆերդինանդի սպանությունը Սարանոյում 1914 թվականի հունիսի 15-ին: Սերբիային անընդունելի վերջնագիր ներկայացնելուց հետո Ավստրո-Հունգարիան հուլիսի 15-ին պատերազմ սկսեց նրա դեմ, իսկ հուլիսի 19-ին Գերմանիան պատերազմ հայտարարեց Ռուսաստանին: Հոկտեմբերի 14-ին պատերազմի մեջ մտավ Թուրքիան: Պատերազմն ընդգրկել էր Եվրոպայի, Ասիայի և Աֆրիկայի ավելի քան 4 միլիոն քառակուսի կիլոմետր տարածք:

Պատերազմին մասնակցող իմպերիալիստական պետություններից յուրաքանչյուրն ուներ նվաճողական իր պլանները: Թուրքիայի գլխավոր նպատակն էր երիտթուրքերի պանթուրքիզմի գաղափարախոսության իրականացումը: Ծրագրված էր գրավել Անդրկովկասը, շարժվել դեպի Դաղստան և Հյուսիսային Կովկաս, ապա հասնել Վուլգայի ափերը, այնուհետև թափանցել Միջին Ասիա: Թուրքական ապագա մեծ

կայսրությունը պիտի տարածվեր Բալկաններից մինչև Ալթայ և Հեռավոր Արևելք, Դրինից մինչև Հյուսիսային սառուցյալ օվկիանոս: Թուրքիայի՝ պատերազմի մեջ մտնելու գլխավոր պատճառներից մեկն էլ Հայկական հարցի «լուծումն» էր:

Գերմանիան նպատակ ուներ տիրանալ Անգլիայի և Ֆրանսիայի գաղութներին, Բեռլին-Բադդադ-Բասրա երկաթուղու կառուցմամբ տիրանալ Հնդկաստանին, փակել Ռուսաստանի առաջխաղացումը դեպի թուրքական տարածքներ:

Ֆրանսիան հույսեր էր փայփայում տիրանալ Թուրքիային պատկանող Միջագետքի արաբական տարածքներին:

Անգլիայի գլխավոր մտահոգությունը հսկայական գաղութային տարածքների պահպանումն էր:

Ցարական Ռուսաստանը նպատակադրվել էր Թուրքիայից զավթել սևծովյան նեղուցները, ապա Արևմտյան Հայաստանի վրայով դուրս գալ Միջերկրական ծով:

Պատերազմն ընթանում էր բազմաթիվ ռազմաճակատներում, որոնցից գլխավորները Եվրոպայի Արևմտյան և Արևելյան ռազմաճակատներն էին, իսկ Բալկանյան, Իտալական, Հյուսիսաֆրիկյան, Հեռավորարևելյան, Կովկասյան և Գալիպոլյան ռազմաճակատները համարվում էին երկրորդական:

1914 թվականի հուլիսին, երբ դեռ պատերազմը չէր սկսվել, Երզրումում հրավիրվեց Դաշնակցության 8-րդ ընդհանուր ժողովը: Օրակարգի հարցերը, որոնք վերաբերում էին երկրի ներքին կյանքին, հողային խնդրին, արտագաղթին, կառավարության վարած հակահայ քաղաքականությանը, ինքնապաշտպանությանը, բարենորոգումներին, դեռ չէին սպառվել, երբ ստացվեց պատերազմի սկսման լուրը: Ժողովը կարճեց իր օրակարգը և քննության առավ Թուրքիայի՝ պատերազմի մեջ մտնելու դեպքում ունենալիք դիրքորոշման հարցը: Որոշվեց հրահանգել կուսակցության մարմիններին՝ օրինապահ մնալ իրենց ապրած երկրների վերաբերմամբ և կատարել իրենց քաղաքացիական պարտականությունները:

Ժողովը փակված էր արդեն, երբ Երզրում հասան Իթքիատի լիազորներ Բեհաեդդին Շաքիրը, Նաջի և Խալիլ բեյերը՝ բանակցելու Դաշնակցության հետ: Նրանք առաջարկեցին միանալ իրենց և ռուսների դեմ ապստամբեցնել կովկասահայերին, վկայակոչելով, որ վրացիներն ու կովկասյան թաթարներն արդեն տվել են իրենց համաձայնությունը: Փո-

խարենը նրանք հայերին խոստանում էին ստեղծել հայկական ինքնավար մի իշխանություն՝ ռուսահայ և թուրքահայ որոշ հողամասերից: Նրանք դաշնակցության ներկայացուցիչներ Ռոստոմին, Խ. Մալումյանին (Ավնունի) և Վառայանին ցույց տվեցին մի քարտեզ, որով Կարսի շրջանը, Երևանի նահանգը, Գանձակի նահանգի մի մասը, ինչպես նաև Վանի, Բիթլիսի վիլայեթներն ու Էրզրումի վիլայեթի մի մասը տրվում էին ինքնավար Հայաստանին:

Դաշնակցության ներկայացուցիչները թուրքերին հայտնեցին, որ իրենք չեն կարող ընդունել ռուսների թիկունքում ապստամբելու առաջարկը և շեշտեցին, որ հայ ժողովուրդը թե՛ Թուրքիայում, թե՛ Ռուսաստանում պարտավոր է իր քաղաքացիական պարտականությունները կատարել բարեխղճորեն: Նրանք հայտնեցին նաև, որ իրենք կտրակամապես դեմ են Թուրքիայի պատերազմելուն, որովհետև համոզված են, որ վերջնական հաղթանակը դաշնակիցներին է պատկանելու, պատերազմին մասնակցել՝ նշանակում է երկիրը նետել աններելի արկածախնդրության գիրկը, որը կործանարար կլինի ոչ միայն հայ ժողովրդի, այլև օսմանյան պետության համար: Թուրք ներկայացուցիչները հեռացան խիստ դժգոհ՝ հայերի պատասխանը համարելով դավաճանություն: Ինչպես իրավացիորեն գրում է Ս. Վրացյանը, հայերը չէին կարող խոստանալ ավելին. ոչ միայն կովկասահայերին ապստամբեցնել, այլև թուրքահայերին էլ դժվար էր ոգևորել «օսմանյան հայրենասիրությամբ», այնքան վարկաբեկված էր թուրքական ռեժիմը հայ ժողովրդի աչքին:

Ընդհակառակը, պատերազմի դեպքում ավելի հավանական ու տրամաբանական էր հակաթուրքական զգացմունքների պոռթկումը, ինչը և տեղի ունեցավ:

Միանգամայն տեղին է նկատել ակադեմիկոս Հ. Ռ. Սիմոնյանը, որ եթե Դաշնակցության ղեկավարությունն այն ժամանակ կարողանար կռահել ռիսերի մթնամուգազանային մտադրությունը, ապա զուցե ընդուներ միակ ճիշտ վճիռը՝ զորահավաքի ենթարկել ազգի բոլոր ուժերը և կենաց ու մահու կռվի դուրս գալ ամարգ թշնամու դեմ: Դա էր, հավանաբար, ժողովրդի փրկության միակ ելքը (Հ. Ռ. Սիմոնյան, Անդրանիկի ժամանակը, Գիրք Ա, Երևան, 1995, էջ 372):

Այնուհետև խոսելով նույն ժամանակ Պոլսում կնքված թուրք-վրացական պայմանագրի մասին՝ որով թուրքերը վրացիներին խոստանում էին անկախություն, իսկ վրացիները պարտավորվում էին պատերազմի ժամանակ աջակցել թուրքերին, հարգարժան ակադեմի-

կոսը գրում է, թե այդպիսով թուրքերը հայերի հետ Էրզրումում չկարողացան լեզու գտնել, բայց Պոլսում վրացիների հետ կարողացան (նույն տեղում, էջ 373): Այո՛, ճիշտ է, բայց պետք է նկատի ունենալ, որ թուրքերը վրացիների հանդեպ նույն «զգացումները» չէին տածում, ինչ հայերի, ուրեմն և զուգահեռը կարող է թյուրըմբռնում առաջացնել:

ՈԱԶՄԱԿԱՆ ԳՈՐԾՈՂՈՒԹՅՈՒՆՆԵՐԸ ԿՈՎԿԱՍՅԱՆ ԾԱԿԱՏՈՒՄ 1914–1916 ԹՎԱԿԱՆՆԵՐԻՆ

Ռուսաստանը Թուրքիային պաշտոնապես պատերազմ հայտարարեց 1914 թվականի հոկտեմբերի 31–ին: Կովկասյան ճակատում ռուսների դիմաց կանգնած էր թուրքական 3–րդ բանակը՝ բաղկացած 9–րդ, 10–րդ և 11–րդ կորպուսներից, հեծյալ դիվիզիայից, 4,5 քրդական հեծյալ դիվիզիաներից, Միջագետքից ժամանած երկու առանձին հետևակային դիվիզիաներից: Յուրաքանչյուր կորպուս բաղկացած էր 3 դիվիզիայից և մեկ հեծյալ բրիգադից:

Սարիղամիշի օպերացիան: Կովկասյան ճակատում 1914–1917 թվականներին ռուսական բանակը իրականացրեց մի շարք փայլուն օպերացիաներ՝ Սարիղամիշի, Ալաշկերտի, Համադանի և այլն, որոնցից ամենադժվարինն ու ամենափայլունը Սարիղամիշիինն էր: Հետաքրքիր է, որ ռուսական հրամանատարությունը նախօրոք այդպիսի օպերացիա չէր պլանավորել, այն պարտադրվեց թուրքական հրամանատարության կողմից: Այդ օպերացիան ընթացավ 1914 թ. դեկտեմբերի 9–ից մինչև 1915 թվականի հունվարի 5–ը, սակայն գլխավոր իրադարձությունները ծավալվեցին դեկտեմբերի 10–23–ին:

Օպերացիայի առաջին երկու օրերին թուրքական 9–րդ և 10–րդ կորպուսները ռազմարշավ կատարեցին և դուրս եկան թևային հարվածի համար նախանշված բնագծերը: Սակայն շուտով սկսվեց ուժեղ սառնամանիք, երևացին առաջին ցրտահարվածները: Տեսնելով այդ ամենը՝ էմվեր փաշան տվեց հետևյալ դեմագոգիկ հրամանը. «Զինվորներ, ես այցելեցի ձեզ բոլորիդ: Տեսա, որ ձեր ոտքերը մերկ են և ձեր ուսերին շինելներ չկան: Սակայն ձեր առջև կանգնած թշնամին վախենում է ձեզանից: Շուտով դուք կհարձակվեք և կմտնեք Կովկաս: Այնտեղ դուք կգտնեք ամեն տեսակի պարեն և հարստություններ: Ամբողջ մուսուլմանական աշխարհը հուսով սպասում է ձեր վերջին ջանքերին»: Այս հրամա-

նի համար գերմանական զեներալ Ֆոն դեր Յուլցը ենվերին ծաղրանքով անվանեց արևելյան նորահայտ Նապոլեոնիկ (Ա. Յ. էջ 142): 1812 թ. Բորոզինոյի ճակատամարտից առաջ Նապոլեոնը նույնպես, դիմելով իր զինվորներին, կոչ էր արել գրավել Մոսկվան, որտեղ նրանք կգտնեն տաք բնակարաններ և պարեն, գուշակելով նրանց շուտափույթ վերադարձը հայրենիք:

Այդ տազնապալի օրերին Վորոնցով-Ղաշկովի հիվանդության պատճառով գլխավոր հրամանատարի պարտականությունը դրվեց նրա օգնական զեներալ Միշլանսկու վրա, որն իր վրա վերցրեց զորքերի Սարիղամիշի խմբավորման հրամանատարությունը: Սակայն, ինչպես ցույց տվեցին նրա հետագա կարգադրությունները, Միշլանսկին նույնպես լիովին չէր պատկերացնում իրադրությունը, տատանվում էր և տալիս հակասական հրամաններ:

Դեկտեմբերի 14-ին ռուս հետախույզները գերի վերցրին թուրքական 29-րդ հետևակային դիվիզիայի շտաբի պետին, որի մոտ հայտնաբերվեց հրաման խորը թևային հարվածով Սարիղամիշը գրավելու մասին: Դա խուճապի մեջ զցեց Միշլանսկուն, որը սկսեց մտածել, թե ամբողջ Կովկասյան բանակին կատարյալ աղետ է սպառնում: Դեկտեմբերի 15-ին կազակային հարյուրյակի ուղեկցությամբ նա թողեց Սարիղամիշը՝ այդ մասին ոչինչ չասելով շտաբի պետ Յուդենիչին և ցուցումներ չթողնելով զորամասերի հրամանատարներին: Դեկտեմբերի 16-ին Կաղզվանից նա 4-րդ բանակային կորպուսի հրամանատար զեներալ Օգանովսկուն ուղարկեց հետևյալ կարգադրությունը. «Անհապաղ, առանց Սարիղամիշի տակ մարտերի արդյունքներին սպասելու, նահանջել դեպի սահմանային Ադրի-դաղ լեռնաշղթան, իսկ թուրքերի ճնշման դեպքում այնուհետև նահանջել Երևան-Աղստաֆա ուղղությամբ»: Ի պատիվ զեներալ Օգանովսկու, որն, ի դեպ, ազգությամբ հայ էր, պիտի ասել, որ նա քաջություն ունեցավ լռության մատնել գլխավոր հրամանատարի պաշտոնակատարի հրամանը և չկատարել այն: Պեներալ Միշլանսկին, առանց որևէ պատճառի, ռազմաճակատի գիծը կրճատելու անվան տակ հրամայեց զեներալ Չեռնոզուբովի ադրբեջանական ջոկատին՝ նահանջել Թավրիզից, Ուրմիայից, Դիլմանից և դիրքեր գրավել Ջուլֆա-խոյ բնագծում: Պեներալ-լեյտենանտ Չեռնոզուբովը կատարեց այդ բացահայտ սխալ հրամանը, իսկ 1915-ին հարկադրված էր վերստին գրավել այդ բնագծերը, սակայն այս անգամ արդեն մեծ դժվար

րությամբ և զոհերով: Այդ նահանջից առաջին հերթին տուժեց տեղական հայ ազգաբնակչությունը:

Աստիճանաբար Սարիղամիշ բերվեցին ռեզերվներ՝ հետևակային, հեծելազորային և հրետանային զորամասեր: Դեկտեմբերի 14-ից հետո նրանք արդեն ի վիճակի էին հետ մղել թուրքերի գրոհները: Թուրքերն իրենք ծանր դրության մեջ էին: Երբ ելման դիրքերից նրանք ուղարկեցին 10-րդ կորպուսի 30-րդ և 31-րդ դիվիզիաները, նրանց շարքերում հաշվվում էր 20.000 զինվոր, իսկ դեկտեմբերի 14-ի դրությամբ Սարիղամիշի մատույցներում մնացել էր ընդամենը 3200 զինվոր:

Դեկտեմբերի 15-ին իր հիանալի պլաստունյան բրիգադով (կազակային հետևակ) Սարիղամիշ հասավ զեներալ Պրժմալսկին, որի վրա դրված էր Սարիղամիշի պաշտպանությունը և որին տրված էր գործողությունների ազատություն:

Սարիղամիշի տակ ծանր մարտերի օրերին ռուսական հրամանատարությունը պահպանեց ջոկատների կամ խմբերի համակարգը: Դեկտեմբերի 15-22-ը գործում էին հետևյալ ջոկատները՝ սկսած աջ թևից. Ֆեսենկոյի հեծելազորը, Գաբաևի, Վորոնովի, Բարաթովի, Բարկովսկու, Կրավչենկոյի, Պոպովի, Բուկրետովի, Մալեննիկովի և այլոց ջոկատները: Դժվար է ասել, թե այդ ջոկատներից հատկապես որը կատարեց առավել վճռական դեր, որովհետև բոլորն էլ մարտնչում էին կլիմայական դժվարին պայմաններում և նրանցից ամեն մեկն էլ աչքի ընկավ բացառիկ տոկունությամբ ու համառությամբ: Հատկապես դեկտեմբերի 15-ից հետո եղան պահեր, երբ թուրքերը գրավեցին Սարիղամիշի կայարանը, ամրացան Կարս-Սարիղամիշ երկաթուղում, գրավեցին Սարիղամիշի մատույցները, «Արծվաբույն» տիրապետող բարձունքը, և ենվերը համարեց, որ հասել է հաղթանակի: Սակայն ռուս զինվորների դիմացկունության և հերոսության շնորհիվ, որոնք բազմիցս սվինամարտի նետվեցին, քաղաքի պաշտպանությունը չերերաց: Դեկտեմբերի 20-ից հետո թուրքական բաժան-բաժան զորամասերի շուրջ օդակը գնալով սեղմվեց: Աջ թևից Գաբաևի, Բարաթովի ջոկատները և Ֆեսենկոյի հեծելազորը, ձախից՝ Բուկրետովի, Պոպովի, Բարկովսկու ջոկատները քայլ առ քայլ, մեծ կորուստների գնով, կտրեցին թշնամու նահանջի բոլոր ճանապարհները, հատկապես Բարդուսի լեռնանցքի շրջանում, և նախաձեռնությունը վերցրին իրենց ձեռքը:

Դեկտեմբերի 22-ին ռուսական զորքերն ընդհանուր հարձակում սկսեցին: Թուրքերն սկսեցին անկազմակերպ նահանջել: Ժամը 16-ին

Պրժնալսկու զինվորները Կրզլ-Քիլիսայի շրջանում գերի վերցրին թուրքական բանակի 9-րդ կորպուսի հրամանատար Իսհան փաշային և նրա ողջ շտաբը: Սարիղամիշի անտառներում Պրժնալսկու ջոկատը գերեց նաև 17-րդ, 28-րդ և 29-րդ դիվիզիաների հրամանատարներին, 106 սպանների, գրավեց 30 թնդանոթ և 20 զնդացիր: Ռուսական զորքերն սկսեցին թուրքական 10-րդ կորպուսի մնացորդների հետապնդումը, և համառ մարտերը շարունակվեցին ընդհուպ մինչև դեկտեմբերի 30-ը, իսկ էնվեր փաշան փախավ Էրզրում: Բարդուսի մոտ ռուսներին գերի հանձնվեց թուրքական 92-րդ գունդը, իսկ Չաթախի շրջանում գերի հանձնվեց 5000 թուրք զինվոր: Թուրքերը դուրս մղվեցին նաև Օլթիի և Արդահանի շրջաններից: 1915 թ. հունվարի 5-ին ռուսական զորքերի կատարյալ հաղթանակով ավարտվեց Սարիղամիշի օպերացիան:

Թուրքիայում գերմանական ռազմական միսիայի ղեկավար գեներալ Լիման Ֆոն Սանդերսի տվյալներով թուրքական 90.000-անոց 3-րդ բանակից փրկվեցին ընդամենը 12.000-ը, մնացածները սպանվեցին կամ գերի ընկան: Ռուսների կորուստները կազմում էին 29.000 մարդ, որից 6.000-ը՝ ցրտահարվածներ: Գերմանական գեներալը խիստ բացասաբար է գնահատում էնվեր փաշայի գործողությունները Սարիղամիշի օպերացիայի ընթացքում և ավելացնում, որ այդ ծանրագույն պարտության պատմությունը գաղտնի պահվեց, որովհետև արգելվեց խոսել այդ մասին, իսկ չենթարկվողներին ձերբակալում և պատժում էին: Այդ մասին քիչ գիտեին նաև Գերմանիայում (А. Арутюнян, Кавказский фронт 1914—1917, Ереван, 1971, с. 153):

Սարիղամիշի տակ ռուսական բանակի հաղթանակով ավարտվեց ռազմական գործողությունների առաջին փուլը ռուս-թուրքական ռազմաճակատում 1914—1917 թվականներին: Թուրքական երեք բանակներից մեկն ընդամենը երկու ամսվա ընթացքում դադարեց գոյություն ունենալուց:

Գնահատելով Սարիղամիշի օպերացիայի ռազմաքաղաքական ընդհանուր նշանակությունը՝ պրոֆ. Ա. Հարությունյանը իրավամբ առաջին պլան է մղում Կովկասի վրա թուրքական արշավանքի կանխումը: Նա գտնում է, որ տվյալ պահին Երևանում, Ալեքսանդրապոլում և նույնիսկ Թիֆլիսում ռեզերվային զորամասեր չկային, և հաղթանակի դեպքում թուրքական բանակն առանց լուրջ խոչընդոտների կարող էր հայտնվել Անդրկովկասի կենտրոնում, որը կնշանակեր բնակչության ֆիզիկական բնաջնջում, թալան և ավերածություն: Այնուհետև նա եզրակաց-

նում է, որ այն բանակը, որն անլուր զրկանքների ու զոհերի գնով կանխեց թուրքական հորդանների մուտքը Կովկաս, պատմության դատաստանի առջև օբյեկտիվորեն արժանի է ամենայն դրական գնահատակացի (Ա. Հ. էջ 186):

Ալաշկերտի օպերացիան (1915 թ. ապրիլի 24-հուլիսի 26):

Կովկասյան ռազմաճակատում հաջորդ խոշոր իրադարձությունը Ալաշկերտի օպերացիան էր: Սարիղամիշի օպերացիայից հետո 1915 թ. սկզբին գործող բանակի շտաբը Թիֆլիսից տեղափոխվեց Կարս, և ձեռնարկվեցին մի շարք կազմակերպական ու մորթիլիզացիոն միջոցառումներ: Թիկունքի և ռազմաճակատի միջև հաստատվեց կայուն հեռագրական կապ, թիկունքում՝ Սարիղամիշում, Արդահանում, Ախալցխայում, Ալեքսանդրապոլում, Թիֆլիսում և Բաքվում, կազմակերպվեցին լավ ամրացված ու քողարկված շրջաններ, նախապատրաստվեցին երկաթուղային և խճուղային ճանապարհները: 1915 թ. ապրիլի 1-ի դրությամբ Կովկասյան ռազմաճակատում ռուսական բանակն ուներ 120 գումարտակ, 212 հարյուրյակ, 364 թնդանոթ: Թուրքերն ունեին շուրջ 100.000 զինվոր:

1915 թվականին Կովկասյան ռազմաճակատում ռազմական գործողություններն ընթանում էին հիմնականում ծախս թևում, այսինքն՝ Ալաշկերտի հովտում և բուն Իրանի տարածքում: Մարտերն առավել ակտիվ բնույթ էին կրում Կովկասյան 4-րդ բանակային կորպուսի հատվածում, որն զբաղեցնում էր 400 կմ ճակատամաս՝ Մերզեմիրի լեռնանցքից մինչև Թավրիզ: Կորպուսի հրամանատարն էր հայազգի գեներալ Պյոտր Իվանովիչ Օզանովսկին: Կորպուսը բաղկացած էր գեներալներ Աբազինի, Նիկոլևի, Տրուխինի և Չեռնոզուբովի ջոկատներից: 1915 թ. հունիսին 4-րդ կորպուսն իր կազմում ուներ 29 գումարտակ, 121 հարյուրյակ, 93 իրանոթ:

Չորրորդ կորպուսի դիմաց թուրքերն ունեին՝ Դութաղում 37-րդ հետևակային դիվիզիան, Սանազկերտում՝ Սիրիայից բերված 12.000-անոց մեկ դիվիզիա, Վանա լճից Կյուսիս՝ 4 պահեստային գումարտակ և բազմաքանակ քրդական ջոկատներ, Վանի, Ուրմիայի և Սարայի շրջանում՝ 2 դիվիզիա, Իրանում՝ 15.000 քուրդ:

1915 թ. ապրիլին թուրքական 3-րդ և 5-րդ հավաքական և 36-րդ հետևակային դիվիզիաները խալիլ բեյի հրամանատարությամբ անցան հարձակման և գրավեցին Ուրմիա քաղաքը՝ լճից արևմուտք: Կովկասյան բանակի հրամանատարությունը հրամայեց 4-րդ կորպուսի հրամանատարին՝ Վանա լճի շրջանում անցնել հարձակման: Ապրիլի 24-ին

գեներալ Աբաղիսի երևանյան ջոկատն անցավ հարձակման և ապրիլի 27-ին գրավեց Մանագլետը: Միաժամանակ հարձակում սկսեց նաև գեներալ Նիկոլայի ջոկատը, որի կազմում կային հայկական կամավորական երեք դրուժինաներ՝ Վարդանի հրամանատարությամբ: Ռուսական զորքերը, հաղթահարելով թավրիզի 2800 մետր բարձրությամբ դժվարամատչելի լեռնանցքը, մայիսի 5-ին գրավեցին Վան քաղաքը, որի հայ բնակչությունը գտնվում էր պաշարման մեջ և մեկ ամիս հերոսաբար պաշտպանում էր հարազատ քաղաքը: Վանը պաշարած Ջևդեթ բեյի զորքերը նահանջեցին Բիթլիսի ուղղությամբ: Առաջինը Վան մտավ դաշնակցական խնչոյի կամավորական հեծյալ ջոկատը, հետո քաղաք մտան Վարդանը և գեներալ Նիկոլանը:

Ապրիլի 27-ին հարձակման անցավ գեներալ Տրուխինի գլխավորած Մակուի ջոկատը, որը մայիսի 7-ին գրավեց Սարայ գյուղը և այստեղ հանդիպեց գեներալ-լեյտենանտ Չեռնոզուբովի ջոկատին: Այդ երկու ջոկատները, միավորվելով, առաջացան ևս մոտ 100 կմ և գրավեցին Արժեշն ու Կոփը: Դա ռուսական բանակի լուրջ հաջողությունն էր:

Դիլմանի շրջանում գեներալ Չեռնոզուբովի զորքերը գլխովին ջախջախեցին խալի բեյի հավաքական կորպուսի հարվածային խմբավորումը: Այդ ճակատամարտը հսկայական նշանակություն ունեցավ: Թուրքերը տվեցին 3500 սպանված:

Դիլմանի ճակատամարտում հատկապես աչքի ընկավ գեներալ Թ. Նազարբեկովի գլխավորած Կովկասյան 2-րդ հրաձգային դիվիզիան և ժողովրդական հերոս Անդրանիկի գլխավորած հայկական կամավորական 1-ին դրուժինան:

Հետապնդելով խալի բեյին՝ գեներալ Չեռնոզուբովի ջոկատը և հատկապես Կովկասյան 2-րդ հրաձգային դիվիզիայի զորամասերը ստիպված էին հաղթահարել բացառիկ դժվարություններ: Կլիմայական պայմանները և տեղանքը անբարենպաստ էին: Նահանջող թուրքերը ոչնչացրել էին բոլոր անցումները, կամուրջները, բնակարանները, պարենը: Ռուս զինվորները անասելի զրկանքներ էին կրում:

Վանա լճի շրջանում ռազմական գործողությունները մայիս-հունիս ամիսներին առավել ակտիվացան: Թուրքական հրամանատարությունը ձգտում էր ամեն գնով պահպանել Իրանի և Թուրքիայի միջև այդ յուրօրինակ գոտին, որը Ռուսաստանի և Իրանի դեմ միաժամանակյա գործողություններ ծավալելու կարևոր պլանդարմ էր:

Ռուսական հրամանատարությունը նույնպես լուրջ նշանակություն էր տալիս Ալաշկերտի հովտին՝ Կոփի հանգուցակետով, ինչպես նաև Մուշին և Բիթլիսին, որտեղից ուղիներ էին բացվում դեպի Միջագետք:

Գլխավոր հարվածի համար Կովկասյան 4-րդ կորպուսի հրամանատարությունը կենտրոնացրեց 17 գումարտակ, 32 հրանոթ, 35 հարյուրյակ և եսկադրոն՝ գեներալներ Վորոպանովի, Մուդրիի, Նազարբեկովի, Իսրալովի, Շարպանտյեի գլխավորությամբ: Հուլիսի 3-ին բոլոր ջոկատները ձեռնամուխ եղան հրամանի կատարմանը: Չնայած թնամու կատաղի դիմադրությանը և ռուսների մեծ կորուստներին՝ 200 սպանված և 2000 վիրավոր, թուրքերը տեղի տվեցին և սկսեցին նահանջել Կոփի ուղղությամբ: Հուլիսի 5-ին գեներալ Օգանովսկին ճշգրտեց ջոկատների մարտական խնդիրները՝ պահանջելով հետապնդել թնամու Կոփի խմբավորմանը, պահպանել Եփրատի բնագիծը և շարունակել հարձակումը դեպի Փոխուս: Սակայն ուժերի ցրվածության, վատ մատակարարման և ոչ ճկուն ղեկավարման հետևանքով թնամու հետապնդումը սպասված արդյունքը չտվեց: Ընդհակառակը՝ կենտրոնացնելով նոր ուժեր, հուլիսի 9-ին թուրքերն անսպասելիորեն անցան հարձակման: Գեներալ Շարպանտյեի և Նազարբեկովի անվճռական գործողությունների հետևանքով, որոնք, կորպուսի հրամանատարի հրամանին հակառակ, քաշվեցին Վանա լճից հյուսիս, ռուսական ճակատը ճեղքվեց: Ռուսները թողեցին Կոփի բնագծերը և քաշվեցին Մանագլետ: Թուրքերի հարձակումը շարունակվեց մինչև հուլիսի 22-ը: Արդուլ Քերիմ փաշան գլխավոր հարվածը հասցրեց Կոփ-Մանագլետ-Ղուբադ-Ղարաքիլիսա-Ալաշկերտ ուղղությամբ, և հուլիսի 22-ին նրա առաջապահ զորամասերը բնագծեր գրավեցին Արարատ լեռից հարավ Սուլա-Սուլեյման (Ալաշկերտից Ռարալ)-Դիադին-Արնիս (Վանա լճից հյուսիս-արևելք) գծով: Ռուսական զորքերի նահանջն անկազմակերպ էր ընթանում: Ընդամենը 12-13 օրվա ընթացքում Արդուլ Քերիմ փաշայի հարվածային խմբավորումը դեպի հյուսիս՝ Արարատ լեռան ուղղությամբ առաջացավ 100 կմ, իսկ արևմուտքից դեպի արևելք՝ 70 կմ: Թուրքերի այդ հաջողությունների հետագա զարգացումը կարող էր հանգեցնել Իգդիրի և Երևանի գրավմանը: Սակայն թուրքերի հաջողությունները ժամանակավոր էին, որովհետև դրանք ապահովված չէին բներից, ամրապնդված չէին նյութապես ու տեխնիկապես, վատ էր կազմակերպված դրանց ղեկավարումը:

Հուլիսի 22-ին Դահար գյուղի շրջանից գեներալ Բարաթովի ջրկատը, որի կազմում կար 30 զումարտակ, 24 հարյուրյակ և հրետանի, երեք զորասյուներով վճռական հարձակում սկսեց Արդուլ Քերիմ փաշայի հարվածային խմբավորման ծախքի վրա: Այդ հանկարծակի և նպատակասլաց հարձակումն անսպասելի էր թուրքերի համար, որոնք անմիջապես ընկան աննպաստ դրության մեջ: Չախից հարձակվում էին Բարաթովի երեք զորասյուները, կենտրոնից՝ 4-րդ կորպուսի հիմնական ուժերը, աջից՝ Շարպանտյեի և Նազարբեկովի ջոկատները: Թուրքական զորքերն ստիպված էին հապճեպորեն նահանջել: Հատկապես թեժ մարտեր ծավալվեցին Մերգեմիրի լեռնանցքի շրջանում: Բարաթովի զորքերը ջախջախեցին թուրքերին և զրավեցին Մերգեմիր, Կլիչ-զյադուկ լեռնանցքներն ու Դուբաղ գյուղը: Հուլիսի 26-ին մարտերն ընթանում էին արդեն Փալանթեքի դիրքերում: Մարտադաշտում թուրքերը թողեցին հազարավոր սպանվածներ ու վիրավորներ: Ճիշտ է, թուրքերը կարողացան խուսափել շրջապատման մեջ ընկնելուց, բայց հետ քշվեցին մինչև հուլիսի 9-ի ելման դիրքերը:

Պատմագրության մեջ տեղ է գտել այն խորապես սխալ, հակագիտական ու անընդունելի կարծիքը, թե իբր ռուսական հրամանատարությունը գիտակցաբար է կատարել ռուսական զորքերի նահանջը՝ հայ ազգաբնակչության կտորածը թույլ տալու և արդյունքում «Հայաստանն առանց հայերի» ունենալու համար:

1915 թ. հուլիսի 17-ին Վանա լճի շրջանում հայկական կամավորական 1-ին դրուժինայի հրամանատար Անդրանիկ Օզանյանը, տեղեկանալով 8.000 զինվորների անկազմակերպ նահանջի և 4-րդ կորպուսի հրամանատարի՝ նահանջի վերաբերյալ հրամանի մասին, զայրագին վիճել է ջոկատի հրամանատար գեներալ Տրուխինի հետ ու հայտարարել. «Այդ նահանջը կատարյալ կեղծիք է: Դուք ցանկանում եք, որ Հայաստանը մնա առանց հայերի, ահա ձեր նպատակները»: Այնուհետև Անդրանիկն ավելացնում է. «24.000 թուրք ասկյարների դեմ 4-րդ կորպուսն ունի 64.000 զինվոր՝ 8 գեներալներով (Աբացիև, Վորոպանով, Օտուսյանով, Նազարբեկով, Տրուխին, Շարպանտյե, Նիկոլան, Օզանովսկի): Թող թշնամին գա, չափվենք ուժերով, և եթե ուժեղ կլինի, նոր նահանջենք»:

Կովկասյան 2-րդ կորպուսի հրամանատար, գեներալ Թ. Նազարբեկովն իր հուշերում վկայում է, որ այդ նույն օրն Անդրանիկն իր ներկայությամբ կրծքից պոկեց և հատակին շարտեց Գեորգիյան խաչը: Նազարբեկովը վկայում է նաև, որ բժիշկ Հակոբ Ջավրիսը լաց եղավ, երբ

տեղեկացավ Վանի շրջանից ռուսական զորքերի նահանջի մասին և բացականչեց, թե իր բոլոր հույսերն ու երազները օժառի պղպջակի նման պայթեցին:

Սիմոն Վրացյանն այդ առթիվ գրում է. «Թուրքահայկական խնդիրը լուծվում էր թուրքերի ձեռքով: Թուրքահայաստանն առանց հայերի՝ այս համապատասխանում էր և ռուսների հաշիվներին: Մինչ թուրքերը կլանված էին հայկական տեղահանություններով ու ջարդերով, այստեղ ռուս զորավարները կադրիլ էին խաղում թուրքական ռազմաբեմում: Մեկ քայլ առաջ, երկու քայլ հետ՝ ռուս բանակն անվերջ առաջխաղացում և նահանջ էր անում, որոնց ընթացքում խապառ քարուքանդ եղան և իթթիհատական դահիճներից ազատ մնացած Ալաշկերտն ու Վասպուրականը:

Գիտում կա՞ր այդ նահանջների մեջ, թե՞ նրանք իսկապես ռազմագիտական անհրաժեշտություն էին՝ միննույնը չէ՞ր հայ ժողովրդի համար: Նա գաղթում, տնաքանդ էր լինում և ամեն գաղթի հետ կորցնում էր իր տնտեսական ու բարոյական կորովը, և մարդկային հավաքական կերպարանքը» (Սիմոն Վրացյան, Հայաստանի Հանրապետություն, Երևան, 1993, էջ 13):

Համանման կարծիք է հայտնում նաև մեծահամբավ պատմաբան Լեոն՝ գրելով. «Գրեթե միաժամանակ սկսվեց անհասկանալի և խուճապային նահանջը Վանից ու Մանազկերտից մինչև ռուսական սահմանը» (Լեո, Անցյալից, Թիֆլիս, 1925):

Պրոֆ. Ա. Հ. Հարությունյանը գրում է. «Պահպանվել են նաև մեծաքանակ արխիվային փաստաթղթեր և նյութեր, որոնցում հայ հասարակայնության ներկայացուցիչներն առ այսօր շարունակում են մեղադրել ռուսական Կովկասյան բանակի հրամանատարությանը՝ ռազմաբեմում միտումնավոր կամ չարդարացված տեղաշարժերի համար, որոնք աղետալի հետևանքներ ունեցան հայ ժողովրդի համար» (Ա. Հարությունյան, Կովկասյան ճակատը 1914–1917 թթ., Երևան, 1971, էջ 186): Այնուհետև, անդրադառնալով հարցի պարզաբանմանը, խորագիտակ պատմաբանը շարունակում է, թե ռուս-հայկական բարեկամության թշնամիները բազմիցս օգտագործել են հիշյալ իրադարձությունները՝ հայ ժողովրդի նկատմամբ Ռուսաստանի թշնամանքն ապացուցելու համար, ուստի ռազմաստրատեգիական և ընդհանուր քաղաքական իրադրության վերլուծությունը և առաջադրված հարցի օբյեկտիվ պատասխանն ունի գիտա-պատմական և քաղաքական այժմեական խոշոր նշանակություն:

Հեղինակը փաստերով ցույց է տալիս, որ Նիկոլայ 2-րդը, ռազմական մի-
նիստը գեներալ Աուխոնդինովը, գլխավոր շտաբի պետ, գեներալ Յա-
նուշկինիչը, արտգործմինիստը Սագոնովը, գերագույն գլխավոր հրամա-
նատարը, մեծ իշխան Նիկոլայ Նիկոլաևիչը և կայսրության առաջատար
այլ անձինք, ամբողջովին կլանված լինելով Արևմտյան ռազմաճակատի
հոգսերով, շատ քիչ էին զբաղվում Կովկասյան ռազմաճակատի հիմնա-
հարցերով և այն փաստորեն թողել էին Կովկասի փոխարքա Վորոն-
ցով-Ռաշկովի ու նրա օգնականների հայեցողությանը: Պատերազմի
հենց սկզբից փոխարքա Վորոնցով-Ռաշկովը հիվանդացավ և գամվեց
անկողնուն: Սարիղամիշի օպերացիայից հետո գեներալ Միշլանսկու
պաշտոնազրկումից հետո ռազմական օպերացիաները ղեկավարում էր
շտաբի պետը, իսկ երբ 1915 թ. կազմավորվեց Կովկասյան բանակը, նրա
հրամանատար նշանակվեց Նիկոլայ Նիկոլաևիչ Յուդենիչը:

Հեղինակը գալիս է այն ճիշտ եզրակացության, որ դեմ լինելով
Արևմտյան Հայաստանի ինքնավարությանը, ցարական կառավարու-
թյունը, սակայն, չէր կարող միտումնավոր կերպով կազմակերպել իրեն
հավատարիմ քրիստոնեական տարրի ոչնչացումը: Անհեթեթ կլիներ
մտածել, որ ցարական կառավարությունը, 1913-1914 թթ. պայքարելով
Արևմտյան Հայաստանում բարենորոգումներ անցկացնելու, հայկական
կամավորական դրուժինաներ կազմավորելու և զինելու, հարյուր հա-
զարավոր փախստականներին օգնություն կազմակերպելու համար,
միաժամանակ իրականացնեն հայ ազգաբնակչությանը ոչնչացնելու
քաղաքականություն: Դա համոզեցուցիչ չէ և փաստորեն չի համապա-
տասխանում իրականությանը: Օգանովսկու կորպուսը 1915 թվականի
ամռանը նահանջեց Արդուլ Քերիմ փաշայի խմբավորման գերագանց
ուժերի հարվածների տակ: Սակայն պաշտպանության լավագույնս
կազմակերպման և զորքերի հմուտ ղեկավարման դեպքում կարելի էր
խուսափել դրանից: Համադրելով փաստերը, պրոֆ. Ա. Հարությունյանը
հանգում է այն ճիշտ եզրակացության, որ 1915 թ. ամռանը Ալաշկերտի
հովտից Կովկասյան 4-րդ կորպուսի նահանջը, որի հետևանքով թողն-
վեցին Վանը և հայկական այլ քաղաքներ ու գյուղեր, պայմանավորված
էր հետևյալ պատճառներով. կորպուսի ճակատի ձգվածությունը (400
կմ), կառավարման վատ կազմակերպումը, զորքերի մարտական և նյու-
թական մատակարարման անբավարար վիճակը, հետախուզության
թույլ դրվածքը, հրամանատարների անխելահասությունը:

Կովկասյան բանակի հրամանատարությունը ուշացումով սկսեց
ուղղակիորեն ու անմիջականորեն միջամտել 4-րդ կորպուսի գործերին
և ձեռնարկեց արմատական միջոցառումներ, որոնց շնորհիվ, և հատկա-
պես գեներալ Բարաթովի ուժեղ ջոկատի ուղարկումով թուրքերի սկզբ-
նական շրջանի հաջողությունները լիովին լիկվիդացվեցին, և Ալաշկեր-
տի հովիտը կրկին հայտնվեց ռուսների ձեռքում:

**Էրզրումի օպերացիան (1915 թ. դեկտեմբերի 28-1916 թ.
փետրվարի 18):** Կովկասյան ռազմաճակատում 1916 թվականի ամե-
նակարևոր իրադարձությունը Մերձավոր Արևելքի և Օսմանյան կայս-
րության ամենախոշոր ամրոցի՝ Էրզրումի գրավումն էր: Էրզրումի ռազ-
մաստրատեգիական և քաղաքական նշանակությունը շատ մեծ էր: Քա-
ղաքը ուներ 52.000 բնակիչ, որից 15.500-ը հայեր էին: Այն Անդրկովկա-
սի վրա թուրքերի հարձակումների գլխավոր բազան էր:

Էրզրումի օպերացիայի սկզբում Կովկասյան բանակը (գլխավոր
հրամանատար՝ գեներալ Ն. Ն. Յուդենիչ) իր կազմում ուներ 126 զու-
մարտակ, 208 հարյուրյակ, 372 հրանոթ, 20 ինժեներական դասակ, 20
աշխարհագրային դրուժինա՝ մոտավորապես 103 հազար մարդ: Թուր-
քական 3-րդ բանակն ուներ 123 զումարտակ, 40 էսկադրոն, 10.000 քր-
դեր, 122 հրանոթ, մոտ 60.000 մարդ: 1915 թ. վերջին Կովկասյան ճակա-
տը ձգվում էր Սև ծովի հարավային ափերից՝ ճորոխ գետից մինչև Ռս-
տան՝ Վանա լճի հարավային ափը:

Էնվերը խստաշունչ ձեռնարկում ռուսական հարձակում չէր նախատե-
տում և նախապատրաստվում էր գարնանային հարձակման, մինչդեռ
ռուսները մանրակրկիտ մշակում էին Էրզրումի օպերացիայի պլանը, որն
իրավամբ համարվում է ռուսական ռազմական արվեստի փայլուն մնու-
ներից մեկը: Պլանի ելությունն էր հարված հասցնել թուրքական հիմնա-
կան ուժերի կենտրոնին՝ հուսալիորեն ապահովելով սեփական թևերը:

Էրզրումի օպերացիայի պլանի իրագործումն սկսվեց 1915 թ. դեկ-
տեմբերի 28-ին: Այդ օրն սկսվեց հարձակումը Օլթի ուղղությամբ: Ընդ
որում, Թուրքեստանյան 2-րդ կորպուսը (հրամանատար՝ գեներալ
Պրժևալսկի) վերցրեց խրամատների առաջին գիծը, իսկ երկրորդ և եր-
րորդ օրերին վանելով թուրքերի հարձակումները՝ մոտեցավ լարափա-
կոցների: Դեկտեմբերի 30-ին և 31-ին Կովկասյան 1-ին և Թուրքեստա-
նյան 2-րդ կորպուսները միաժամանակյա հարձակմամբ տիրացան
մինչև Խորասան գյուղն ընկած բնագծերին: Հունվարի 5-ին երկու կոր-
պուսները գրավեցին Քյոփրիքյոյի բնագծերը: Հետապնդելով հակառա-

կորդին՝ հունվարի 6-ին Սիբիրյան կազակական բրիգադը գրավեց Չասան-Կալան, և թուրքերը խուճապահար փախան դեպի Երզրում: Ստեղծվեց Երզրումի ամրոցը գրավելու ռեալ հնարավորություն:

Երզրումի ամրոցն անմիջականորեն գրավելու համար Կովկասյան բանակի հրամանատարն առանձնացրեց 88 գումարտակ՝ 60.000 զինվոր, 9 դրուժինա, 166 հրանոթ, 29 դաշտային հաուբից, 16 պաշարողական հրանոթ, 70 հարյուրյակ, սակրավորների 4 դասակ: Գրոհի նախապատրաստումը տևեց 21 օր: Ռուսական շարասյուների առջև կանգնած էին թուրքական 9-րդ, 10-րդ և 11-րդ համալրված կորպուսները, որոնք հին ծանոթներ էին դեռ Սարիղամիշից:

Երզրումի գրոհն սկսվեց ոչ թե արշալույսին, ինչպես դա սովորաբար արվում էր, այլ 1916 թ. հունվարի 29-ի ցերեկվա ժամը 14-ին՝ հրետանային նախապատրաստությամբ, իսկ հետևակի գրոհն սկսվեց ժամը 23-ին՝ 30 աստիճան սառնամանիքի պայմաններում:

Հունվարի 30-ի կեսօրին թուրքեստանյան կորպուսի զորամասերը գրավեցին Կարագյուբեկի ամրությունները, գեներալ Ռյաբինինը գրավեց Դուլանգյոզի բերդամասը, իսկ գեներալ Չիկովանին հարավից մոտեցավ Փալաթբեքի ամրություններին: Հունվարի 31-ին շարունակվեցին թե՛ մարտերը բերդամասերում, խրամատներում և բերդի մատույցներում: Թուրքերը ֆանատիկորեն դիմադրում էին: Գեներալներ Վոլշչինի և Վորոբյովի շարասյուները բացառիկ դժվարություններով ու կորուստներով խոր ձյան միջով շարժվում էին առաջ և փետրվարի 1-ին վճռական գրոհով գրավեցին Տաֆտա բերդամասը, որն ամենաուժեղ բնագիծն էր և ամրացված էր ռեդուտներով, օդակածն խրամատներով, բազմազան լարափակոցներով: Այդ հաղթանակը վճռական նշանակություն ունեցավ Երզրումի ամրոցի ու քաղաքի գրոհի համար:

Փետրվարի 2-ին Կովկասյան 1-ին կորպուսը վճռականորեն գրոհեց առաջին գծի բոլոր բերդամասերը: Արշալույսին գրավեց Չոբան-դեդե ամրությունը, իսկ ժամը 14-ին սկսվեց Ուզուն-Ահմեդ, Կաբուրգա, Օրթայունով, Սիվիշիկ և այլ բերդամասերի գրոհը: Փետրվարի 3-ի առավոտյան ժամը 5-ին Երզրումի ամրոցը ռուսների ձեռքում էր: Ռուսները գերի վերցրին 235 սպա, 13.000 զինվոր, 9 դրոշ, 323 հրանոթ: Նշանակալի էին նաև ռուսների կորուստները՝ 64 սպա, 2275 զինվոր, 14.460 վիրավոր և ցրտահարված:

Թուրքական 3-րդ բանակի ջախջախումը և Երզրումի գրավումը խիստ բացասաբար ազդեց թուրքերի վրա:

Երզրումի գրավումից հետո Կովկասյան բանակի շտաբը վերաբազավորվեց այստեղ: Երզրումը դարձավ բոլոր ստրատեգիական ճանապարհների առաջավոր հանգույց: Սարիղամիշից մինչև Երզրում կառուցվեց նեղգիծ երկաթուղի և լավ խճուղի:

Հատկանշական է, որ Եվրոպայի և Ռուսաստանի հասարակական շրջանները նշում էին ոչ միայն Երզրումի գրավման ռազմական նշանակությունը, այլև այդ հաղթանակի հետ էին կապում հայ ժողովրդի վիճակի բարելավման և Հայկական հարցի լուծման հույսերը: Եվ պատահական չէ, որ Երզրումի գրավման գործում հայ ազգաբնակչությունը ակտիվ դեր կատարեց:

Քանի որ Ռուսաստանի պաշտոնական մամուլը անընդհատ շեշտում էր, թե իբր պատերազմը Մերձավոր Արևելքում հետապնդում է Հայաստանն ազատագրելու նպատակ, ուրեմն Սարիղամիշի, Ալաշկերտի և Երզրումի հաղթական ճակատամարտերին պիտի հետևեին ինչ-որ գործնական քայլեր: Երզրումի առումից հետո Հայոց կենտրոնական ազգային բյուրոյի պատվավոր նախագահ Մեսրոպ Եպիսկոպոսը Արևմտյան Հայաստանի ազատագրման կապակցությամբ հեռագիր ուղարկեց Կովկասի փոխարքային և ստացավ հետևյալ պատասխանը. «Թող աստված օգնի համընդհանուր բարօրության համար մեկընդմիջտ ամրացնել Երզրումը իբրև միասնական Ռուսական պետության մաս և դրանով վերջ դնել թուրքական ճնշման տակ գտնվող քրիստոնյաների տառապանքներին» (Ա. Գ. էջ 237):

Երզրումի օպերացիայի օրերին Կովկասյան բանակի հրամանատարը խնդիր դրեց Կովկասյան 4-րդ կորպուսի առջև, որի հրամանատարն այդ ժամանակ գեներալ դե Վիտտեն էր, հարձակվել և գրավել Մուշն ու Բիթլիսը: Փետրվարի 3-ին Նազարբեկովը գրավեց Մուշը, իսկ փետրվարի 17-ին Աբաղիսի զորքերը ձեռնամարտով գրավեցին Բիթլիսը: Նրանց զորքերի կազմում հերոսաբար մարտնչում էին հայկական կամավորական դրուժինաները:

Մուշի և Բիթլիսի գրավումից հետո ռուսական հրամանատարությունը կանգնեցրեց հետագա հարձակումը, ինչը լիովին բխում էր ռազմաքաղաքական իրադրությունից: Ջորամասերն ու ստորաբաժանումները կարգի էին բերվում, ամրանում էին գրավված բնագծերում, նախապատրաստվում դիմագրավելու թուրքերի հնարավոր հակահարձակումներին:

Տրապիզոնի օպերացիան: Երզրունի օպերացիայից հետո Կովկասյան ռազմաճակատում ռազմական գործողությունները շարունակեցին զարգանալ աջ և հատկապես ձախ թևերում: Դարդանելի օպերացիայից հետո (1915 թ. փետրվարի 19–1916 թ. հունվարի 9), որի ընթացքում անգլո–ֆրանսիական զորքերը անգլիական գեներալ Յամիլտոնի և ֆրանսիական գեներալ ղը Ամադի գլխավորությամբ փաստորեն պարտություն կրեցին թուրքերից (թուրքական զորքերի գործողությունները ղեկավարում էր գերմանական գեներալ Լիման ֆոն Սանդերսը) և իրենց զորքերը Չալիպոլի թերակղզուց էվակուացրին Սալոնիկ, թուրքական հրամանատարությունը հնարավորություն ստացավ նեղուցների շրջանից 12 դիվիզիա փոխադրել Կովկասյան ճակատ: Այդ համգամանքը ժամանակավորապես նպաստավոր պայմաններ ստեղծեց թուրքերի համար: Սակայն 1916 թվականի մարտին ռուսական զորքերի փայլուն հարձակումը հարավարևմտյան ռազմաճակատում ռուս տաղանդավոր գեներալ Բրուսիլովի հրամանատարությամբ, հնարավորություն տվեց Կովկասյան բանակին 1916 թվականի ընթացքում իրականացնել մի քանի խոշոր և հաջող օպերացիաներ: Դրանցից ամենափայլուններից մեկը Տրապիզոնի օպերացիան էր, որը նախապատրաստվեց և անցկացվեց 1916 թվականի մարտի 13–մայիսի 17–ին: Տրապիզոն քաղաքը և նավահանգիստը կարևորագույն կետ է սևծովյան ծովագրին, որից դեպի հարավ են ձգվում բարեկարգ ճանապարհներ: Տրապիզոնի գրավումը Ռուսաստանի համար ուներ հսկայական ռազմավարական նշանակություն: Թուրքական հրամանատարությունը ևս չուրջ նշանակություն էր տալիս Տրապիզոնին: Թուրքերը հենց Տրապիզոնի վրայով էին իրենց զորքերին համալրում և սպառազինություն հասցնում: Ռուսական հրամանատարությունը Նովոռոսիյսկից 10.000–անոց դեսանտ հանեց Տրապիզոնից արևելք՝ Կարադերեի շրջան, որի շնորհիվ ռուսական Սերժոժովյան ջոկատը որոշակի գերակշռություն ստացավ: Սկսելով հարձակումը և կռվանցելով Կարադերե գետը, ռուսական զորքերը ապրիլի 5–ին գրավեցին Տրապիզոնը: Մինչև մայիսի 26–ը նոր կազմավորված Կովկասյան 5–րդ կորպուսի զորքերը գրավեցին նաև Տրապիզոնի շրջակա բնակավայրերը և դուրս եկան նրանից 20–25 կմ արևմուտք: Տրապիզոնի և նրա շրջակայքի գրավումը ռուսական բանակի խոշորագույն հաջողություններից մեկն էր:

Ռուսական բանակի մարտական հաջողությունները Երզրունից և Տրապիզոնից հետո փաստ դարձան և գրավեցին համաշխարհային հա-

սարակայնության ուշադրությունը: Ասիական Թուրքիայի հարցը, ըստ էության, չուծվում էր միայն ռուսական բանակի ուժերով: Գերագույն գլխավոր հրամանատարությունը փոխեց իր վերաբերմունքը Կովկասյան ճակատի նկատմամբ և այժմ նույնիսկ այստեղ միավորումներ էր նետում Արևմտյան ռազմաճակատից: Սայիսին արդեն այստեղ ռուսական զորքերի թիվն անցնում էր 230.000–ից: Թուրքերը 3–րդ բանակից զատ ռուսների դեմ շարժեցին նաև 2–րդ բանակը, որի առջև խնդիր դրվեց Օդնուտի շրջանից հարձակվել Զյոփրիքոյի ուղղությամբ և դուրս գալ ռուսների թիկունքը, միանալ 3–րդ բանակին, գրավել Երզրունը և ապա ներխուժել Անդրկովկաս: Թուրքական երկու բանակներն ունեին 282 գումարտակ՝ ռուսների 183–ի դիմաց:

1916 թ. հունիսի 9–ին թուրքական 3–րդ բանակը հարձակման անցավ ռուսների աջ թևում, ճեղքեց ճակատը և սկսեց նեղել Կովկասյան 5–րդ և Թուրքեստանյան 2–րդ կորպուսների զորքերին: Թուրքերը ձգտում էին հնարավորին չափ արագ անցնել Սերժոժովյան կորպուսի և ռուսական ճակատի կենտրոնի թիկունքը: Գլխավոր հարվածը հասցվեց 5–րդ կորպուսին: Ռուսական հրամանատարությունը գիտեր, որ թուրքական զորքերը Բայբուրդի շրջանում քիչ են, ուստի Թուրքեստանյան 2–րդ կորպուսի առջև խնդիր դրվեց հարձակվել և գրավել Բայբուրդը: Չարձակման խելացի կազմակերպման շնորհիվ կորպուսը հուլիսի 3–ին գրավեց Բայբուրդը և զարգացնելով հարձակումը, դուրս եկավ նրանից 25–30 կմ արևմուտք, իսկ հուլիսի 7–ին գրավեց Գյումուշխանեն: Կորպուսի զորքերը դրսևորեցին բացառիկ կազմակերպվածություն և ռազմական խորամանկություն: Բրիգադներից մեկը Երզնկայի շրջանում դուրս եկավ թուրքերի թիկունքը և խուճապ ու վախ առաջացրեց: Հուլիսի 12–ին ռուսները գրավեցին տնտեսական խոշոր կենտրոն Երզնկան: Թուրքերի պարտությունն ապշեցուցիչ էր՝ ռուսները վերցրին 17.000 գերի: Բարոյալքված թուրքական զորքերը խուճապահար նահանջեցին դեպի արևմուտք և հարավ: Երզնկայի գրավմամբ ռուսներն ավարտեցին Արևմտյան Չայաստանի մաքրումը թուրքերից: Դրանով ձախողվեց 3–րդ և 2–րդ բանակների համատեղ հարձակմամբ Երզրունը վերադարձնելու թուրքական պլանը, քանի որ 2–րդ բանակի հարձակման պահին ջախջախված 3–րդ բանակը ստիպված էր միայն պասիվ կերպով պաշտպանվել:

Թուրքական 2–րդ բանակը՝ 74.000 սվին, 98 հրանոթ, 7.000 քուրդ, առաջադրանք ստացավ կենտրոնացնել իր հիմնական ուժերը Դիարբե-

քիրի, Օղնուտի, Քղիի, Խարթերդի շրջաններում և հարծակվել Քյոփրի-քյոյի ուղղությամբ, այսինքն՝ դուրս գալ ռուսների երզրումյան խմբավորման թիկունքը: Գերմանական հրամանատարությունը հունիսի սկզբներից մեծացրեց զենքի և հանդերձանքի մատակարարումը, թուրքերին տրամադրեցին նշանակալի թվով զինվորներ ու սպաներ, որովհետև Արևմտյան Յայաստանի տարածքի գրավումը խիստ անհանգստություն էր առաջացրել Բեռլինում: Թուրքերը երազում էին ռևանշի մասին:

Օղնուտի օպերացիան (19 16 թ. հուլիսի 29—սեպտեմբերի 7):

Հուլիսի 23—ին սկսվեց թուրքական բանակի գլխավոր ուժերի հարձակումը Օղնուտի և Քյոփրիքյոյի ուղղություններով: Ռուսական 4—րդ կորպուսի զորամասերը, չդիմանալով թուրքերի ճնշմանը, նահանջեցին: Թուրքերը դուրս եկան Սեդրագետի ափերը: Ըստ էության հարավից ճանապարհը դեպի երզրում բաց էր: Դրությունը վտանգավոր էր դառնում: Կովկասյան բանակի հրամանատարը թևային հարվածներ հասցնելու համար բանակային ռեզերվից ստեղծեց երկու ջոկատ՝ գեներալներ Դուբինսկու և Նիկոլանի հրամանատարությամբ:

Օգոստոսի 11—ին Դուբինսկու ջոկատն անցավ հարձակման, սակայն հանդիպեց թուրքերի համառ դիմադրությանը, որոնք հետ մղեցին ռուսների առաջապահ զորամասերը և իրենք անցան հարձակման: Նիկոլանը դժվարությամբ պահում էր նրա աջ թևը:

Օգոստոսի 15—18—ին ռուսների երկրորդ հարձակումը շոշափելի արդյունքներ չտվեց: Օգոստոսի 19—ին թուրքական բանակը վերստին՝ երրորդ անգամ, անցավ հարձակման և ճեղքելով ռուսական ճակատը՝ գրավեց հարմար բնագծեր: Դրությունը կրիտիկական էր: Ռուսներն օգտագործեցին իրենց ռեզերվները: Դաժան մարտեր էին ընթանում Մուշի շրջանում: Սակայն հմտորեն կիրառելով թևային հարվածների և նրբին տեղաշարժերի մարտավարությունը՝ ռուսական զորքերն անցան հարձակման, դուրս մղեցին թուրքերին գրավված շրջաններից, ջախջախեցին նրանց առաջապահ զորամասերը և վերականգնեցին իրենց դիրքերը: Օգոստոսի 29—ին դաժան մարտերի թեժ պահին Կըզըլ—Չուբուկ և Բինգյուլ—դաղ լեռներում անսպասելիորեն ծյուն տեղաց և սառնամանիք սկսվեց: Ձորքերը նախապատրաստված չէին ձմռանը, ուստի ռազմական գործողությունները լեռնային շրջաններում գրեթե դադարեցին:

Հուլիսի 29—ին սկսած Մուշ—Բիթլիս և Քղի—Վանա լիճ հատվածներում ռուսներն աստիճանաբար նեղեցին թուրքերին և օգոստոսի 11—ին գրավեցին Մուշը:

Դաժան մարտերը շարունակվեցին մինչև սեպտեմբերի 7—ը, որից հետո լեռնային շրջաններում խիստ սառնամանիքի սկսման և թուրքերի խոշոր պարտության պատճառով Կովկասյան 2—րդ բանակի ճակատում սկսվեց հարաբերական դադար: Այդպիսով թուրքական 2—րդ բանակի հարձակումը (հրամանատար՝ Մուստաֆա Քեմալ փաշա) ավարտվեց պարտությամբ: Օղնուտի օպերացիայի ընթացքում 39 օրում թուրքերը կորցրին 60.000, ռուսները՝ 21.000 մարդ: Դրանից հետո ռազմաճակատը Արևմտյան Յայաստանի տարածքում կայունացավ: 1914—1916 թթ. ընթացքում ռուսական զորքերի գրաված տարածքը շատ ավելին էր ներկայիս երեք Անդրկովկասյան հանրապետությունների տարածքից: 1916 թվականի վերջին ռուս-թուրքական ռազմաճակատի գիծն անցնում էր Տիրեբուլու (Սև ծովի ափ, Տրապիզոնից 70 կմ արևմուտք), Խարչիդ—Դարասի, Շիխլի, Ադիսա, Կարազյուլ, Ջենցիկե, Սաթար, Բելումեր (Մամախաթունից 250 կմ հարավ—արևմուտք), Քղի, Չաթան, Օղնուտից հարավ, Գուլբան, Գենջ, Մուշից, Բիթլիսից և Վանա լճից հարավ գծով՝ երզրումից 70—100 կմ արևմուտք:

ՀԱՅԿԱԿԱՆ ԿԱՄԱՎՈՐԱԿԱՆ ԴՐՈՒԺԻՆԱԼՆԵՐԸ ԵՎ ԿԱՆՈՆԱՎՈՐ ՋՈՐԱՄԱՍԵՐԸ ԿՈՎԿԱՍՅԱՆ ՈԱՋՄԱՃԱԿԱՏՈՒՄ

Հայ բուլշևիկները, ելնելով Առաջին համաշխարհային պատերազմի բնույթի մասին լեռնային գնահատականից, բացասաբար են վերաբերվել ռուսական բանակի կազմում հայկական կամավորական դրուժինաների կազմակերպմանը: Նրանք այդ միջոցառումը դիտել են իբրև օժանդակություն ցարական կառավարության զավթողական քաղաքականությանը: Նրանք նկատի են ունեցել նաև, որ ռուսական բանակի կազմում հայկական կամավորական դրուժինաների առկայությունը կարող է առիթ դառնալ արևմտահայության նկատմամբ առավել դաժան վերաբերմունքի համար: Սակայն ցարական կառավարության ձգտումը՝ օգտագործել կամավորական շարժումը իր իմպերիալիստական նպատակների համար, լիակատար հակասության մեջ էր գտնվում շարքային կամավորների բնական, ազնիվ ցանկության հետ՝ օգնել իրենց արևմտահայ եղբայրներին թուրքական բռնապետության դեմ նրանց մղած դժվարին պայքարում: Հետագայում երիտթուրքական կառավարությունը, կենսագործելով արևմտահայերի ցեղասպանության քաղաքականությունը, ե-

րեսպաշտորեն առիթ էր ծառայեցնում հայկական մի քանի կամավորական դրուժինաների առկայությունը ռուսական բանակում: Դեռևս էնվեր փաշան, Սարիղամիշի տակ թուրքական 3-րդ բանակի ջախջախումից հետո, որը տեղի ունեցավ ռուսական բանակի կործանիչ հարվածների տակ և որտեղ կամավորական դրուժինաները չէին կարող որևէ կարևոր դեր խաղալ, ճգնում էր թուրքերի պարտությունը վերագրել հայերին:

Կովկասի փոխարքայությունը հետևյալ երեսպաշտական կոչն ուղղեց արևմտահայությանը. «Չայեր: Դուք երկար եք տանջվել թուրքական անտանելի լծի տակ, սակայն այժմ ռուսական քաջարի զորքերի հաղթարշավը աստծո օգնությամբ ձեզ բերում է ազատության դարավոր ճնշումից:

Ռուսական երկրի Միապետ առաջնորդը երաշխավորում է հայ ժողովրդին Ինքնավար Հայաստանի ստեղծում՝ հայկական վեց վիլայեթների և նրանց հետ անխազելիորեն կապված Կիլիկիայի սահմաններում՝ Ռուսաստանի հզոր հովանավորության տակ:

Հարևան ժողովուրդների հետ ազատ համակեցությամբ, նրանց իրավունքների պահպանմամբ՝ հայ ժողովուրդը կմտնի ազգային վերածնության նոր դարաշրջան:

Չայեր: Երկար եք դուք տանջվել, սակայն մոտ է ժամը, երբ ձեզ կողողեն խաղաղության և ազատության ճառագայթները:

Թող Տեր Աստված ձեզ օրհնի արդար գործի հաղթանակի համար» (Ա. Յ., էջ 295): Կոչի տեքստը երկար քննարկվեց և բազմիցս փոփոխվեց:

Ռուսական Պերագույն հրամանատարության պաշտոնական տվյալներով պատերազմի հենց սկզբից Արևմտյան և Կովկասյան ռազմաճակատներում ռուսական բանակներում զենք էին կրում շուրջ 200 հազար հայ զինծառայողներ:

Հայկական կամավորական դրուժինաների քանակի և նրանց թվակազմի մասին հրապարակված և արխիվային աղբյուրներում տրվում են հակասական ու թերի տեղեկություններ: Հրապարակախոս Գաբրիել Լազյանը «Հայաստան և Հայ Դատը» գրքում (Կահիրե, 1946, էջ 186–193) պնդում է, թե մինչև 1915 թ. փետրվարը կամավորական ջոկատներ են ուղարկվել 4500 մարդ, իսկ մինչև նույն թվականի հոկտեմբեր կազմվել է 6 ջոկատ՝ 5000 մարդ ընդհանուր թվաքանակով:

Ռուսական բանակի զեներալ-մայոր, Կովկասյան ռազմաճակատում Առաջին համաշխարհային պատերազմի մասնակից Գ. Կորզանո-

վը (Ղորղանյան) «Չայերի մասնակցությունն առաջին համաշխարհային պատերազմին Կովկասյան ռազմաճակատում (1914–1918)» գրքում (Ֆրանսերենը՝ Փարիզ, 1927, իսկ հայերենը՝ «Հայրենիք» ամսագրի 1926–1927 թթ. համարներում) հաստատում է, որ սկզբնական շրջանում հայ կամավորների շարքերում հաշվվում էին 2500 մարդ և միայն հետագայում նրանց թիվը հասավ 6000-ի: Առանձին հեղինակներ այդ թիվը հասցնում են մինչև 9.000-ի:

Սկզբնաղբյուրները վկայում են, որ պատերազմի առաջին օրերին կամավորական ջոկատների մեջ մտնել ցանկացողների թիվը չափազանց շատ էր ոչ միայն Հայաստանում և Անդրկովկասում, այլև ամբողջ Ռուսաստանում և արտասահմանյան երկրներում: Սակայն Կովկասյան ճակատի հրամանատարությունը, կառավարության ցուցումով, գիտակցաբար չզնաց կամավորների թվի չափազանց մեծացման: Աշխարհի տարբեր ծայրերից՝ Եգիպտոսից, Ֆրանսիայից, ԱՄՆ-ից, Կիպրոսից և շատ ուրիշ երկրներից բազմաթիվ դիմումներ էին ստացվում ինչպես դրուժինա մտնելու, այնպես էլ կարգադրիչ մարմնի ընթացիկ հաշվին գումարներ փոխանցելու մասին: Այսպես՝ 1915 թ. նոյեմբերի 10-ին Ռուսաստանի ճանապարհային հաղորդակցության մինիստրը խնդրում էր արտագործնախարար Սազոնովի թույլտվությունը՝ Բուլղարիայից հայ կամավորներին Կովկաս փոխադրելու մասին: Նույնպիսի խնդրանքներով արտագործնախարարին էին դիմում Կիպրոսի և Եգիպտոսի ռուսական ներկայացուցիչները՝ 1000-ական հայ կամավորների Կովկաս փոխադրվելը կազմակերպելու մասին: ԱՄՆ-ից Կովկաս գալու թույլտվության էին սպասում 15.000 կամավորներ: Հնչակյանների ղեկավարությամբ ԱՄՆ-ից կամավորների առաջին խումբը 1915-ի մարտին Արխանգելսկի վրայով հասավ Կովկաս: Խումբը գլխավորում էր Մշեցի Պանդուխտը: Երկրորդ խումբը նույն ճանապարհով Կովկաս եկավ 1915-ի մայիսին՝ Ալեքսանդր Մնացականյանի գլխավորությամբ, երրորդը՝ նոյեմբերին, Շահենի ղեկավարությամբ: Կամավորների այս ձգտումը միայն և միայն հայրենասիրական էր:

Կամավորական շարժման գործում որոշակի դեր ստանձնեց Կովկասի փոխարքա (1905–1915), զեներալ-լեյտենանտ, կոմս Իլլարիոն Իվանովիչ Վորոնցով-Դաշկովը (1837–1916), որը կառավարության անունից հայ բուրժուազիայի ներկայացուցիչներին առատ խոստումներ տվեց: Սակայն բուն շարժումը գլխավորում էր հայ հասարակական-քաղաքական նշանավոր գործիչներից կազմված Հայկական Ազգային

Բյուրոն, որը ստեղծվել էր Թիֆլիսում, դեռևս 1912-ի վերջերին և կոչված էր օգնելու Ամենայն Հայոց կաթողիկոսին՝ Հայկական հարցի շուրջ բանակցություններ վարելու մեծ պետությունների հետ: Բյուրոյի պատվավոր նախագահն էր Վրաստանի հայկական թեմի առաջնորդ Սեսրոպ եպիսկոպոսը, անդամներն էին Ա. Բաբախանյանը (Լեոն), Ս. Հարությունյանը, Գոլի. Թունանյանը, Հ. Ջավրիկը, Կ. Ստեփանյանը, Ա. Սահակյանը, Հ. Ամիրխանյանը, Հ. Սպենդիարյանը, Խ. Աֆրիկյանը, Հ. Արղությանը, Հ. Սելիքյանը, Ս. Կյուլպենկյանը, Ավ. Պողոսյանը, Գ. Խատիսյանը (Ալ. Խատիսյանի եղբայրը), Ստ. Լիսիցյանը, Ա. Պապովյանը, Ա. Աբեոյանը, Հ. Քոչարյանը: Ռուսաստանից և արտասահմանից այնքան հայեր եկան Թիֆլիս, որ հարկ եղավ հատուկ հայտարարությամբ դադարեցնել նրանց հոսքը: Հայ կամավորները զինվորագրվում էին Անտանտի պետություններին այն հույսով ու հավատով, որ նրանց օգնությամբ կկարողանան ազատագրել Արևմտյան Հայաստանը:

Ջոկատներ կազմելու և նրանց զենքով ապահովելու նպատակով ստեղծվեց Ռազմական խորհուրդ, որն իր ներկայացուցիչներն ուներ Ռուսական կայսրության բոլոր հայաբնակ վայրերում: Շոշափելի աշխատանք կատարեցին հատկապես Մոսկվայի, Պետրոգրադի, Բաքվի, Նյու Յորքի, Փարիզի և Լոնդոնի կոմիտեները: Ճիշտ է, կամավորական ջոկատների կազմավորման ծախսերը հիմնականում հոգում էր ցարական կառավարությունը, սակայն հայերն էլ հանգանակում էին շոշափելի գումարներ: Միայն 1915-ին նրանք տրամադրեցին 1.444.000 ռուբլի:

Սկզբնական շրջանում կազմակերպվեցին կամավորական չորս ջոկատներ: Առաջին ջոկատի հրամանատար նշանակվեց ժողովրդական հերոս Անդրանիկը: Ջոկատն ամենամեծն էր և ուներ 1200 կամավոր: Երկրորդ ջոկատը՝ բաղկացած 500 հոգուց, գլխավորելու էր Դրոն (Դրաստամատ Կանայան), երրորդը՝ 500 հոգի, Համազասպ Սրվանձտյանը, չորրորդը՝ 500 հոգի, փառաբանված ֆիդայի Քեռին (Արշակ Գավաֆյան): Հետագայում կազմվեց 5-րդ գունդը՝ Խանասորա Վարդանի (Սարգիս Մեիրաբյան) գլխավորությամբ: Վեցերորդ հնչակյան գնդի հրամանատարն էր սկզբում Ա. Ջանիդլարյանը, որին փոխարինեց Գ. Ավշարյանը, իսկ նրա զոհվելուց հետո՝ Հայկ Բժշկյանը (Գայ): Այս ջոկատին հետագայում միացավ Պանդուխտի (Սիքայել Սեֆերյան) 350 հոգուց բաղկացած խումբը: Յոթերորդ գնդի հրամանատարն էր Հովսեփ Արղությանը (Իշխան): 1915 թ. վերջերին հայ կամավորների ընդհանուր թիվը հասավ 10.000-ի: 1915 թ. ապրիլին Ազգային բյուրոյի որոշմամբ

2-րդ, 3-րդ և 4-րդ ջոկատները միավորվեցին 5-րդ ջոկատի հետ՝ Արա-րատյան ջոկատ ընդհանուր անվամբ, որի հրամանատարությունը հանձնվեց Խանասորա Վարդանին:

Ինչպես իրավացիորեն մկատել է ակադեմիկոս Հ. Սիմոնյանը, հայկական կամավորական ջոկատներին ժողովուրդը մկրտեց «գնդեր» անունով, որոնք իրենց թվակազմով չորս անգամ փոքր էին ռուսական գնդերից: Ռուսական գունդը բաղկացած էր չորս գումարտակից, որոնցից յուրաքանչյուրը՝ չորս վաշտից, յուրաքանչյուրը՝ 250 զինվորով, ուստի հայկական կամավորական ջոկատներն իրենց չափերով, ըստ էության, գումարտակներ էին: Հ. Սիմոնյանն այն կարծիքն է հայտնում, որ հայկական այդ զորամասերը մի շատ կարևոր տարբերիչ առանձնահատկություն ունեին. այդ այն էր, որ ռուսական գումարտակներն ինքնուրույն միավորներ չէին, նրանք գնդի բաղկացուցիչներ էին, մինչդեռ հայկական ջոկատները զինվորական անկախ միավորներ էին, ուստի կարելի է դրանց նաև գունդ անվանել (Հ. Սիմոնյան, Անդրանիկի ժամանակը, Երևան, 1995, հ. 1, էջ 387):

Հրամանատարության որոշմամբ հայկական կամավորական գնդերի համար որոշվեցին հետևյալ չորս ուղղությունները.

Առաջին գունդ (հրամ.՝ Անդրանիկ) — Իրան-Բաշկալե-Վան:

Երկրորդ գունդ (հրամ.՝ Դրո) — Իզդիլ-Բայազետ-Բերկրի-Վան:

Երրորդ գունդ (հրամ.՝ Համազասպ) — Կաղզվան-Ալաշկերտ-Մանազկերտ-Բիթլիս:

Չորրորդ գունդ (հրամ.՝ Քեռի) — Սարիղամիշ-Քյոփրիքոյ-Էրզրում:

Դրան համապատասխան՝ Կովկասյան բանակի ջոկատների հրամանատարները ցուցումներ ստացան հայկական կամավորական գնդերի օգտագործման ձևերի ու մեթոդների մասին: 1914-ի վերջին բոլոր չորս գնդերը պատրաստ էին ճակատ մեկնելու համար:

Առաջինը ռազմաճակատ մեկնեց Դրոյի (Դրաստամատ Կանայան, 1884-1956) երկրորդ գունդը՝ 1914 թվականի հոկտեմբերի 24-ին: Դուրս գալով Թիֆլիսից՝ գունդը շարժվեց դեպի Իզդիլ, որը Դրոյի ծննդավայրն էր: Այստեղից գունդը խորանալու էր դեպի Արևմտյան Հայաստան՝ Իզդիլ-Բայազետ-Բերկրի-Վան ուղղությամբ:

Երկրորդը ռազմաճակատ մեկնեց Համազասպի (Համազասպ Սրվանձտյան, 1873-1921) գլխավորած երրորդ գունդը՝ Կաղզվան-Ալաշկերտ-Բիթլիս ուղղությամբ, 1914-ի նոյեմբերի 1-ին:

Երրորդը Սարիզամիշ–Էրզրում գծով շարժվեց Չորրորդ գունդը՝ նոյեմբերի 6–ին, Քեռիի (Արշակ ԳավաՖյան, 1858–1916) հրամանատարությամբ:

Առաջին գունդը, որը թվակազմով ամենամեծն էր լինելու, կազմավորվելու էր Պարսկաստանի Սալմաստ գավառում, որին ձեռնամուխ էր լինելու Անդրանիկը (Անդրանիկ Օզանյան, 1865–1927)՝ բժիշկ Հակոբ Ջավրիկի և Սամսոն Հարությունյանի հետ միասին:

Ըստ Դրոյի կյանքն ու գործն ուսումնասիրած պատմաբան Համլետ Գևորգյանի՝ Երկրորդ գունդը կազմավորվել է հենց Իգդիրում (Հ. Գևորգյան, Դրո, Երևան, 1991, էջ 29): Մեր կարծիքով Իգդիրում հավանաբար տեղի է ունեցել գնդի սոսկ համալրում: Գնդի կազմում էին Յապոնի (Հովհ. Պարոնյան) և Գանձակեցի Ջենյակի (Հարություն Նանույան) հեծյալ 50–յակները, Կարբեցի Օճեի (Հովհ. Մելքոնյան), Խոսրով Եղիազարյանի, Բաշգյառնեցի Մարտիրոսի (Մարտիրոս Աբրահամյան), Գանձակեցի Դալի Ղազարի, թիֆլիսեցի Ռիժա Տիգրանի հետևակային հարյուրյակները: Դրոյի օգնականներն էին Գարեգին Նժդեհը, Արմեն Գարոն, Դաշնակցական Խեչոն:

Դրոյի գունդը, որը գործելու էր գեներալ Նիկոլանի զորախմբի կազմում, հրամանատարությունից առաջադրանք ստացավ անցնել Հայկական պար լեռնաշղթան և կոտրելով թափառես լեռան բարձունքներում ամրացած թշնամու դիմադրությունը՝ հարձակվել Վանի ուղղությամբ: Փայլուն կերպով կատարելով այդ առաջադրանքը, Դրոն ամրանում է Կավրե–Շամե գյուղում: Այստեղ նրան հասնում է գեներալ Նիկոլանի հրամանը՝ անհապաղ նահանջելու մասին: Բանն այն է, որ ապաշնորհ գեներալ Աբաղիսի զորախմբի նահանջի հետևանքով վտանգվել էր գեներալ Նիկոլանի զորախումբը, որի առաջապահը Դրոյի գունդն էր: Դրոն վճռում է չկատարել Նիկոլանի հրամանը և ճակատամարտ տալ տասնապատիկ գերազանցող հակառակորդին: Սկսվում է անհավասար մարտը: Ականատեսների վկայությամբ՝ Դրոն, գլուխը ծիու ականջների մեջ դրած, գնդակների տարափի տակ նետվում է դիրքից դիրք, քաջալերում մարտիկներին: Հայ կամավորների անօրինակ հերոսության շնորհիվ Կավրե–Շամեի ճակատամարտն ավարտվեց թուրք–քրդական հրոսակների անկանոն փախուստով: Գակատամարտի ավարտին, սակայն, Դրոն ծանր վիրավորվեց և փոխադրվեց թիֆլիսի Արամյան հիվանդանոց: Կամավորական Երկրորդ գնդի հրամանատարությունը ժամանակավորապես ստանձնեց Արմեն Գարոն: Հիվանդանոցում թիֆլիսի

քաղաքագլուխ Ալ. Խատիսյանի ուղեկցությամբ Դրոյին այցի եկավ Նիկոլայ 2–րդ ցարը և նրան շնորհեց Գեորգիևյան զինվորական խաչ՝ քաջության համար:

Սարիզամիշի ճակատամարտից հետո հայ կամավորական խմբերը կազմալրելու նպատակով տեղափոխվեցին քիկունք և նրանցից յուրաքանչյուրի թվակազմը հասցվեց 1000–ի: Պահի հրատապ խնդիրը տեղ–տեղ գեների դիմած արևմտահայությանը և մորթատվող անպաշտպան ժողովրդին օր առաջ օգնության հասնելն էր, որը կարելի էր իրականացնել կամավորական խմբերը միավորելու և առավել կարևոր Վան–Մուշ, Վան–Բիթլիս ուղղություններում կենտրոնացնելու միջոցով: Հայ Ազգային Բյուրոյի պահանջով կամավորական Երկրորդ, Երրորդ և Չորրորդ խմբերը միավորվեցին Հինգերորդ խմբին և Խանասորա Վարդանի ընդհանուր հրամանատարությամբ կազմվեց «Արարատյան ջուկատ» զորախումբը, որն իբրև գեներալ Նիկոլանի զորամասի առաջապահ՝ պիտի գործեր Իգդիր–Բերկրի–Վան ուղղությամբ:

Երկամսյա բաժանումից հետո Դրոն 1915–ի փետրվարի վերջերին վերստանձնեց Երկրորդ կամավորական գնդի հրամանատարությունը, իսկ նրա օգնական է նշանակվում Գարեգին Նժդեհը: 2–րդ վաշտի հրամանատարությունը հանձնվեց Ղազար Քոչարյանին (Քաչալ Ղազար): Ապրիլի 15–ին գունդը Երևանից մեկնում է Էջմիածին, ստանում Ամենայն Հայոց կաթողիկոս Գևորգ 5–րդի օրհնությունը և ապա շարժվում Իգդիր: Այստեղ Վանից ստացվում է Արամի նամակը՝ անհապաղ օգնություն հասնելու խնդրանքով, որից հետո Արարատյան գունդը, որի կազմում էր Դրոյի զորախումբը, անմիջապես ուղղություն է վերցնում դեպի Վան: Ապրիլի 26–ին Դրոյի զորախումբը մոտենում է թշնամու կողմից ամրացված Բերկրի քաղաքին: Տեղացող առատ ծյունը և քանդված կամուրջը չեն արգելակում Դրոյի քաջերին՝ ձիերով անցնել սառցակալած գետը, ջախջախել թշնամուն և գրավել Բերկրին: Չսպասելով գեներալ Նիկոլանի հիմնական ուժերին՝ Դրոյի զորախումբն արշավում է Վան տանող ճանապարհի հաջորդ արգելապատնեչի՝ Շեխկալե գյուղի վրա: Նրա զորախմբին զուգահեռ դեպի Վան էին արշավում նաև Համազասպի և Քեռու զլխավորած զորախմբերը: Գրավելով Շեխակալե և Ջանիկ գյուղերը՝ Դրոն արագորեն մոտենում է Վանին: Թուրքերն ստիպված վերացնում են քաղաքի պաշարունը և նահանջում, իսկ քաղաքի պաշտպանները հրդեհում են թուրքական քաղամասերը:

Մայիսի 2-ի առավոտյան Դրոյի զորախմբի առաջապահ ջոկատը Դաշնակցական խեչոյի և Դալի Ղազարի գլխավորությամբ սրարշավ մտնում է Վան: Մի քանի ժամ անց քաղաք են մտնում նաև կամավորական երկրորդ գնդի մյուս վաշտերը և արժանանում վանեցիների ցնծագին ընդունելությանը: Ինքը՝ Դրոն, հանդես եկավ կարճ և ազդու ճառով և հրամայեց հրացանային հինգ համագարկով ազդարարել Վանի ազատագրումը:

Երկու օր անց Վան մտան Համազասպի և Քեռու 3-րդ և 4-րդ գնդերը ու գեներալ Լիկոլանի զորագնդերը, իսկ ավելի ուշ Վան հասավ նաև Անդրանիկի գունդը:

Վանում Դրոն այցելում է իր վաղեմի ընկերոջ՝ Լեռնապարի մարտական ուժերի կազմակերպիչ ու առաջնորդ, թուրքերի կողմից դավադրաբար սպանված Վանա Իշխանի այրում: Նրա հանձնարարությամբ հայ զինվորները Հիրճ գյուղում հայտնաբերում են Իշխանի ու նրա զինակիցների դիակները և ամփոփում Վանի գերեզմանատանը:

Վան մտնելուց մի քանի օր անց Դրոյի գունդը օգնության շտապեց ինքնապաշտպանության դիմած Շատախի և Մոկսի հայությանը: Դա կապված էր լուրջ դժվարությունների հետ, որովհետև Շատախ տանող ուղին անցնում էր քրդերով խիտ բնակեցված Գորանի դաշտավայրով, որտեղ կարելի էր մուտք գործել կիրճերով անցնող միակ ճանապարհով: Այնժամ Դրոն կարգադրում է Ղազար Քոչարյանի վաշտին՝ շրջանցել ամրություններն ու հարվածել թշնամու թիկունքին: Թուրք-քրդական ուժերը, ընկնելով երկկողմանի կրակի տակ, դիմում են փախուստի: Թափանցելով Գորանի դաշտ՝ Դրոյի քաջերը արագորեն գրավում են քրդական բոլոր գյուղերը և մոտենում ամենաուժեղ ամրությանը՝ Աղվուտ գյուղին, որի գրավման համար հարկավոր է լինում մի քանի ժամ միայն: Այնուհետև հայ կամավորները մտնում են հայկական Սևտիկին գյուղը: Դրանից հետո թուրքերը դադարեցնում են Շատախի 45-օրյա պաշարումը և դիմում փախուստի: Մայիսի 12-ին, կամավորական երկրորդ գնդի գլուխ անցած, Դրոն հաղթականորեն մուտք է գործում Շատախ գավառի ինքնապաշտպանության կենտրոն թաղ գյուղը: Դրոյի նախաձեռնությամբ Շատախի ինքնապաշտպանության հրամանատարներ Սամվել Պետրոսյանի և Տիգրան Բաղդասարյանի գլխավորությամբ կազմվում է գավառի կառավարություն և ոստիկանություն, որոնք անմիջականորեն պիտի ենթարկվեին Արամ Մանուկյանի նահանգապետությանը:

Սեկ շաբաթ անց Դրոյի զորամասերը շարժվում են դեպի Մոկս, ուր տեղի հայությունը, կենտրոնանալով մի քանի կետերում, օրհասական կռիվ էր մղում թուրքերի ու քրդերի դեմ: Հայ կամավորները միաժամանակյա հարձակմամբ գրավում են Մոկսը, Սոքան և Սպարկերտ գյուղերը: Զուգահեռաբար Քեռին և Համազասպը միացյալ ուժերով գրավում են Ոստանը:

Ազատագրելով Վանա լճի հարավային շրջանները, հայ կամավորական գնդերը մոտենում են Ռշտունյաց գավառի Սուրբ և Դատվան քաղաքներին, որոնց գրավումով բացվելու էին Տարոն, Սասուն և Բիթլիս տանող ուղիները: Հայկական կամավորական չորս գնդերը մտցվեցին գեներալ Տրուխիմի զորախմբի կազմում:

Հունիսի վերջերին հայկական չորս գնդերը միահամուռ գրոհում էին լավ ամրացված Սուրբը: Հաջորդ օրը՝ հուլիսի 1-ին, հայ կամավորները գրավում են քաղաքը, իսկ թշնամին նահանջում է Դատվան: Ցավոք, գեներալ Տրուխիմը միայն երեք օր անց՝ հուլիսի 4-ին, հրաման տվեց Դատվանը գրոհելու մասին, որը հնարավորություն ընձեռեց հակառակորդին՝ ամրանալ դիրքերում: Այդ էր պատճառը, որ թշնամուն նահանջի հարկադրել հաջողվեց երկօրյա համառ կռիվներից հետո միայն: Կանոնավոր մարտաշարքերով նահանջող թշնամուն հետապնդելիս Գրգուռ լեռան մերձակայքում գոհվեց Հայոց Ազատամարտի նշանավոր դեմքերից մեկը՝ Դաշնակցական խեչոն: Այնուհետև Դրոն գրավեց Դատվանի նավահանգիստը, իսկ Անդրանիկի մարտիկները ներխուժեցին քաղաք: Դրոյի զորքերը հասնում են Աղբյուր Սերոբի ճննդավայր Սոխորդ, իսկ Անդրանիկի, Քեռու և Համազասպի գնդերը շարժվում են Նեմրուք լեռան և Բիթլիսի ուղղություններով:

Դրոն պահանջում էր թեկուզև միայն հայկական զորագնդերով արշավել Տարոն ու Սասուն, ուր ժողովուրդը օգնության սպասումներով դեռևս շարունակում էր դիմադրությունը, սակայն Տրուխիմին փոխարինած գեներալ Թ. Նազարբեկովը հրավիրում է խորհրդակցություն և Մանակերտում հայտնված թուրքական մեծաքանակ ուժերի հայտնվելու պատճառաբանությամբ հրամայում է թողնել գրաված տարածքները և նահանջել:

1915 թ. հուլիսի 15-ին երկու ուղղություններով սկսվեց ռուսական զորքերի զանգվածային նահանջը: Նահանջի առաջին թևը ձգվում էր Դատվան-Սուրբ-Ոստան-Վան-Արճակ-Սարայ-Իրան ուղղությամբ: Երկրորդ թևը նահանջում էր Ախլաթ-Արճեշ-Բերկրի-Աբաղայի

դաշտ—Կովկաս գծով: Դրոն և Անդրանիկը պիտի նահանջեին այս ուղ-
ղությամբ:

Եթե հարձակման ժամանակաշրջանում հայ կամավորական գն-
դերը գտնվում էին առաջապահների շարքերում, ապա այժմ նրանք
գտնվում էին վերջնամասում և ապահովում էին մյուս զորամասերի ու
գաղթականության նահանջը:

Հայ գաղթականների հսկայական բազմությունը հուլիսի 23—ին
հասավ Բերկրի: Նրանց հետապնդում էին թուրքական զորքերն ու քր-
դական հրոսակները: Գաղթականության նկատմամբ անտարբեր վերա-
բերմունքի հետևանքով ռուսական զորքերն ու Անդրանիկի գունդը բա-
վականին առաջ էին անցել, իսկ Վարդանի անփուլթ դեկավարման
հետևանքով Համազասպի և Քեռու զորագնդերը Արարատյան ջոկատի
կազմում անցել էին Պարսկաստան: Բերկրին կարող էր վերածվել բազ-
մահազարանոց գերեզմանոցի, եթե թշնամու հետ օրհասական մարտի
բռնված Վասպուրականի, Մոկսի և Շատախի մարտիկներին օգնության
չհասներ Դրոյի զորագունդը: Հուլիսի 23—ին հասնելով մարտադաշտ՝
Դրոն, որի հետ էին մասնակցում ու Մեսրոպը, հրամայում է Մարտիրոսի,
Ղազարի և Յապոնի վաշտերին՝ անհապաղ գրավել Բերկրիի կիրճն ու
իշխող բարձունքները: Մղելով երկօրյա կենաց և մահու կռիվ՝ Դրոն
հնարավորություն է ընձեռում տասնյակ հազարավոր գաղթականների
մեծ մասին Բերկրիի կիրճով դուրս գալ Արաղայի դաշտ ու փրկվել
ստույգ կործանումից: Դժբախտաբար, Բերկրիի շրջակայքում թուրքերի
և քրդերի հարձակումներին զոհ գնացին մեծ թվով գաղթականներ: Հու-
լիսի վերջին Դրոն գաղթականության հետ միասին հասնում է Իգդիր:
Նա համառորեն պահանջում էր հրամանատարությունից՝ թույլ տալ ան-
հապաղ արշավել Տարոնի և Սասունի վրա, որտեղ ժողովուրդը դեռ մա-
քառում էր և օգնության դեպքում կարող էր փրկվել: Սակայն, ցավոք, մա-
այրպիսի թույլտվություն ստացավ միայն շաբաթներ անց, երբ ռազմա-
կայան հասած Ռուբեն Տեր—Միմասյանը և Վահան Փափազյանը գուժե-
ցին Տարոնի և Սասունի հայության ինքնապաշտպանության դադարեց-
ման մասին:

1916 թվականի սկզբներին Կովկասյան բանակի հրամանատա-
րությունը մարտական խոշոր զործողություններ է նախապատրաստում
էրզրում—Մուշ—Բիթլիս ուղղություններում: Այստեղ են կենտրոնացվում
մասնա կամավորական գնդերը, որը նրանց 3—րդ արշավանքն էր դե-
պի Արևմտյան Հայաստան:

1916 թվականի հունվարի 6—ին Դրոյի գլխավորած Երկրորդ գուն-
դը Մանազկերտի մոտ գետանցում է Եփրատը և ուղղություն վերցնում
Ղեպի Խնուս, ուր մտնում է հունվարի 12—ին: Փետրվարի 5—ին Դրոյի
գունդը առաջինն է մարտերով մտնում Մուշ, իսկ երկու օր անց Դրոն
բարձրանում է Սասուն, լինում Առաքելոց վանքում: Դրոյի մարտիկները
հավաքում էին լեռների ծերայերում թաքնված ու հրաշքով փրկված հա-
յերի բեկորներին:

Մուշի գրավումից հետո Երկրորդ կամավորական գնդի հրամա-
նատարությունը հանձնվում է գնդապետ Եգոր Տեր—Ավետիսյանին, իսկ
Դրոն հիվանդության պատճառով տեղափոխվում է թիկունք: Նրա բա-
ցակայության ժամանակ գունդը տեղափոխվում է Բիթլիսի ճակատ,
համգործակցում Անդրանիկի գլխավորած 1—ին գնդին, և մարտի 3—ին
Բիթլիսը գրավվում է, որից հետո գունդը կրկին վերադառնում է Մուշ:

Ապրիլի 3—ին գունդ է վերադառնում ապաքինված Դրոն և հաջորդ
օրը գրոհի է տանում իր վաշտերին: Վերջին անգամ Դրոյի գունդը
Արևմտյան Հայաստանի տարածքում կռիվ է մղում Կազմազյադուկ բնա-
կավայրի մոտ կուտակված թշնամու դեմ:

Նույն 1916—ին հայկական կամավորական գնդերի կազմացրու-
մից հետո, որոնք վերակազմավորվեցին ռուսական բանակի հրածգա-
յին գումարտակների, Դրոն, կտրականապես մերժելով ռուսական բա-
նակային ծառայությունը, գալիս է Կովկաս: Փետրվարյան հեղափոխու-
թյունից հետո Դրոն շտապում է Թիֆլիս և հայտնվում ծավալվող իրա-
դարձությունների կենտրոնում:

Անդրանիկի գլխավորած Առաջին գունդը պետք է գործեր Կովկա-
սյան բանակային կորպուսի կազմում, որի հրամանատարն էր ազգու-
թյամբ հայ գեներալ Պյոտր Իվանովիչ Օգանովսկին:

Անդրանիկն իր զինակիցների հետ միասին 1914 թ. հոկտեմբերի
19—ի ուշ երեկոյան Թիֆլիսից գնացքով մեկնեց Ղեպի Պարսկաստան:
Նրա մեկնման արարողությունը վերածվեց խանդավառ ցույցի: Առաս-
պելական հերոսին ողջերթ մաղթելու էին եկել հազարավոր հայեր: Հոկ-
տեմբերի 21—ին Անդրանիկը հասավ Ջուլֆա (հին հայկական Ջուղա
գյուղից երեք կիլոմետր հեռու): Հոկտեմբերի 22—ին կամավորներն
ստացան հրացաններ, իսկ հոկտեմբերի 23—ին ուղևորվեցին Ղեպի
Պարսկաստան: Հոկտեմբերի 25—ին նրանք հասան Խոյ, ապա՝ Սալ-
մաստ գավառը: Բաֆֆու ծննդավայր Փայաջուկ գյուղում Անդրանիկին
ցույց տրվեց փառահեղ ընդունելություն: Անդրանիկը Ուրմիա լճի հյու-

սիս—արևմուտքում գտնվող Ղալասար գյուղը ժամանեց հոկտեմբերի 29—ին, որտեղ անմիջապես սկսվեցին գնդի ձևավորման ու վերջնական կազմավորման աշխատանքները: Հաղթահարելով մեծագույն դժվարություններ՝ կադրային զինվորական հրահանգիչների բացակայություն, երթային և խոհանոցային պարագաների պակաս և այլն, նոյեմբերի 2—ին Առաջին կամավորական գնդի ձևավորումը հիմնականում ավարտվեց: Գնդի կազմում կար 1200 հոգի: Այն բաղկացած էր չորս վաշտից՝ յուրաքանչյուրում 250 կամավոր: Վաշտերի հրամանատարներն էին սասունցի Սմբատ Բորոյանը (Մախլուտո), բաբերդցի Սեպուհը (Արշակ Ներսիսյան), ախալցխեցիներ Արտաշես Սուճյանը և Նիկոլ Տեր—Հակոբյանը: Գունդն ուներ նաև 100 հոգուց բաղկացած հեծյալ առաջապահ խումբ՝ գյումուշխանեցի Ավոյի հրամանատարությամբ: Գնդի բժշկական բաժինը ղեկավարում էր բժիշկ Հակոբ Չավրիսը, սանիտարական կազմը՝ բժ. Տեր—Թումասովը, պարենավորման բաժինը՝ Պարույր Լևոնյանը: Կար բեռնակիր գումակ: Անդրանիկի անմիջական օգնականներն էին եվրոպական կրթություն ստացած ուրֆացի Մ. Նալբանդյանը, օրդուցի Նիկողոսյանը, տրապիզոնցի Վարդանը, Երվանդ Խաթանասյանը:

Անդրանիկի գունդը մտցվեց զեներալ—լեյտենանտ Ֆյոդոր Գրիգորևիչ Չեռնոզուբովի ջոկատի մեջ, որը կոչվում էր Ատրպատականյան կամ Ադրբեջանական ջոկատ (նկատի էր առնված Պարսկական Ադրբեջանը) և որի դիվիզիաներից մեկի հրամանատարը Թովմաս (Ֆոմա) Հովհաննեսի Նազարբեկյանն էր:

1914 թ. նոյեմբերի 3—ին Անդրանիկի գունդը զեներալ Չեռնոզուբովի հրամանով շարժվեց դեպի Դիլման: Առաջին մարտական մկրտությունը գունդն ստացավ Աշնակ գյուղի մոտակայքում՝ նոյեմբերի 7—ին սրընթաց հարձակմամբ գրավելով թշնամու դիրքերը և ապա՝ Պուրուշուրան գյուղն ու լեռնանցքը: Գններալ Չեռնոզուբովը այդ առթիվ հեռագիր ուղարկեց Ամենայն Հայոց կաթողիկոսին, որտեղ հիացմունքով էր խոսում Անդրանիկի կամավորների քաջագործությունների մասին: Հետաքրքրական է, որ այդ մարտերը տեղի էին ունենում պատմական Արաուլ լեռան փեշերին, ուր 451 թվականին տեղի էին ունեցել հայ—պարսկական վճռորոշ կռիվները (Հ. Միմոնյան, նշվ. աշխ., էջ 398): Նոյեմբերի 8—ին Խանիկ գյուղը գրավելուց հետո Անդրանիկի գունդը մտցվեց զեներալ Թ. Նազարբեկյանի դիվիզիայի կազմի մեջ: Նոյեմբերի 15—ին գունդը առաջադրանք ստացավ գրավել թուրք—պարսկական սահմանագծի վրա գտնվող Կոթուրի լեռնանցքը, որը խոյից դեպի Վան

տանող միակ անցուղին էր: Այդ առաջադրանքը նույնպես պատվով կատարվեց, որից հետո Անդրանիկի գործառն մտավ Թուրքիայի տարածքը: Դեկտեմբերի 4—ին հայ կամավորները գրավեցին քրդական Պելեճուկ և Բելեգյանուկ գյուղերը, որի համար Անդրանիկը պարգևատրվեց ոսկե թրով:

1914—ի դեկտեմբերի 24—ին զեներալ Չեռնոզուբովը նույնպես նահանջի հրաման ստացավ, որը մեծ դժգոհությամբ ընդունեցին Անդրանիկն ու նրա կամավորները: Նրանք նահանջեցին մինչև Կոթուր, իսկ հետո հրամայվեց նահանջել մինչև Ջուլֆա: Կանգ առնելով խոյից ոչ հեռու հայկական Սեիդվար գյուղում՝ Անդրանիկը գնդի ստորաբաժանումների առջև հանդես եկավ մի սրտառու ճառով՝ կոչ անելով նահանջից չընկճվել ու չհուսահատվել, քանի իրենց հետ են մեծ Ռուսաստանի քաջարի բանակները: Ճառի բովանդակությունը վերադարձված է «Արմյանսկի վեստնիկում» (Հ. Ս. էջ 417): Ուրեմն Անդրանիկի իրական ու մնայուն վերաբերմունքը Ռուսաստանի հանդեպ ահա այդպիսին էր, իսկ նրա զայրույթը ռուսական ապաշնորհի հրամանատարների դեմ՝ սոսկ ռուսական պոռթկում պետք է համարել:

Տասնօրյա հանգստից հետո 1915—ի հունվարի 9—ին Անդրանիկի գունդը նորից կռվի դաշտ մեկնելու հրաման ստացավ Թավրիզի ուղղությամբ: Հունվարի 13—ին գունդը մտավ Մարանդ քաղաքը, իսկ հաջորդ օրը շարժվեց դեպի Սոֆիա՝ մասնակցելու այստեղ սկսված կռվին: Ինքը՝ Անդրանիկը, այդ ժամանակ Թիֆլիսում էր և փետրվարի 23—ին միայն հասավ խոյ: Ապրիլին նա հրաժարական ներկայացրեց՝ խանասորի Վարդանին Արարատյան գնդի հրամանատար նշանակելու կապակցությամբ: Վեճը հարթեց այստեղ ժամանած Ռոստոմ Զորյանը:

Անդրանիկի մղած բոլոր մարտերից ամենափայլունը Դիլմանի ճակատամարտն էր, որտեղ հայ կամավորները դրսևորեցին աննախադեպ խիզախություն:

1915 թ. ապրիլի սկզբին թուրքերը շոջապատեցին Դիլմանում գտնվող գնդապետ Նազիկի 6—րդ գունդը: Նազիկը հեռագրով օգնություն խնդրեց Չեռնոզուբովից, իսկ վերջինս հրամայեց Անդրանիկին՝ անհապաղ օգնության հասնել Դիլմանում պաշարված ռուսական զորամասերին: Ապրիլի լույս 16—ի գիշերը Ավոյի ու Սմբատի վաշտերը շտապեցին Դիլման: Եթե չհաջողվեր կանգնեցնել թուրքերին, ապա նրանք կարող էին արագ հասնել Արաքսի ափը: Ապրիլի 15—ին այստեղ եկավ հրաձգային բրիգադի հրամանատար, զեներալ—մայոր Թ. Նազարբեկո-

վր: Չեռնոզուբովի մոտ տեղի ունեցած խորհրդակցությունում որոշվեց Դիլմանի ճակատում թշնամու առաջխաղացումը կանգնեցնելու խնդիրը դնել Նազարբեկովի վրա: Նրա տրամադրության տակ դրվեց Սալմաստի դիվիզիան՝ բաղկացած 8.000 հոգուց: Ապրիլի 16-ին նրան միացան նաև Անդրանիկի 1000 կամավորները: Ապրիլի 18-ին ճակատամարտն սկսվեց: Ռուս զինվորները և հայ կամավորները դիրքեր էին գրավել Դիլմանից հյուսիս ձգվող Մուհանջիկի լեռնաշղթայի ցածրադիր բարձունքների վրա: Անդրանիկի ցուցումով հիսունապետ Կարոն ամրացավ Սալմաստի ողջ դաշտի վրա իշխող մի մեծ ժայռի կատարին, որը հին ֆիդայու ճշգրիտ գնահատմամբ վճռորոշ էր լինելու: Երբ տասնապատիկ ավելի թուրքերի դեմ Նազարբեկովը օգնություն խնդրեց Օգանովսկուց, վերջինս պատասխանեց. «Ունենալով Անդրանիկին՝ ձեր ուժերը տասնապատկվում են» (Յ. Ս. էջ 439): Անդրանիկը դիրքից դիրք էր սլանում ձիու վրա, քամուց ինչպես արծվի թևեր շինելի փեշերը բացված: Նա իջնում էր ձիուց, վիրավոր զինվորից վերցնում հրացանը, պառկում նրա կողքին, անվրեպ կրակում, ապա նորից սլանում էր ուրիշ դիրքեր, ոգեշնչում նրանց: Սկսվեց թուրքական առանձին զորամասերի նահանջը, որը շուտով ընդգրկեց Խալիլի ամբողջ բանակը, որն էլ ի վերջո վերածվեց անկանոն փախուստի: Մի քանի ժամ անց ռուսական զորքը առանց դիմադրության հանդիպելու մտավ Դիլման: Հաղթանակը լիակատար էր: Թուրքերը տվեցին 3000 սպանված և 1500 վիրավոր: Միայն հայ կամավորները ոչնչացրել էին 700 ասկյար, իսկ իրենք տվել էին 30 սպանված և 50 վիրավոր: «Դիլմանի ճակատամարտը հայոց զենքի փառահեղ ստեղծագործություններից մեկն է, — գրում է ակադեմիկոս Գ. Սիմոնյանը: — Այն մեկ անգամ նս ցույց տվեց, որ զինված հայ մարդը կարող է անկարելի կարելի դարձնել» (էջ 446): Դիլմանի ճակատամարտը Սարիղամիշի նման խափանեց թուրքերի արշավանքը դեպի Կովկաս և ի չիք դարձրեց Երիտթուրքերի հերթական պանթուրքական պլանը:

Գեներալ Նազարբեկովը հենց ապրիլի 18-ի ուշ երեկոյան, երբ դեռ նոր էր վերջացել ճակատամարտը, միջնորդագիր ուղարկեց կորպուսի շտաբին՝ Անդրանիկին Գեորգիևյան զենքով պարզևատրելու մասին: Երկու օր հետո ստացվեց Չեռնոզուբովի հեռագիրը, որով շնորհակալություն էր հայտնում Անդրանիկին ու նրա զորամասին՝ մարտական սխրագործության համար:

Դիլմանի ճակատամարտից հետո Խալիլ փաշան շարժվեց դեպի Վան, սակայն Անդրանիկը, առանց Նազարբեկովի թույլտվության, սե-

փական նախաձեռնությամբ գրավեց Բաշկալեի բարձունքները և փակեց թուրքերի ճանապարհը դեպի Վան:

Ապրիլի 23-ին Անդրանիկին ներկայացավ Վանից պաշարման օղակից հրաշքով դուրս եկած մի սուրհանդակ և նրան հանձնեց կտորի վրա գրված երկու նամակ, որոնցով խնդրվում էր անհապաղ օգնության հասնել օրհասական դրության մեջ գտնվող Վանի պաշտպաններին: Ռուսական զորամասերի հետ համատեղ կռիվներ մղելով Վանի շրջակայքում՝ Բաշկալեում, Չուխկետուկում, Առակում, Սուֆլյանում, Օմարխուլանում, Մերվանայում (այստեղ մի գնդակ մտավ Անդրանիկի ձախ կոշիկի մեջ), Հայկական Առաջին գունդը հետապնդեց Խալիլին մինչև Ջուլաներիկ՝ Ասորեստանի կենտրոնը, որտեղից էլ շրջվեց հյուսիս և ուղղություն վերցրեց դեպի Վան:

Հունիսի 3-ին Անդրանիկի կամավորական գունդը մտավ Վան, որին դիմավորեց Վանի նահանգապետ Արամ Մամուկյանը և ողջ ազգաբնակչությունը: Ստացվեց գեներալ Տրուխիմի շնորհավորական հեռագիրը՝ մարտական փայլուն գործողությունների համար:

Տասն օր Արտամետ գյուղում հանգստանալուց հետո Անդրանիկի զորամասը հունիսի 12-ին հասավ Ոստան և հունիսի 14-ին միացավ Տրուխիմի ջոկատին: Դրոյի և Քեռու կամավորների հետ համագործակցված մարտեր մղելով՝ հուլիսի 6-ին Անդրանիկը մտավ Դատվան գյուղը: Այնուհետև դարձյալ մարտերով հայ կամավորները հասան մինչև Ախլաթ և Աղիլջնագ:

Նահանջ: Կամավորական զնդերի այդ փայլուն հաջողությունների օրերին գեներալ Նազարբեկովը Անդրանիկին ու Դրոյին հայտնեց, որ գեներալ Օգանովսկին հրամայել է նահանջել, պատճառաբանելով, թե թուրքական 11 դիվիզիա է գալիս ընդառաջ, որոնց դիմադրելն անհնար է: Անդրանիկն այդ հրամանը համարեց դավաճանություն և հայության համար կործանարար: Ակադեմիկոս Գ. Սիմոնյանը գտնում է, որ ռուսական զորքի նահանջի մեջ պատասխանատվության իր բաժինն ուներ Կովկասյան բանակի շտաբին կից հետախուզության աշխատող, պրապորշչիկ Տիգրան Տևոյանցը: Չափազանցված զգուշություն դրսևորելով՝ նա հրամանատարությանը տագնապալի ու խուճապահար գաղտնի տեղեկագիր ներկայացրեց թշնամու տասնմեկ դիվիզիաների իբր սկսած հարձակման մասին: Միաժամանակ նա իրավամբ ավելացնում է, որ խուճապահար հետախույզի տեղեկագիրը չէր կարող վճռորոշ դեր խաղալ: Այս առիթով էր, որ Անդրանիկը բացականել էր. «Այս նահանջը

կատարյալ կեղծիք մըն է: Դուք կուզեք, որ Հայաստան առանց հայու մնա»: Անդրանիկի այս բուսական պոռթկումն արդարացնելու համար մեծարգո ակադեմիկոսը գրում է, թե ցարի հորեղբորորդի, մեծ իշխան Նիկոլայ Նիկոլաևիչը բացմիցս արտահայտվել էր առանց հայերի Հայաստանի մասին, և դա միայն նրա կարծիքը չէր, այլ արքունիքի և կառավարության որոշ շրջանների մտայնությունը: Իբրև հիմնավորում՝ նա մատնանշում է այն փաստը, որ դեռևս 1915 թ. ապրիլին գեներալ Յուդե-նիչը Վորոնցով-Դաշկովին գրել էր, որ Արևմտյան Հայաստանը գրավելուց հետո անհրաժեշտ է այնտեղ ստեղծել ռուսական բնակավայրերի մի շղթա, որն ընկած լինի ռուս-թուրքական սահմանի երկայնքով: Նա առաջարկում էր այդ նպատակով Դոնից ու Կուբանից այստեղ տեղափոխել մեծ թվով կազակների ընտանիքներ (էջ 465): Համաձայն ենք՝ իրոք այդպիսի ծրագրեր մշակվել են և նույնիսկ անհաջող փորձեր են արվել դրանք իրականացնելու: Բայց արդյո՞ք դա նշանակում էր, որ կազակները պետք է բնակեցվեին հենց հայերի բնակավայրերում և անպայման հայերին այնտեղից տեղահանելու պայմանով: Մեր համոզմամբ՝ ամենևին ոչ: Հայաստանը հայ տարրից դատարկելը ակնհայտ անմտություն կլիներ հենց Ռուսաստանի շահերի տեսանկյունից: Պարզապես սահմանային այն ծառայությունը, որ կարող էին իրականացնել կազակները, չէին կարող իրենց վրա վերցնել հայերը, բայց նրանք հիանալիորեն կարող էին բնակվել կողք կողքի:

Ինչպես վերևում ասվեց, նահանջն իրականացվելու էր երկու ուղղություններով, որոնցից մեկը ձգվելու էր Վանա լճի հարավային ափերով՝ Ոստան-Վան-Արճակ-Սարայ-Իրան գծով: Անդրանիկի զորամասը նահանջելու էր մյուս՝ Ախլաթ-Աղջավազ-Արճեշ-Բերկրի-Աբաղայի դաշտ ուղղությամբ դեպի Կովկաս: Հուլիսի 14-ին զորամասը հասավ Արճեշ, որտեղ կուտակված էին մշեցի, բուլանուխցի, ախլաթցի 2000 գաղթականներ: Նրանց առաջնորդում էր Անդրանիկի հին զինվոր Ֆիդայի Հասրեթը: Հուլիսի 18-ին Անդրանիկը գաղթականների հետ միասին հասավ Բերկրի: Նույն օրը Վասպուրականի հայկական կառավարությունը ժողովրդի հետ միասին ռուսական հրամանատարության խորհրդով թողեց Վանը: Ակսվեց Վասպուրականի հայության առաջին մեծ ու աղետալի գաղթը: Գաղթականների թիվը հասնում էր 150 հազարի: Վանի, Արճեշի, Շատախի և Մոկսի հայության գաղթը նույնպես կատարվում էր վերը նշված երկու ուղղություններով՝ դեպի Կովկաս և Իրան: Դեպի Կովկաս գաղթող հայության պաշտպանությունը հանձնա-

րարվեց Անդրանիկի և Դրոյի, իսկ դեպի Իրան գնացողներինը՝ Համազասպի և Քեռու գնդերին:

Հուլիսի 22-ին հայ կամավորները և գաղթականները դուրս եկան Բերկրիից և հաջորդ օրը երեկոյան հասան Աբաղայի դաշտը: Հուլիսի 25-ին նրանք հասան Օրգով, իսկ 26-ին՝ Իգդիր: Գաղթը տեղի էր ունենում անտանելի շոգի, փոշու, ամպերի, քաղց ու ծարավի, դարանակալ թուրք ու քուրդ ավազակախմբերի մշտական հարձակումների անասելի ծանր պայմաններում: Ճանապարհներին թողնելով մոտ 50 հազար երեխաների, կանանց ու ծերերի դիակներ՝ գաղթականների տանջահար շարայուները ի վերջո հասան Արարատյան դաշտ՝ լրացնելով այլ շրջաններից այնտեղ կուտակված հազարավոր բոկոտն ու սովահար գաղթականների շարքերը: Ամեն օր էջմիածնի ու Երևանի փողոցներից հարյուրավոր դիակներ էին հավաքում: Տխուր մտորումների առիթ են տալիս Հ. Սիմոնյանի հետևյալ տողերը. «Դժբախտ փախստականներին օգնության ձեռք էին մեկնում ռուսական իշխանությունները: Մեծածավալ օգնություն էր գալիս նաև դրսից, հատկապես Ամերիկայից: Բայց Կովկասի հայ ունևորները քայ անտարբերություն էին ցուցաբերում և առանց սպառնալիքներ կամ նախատիքներ ստանալու չէին բացում իրենց փողի քսակները» (էջ 468): Հեղինակը կատարում է նաև, մեր կարծիքով, մի շատ կարևոր նշում, գրելով, որ ռուսական զորքերի գլխավոր հրամանատարը զորքին հրամայել էր նահանջել միայն ժողովրդի գաղթելուց հետո: Այդ հրամանը կատարվեց, և բանակը Վանը թողեց վանեցիների գաղթից 10 օր հետո՝ հուլիսի 28-ին, ապա փոքր-ինչ նահանջելուց հետո կանգ առավ, և երբ վտանգը համարվեց անցած, վերագրավեց քաղաքը (էջ 469): Ստացվում է, որ հերոսության են բոլոր այն պնդումները, թե ռուսական զորքերը բախտի քնահաճույքին են թողել վասպուրականցի գաղթականներին:

Իգդիրում Անդրանիկը արձակեց իր գունդը, ծիբրը և գույքը հանձնեց տեղի պարետին և հայկական բոլոր կամավորական զորամասերի պետ, գեներալ-մայոր Յուրկևիչից փաստաթուղթ ստանալով մինչև սեպտեմբերի 15-ը արձակուրդում լինելու մասին, օգոստոսի 8-ին իր թիկնապահ Երվանդ Փափազյանի հետ մեկնեց Երևան, այնտեղից էլ օգոստոսի 12-ին հասավ Թիֆլիս: Այստեղ նա Կովկասյան Ազգային Բյուրոյի և Կարգադրիչ մարմնի հորդորներով կոչ արեց հայ երիտասարդությանը՝ նոր զորամաս կազմակերպելու համար հավաքվել Երևանում:

Այն շուտով կազմավորվեց և կոչվեց Առաջին Հայկական զորամաս՝ Անդրանիկի հրամանատարությամբ:

1915 թվականի նոյեմբերի 7-ին Առաջին Հայկական զորամասը ռուսական բանակի հետ միասին հասավ Վան: Նրանց հետ երկիր վերադարձան հազարավոր գաղթականներ: Մի քանի օր անց հայ կամավորներն ուղարկվեցին Արճեշ, որի մատույցներում դեկտեմբերի 27–31-ը հաղթական կռիվներ մղեցին թուրք-քրդական ուժերի դեմ:

1915-ի նոյեմբերի 5-ին Անդրանիկը Կովկասյան բանակի հրամանատարին հրաժարական ներկայացրեց՝ պատճառաբանելով իր զինվորների քաջագործությունները բարձրագույն հրամանատարության կողմից արժանվույնս չգնահատելը և նրանցից ոչ մեկին մարտական պարգևների չներկայացնելը:

1916 թվականի հունվարին Անդրանիկը և հայկական մյուս զորամասերի հրամանատարներն ստացան կամավորական գնդերը ցրելու և դրանք բանակի հրաձգային զուսմարտակների վերածելու մասին Կովկասյան բանակի հրամանատարության 1916 թ. հունվարի 16-ի հրամանը:

1916 թ. փետրվարի 8-ին Հայկական Առաջին զորամասը հրաման ստացավ դուրս գալ Դատվանից և շարժվել դեպի Ռահվի-Ռուրան՝ Բիթլիսի կիրճի մուտքը փակելու առաջադրանքով: Ճակատամարտը Բիթլիսի համար սկսվեց փետրվարի 16-ի առավոտյան: Անդրանիկի երկու վաշտերն ընթանում էին ռուսական զորքի առջևից: Խոր ծյան միջով, թշնամու տեղատարափ կրակի տակ նրանք սկսեցին մագլցել այն լեռների կատարները, որոնք նույնիսկ ամռանը դժվարամատչելի էին: Այդ օրը կամավորները տվեցին 15 սպանված և 55 վիրավոր, բայց թշնամու դիրքերը գրավել չկարողացան: Հետ քաշվելով՝ կամավորները երկու օր հանգստացան Ճվար գյուղում: Ապա հրաման ստացվեց՝ սվինամարտով գրավել Բիթլիսը: Անդրանիկի զորամասը պիտի գործեր աչ թևի ծայրում՝ գնդապետ Ֆիլիպովի հրամանատարության ներքո: Ֆիլիպովի խնդրանքով Անդրանիկը մանրամասն խորհուրդներ տվեց նրան, թե ինչպես հարձակվել: Հարձակումն սկսվեց գիշերվա ժամը 4.30-ին: Դիրքերից դուրս շարտելով թուրքերին, ռուս-հայկական զորասյունը մտավ քաղաք: Թուրքերը կարճ ու անկանոն դիմադրությունից հետո անձնատուր եղան՝ շատերը շապիկ-վարտիքով: Փետրվարի 19-ի լուսաբացին Բիթլիսը գրավված էր: Բիթլիսը Անդրանիկի երկրորդ մեծ հաղթանակն էր՝ Դիլմանից հետո, որի համար նա պարգևատրվեց Սուրբ Վլադիմիրի 4-րդ աստիճանի շքանշանով՝ սրով ու ժապավենով: Շատ կամավորներ

պարգևատրվեցին հուշամեդալով, որի վրա հայերեն և ռուսերեն փորագրված էր. «Տէր կեցոյ գհայս (Թող Տերը պահպանի հայերին)»:

Բիթլիսի գրավումից հետո դեռ չէին չորացել հայ կամավորների շորերը, երբ ստացվեց խմբավորման հրամանատար, մահմեդական գեներալ Աբացիևի հրամանը՝ փետրվարի 20-ին Մշո դաշտ դուրս գալու մասին: Անդրանիկը գրավոր ձևով մերժեց կատարել այդ հրամանը՝ մատնանշելով կամավորների հոգնածությունը: Անդրանիկի խնդրանքով նրա զորամասը հանվեց Աբացիևի ենթակայությունից և հանձնվեց Նազարբեկովին: Անդրանիկը դեպի Մուշ շարժվեց փետրվարի վերջերին, իսկ մարտի սկզբներին համարյա առանց դիմադրության գրավեց Մուշը: Հոգնած և հիվանդ Անդրանիկը, 1916 թ. մարտի 18-ին զորամասի հրամանատարությունը հանձնելով Սմբատին և հրաժեշտ տալով զորամասին, հանգստանալու նպատակով մեկնեց Կովկաս:

Հայկական կամավորական գնդերը ցրելու մասին հրամանը Նիկոլայ 2-րդ ցարը ստորագրել էր դեռևս 1915 թ. դեկտեմբերին: Դրա համար պաշտոնապես վկայակոչվում էր կամավորների ցածր կարգապահությունը: Իրականում իշխանությունները վախենում էին, որ դրանք կարող են ինքնուրույն բանակի վերածվել: Ի վերջո որոշվեց, որ հայկական կամավորական գնդերը ոչ թե ցրվում են, այլ վերակազմվում են ռուսական բանակի հրացանակիր գնդերի, որոնց հրամանատարությունը հանձնվում էր ռուսական բանակի հայազգի զինվորականներին:

1916 թ. սեպտեմբերին, երբ հայկական կամավորական զորամասերը հիմնականում արդեն ցրված էին, Մեծ իշխան Նիկոլայ Նիկոլաևիչը պաշտոնական հրաման արձակեց դրանց լուծարման մասին:

«ԱՅՈՑ ՄԵՆ ԵՂԵՈՆԸ»

Առաջին համաշխարհային պատերազմի ժամանակ հայ ժողովուրդը ենթարկվեց մարդկության պատմության մեջ մինչ այդ չլսված ու չտեսնված ցեղասպանության. երիտթուրքական կառավարողների հանցապարտ ղեկավարությամբ ամենավայրագ ձևերով ու մեթոդներով բնաջնջվեցին մոտ 1,5 միլիոն արևմտահայեր, իսկ նրանց բնօրրան Արևմտյան Հայաստանը լիովին դատարկվեց, վերածվեց ավերակույտի:

Հայ ժողովրդի բնաջնջման անմարդկային պլանը մշակվել էր նախօրոք, իսկ պատերազմի ժամանակ այն կոնկրետացվեց ու իրականացվեց: Երիտթուրքերի հայաջինջ քաղաքականությունը հետևանք էր ոչ թե հայերի ոչ լոյալ վարքագծի, ինչպես ճգնում են ներկայացնել պատմության հին ու նոր կեղծարարները, այլ բռնակալական թուրքիայի մշտապես իրականացվող հայասպանության ամմիջական շարունակությունն էր՝ իր ավարտուն տեսքով: Ուստի ամենևին էլ պատահական չի հնչում Թալեաթի խոստովանությունը՝ «Հայկական խնդիրը լուծելու տեսակետով՝ երեք ամսվա մեջ ես ավելի գործ կատարեցի, քան Արդուլ Համիդը երեսուն տարվա մեջ» (Հ. Մ. էջ 384):

Եղեռնի շարժառիթները: Հայերի բնաջնջման պետական քաղաքականության աստիճանի բարձրացրած ծրագրի հիմքում ընկած էին տնտեսական և քաղաքական նկատառումներ: Հայերը, ըստ թուրքերի պատկերացման, սեպի նման խրվել էին մուսուլմանական աշխարհում, ունեին ռուսական կողմնորոշում և խանգարում էին իրենց պանիսլամական ու պանթուրքական պլանների իրականացմանը: Իրականում՝ իրենք թուրքերն էին Փոքր Ասիայի նվաճմամբ սեպ խրել քրիստոնեական միջավայրում: Կարևոր դեր էր խաղում նաև Հայկական հարցի միջազգայնացումը, որը հնարավորություն էր ընձեռում մեծ տերություններին՝ պատեհ առիթով միջամտելու Թուրքիայի ներքին գործերին: Թուրք բռնակալներին կատաղության էր հասցնում հայ ժողովրդի մղած ազատագրական պայքարը, որը նրա բնական իրավունքն էր:

Դեռևս 1907 թ. դեկտեմբերի 27–29–ը Փարիզում տեղի ունեցած ժողովում Հայ հեղափոխական դաշնակցությունը և Իթթիհատը համաձայնություն կայացրին հետևյալի շուրջ. սուլթան Համիդի գահազրկում, արմատական փոփոխություն վարչաձևի մեջ, խորհրդարանի հաստատում:

1908 թ. հուլիսի 10–ին սուլթանը վերահաստատեց 1876 թվականի Սահմանադրությունը:

1908 թ. սեպտեմբերին Սալոնիկում գումարված Իթթիհատի ընդհանուր ժողովը հռչակեց մի շարք սկզբունքներ՝ թուլատրել քաղաքական կուսակցություններ, ընդարձակել նահանգային վարչական իրավունքները, բոլոր քաղաքացիների իրավունքների և պարտականությունների հավասարություն, ոչ մահմեդականների զինվորագրում, ազատ կրթություն, կրոնական հաստատությունների ազատություն, ազատ ընտրություններ և այլն, որոնք, սակայն, շատ չանցած դրժվեցին: Սկսվեցին ոտնձգություններ կուսակցությունների, լեզուների դեմ, սպառնալիքով արգելվեցին ընդդիմադիր թեկնածուները: 1909 թ. ապրիլի սկզբի Ադանայի ջարդերից հետո ՀՀԴ–ն խզեց իր կապերը Իթթիհատի հետ: Սակայն, նկատի ունենալով տիրող ծանր կացությունը, հայությանն սպառնացող ընդհանուր ջարդի վտանգը չարագործներին զսպելու և ինքնապաշտպանության նպատակով ժամանակ շահելու համար 1909 թ. օգոստոսի 24–ին ՀՀԴ–ն նոր համաձայնության եկավ Իթթիհատի հետ՝ հետևյալ իմաստով. Սահմանադրության կիրարկման, Օսմանյան հայրենիքը անջատումից և բաժանումից զերծ պահելու համար պայքար միացյալ ուժերով և փարատել այն կարծիքը, թե հայերը անկախության են ձգտում (Հ. Ղ. էջ 16):

Սակայն դրանից հետո Իթթիհատը թույլ տվեց ամենամեծ սրիկայությունը: Ատորագրված համաձայնագրի մեկանը դեռ չէր չորացել, երբ Իթթիհատը 1910 թ. հոկտեմբերի 31–ին Սալոնիկում ընդհանուր ժողով գումարեց, որը տևեց 13 օր: Ժողովն ընդունեց կանխամտածված կտրուկ ծրագիր, որը հիմք դարձավ թուրքական կառավարության հետագա ցեղասպանության քաղաքականության, զինվորական բռնի ուժով ոչ թուրք տարրը բնաջնջելու, թուրքական միացյալ պետություն ստեղծելու համար: Այն ուղենիշ եղավ հետագայում քեմալականների ու «դեմոկրատ» թուրքերի համար: Ժողովում բանաձևվեց «Թուրքիան միայն թուրքերի համար» սկզբունքը: Ժողովին մասնակցում էին պանթուրքիզմի ջատագովներ Ահմեդ Ադանը, որն իր սև գործերով հայտնի էր Անդրկովկասում, դոկտոր Ռուսուլխին, Զիա Գյոք Ալիը, Բեհաեդդին Շաքիրը,

Ջահիդը, Թալեաթը, Հաջի Ադիլը և նման այլ չարաշուք անձինք: Ընտրվեց 14 հոգուց բաղկացած գաղտնի Կենտրոնական Կոմիտե, որի անդամները բնաջնջումի արյունարբու զինվորական կամ քաղաքական պետեր էին: Բոլոր ժողովականներն ընդունեցին հետևյալ երդումը. չպատկանել այլ կուսակցության, պահել որոշումների գաղտնիքը, գործել Կոմիտեի որոշումների համաձայն, սպանել Կոմիտեին կամ նրա ծրագրերին դավաճանողներին, երդմնազանցության դեպքում ընդունել Կոմիտեի սահմանած մահապատիժը (Հ. Ղ. էջ 17):

1914–1918 թվականներին արյունահեղ թուրքական ներքին քաղաքականությունը 1910 թվականի նոյեմբերյան գաղտնի ժողովի որոշումների շարունակությունն էր:

Եթե 1908 թվականի Մահմանադրության օրերին Իթթիհատի անդամների թիվը հազիվ 400 էր, ապա 1914–ին այդ թիվը հասավ 350.000–ի, որովհետև այդ կուսակցությանը չպատկանողը որևէ պաշտոն չէր ստանում:

Բալկանյան երկրներից բերվեցին քրիստոնյաների դեմ բուռն ատելությամբ լցված 5.000 թուրք ոստիկաններ և աստիճանակիր զանազան զինվորականներ ու տեղափոխվեցին հայկական նահանգների կենտրոններում, որոնք հետո դարձան ցեղասպանության պետական հսկայական ծրագրի գործիքներն ու գործակալները (Հ. Ղ. էջ 18):

Օսմանյան կայսրությունում թուրքերը մեծամասնություն չէին կազմում, բայց բանակը իրենց ձեռքում էր: Իթթիհատի շարքերն էին ընդունվում ամեն տեսակ խայտաբղետ անձինք՝ աննկարագիր, ստորին դասակարգի տարրեր՝ թիվ, ազդեցություն և ժողովրդականություն ձեռք բերելու համար:

Հայաբնակ վայրերին մոտիկ գետեղվեցին մուհաջիրներ, որոնք նույնպես հետագայում ցեղասպանության գործիք ծառայեցին:

1912 թ. նոյեմբերին Իթթիհատի որոշմամբ գերմանական «Լորդլայ» պահականավոր Արդուլ Համիդը իր չորս կանանցով Սալոնիկից փոխադրվեց Կ. Պոլիս և արգելափակվեց Բոսֆորի ափին գտնվող Պեյլեր Պեյ պալատում: Նա մահացավ պատերազմի ժամանակ՝ 1918–ին, ու Թալեաթը լաց եղավ նրա վրա՝ կորցնելով ջարդարարության իր վարպետին:

Իթթիհատական կուսակցության ուղղությունը մշակողները քառասուն հոգի էին, գրեթե հավասար հեղինակությամբ: Նախապես լայնամտություն կեղծող այդ շեֆերը դարձել էին նեղմիտ, բռնակալ, իրենց ստորագրություններն ուրացող, հակառակորդներին մահվան սպառնա-

լիքով լռեցնող: Հակառակ նրան, որ օսմանյան կայսրության մեջ թուրքերի թիվը 25 տոկոս էր. նրանք փոխանակ «միություն և առաջադիմություն» քարոզելու, միակերպություն և ծուլում ջատագովեցին՝ դառնալով ամբողջատիրական:

1914 թ. օգոստոսի 2–ին կնքվեց 8 կետից բաղկացած թուրք–գերմանական զինակցության գաղտնի պայմանագիր՝ ստորագրված Գերմանիայի դեսպան Ֆոն Վանզենհայմի և Թուրքիայի վարչապետ Սայիդ Հալիմի կողմից: Այդ պայմանագիրը հայերի ցեղասպանության իրականացման կարևորագույն գործոններից մեկը դարձավ:

Ջարդարարական մեքենայի կազմակերպումը: Սարիղամիշի ճակատամարտում կրած պարտությունից հետո 1915 թ. փետրվարի առաջին կեսին գումարվեց Իթթիհատի Կենտրոնական կոմիտեի արտակարգ գաղտնի նիստ, որին մասնակցում էին երիտթուրքական բոլոր հայտնի գործիչները՝ Թալեաթը, Էնվերը, Ջիա Գեռքալիը, Միդիատ Շուքրին, Բեհաեդդին Շաքիրը, Նազըմը, Հյուսեյն Ջահիդը, Կարա Բեմալը, Խալիլը, Հասան Ֆեհմին, Ադա օղլու Ահմեդը, Ջավիդը, Մելան Ջադե Ռիֆաթը: Բացակայում էին միայն Ջեմալը, որն այդ պահին գտնվում էր եգիպտական ճակատում և Կոմիտեի միակ հայ անդամ Պետրոս Հալաջյանը, որից զուլշացել ու չէին հրավիրել: Խորհրդակցությունը բացառապես զբաղվեց հայերի բնաջնջման հարցով: Նիստի ստագրությունը ներկայացված է Մելանգադե Ռիֆաթի «Օսմանյան հեղափոխության մութ ծալքերը և Իթթիհատի հայաջինջ ծրագիրները» գրքում (Երևան, 1990): Իթթիհատի Կենտկոմի պատասխանատու քարտուղար դոկտոր Նազըմը իր ելույթում առաջ քաշեց կայսրության ողջ տարածքը ոչ թուրք տարրերից մաքրագործելու և, մասնավորապես, ողջ հայությանը բնաջնջելու խնդիրը, այն հաշվով, որ ոչ մի հայ չմնա ու այդ անունը մոռացվի: Դրա համար պատերազմն ստեղծել է ամենահարմար պահը, որովհետև թոհուրոհի մեջ պետությունների բողոքի ծայրը չի լավի, իսկ եթե լավի էլ, շուտով մոռացության կտրվի: Նույն ոգով Նազըմին ձայնակցեցին Շաքիրը, Ֆեհմին, Թալեաթը և երիտթուրքական մյուս բորենիները: Երիտթուրքերի գաղտնի խորհրդակցությունը միաձայն որոշում ընդունեց ամբողջ հայության ոչնչացման մասին: Այդ ծրագրի իրականացման կոնկրետ միջոցառումներ մշակելու համար ստեղծվեց երեքի գործադիր մարմին, որի անդամներն էին դոկտոր Բեհաեդդին Շաքիրը, դոկտոր Նազըմը և կրթական նախարար Միդիատ Շյուքրին: Երիտթուրքերի պահանջով սուլթան Մեհմեդ Ռեշադը կայսերական հրամանով 1915 թ. մար-

տի 1–ից մինչև հոկտեմբերի 1–ը արձակեց օսմանյան պառլամենտը, որտեղ կային մաս հայ պատգամավորներ:

Բեհաեդդին Շաքիրի առաջարկությամբ եռյակ կոմիտեն ստեղծեց հայերի բնաջնջման հատուկ կազմակերպություն՝ Թեշքիլաթը մախսուսե, որի գլուխ կանգնած էր Թալեաթը, տեղակալն էր Տիգրանակերտի կուսակալ Ռեշիդ բեյը: Հատուկ կազմակերպությունն ուներ վարչական մարմին, որի մեջ մտնում էին Նազընը, Շաքիրը, Աթըֆը, Ռիզան, Էնվերի հորեղբայր Խալիլը, Ազիզը, Պուլսի իթթիհատական կենտրոնի ղեկավար Ջևադ բեյը: Հատուկ կազմակերպության անմիջական ներկայացուցիչն էր Էնվերի մերձավոր Էշրեֆ բեյը: Հայերի բնաջնջման համար պետք է օգտագործվեին ինչպես զորքն ու ժանդարմերիան, այնպես էլ բանտերից ազատված արյունարբու մարդասպաններից կազմված հրոսակախմբերը, քրդական ավազակախմբերը, չեթենբերը, մահմեդական ֆանատիկ խուժանը, որոնց թիվը հասավ 10.000–ի: Կազմակերպությունը իր ճյուղերն ստեղծեց Թուրքիայի ողջ տարածքում:

Ինչպես նշում է Հայկազն Ղազարյանը «Ցեղասպան թուրքը» գրքում (Բեյրութ, 1968, էջ 37) Թեշքիլաթը մախսուսեն կառավարության և օրենքների միջամտությունից զերծ, իր քայլերի մեջ անկախ և բացառապես երեքի գործադիր մարմնի հրամաններով գործող, իթթիհատական արյունարբու մարդասպաններից ու կողոպտիչներից բաղկացած մի խումբ էր: Ղա կառավարություն էր կառավարության մեջ, կուսակցություն էր կուսակցության մեջ:

Հատուկ կազմակերպության վարչական մարմինը մշակեց հայերի բնաջնջման հետևյալ հիմնական ծրագիրը. 1. թուրքական բանակ զորակոչված հայ զինվորների ոչնչացում, 2. թիկունքի ողջ հայ բնակչության զինաթափում, 3. հայ մտավորականության ձերբակալում, աքսոր և ոչնչացում, 4. բոլոր հայերի բռնագաղթ դեպի Միջագետքի անապատները և նրանց անխնա բնաջնջում:

Որոշվեցին նաև հայերի տեղահանման ու ոչնչացման ժամկետներն ըստ վիլայեթների, սանջակների, քաղաքների ու գյուղերի:

1915 թվականի ապրիլի 15–ին Թալեաթի, Էնվերի ու Նազընի ստորագրությամբ հատուկ հրահանգ ուղարկվեց Օսմանյան կայսրության տեղական իշխանություններին՝ նահանգապետից մինչև գյուղապետեր: Հրահանգով տեղեկացվում էր, որ «Միասնություն և առաջադիմություն» կոմիտեն, առաջնորդվելով պատերազմում անպայման հաղթանակի հասնելու մղումով և նպատակ ունենալով կանխել հայկական

հարցի հետագա առաջադրումը, որոշեց վերջ դնել այդ հարցին, հայերին քշել արաբական անապատները և բնաջնջել այդ խորթ տարրը: Կառավարությունը և Իթթիհատի Կենտրոնական կոմիտեն հրամայում են տրամադրության տակ եղած բոլոր ուժերով աջակցել Իթթիհատի տեղական օրգաններին, որոնք ապրիլի 24–ի արևածագին գաղտնի հրահանգի համաձայն ձեռնարկելու են այդ հրամանի կատարմանը: Խստորեն նախագուշացվում էր, որ ամեն մի պաշտոնական կամ մասնավոր անձնավորություն, որը կընդդիմանա այս «սրբազան ու հայրենասիրական գործին» ու չի կատարի իր վրա դրված պարտականությունները, կամ որևէ ձևով կփորձի պաշտպանել կամ թաքցնել այս կամ այն հային, կճանաչվի իբրև հայրենիքի ու կրոնի թշնամի և դրան համապատասխան կպատժվի (Մ. Ա. էջ 311):

Հայերի բնաջնջման հատուկ լիազորներ կարգվեցին բոլոր հայքանակ վայրերում: Բեհաեդդին Շաքիրն ուղարկվեց արևելյան նահանգներ և հաստատվեց Կարհնում, Ռիզա բեյը մեկնեց Տրապիզոն, իսկ Պուլսում հատուկ հանձնարարականներ ստացավ Ջևադ բեյը, որը համապատասխան զինվորական ուժերով վիլայեթներ էր ուղարկում եռանդուն իթթիհատական զործիչների, սերտ կապեր պահպանում նրանց հետ ու հսկում գործողությունների ընթացքին: Մահվան մեքենան պատրաստ էր, և մնում էր այն գործի դնել:

ԱՐԵՎՄՏԱՅԱՅՈՒԹՅԱՆ ԲՈՆԱԳԱՂԹՆ ՈՒ ԿՈՏՈՐԱՋՆԵՐԸ: ՀԱՅ ԶԻՆՎՈՐԱԿԱՆՈՒԹՅԱՆ ՈՇՆՉԱՑՈՒՄԸ

Արևմտահայության կոտամքներն սկսվեցին թուրքական սեֆերբերիլի կոչվող զորահավաքից: Նախկինում քրիստոնյաները, այդ թվում նաև հայերը, բանակ չէին զորակոչվում և դրա դիմաց վճարում էին զինվորական հարկ՝ բեղելի ասկերի, որը կազմում էր 20–40 դուրուշ: 1908 թվականի հեղափոխությունից հետո հայերը ևս ենթակա դարձան զինակոչի, բայց կարող էին նաև ազատվել՝ զինվորական տուրք վճարելով: Չորահավաքի ենթակա էին 20–45 տարեկան տղամարդիկ, բայց երբ թուրքիան 1914 թվականի օգոստոսի 2–ին զորահավաք հայտարարեց, այն տարածվեց բոլոր հայ տղամարդկանց վրա: Հայերից սկզբում հավաքեցին 50–ական ոսկի՝ իբրև բեղելի, սակայն հետո բռնությամբ բոլորին զինակոչեցին, իսկ խուսափողներին գնդակահարում էին: Ջարդա-

րարները դասալիքներ որոնելու պատրվակով ներխուժում էին հայերի տները, խուզարկում, կողոպտում էին, գանակոծում ու սպանում անմեղ մարդկանց: Հայ բնակչության գլխին կատարյալ չարիք դարձավ զենքի հանձնման կամ բռնագրավման գործողությունը, որն անցկացվում էր զորահավաքին զուգահեռ: Դրա պատրվակ ծառայեց այն, որ 1908 թվականի հեղափոխությունից հետո իթթիհատականները որոշ վայրերում հայերին նույնպես զենք էին բաժանել՝ սուլթանի կողմնակիցների դեմ պայքարելու համար: Հայերը վաղուց վերադարձրել էին այդ զենքը, բայց իշխանություններն ամենուրեք հայերից պահանջում էին զենք հանձնել: Այդ անվան տակ նույնպես ջարդարարները տակնուվրա էին անում հայերի տները, հաճախ «հայտնաբերում» իրենց իսկ զենքերը, գործադրում անլուր բռնություններ: Բանը հասավ այնտեղ, որ շատ դեպքերում, տեղեկանալով զենք որոնող ջոկատի մոտենալու մասին, հայերը չափազանց թանկ զենքով մահմեդականներից զենք էին գնում և հանձնում իշխանություններին:

Արևմտահայության համար մեծագույն պատուհաս դարձավ պատերազմական տուրքը՝ թեքյալիֆի-հարպիեն: Պատերազմական ծախսերը հոգալու համար կառավարությունը բնակչությունից վերցնում էր պարեն, հագուստ, քաշող ուժ՝ ունեցվածքի 1/10-ի չափով և փոխարենը տալիս ոչինչ չարժեքող թղթի կտոր՝ ստացական: Մոքիլիզացվեցին բոլոր փոխադրական միջոցները՝ սայլերը, եզները, գոմեշները, ձիերը, ջորիներն ու էշերը: Բայց քանի որ դա էլ չբավարարեց, սկսեցին հայերին օգտագործել իբրև բեռնակիր-շալակատարներ: Պարզապես տաժանակրություն էր տարվա բոլոր եղանակներին՝ կիզիչ արևի տակ կամ ծմռան բքին ծանր բեռները շալակին քայլել անվերջանալի կիլոմետրեր: Պատերազմի սկզբում գորակոչվեցին շուրջ 50 հազար հայեր, որոնք գտնվում էին դժոխային պայմաններում: Նրանք սնվում և հագնվում էին շատ վատ, ենթարկվում թուրք զինվորների ծաղրուծանակին ու կամայականություններին: Նրանք մեծ մասամբ ծառայում էին պաշտպանական ջոկատներում, այն էլ Միջագետքի և Սիրիական ճակատներում, որովհետև թուրքական հրամանատարությունը դիտավորյալ նրանց հեռու էր պահում Կովկասյան ռազմաճակատից: Չնայած այդ ամենին՝ արևմտահայ զինվորներն ու սպաները բարեխղճորեն կատարում էին իրենց քաղաքացիական պարտքը և ամեն կերպ աշխատում էին խուսափել անցանկալի միջադեպերից: Սակայն դա չխանգարեց ռազմական միմիստր ենվեր փաշային՝ Սարիղամիշի ճակատամարտի պարտության

որջ մեղքը բարդել հայերի վրա և 1915 թ. փետրվարի 27-ին հրաման տալ զորամասերի հրամանատարներին՝ 1. կայսերական բանակում ծառայող բոլոր հայերին առանձնացնել իրենց զորաբաժիններից և աչքից հեռու վայրերում զնդակահարել, 2. հայ սպաներին իրենց զորախմբերի բնակատեղերում բանտարկել և սպասել նոր ցուցումի: 3. կատարման մասին զեկույց ներկայացնել 48 ժամվա ընթացքում (Ա. Անտոնյան, էջ 232): Այդ հրամանի հիման վրա 1915 թվականի գարնանը թուրքական բանակի հայ զինվորականները զինաթափվեցին ու առանձնացվեցին բացառապես բանվորական, աշխատանքային գումարտակների՝ ամելթաբուրիների և զրաաթ-թաբուրիների մեջ: Նրանց ուղարկում էին ամենածանր աշխատանքների, օգտագործում ճանապարհաշինարարության, երկաթուղագծերի և թունելաշինության մեջ: Համալ-թաբուրիներում ընդգրկվածներին հարկադրում էին գրաստների փոխարեն ծանր բեռներ փոխադրել: Ընդհանուր առմամբ կազմվեցին 120 այդպիսի գումարտակներ (Հ. Ղ. էջ 22): Այդ տաժանակիր աշխատանքները կատարելուց հետո հայ զինվորները դավադրաբար սպանվեցին զանազան գաղտնի վայրերում: Այդ առթիվ անգլիացի հեղինակ Առնոլդ Թոյնթին գրել է, որ հայ զինվորների տմարդի ջարդը թուրք զինվորական և քաղաքացիական իշխանությունների գործակցությամբ ու միջոցներով՝ աշխարհի ոճիրներից ամենանշանականը, ամենաստորինը և ամենավատթարագույնն է (Հ. Ղ. էջ 22):

Այսպիսով՝ արևմտահայության բնաջնջման առաջին մեծ գործողությունը թուրքական բանակի հայ զինվորների ոչնչացումն էր: Բացահայտ կեղծիք է այդ տմարդի արարքը հայերի դասալքությամբ հիմնավորելու թուրքական վարկածը, քանի որ թուրք և քուրդ դասալիքների թիվը մի քանի անգամ գերազանցում էր հայ դասալիքների թվից, իսկ վերջիններս էլ, եթե դասալքում էին, ապա այդ քայլին դիմում էին բանակում նրանց համար ստեղծված անտանելի պայմաններից դրդված: Հատկանշական է, որ Լիման ֆոն Սանդեռսի տվյալներով Կարինի շրջանում մասսայականորեն դասալքում էին հենց թուրք զինվորները, որոնց թիվը 1916-ին արդեն հասնում էր 30 հազարի, իսկ 1918-ին թուրքական բանակի զինվորների թիվը գիջում էր դասալիքների թվին (Զ. Կ. էջ 224): Ուրեմն գլխավոր պատճառը հայերին ռազմունակ ուժից զրկելն էր:

Փաստերը անառարկելիորեն հաստատում են, որ հայերի կոտորածն սկսվել էր ավելի վաղ, քան նրանք տեղ-տեղ դիմեցին ինքնա-

պատկանություն, որն էլ թուրքերը հետին թվով համարեցին ապստամբություն և այն պատրվակ դարձրին ցեղասպանության համար:

ԱՐԵՎՍՏԱՅԱՅ ՄՏԱՎՈՐԱՎԱՆՈՒԹՅԱՆ ՈՇՆՉԱՑՈՒՄԸ

Մեծ եղեռնի երկրորդ խոշոր գործողությունը արևմտահայ մտավորականության ձերբակալությունը, աքսորն ու զազանաբարո ոչնչացումն էր: Դրա նպատակը արևմտահայության զլխատուծը, նրան ուղղություն տվող, ղեկավարող ուժից զրկելն էր: Ամենածանր հարվածը հասցվեց Պոլսին, ուր կենտրոնացած էր հայ մտավորականության ընտրանին՝ գրողներ, արվեստագետներ, գիտնականներ, բժիշկներ, մանկավարժներ, լրագրողներ, հասարակական-քաղաքական գործիչներ: Պատերազմի նախօրյակին Կ. Պոլիսն ուներ 600.000 բնակիչ, որից 150.000-ը հայեր էին: Այստեղ բնակվող հայ մտավորականության ոչնչացումը երիտթուրքական կառավարության համար առաջնահերթ խնդիր էր: Այդ գործողությունը ղեկավարում էին Պոլսի ոստիկանապետ Պետրի բեյը, նրա քաղաքական գծով օգնական Ռեշադը և ընդհանուր ապահովության պետ Ջանփոլադը: Նախօրոք կազմված սև ցուցակների համաձայն, որին իրենց մասնակցությունն էին բերել ոստիկանատան հայ ուրացող ծառայողներ Արթին Մկրտչյանը, Հմայակ Արամյանը և Գամեր Շիրինյանը, 1915 թվականի ապրիլի 24-ին միաժամանակ ձերբակալվեցին և Պոլսի Մետերհանե կենտրոնական բանտ բերվեցին հայ մտավորականների առաջին խումբը՝ շուրջ 230 հոգի: Այդ արյունոտ կիրակին հայ ժողովրդի պատմության մեջ մտավ որպես ամենասև տարեթիվ, համազգային սգի օր: Ապրիլի 25-ին ձերբակալվածներին տեղափոխեցին Հայդար-փաշայի նավամատույցը և այնտեղից հատուկ զնացքով Նիկոմիդիա-Անկարա գծով ժանդարմների ու ոստիկանների խիստ հսկողությամբ, որոնց ղեկավարում էր Պոլսի բանտապետ Չեթեջի Իբրահիմ բեյը, ուղարկվեցին Անատոլիայի խորքերը: Ապրիլի 28-ին զնացքը Անկարա չհասած կանգ առավ Սենճան-քեոյ կայարանում, որտեղ ձերբակալվածներից իջեցնում են 75 հոգու և տանում Այաշ: Հուլիսին բանտարկյալների մեկ այլ խմբի երկաթուղով ուղարկում են ղեպի Ուրֆա-Հալեպ, սակայն Ուրֆա-Տիգրանակերտ ճանապարհին նրանց վրա են հարձակվում չեթեթերը ու տանջամահ անում նրանց: Այստեղ զոհվեցին գրող-իրապարակախոս Ռուբեն Ջարդարյանը, անվանի գիտ-

նական, կենսաբան Նազարեթ Տաղավարյանը, դաշնակցական և հնչակյան գործիչներ Է. Ակնունին (Խաչատուր Մալումյան), Գ. Խաժակը (Գարեգին Չաքալյան), Հարություն Ճանկուլյանը և ուրիշներ: Այաշի մնացած բանտարկյալներին օգոստոսի կեսերին տարան մի լեռան մոտ ու տանջամահ արեցին: Դրանց թվում էին դոկտոր Փաշայանը, մեծ բանաստեղծ Սիամանթոն (Ատոմ Յարճանյան), իրապարակախոս Ամբատ Բյուրատը (Տեր-Ուզարյան), դերասան Ենովջ Շահենը և ուրիշներ:

Մահապարտների գնացքը ապրիլի 27-ին հասավ Անկարա, որտեղից նրանց կառքերով տարան Գասթեմունիի ուղղությամբ: Նրանց մեջ էր նաև Կոմիտասը: Ապրիլի 28-ին թվով 150 բանտարկյալների հասցրին Չանկրը քաղաքը և փակեցին գորանոցի ներքնահարկում: Դրվել էր արդեն Կոմիտասի խելագարության սկիզբը: Մի քանի օր անց Չանկրի բանտարկյալներին թույլատրվում է ապրել քաղաքում: Նրանցից առանձնացնում են 56 հոգու՝ իբր Դեր-Չոր ուղարկելու համար: Սակայն Անկարայի բանտում մեկ ամիս պահելուց հետո օգոստոսի կեսերին նրանց տանում են քաղաքից դուրս և կոտորում: Մի քանի օր անց իոշոտվեցին Չանկրի բանտարկյալներից ևս 26 հոգի: Աքսորյալներից 5 հոգու, այդ թվում բանաստեղծներ Դանիել Վարուժանին և Սևակին (դոկտոր Ռուբեն Հիլինկիրյան) հրամայում են Անկարայի ճանապարհով մեկնել Այաշ, սակայն թունեյ գյուղի ձորակում նրանց վրա են հարձակվում ավազակ Հալոյի քրդերը, մերկացնում բոլորին ու տանջամահ անում անձնապաշտպանության դիմած մտավորականներին: Իսկ մինչ այդ Սևակը փրկել էր քուրդ Հալոյի աղջկան:

Կ. Պոլսում շարունակվում էին ձերբակալությունները: Օգոստոսին պետական դավաճանության մեղադրանքով ձերբակալվում են մեծանուն գրող, իրավաբան, պառլամենտի անդամ Գրիգոր Ջոհրապը և Վարդգեսը (Հովհ. Սերենկյուլյան), որոնք տարվեցին Ուրֆա և բանտ նետվեցին: Այլ բանտարկյալների հետ նրանց տարան Ուրֆայից քիչ հեռու Կարաքեոփրու վայրը և չերթեզ Ահմադի ու Էմվերի հորեղբայր Խալիլ անմիջական մասնակցությամբ տանջամահ արեցին:

Հետագայում Չանկրի բանտարկյալներից սպանվեցին ռամկավարների առաջնորդ Տիրան Քելեկյանը, որը թուրքիայի պատմություն էր դասավանդել համալսարանում, կազմել ֆրանս-թուրքերեն բառարան, Տիգրան Չեռկյուրյանը, Մելքոն Կյուրճյանը (Հրանտ), Գեղամ Բարսեղյանը, Լևոն Լարենցը (Քիրիշճյան), Հարություն Շահիրկյանը (Ատոմ) և ուրիշներ:

Գավառներում ձերբակալվեցին ու մորթուվեցին գրողներ Երուխանը (Երվանդ Սրմաքեշխանյան), Թլկատինցին (Յովհ. Յարությունյան), պրոֆեսորներ Կարապետ Սողիկյանը, Մկրտիչ Որբերյանը, Յովհ. Պուճիկանյանը, Յովհ. Յակոբյանը և շատ ուրիշներ:

Ապրիլյան եղեռնի օրերին Կ. Պոլսում սկսվեց 20 հնչակյանների դատավարությունը՝ Փարամազ (Մաթևոս Սարգսյան), Յամբարձում Գրիգոր, դոկտոր Պեննե Թորոսյան (Պետրոս Մանուկյան), Արամ Աջըզբաշյան, Երվանդ Թոփուզյան, Ամբատ Գլճյան և ուրիշներ, որոնց կախաղան բարձրացրին:

Ծանր հարված հասցվեց նաև հայոց եկեղեցուն ու հայ հոգևորականությանը: Ըստ հայոց եկեղեցու մեծահռչակ պատմաբան Մաղաքիա արքեպիսկոպոս Օրմանյանի տվյալների՝ Թուրքիայում հայկական եկեղեցիների ու վանքերի թիվը պատերազմից առաջ հասնում էր 2200-ի (Մ. Օրմանյան, Յայոց եկեղեցին, Երևան, էջ 259-264): Եղեռնի ժամանակաշրջանում թուրքական վանդալները ավերեցին, հրկիզեցին ու կողոպտեցին դրանցից 2150-ը, կոտորեցին շուրջ 4000 հոգևորականների: Ավերակների վերածվեցին Աղթամարը, Սշո Սուրբ Կարապետը և այլն: Թուրքական կառավարությունը 1916 թվականի հունիսի 26-ին ընդունեց «Յայոց կաթողիկոսության և պատրիարքության կանոնագիր», որով 1863 թվականի Ազգային սահմանադրությունը վերացվում էր, իսկ Սսի ու Աղթամարի կաթողիկոսությունները միավորվում էին Երուսաղեմի կաթողիկոս-պատրիարքի անձի մեջ: Այդպիսին դարձավ Կիլիկիայի նախկին կաթողիկոս Սահակ Խապայանը: Պոլսի պատրիարքությունը փակվեց, իսկ պատրիարք Ջավեն Արքեպիսկոպոսը քստրվեց Մոսուլ, ապա՝ Բաղդադ: Արգելվեց ամեն կարգի կապ և հարաբերությունը Մայր Աթոռ Ս. Էջմիածնի հետ:

ՋԱՐԴԵՐԸ ԵՎ ԿԵՂԵՑՆԵՐԻՄ

Մեծ եղեռնի երրորդ և ամենաարյունոտ գործողությունը նահանգներում հայերի բռնի տեղահանությունն ու կոտորածն էր: Սոսկ այն փաստը, որ տեղահանությունը տարածվեց ամբողջ Թուրքիայի, այդ թվում նաև այնպիսի շրջանների հայության վրա, որոնք հարյուրավոր կիլոմետրերով հեռու էին ռազմական գործողությունների թատերաբեմից, լիովին մերկացնում է թուրքական այն կեղծիքը, թե իբր տեղահա-

նությունը կատարվել է ռազմա-ստրատեգիական անհրաժեշտությունից ելնելով: Յայերի տեղահանության վերաբերյալ թուրքական կառավարության հատուկ հրահանգում որոշակիորեն ասված էր. «Ծանոթ ազգի (հայերի — Մ. Կ.) տարագրությունը նպատակ ունի ապագայի համար մեր հայրենիքի փրկությունը, քանի որ նրանք ուր որ ապրելու լինեն, երբեք իրենց խռովարար գաղափարներից չպիտի հրաժարվեն: Ուրեմն պիտի փորձենք, որքան որ կարելի է, նրանց թիվը նվազեցնենք» (Յուլյանատյան Մեծ Եղեռնի, էջ 526): Ուրեմն փաստորեն դա ոչ թե տարագրության, այլ բնաջնջման հրահանգ էր: Յրահանգում տրվում էր կործանարար տեղահանության կազմակերպման մանրամասները. 1. բոլոր հայերը պիտի մեկնեին գյուղ առ գյուղ կամ թաղամաս առ թաղամաս՝ ոստիկան-զինվորների հսկողության տակ, 2. նրանց արգելվում էր հողերը և գույքը վաճառել կամ ուրիշի մոտ թողնել, այլ պիտի հանձնեին պետությանը, որովհետև հայերը տեղահանվում էին իբր ժամանակավորապես, և պատերազմից հետո վերադառնալով՝ հետ էին ստանալու իրենց ունեցվածքը, 3. կապահովվի հայերի կյանքը, 4. ճանապարհին նրանց կտրվի անհրաժեշտ օգնություն, 5. չենթարկվողների և ոստիկան-զինվորների վրա զենք բարձրացողների դեմ զենք կգործադրվի, իսկ փախուստի փորձ կատարողներն ու նրանց պատասպարողները կդատվեն պատերազմական ատյանով ու կզնդակահարվեն:

Արևմտահայության բռնի տեղահանությունն ու ջարդը Արևմտյան Յայաստանի ոչ ճակատամերձ շրջաններում, կենտրոնական և Արևմտյան Անատոլիայում և Եվրոպական Թուրքիայում հիմնականում տեղի ունեցավ 1915 թվականի մարտ-հոկտեմբեր ամիսներին:

Վասպուրական: Պատերազմի նախօրյակին Վանի վիլայեթն ուներ 542.000 բնակչություն, որից հայեր՝ 192.000, ասորիներ՝ 98.000, հրեաներ՝ 5000, քրդեր՝ 210.000, թուրքեր՝ 30.500, չերքեզներ՝ 500, եզդիներ՝ 5400, բոշաներ՝ 600: Վիլայեթը կազմված էր Վանի և Յեքյարիի (Ջուլյաներիկ) սանջակներից: Վերջինիս կենտրոնը Բաշկալեն էր: Այստեղ հիմնականում բնակվում էին քրդեր, հայերը 10.000 էին: Ջուլյաներիկում ապրում էին նաև 80.000 ասորիներ: Վանա լճի հարավային ափերով ձգվում են Կորդվագ լեռները՝ Արտոս և Եղեռով գագաթներով, արևելյան ափերով՝ երկգագաթ Վարագը և Թիմարի լեռները, հյուսիսային ափերով՝ Սիփանը և Ծաղկանց (Ալադաղի) լեռները, արևմտյան ափերով՝ Նեմրուքն ու Գրգուրը: Լճափի քաղաքներից են Վանը, Արժեշը, Ալջավագը, Խլաթը, Դատվանը, Ոստանը:

Վանի սանջակն ուներ 13 գավառ՝ Վան–Տոսպ (Ավանց և Արտամետ գյուղերով, որոնցից առաջինը նավահանգիստն էր), Թիմար (Լիմ և Կտուց կղզիներով), Բերկրի, Արճեշ, Ալջավազ, Հայոց Չոր, Գավաշ, Կարճկան, Արճակ, Սարայ, Խոշաբ, Նորդուզ, Շատախ (Թաղ կենտրոնով, Փեսանդաշտ և Խորզանք դաշտերով), Մոկս, Կարկառ:

Պատերազմի սկզբում Վանի կուսակալ Թահսին բեյին փոխարինեց հայաստյաց Ջևդեթ բեյը, որն էնվերի փեսան էր: Բաշկալեի մութեսարիֆ եղած ժամանակ նա պայտել էր տվել 12 տարեկան մի հայ պատանու և ստացել «նալբանդ» մականունը:

Նախօրոք կազմված հայաքիմջ ուժերը բացահայտ հարձակման անցան, երբ բացվեց Կովկասյան ռազմաճակատը: 1914 թ. նոյեմբեր–դեկտեմբեր ամիսներին Արևելյան Հայաստան գաղթեցին շուրջ 40.000 հայեր: Այդ նույն ժամանակ միայն Վանա լճի հյուսիսային շրջաններում 3 օրում կոտորվեցին 22 հազար հայեր: Թուրքական զորքերն ու քրդական հրոսակախմբերը, ոստիկանական ջոկատներն ու հանցագործ խմբերը Բաշկալեի և Սարայի շրջանների տասնյակ գյուղերում կազմակերպեցին կոտորած, թալան և առևանգումներ: Ջարդեր կազմակերպվեցին նաև Ալջավազի, Բերկրիի և այլ շրջաններում:

Կարին և Տրապիզոն: Կարինի (Երզրումի) վիլայեթի 646.000 բնակիչներից 215.000–ը հայեր էին, 12.000–ը՝ հույներ և ասորիներ, 250.000–ը՝ թուրքեր, 120.000–ը՝ քրդեր, 25.000–ը՝ պարսիկներ, 7000–ը՝ չեքեզներ, 3000 եզդիներ: Վիլայեթի մի շարք շրջաններում հայերը մեծամասնություն էին կազմում, իսկ Կարին, Բաբերդ, Երզնկա, Խնուս և Դերջան քաղաքներում հայեր էին բնակչության մեկ երրորդից մինչև կեսը:

Կարինն ավանդաբար համարվում էր Արևմտյան Հայաստանի կենտրոնը, կարևոր ստրատեգիական կետ, և ցեղասպանությունն իրականացնելու համար այստեղ էր ուղարկվել երիտթուրքական պարագլուխներից Բեհաեդդին Շաքիրը: Նա ստեղծեց հայերի տեղահանության ու ջարդի իրականացման հատուկ մարմին, կազմակերպվեցին հատուկ հրոսակախմբեր: Թուրքական իշխանությունները 1915 թ. ապրիլի 30–ին քաղաքից դուրս կազմակերպեցին մուսուլմանական հավաքույթ, որտեղ կոչ արվեց անողորմաբար ոչնչացնել բոլոր հայերին: Թուրքական հրոսակախմբերը մայիսի 12–ին Կարինից շարժվեցին շրջակա հայկական գյուղերը, տեղահանեցին 25.000 հայերի, նրանց քշեցին դեպի Դերջան ու մաս–մաս ոչնչացրին: Այդ նույն ժամանակ թուրքերը խուճ–խուճ ոչնչացրին նաև Կարին–Երզնկա գծի վրա աշխատող զինաթափված հայ

զինվորներին: Վանից նահանջող թուրքական բանակը մայիսի 19–ին հարձակվեց Խնուսի վրա ու կոտորեց տեղի հայ բնակչությանը: Այա եկավ Կարինի հերթը, ուր բնակվում էին 78.000 հայեր: Ինչպես նշում է պրոֆ. Մ. Արզումանյանը, դա վիթխարի ուժ էր, որին կարելի էր կազմակերպել ակտիվ ինքնապաշտպանություն, սակայն, ցավոք, դա չարվեց (Մ. Արզումանյան, Հայաստան 1914–1917, Երևան, 1969, էջ 373):

1915 թ. մայիսի 26–ին Կարինում տեղի ունեցան զլխավորապես մտավորականների ու հոգևորականների զանգվածային ձերբակալություններ: Ավերվեց 1877–1978 թթ. ռուս–թուրքական պատերազմում զոհված ռուս զինվորների հուշարձանը: Տեղահանվեցին 160 երևելի հայ ընտանիքներ, որոնք Քղիի ճանապարհին հոշոտվեցին թուրք և քուրդ ավազակախմբերի կողմից: Կարինի երիտասարդության կոչը՝ դիմել ինքնապաշտպանության՝ լռեցվեց հոգևորականության և աղայական դասի կողմից, որոնք հորդորեցին ենթարկվել իշխանություններին:

Հունիսի 4–ին նոր հարձակում սկսվեց Կարնո դաշտի հարյուրից ավելի գյուղերի վրա: Երկու ժամում տեղահանելով բնակչությանը, նրանց քշեցին դեպի Դերջան ու Երզնկա և ճանապարհին կոտորեցին:

Դրան հետևեց Երզնկայի աղետը, որտեղ կային 25.000 հայեր: Հունիսի 9–10–ին նրանք երեք քարավաններով դուրս բերվեցին քաղաքից և հունիսի 14–ին նրանց միացրին Քեմախում: Այստեղ կազմակերպվեց չորսժամյա ջարդ, և հազարավոր հայեր կոտորվեցին:

Երզնկայի ճակատագրին արժանացան նաև Բաբերդի հայերը, որտեղ կար 19.000 հայություն: Նրանց զլխավոր ջարդը նույնպես տեղի ունեցավ Քեմախի կիրճում: Չէր օգնում նաև հավատալիոխությունը: Նրանց բռնություն կնքում էին Աբդուլլա ամունով, որ հետո հեշտ գտնեն ու ոչնչացնեն:

Մայիսի 20–ին տեղահանեցին Խնուսի և շրջակա 27 գյուղերի հայ բնակչությանը՝ 1700 ընտանիք, որոնց հոշոտեցին Բասկանի մոտ: Կոտորածն ուղեկցվում էր անմարդկային դաժանությամբ: Քիչ է ասել գազանային, որովհետև գազանների միջավայրում նման բաներ չեն լինում: Օրինակ՝ թուրքերը լլկում էին կանանց ու աղջիկներին, մորթում երեխաներին իրենց ծնողների առաջ, պատռում էին հղի կանանց փորը, մոր աչքերի առաջ բռնաբարում էին աղջկան ու ստիպում մորը՝ ջուր լցնել իրենց ձեռքերին, մորթում էին երեխաներին և ստիպում ծնողներին՝ ուտել նրանց միսը: Այդ ոչ մի գազան նման բաներ չի անում:

Հունիսի 9–ին քաղաքը թողնելու կարգադրություն արվեց Կարին քաղաքի հայերին: Հունիսի 19–ին դեպի Բաբերդ ու Երզնկա քշվեց կա-

րինցիների երկրորդ քարավանը՝ շուրջ 10.000 մարդ: Երզնկայի դաշտում կազմակերպվեց ահավոր ջարդ, և խոշտանգվեցին հազարավոր մարդիկ: Կենդանի մնացածներին տարան Քենսիսի կիրճը և այնտեղ կոտորեցին:

Կարինցիների երրորդ քարավանը՝ 8.000 մարդ, քաղաքից դուրս բերվեց հունիսի 24-ին և Քենսիսի կիրճում արժանացավ նախորդների ճակատագրին:

Չուլիսի 3-ին ճակատագրի նույն ճանապարհով գնաց կարինցիների չորրորդ քարավանը՝ 9.000 հոգի: Վերջին՝ հինգերորդ քարավանը՝ 7.000 հոգի, դուրս բերվեց հուլիսի 18-ին, որոնց թվում էր նաև Կարինի հոգևոր առաջնորդ Սմբատ եպ. Սաաթետյանը, և որոնց կոտորեցին Դերջանի մոտ: Միայն շատ քչերը հասան Ուրֆա և Չալեպ: 1915 թ. նոյեմբերի սկզբին տեղահանեցին ու ոչնչացրին նաև Կարինի հայ կաթոլիկներին:

Այդպիսով Կարինը լիովին հայազրկվեց: Մնացին միայն 20 արհեստավորներ, 50 որմնադիրներ և ամերիկյան միսիոներ Ստեպլտոնի մոտ ապաստանած 18 աղջիկներ, սակայն սրանց մեծ մասին էլ ոչնչացրին: Երբ ռուսական զորքերը մտան Կարին՝ հայտնաբերեցին 22 հայ աղջիկների միայն:

Ուզմաստրատեգիական կարևոր նշանակություն ուներ Տրապիզոնի և Սամսունի ծովեզրյա շրջանը, որտեղ 1915-ի հունվարին արդեն երևացել են ռուսական ռազմանավեր: Տրապիզոնում ու նրա շրջակայքում բնակվում էին շուրջ 60.000 հայեր, իսկ բուն քաղաքում՝ 14.000: Տրապիզոնահայության մասսայական տեղահանությունն ու ջարդը գլխավորում էր Ջեմալ Ազմի փաշան: Բռնի տեղահանությունը կատարվեց 1915 թ. հունիսի 17-ից մինչև հուլիսի 6-ը: Հայերին քաղաքից դուրս էին բերում մի քանի հարյուր հոգուց կազմված խմբերով ու Երզնկայի ճանապարհին կոտորում: Շատերին էլ խեղդամահ արեցին ծովում: Հատուկ նավերով հատկապես տղամարդկանց հեռացրին ծովափից ու բուլոթին խեղդամահ արեցին: Տեղահանության ժամանակ հայտարարվեց, որ հղի կանայք կարող են մնալ, բայց հետո նրանց բուլոթին նույնպես ծովը թափեցին: Թուրքերը բարբարոսաբար պարկերի մեջ լցրին ու ծովը թափեցին նաև հույն միտրոպոլիտ Լորիստաֆի հավաքած 600 հայ մանուկներին, որոնցից միայն 8-ը փրկվեցին: Տրապիզոնի ու նրա շրջակայքի տեղահանված հայությունը ոչնչացվեց Գյումուշխանե-Երզնկա ճանապարհին: Թեքթե կայանում 100-ի չափ հայ տղամարդիկ ըմբոստացան, զինաթափեցին պահակներին ու բարձրացան լեռները, իսկ

աքսորյալների քարավանների մնացորդներն իրենց վախճանը գտան դարձյալ Քենսիսի կիրճում:

Գտնվեցին, սակայն, փոքր թվով տրապիզոնցիներ, որոնք հերոսական զոտեմարտ մղեցին թուրքերի դեմ: Այսպես՝ բաց ծով դուրս բերված 40 հայ տղամարդիկ հարձակվեցին իրենց ուղեկցող ոստիկանների վրա ու բուլոթին ոչնչացրին, սակայն իրենք էլ գրեթե բուլոթը զոհվեցին՝ փրկվեցին երկու հոգի: Տրապիզոնում հնչակյան Հարություն Սարգսյանը իր Գուրգեն և Պարույր որդիների հետ փորձեց սպանել Ջեմալ Ազմիին և ոտքի կանգնեցնել հայերին, բայց նրանք ժամանակից շուտ ձերբակալվեցին ու սպանվեցին: Սեդրակ Սեյրանյանն ու Երվանդ Տերտերյանը ամրացան իրենց տներում, թուրքերի դեմ կռվեցին մինչև վերջին փամփուշտը և անձնասպան եղան:

Շուրջ 600 խիզախ տրապիզոնցիներ բարձրացան լեռները և երկար ժամանակ մարտնչեցին թուրքերի դեմ՝ Ջիլ Օհաննեսի, Միքայել Ջեյթունճյանի, Հակոբ Քեհյանի գլխավորությամբ: Միայն 1923 թվականին նրանց հաջողվեց նավակներով դուրս գալ ռուսական ափ:

Այսպիսով՝ շուրջ 60 հազար տրապիզոնահայերից փրկվեցին ընդամենը 2500 հոգի:

Սամսունի սանջակում կար 30.000 հայություն, իսկ քաղաքում 5000: Այստեղ տեղահանության հրամանն ստացվեց 1915-ի հուլիսի սկզբին, որոնց քչեցին դեպի Ամասիա և Թոքատ, ու ճանապարհին կոտորեցին: Շատերը տանջանքներից փրկվելու համար իրենց նետում էին Եփրատը: Թուրքերը ցուցադրաբար 5 տարվա բանտարկության դատապարտեցին սամսունցի մի հայ կնոջ, որն իր մանկահասակ որդուն նետել էր Եփրատ գետը:

Տարոն: Պատմական Տարոնը Բիթլիսի (Բաղեշ) վիլայեթն էր, որն ուներ 398.000 բնակիչ, որից հայեր՝ 180.000, ասորիներ՝ 15.000, 40.000 թուրքեր, 140.000 քրդեր, 10.000 չերքեզներ, 8000 պարսիկ, 5000 եզդի: Հարյուրավոր գյուղերից բացի 40.000 հայեր ապրում էին Բիթլիսում, 80.000՝ Մուշում, 18.000՝ Սղերդում, 10.000՝ Սանազկետում: Բիթլիսի վիլայեթի մեջ էր մտնում նաև հերոսական Սասունը:

Ի տարբերություն մյուս վայրերի, թուրք մարդակերները որոշել էին տարոնահայությանը բնաջնջել տեղում, առանց տարագրության, որովհետև Մուշն ու Սասունը հայ ազատագրական շարժման կենտրոնատեղին էին և անցյալում շատ կորուստներ էին պատճառել թշնամուն:

Պատերազմի նախօրյակին Բիթլիսի նահանգապետն էր կատաղի իթթիհատական Մուստաֆա Արդուլ Յալըզը, իսկ Մուշի գավառապետն էր ջարդարար Սերվեթ բեյը: Նրանք իրենց գործակիցների հետ միասին Տարոնի աշխարհը բաժանեցին 20 շրջանի և յուրաքանչյուրի համար առանձնացրին հրոսակախմբեր՝ հայերին ոչնչացնելու առաջադրանքով:

Տարոնում մասսայական ձերբակալություններն սկսվեցին 1915 թ. գարնանը: Մալիսի սկզբին Վանի ազատագրումից հետո Ջնդեթը շարժվեց դեպի Ադերդ ու Բիթլիս և սկսեց կոտորել բնակչությանը:

Թուրք-քրդական ուժերը մեկ օրում՝ 1915 թ. հունիսի 28-ին, ոչնչացրին Մշո դաշտի 125 հայաբնակ գյուղեր: Մուշ քաղաքի հայերը Յաջի Յակոբ Կոտոյանի գլխավորությամբ դիմում են ինքնապաշտպանության՝ հակառակ հովվապետ Վարդան վրդ. Յակոբյանի հնազանդության հորդորների:

Սեբաստիա: Սվազի (Սեբաստիա) վիլայեթում կար 370.000 հայություն: Կուսակալն էր մուլեռանդ իթթիհատական Մուամմերը: 1915 թ. հունիսի 3-ին ձերբակալվեցին 3500 հայեր: Տեղահանության հրամանը տրվեց հունիսի 18-ին: Սեբաստիա քաղաքի շուրջ 36.000 հայությունը տեղահանվեց 15 օրում: Նրանց տանում էին դեպի Մոսուլ և Դեր-Չոր: Սեբաստիա-Խարբերդ խճուղու վրա գտնվող Յասան-չելեպի մեծ գյուղը դարձավ իսկական սպանդանոց: Յայերին սպանում էին մանգաղներով, մահակներով, կացնով, ձողերով, սղոցներով: Բարեբախտություն էր համարվում գնդակով սպանվելը, և դահիճները մի գնդակի համար երկու ոսկի էին պահանջում: Մի քարավանից 4000 երեխաների թուրքերը թափեցին Եփրատը:

Սեբաստիայի Մարզվան քաղաքի 22.000 բնակիչներից 12.000-ը հայեր էին: Հունիսի վերջին նրանք բոլորը փոքր խմբերով տեղահանվեցին և ոչնչացվեցին: Տարագրվեց նաև Ամասիայի հայ բնակչությունը:

Բնաջնջվեցին ավելի քան 300.000 սեբաստահայեր:

Խարբերդ: Խարբերդը Մեծ Հայքի Ծոփաց աշխարհի Հանձիթ գավառն էր, որը 19-րդ դարում դարձավ Մամուրեթ-ուլ-Ազիզի կուսակալություն՝ Մեզիրե կենտրոնով, որից ոչ հեռու գտնվում էր գլխավոր քաղաքը՝ Խարբերդը: Կուսակալությունն ուներ երեք սանջակ՝ Խարբերդ, Դերսիմ, Մալաթիա, որոնք բաժանված էին գավառակների: Հայկական գավառակներից (վիճակ) էին Ակնը, Արաբկիրը և այլն:

Խարբերդի վիլայեթն ուներ 575.000 բնակիչ, որից հայեր էին 168.000-ը, ասորիներ՝ 5000, հույներ՝ 1000: Մնացածը մահմեդականներ էին, որից թուրքեր՝ 126.000, քրդեր՝ 95.000, պարսիկներ՝ 180.000:

Խարբերդ քաղաքն ուներ 20.000 բնակիչ, որից 10.000-ը՝ հայեր: Մալաթիայի 35.000 բնակչության 2/5-ը հայեր էին, 3/5-ը՝ թուրքեր ու քրդեր: Խարբերդի վիլայեթն ուներ 360 գյուղ, որից 65-ը՝ հայաբնակ:

Պատերազմի սկզբում Խարբերդահայությունը նույնպես ենթարկվեց զորահավաքի և պատերազմական տուրքի կամայականություններին: Աշխատանքի տանելու պատրվակով Խարբերդի 4000 հայ զինվորների խմբերով քշեցին դեպի Մեզիրե և բոլորին սրախողխող արեցին:

1915 թ. ապրիլ-մայիս ամիսներին Խարբերդում տեղի ունեցան մասսայական ձերբակալություններ: Բանտ նետվեցին Թլկատինցին (Հովհ. Հարությունյան), Երուխանը (Երվանդ Արմաքեշխանյան), թրքագետ-պատմաբան Նիկողոս Թենեքեջյանը: Քուլեջի տեսուչ «Խարբերդի Սոկրատ» Հովհ. Պուճիգանյանի գանգը թուրքերը փշոցեցին, ասելով, թե նրա ռումբը այնտեղ է: Ձերբակալվածներին մերկացնում էին ու ծնծում, ածելիով կտրտում մարմինը և աղ ու քացախ ցանում, մազերն ու եղունգները քաշում, պայտում, ցից հանում, տանջամահ անում (Հուշամատյան Մեծ եղեռնի, էջ 383): Երբ մի գիշեր ոստիկանները փորձեցին դուրս տանել բանտարկյալներին, նրանք հրկիզեցին իրենց անկողիները և հրդեհ բռնկվեց, նահատակվեցին 37 հոգի: Կենդանի մնացածներին, այդ թվում նաև Երուխանին ու Թլկատինցուն, թուրքերը կացնահարեցին:

1915 թ. հունիսի 25-ին սկսվեց Խարբերդցիների տեղահանությունն ու աքսորը դեպի Ուրֆա: Հուլիսի 1-ին Մեզիրեից դուրս բերվեց առաջին քարավանը՝ 2500 մարդ, որը շարժվեց դեպի Տիգրանակերտ: Տղամարդկանց անմիջապես առանձնացրին ու կոտորեցին: Մնացածները 8 օրից հասան Տիգրանակերտ, իսկ 15 օրից՝ Դեր-Չոր, որտեղ գրեթե բոլորն էլ կոտորվեցին: Հուլիսի 3-ին Խարբերդից շարժվեց երկրորդ քարավանը՝ 3000 հոգի, որը նույն ճակատագրին արժանացավ: Նրանցից Հալեպ հասավ 68 հոգի միայն: Նույններին տեղի ունեցավ վերջին գաղթը, և Խարբերդում թաքնված մնացին միայն 200 հայեր:

Մալաթիայի 35.000 բնակիչներից 15.000-ը հայեր էին, որոնք նույնպես տեղահանվեցին և ճանապարհին հոշոտվեցին:

Խարբերդում ուժեղ ինքնապաշտպանություն չհաջողվեց կազմակերպել, թեև դիմադրության որոշ փորձեր եղան: Մորենիկ գյուղի մի խումբ երիտասարդներ կռվեցին մինչև վերջին փամփուշտը: Նույնը եղավ Ծոփքի Ս. Նշան կղզում: Քիչ թվով Խարբերդցիներ էլ անցան Դերսիմ և պայքարը շարունակեցին:

Խարբերդի ոսկեղեն դաշտը վերածվեց ավերակների:

Տիգրանակերտ: Դիարբեքիի (Տիգրանակերտ) 124 հազար հայությունը, թեև շատ հեռու էր ռազմական թատերաբեմից, նույնպես ենթարկվեց ցեղասպանության արհավիրքներին: Դեռևս 1914-ի օգոստոսին թուրքերը հրդեհեցին Դիարբեքիի շուկան, որի հետևանքով այրվեցին հայերի 1080 խանութներ: Այնուհետև տեղի ունեցավ հայ զինվորների կոտորածը:

1915 թ. ապրիլի 15-ին ձերբակալեցին 300 երիտասարդներ և Հայոց առաջնորդարանից պահանջեցին հանձնել զենքը: Գումարվեց հայոց ազգային ժողով՝ Տիգրանակերտի առաջնորդ Սկրտիչ վրդ. Չլղատյանի նախագահությամբ: Հարցը դրված էր որոշակի՝ ենթարկվել, թե՛ դիմել ինքնապաշտպանության: Տեղի է ունենում պառակտում. Առաջնորդ Չլղատյանի կողմնակիցները, որոնք դիմադրության կոչ էին անում, պարտություն են կրում, և հաղթանակում է կործանարար զիծը՝ ցուցադրել հավատարմություն իշխանություններին: Այդ դիրքորոշման հեղինակն էր խաչատուր Տիգրանյանը: Դավաճանների մատնությամբ հավաքվում է եղած զենքը և ինքնապաշտպանության գործը ձախողվում է:

Ապրիլի վերջին-մայիսի սկզբին Դիարբեքիում, որտեղ բնակվում էին 45.000 հայեր, ձերբակալվեցին 400 մտավորականներ, ապա 11 հազար խաղաղ քաղաքացիներ, որոնք զազանաբար խոշտանգվեցին: Առաջնորդ Սկրտիչ վրդ. Չլղատյանին հանեցին բանտից, պտտեցրին փողոցներով, երեսին մուր քսեցին, ականջներին զանգակներ կախեցին: Հետո տարան մզկիթ, որտեղ մեկ-մեկ քաշեցին նրա ատամները, քունքերին շիկացած երկաթ հպեցին, աքցանով պոկեցին մարմնի մսերը, փորեցին աչքերը և կաթիլ-կաթիլ նավթ լցնելով վրան՝ վառեցին (Ս. Ակունի, էջ 66): Նույն բախտին արժանացավ Տիգրանակերտի կաթուղիկ առաջնորդ Անդրեաս եպ. Չելեայանը:

Մայիսի 30-ին Դիարբեքիից դուրս բերեցին 700 հայերից կազմված մի քարավան, որը մոտակա ձորում ենթարկվեց հրոսակախմբի հարձակմանը և ոչնչացվեց: Հետո նահատակներին հագցրին քրդական հագուստներ և լուսանկարեցին՝ հասկանալի ստոր նպատակներով:

Հուլիս-օգոստոսին տեղահանվեց Դիարբեքիի ողջ հայությունը, որոնց աքսորում են դեպի Ռաս-ուլ-Այն և Դեր-Ձոր, սակայն քչերը միայն տեղ հասան: Միայն Պիկաթլան ձորում, Ֆայեզ էլ Ղոսեյի վկայությամբ, ջարդի ենթարկվեցին 24 հազար հայեր (Ֆայեզ էլ Ղոսեյն, Հերոսական հայության անցյալեն, էջ 39-40): Ահավոր ջարդ տեղի ունեցավ Ռաս-ուլ-Այնի շրջանում՝ չերքեզների ձեռքով: Նրանք հոշոտված

հայուհիների մագերից 25 մետրանոց պարան հյուսեցին և ուղարկեցին Դիարբեքիի դահիճ Ֆեյզի բեյին:

Միայն Տիգրանակերտ քաղաքից նահատակվեցին 36.000, իսկ շրջաններից՝ 45.000 մարդ: Պատմությունը պահպանել է մի քանի անհատների՝ Մարտինցի Մարտոյի, Հագրացի Կիրակոսի, Ջավապաթչի Մնճոյի և Իսպիրի որդի Մարտոյի անունները, որոնք զենք վերցրին, կռվեցին ամիսներով, տարիներով, դիմադրեցին մի քանի վաշտի և մեծ կորուստներ պատճառեցին անարգ թշնամուն: Սակայն, ցավոք, դրանք անհատներ էին միայն:

Դիարբեքիի վիլայեթի հայության տարագրմամբ ու ոչնչացմամբ ամայացավ Արևմտյան Հայաստանի գողտրիկ անկյուններից մեկը: Սակայն թուրքական յաթաղանը մահ էր սփռում նաև Թուրքիայի մնացած մասերում բնակվող հայ զանգվածների մեջ:

Արևմտյան և կենտրոնական Անատոլիա: Տարագրության և կոտորածի ենթարկվեցին նաև Թուրքիայի մյուս մասերում բնակվող և փոքրամասնություն կազմող հայերը, որոնք որևէ վտանգ չէին ներկայացնում Օսմանյան կայսրության համար: Իզմիդի (Նիկոմիդիա) սանջակում ապրում էին 71.000, Բրուսայի (Բուրսա) վիլայեթում՝ 90.000, Այդնի (Իզմիր) վիլայեթում՝ 27.000, Անկարայի (Ենկյուրի) վիլայեթում՝ 67.500, Կոնիայի վիլայեթում՝ 25.000, Կասթեմունիի վիլայեթում՝ 14.000 հայեր (Լեվիսիուս, էջ 133):

Իզմիդի և Բրուսայի հայության տարագրությունը տեղի ունեցավ 1915 թ. հուլիս-օգոստոս ամիսներին: Բութանիայի 40-ից ավելի գյուղերում, Պարտիզակում, Արմաշում և Ադաբազարում չտեսնված բռնություններ գործադրվեցին: Հուլիսի 30-ին տարագրվեցին և խոշտանգվեցին Պարտիզակի Օվաճըզի և Տեոնկելի շուրջ 20.000 հայեր: Եսկիշեհիր-Իզմիդ ճանապարհով տարագրվեցին 40-50.000 հայեր:

Պարտիզակցի 250 երիտասարդներ Ջալըն Կարապետի գլխավորությամբ բարձրացան լեռները և մի քանի ամիս անձնագոհ պայքար մղեցին: Նրանց հետևեց Օվաճըզցի Տոնիկի 60 հոգիանոց խումբը, որը կռվեց մինչև 1920 թ. օգոստոսի 1-ը:

Հուլիսի վերջերին տարագրեցին Անկարայի վիլայեթի 15-70 տարեկան տղամարդկանց, որոնց կոտորեցին Անկարայից 6-7 ժամվա հեռավորության վրա մի վայրում: Դրանից հետո 6-7 հարյուրանոց քարավաններով տարագրեցին մնացած բնակչությանը: Աքսորեցին և կոտորեցին նաև Անկարայի ու նրա շրջակայքի 2000 տուն հայ կաթուղիկներ:

րին: Հուլիս—օգոստոսին Անկարայի վիլայեթում հռչակվեցին 42.000 հայեր: Անկարայի կուսակալ Աթըֆը նույնն արեց Կասթեմունիում, երբ այստեղ նշանակվեց նույն պաշտոնով:

Աննկարագրելի ջարդի ենթարկվեցին Յոզղաթի 75.000 հայերը, որոնցից 12.500—ը բնակվում էին քաղաքում, 63.000—ը՝ շրջակա 48 հայկական գյուղերում: Այստեղ մյութեսարիֆն էր Քեմալ բեյը՝ Ջևդեթի աներորդին: Յոզղաթի թեմի առաջնորդ Ներսես եպիսկոպոս Դանիելյանը վճռական գոտեմարտի փոխարեն հնազանդության կոչ արեց և ինքն էլ նահատակվեց: Յոզղաթի հայության ջարդն սկսվեց հուլիսի սկզբին: Չազմագ գյուղում թուրքերը մորթեցին հաղթահասակ Մանուկ Թավլյանին և խնեցին նրա արյունը՝ «անոր պես զորավոր ըլլալու համար» (Հուշամատյան, էջ 325): Քեմալ բեյի հրամանով օգոստոսի 1—ին Յոզղաթի 10.000 հայերի քշեցին Յարադարասի ձորը և դիոլ—գուռնայի նվազածության տակ նախճիր կատարեցին: Նա միակ ոճրագործն էր, որ պատերազմից հետո Պոլսում կախաղան բարձրացվեց:

Եղեռնի ենթարկվեց յոզղաթահայության շուրջ 97 տոկոսը:

Պատերազմի նախօրյակին Կեսարիայի (Կայսերի) սանջակում, որն առանձին վարչական միավոր էր և ուղղակիորեն ենթարկվում էր Բ. Դռանը, կային 47.500 հայեր, որոնցից 15.000—ը՝ քաղաքում, մնացածները՝ շրջակա 24 գյուղերում: Այստեղ հալածանքներն սկսվեցին 1915—ի փետրվարին, որոնք ավելի սաստկացան ապրիլին: Ինչպես գրում է Վ. Կեսարացին, երբ դարբնվում էին հայ ժողովրդի գոյությունը արմատախիլ անող անօրինակ ոճիրներ, ժողովրդի ղեկավար գործիչներից շատ քչերը գուշակեցին վերապահված անողոք ճակատագիրը: Բոլորը զուլուռության, հանքերության ոգի էին քարոզում (Հուշամատյան, էջ 343): Խիզախ հնչակյան Կարապետ Չիլտեմյանը պահանջեց դիմել կազմակերպված դիմադրության, բայց հավանություն չստացավ: Կախաղան բարձրացող Կ. Չիլտեմյանին մնում էր շարտել դահիճների երեսին, որ եթե իր ընկերները համաձայնեին իր հետ, ապա տեղերը փոխված կլինեին: Գտնվեցին նաև հայ դավաճաններ՝ Գևորգ Ելանջյան, Միհրան Յազջյան, Հովակիմ Եգեկիեյան, Մինաս Մինասյան, իսլամացածներ Սարգիս Տոնիկյան, Կյուլպենկ Պետրոսյան, որոնք ոչ միայն մատնեցին իրենց ընկերներին, այլև թուրքերին ցույց տվեցին պահված զենքերի տեղերը: Մայիս—նոյեմբեր ամիսներին 17 քարավաններով կեսարահայությունը տարագրվեց ու բնաջնջվեց: Հալեպ և Դեր—Ձոր հասան 6000 մարդ (Արշակ Ալպոյաճյան, Պատմություն հայ Կեսարիո, Կ. Բ. Գահիրե, 1937, էջ 1409):

Բուրսայի վիլայեթի 78 հազար հայերից փրկվեցին 28.300—ը, Կոնիայի 25 հազարից՝ 10.000—ը: Նման որոշ «մեղմության» պատճառն այն էր, որ հիշյալ վայրերն իրենք արքայազարդ էին:

Կիլիկիա: Կիլիկիայի հայերը, որոնց թիվը կազմում էր 205.000, ապրում էին Ադանայի վիլայեթում և Հալեպի վիլայեթի Մարաշի սանջակում: Այստեղ թուրքերը 78.000 էին: Պատերազմի սկզբում Ձեյթունը, որտեղ կար 28 հազար բնակիչ, դարձավ զինակոչիկների հավաքակայան: Այստեղ գերմանական հյուպատոսն էր Ռյուսլերը: Դեռևս 1914—ի օգոստոսին 600 զինվորներով Ձեյթուն եկավ Մարաշի մյութեսարիֆ Հայդարը՝ զորահավաքն ու զինաթափումը իրականացնելու նպատակով: Սկսելով խժոժություններն ու բռնությունները՝ թուրքերը ձերբակալեցին և ապա սպանեցին զեյթունցիների համայնքի ավագ Նազարեթ Չաուշին: Ձեյթունի Սահակ կաթողիկոսի հորդորների հետևանքով քաջարի զեյթունցիները, չնչին բացառությամբ, այս անգամ ինքնապաշտպանության չդիմեցին: 1915 թ. մարտի կեսերից սկսվեց Ձեյթունի տեղահանությունը: Քաղաքի երեսիկներին ձերբակալելուց հետո մարտի 23—ին Ձեյթունից ու նրա շրջակայքից տարագրվեցին 18 հազար զեյթունցիներ: Մայիսի կեսերին Ձեյթունում մնաց ընդամենը... 6 արհեստավոր հայ, իսկ քաղաքը սպանված հարյուրապետի անուցով վերանվանվեց Սուլեյմանլի: Ձեյթունցիներին քշեցին դեպի Դեր—Ձոր և Կոնիա, և նրանք նույնպես ապրեցին տարագրության բոլոր սարսափները:

1915 թ. ապրիլ—հուլիս ամիսներին Ադանայի վիլայեթի և Մարաշի սանջակի հայկական գյուղերն ու քաղաքները դատարկվեցին հայերից: Ընդհանուր առմամբ Կիլիկիայից տարագրվեցին 100 հազարից ավելի հայեր: Դատարկված հայկական բնակավայրերն անմիջապես բնակեցվում էին մահմեդականներով:

Հալեպի վիլայեթում հայերի տարագրությունն սկսվեց 1915 թ. մայիսին: Իրար հետևից հայաթափվեցին Մարաշը, Այնթապը, Անտիոքը, Իսկենդերունը, Քեսապը, Ուրֆան: Այստեղից ընդհանուր առմամբ տարագրվեց 200.000 հայ:

Ջարդի ենթարկվեցին նաև Եվրոպական Թուրքիայի հայերը: Ադրիանապոլսի (Էդիրնե) վիլայեթի, Ուրդսթոյի և Հալիպոլիի 27.500 հայերից մնացին 7000—ը:

Եղեռնի ալիքը համեմատաբար մեղմ էր Կ. Պոլսում և Ձմյուռնիայում, որոնք միջազգային նավահանգիստներ էին, որոնցում շատ էին օտարերկրյա ներկայացուցչությունները, ուստի երիտթուրքերը, հան-

գիստ թողնելով այդ քաղաքների հայ ազգաբնակչությանը և բավարարվելով միայն մտավորականության խողխողմամբ, փորձում էին դրանով շղարշել վիլայեթներում ռթած արյան գետերը: Սակայն դա էլ տևական չէր. զմյուռնահայությունը հետագայում արտաքսվեց ու ոչնչացվեց քեմալականների ձեռքով:

Ընդհանուր առմամբ 1915–1916 թվականներին արևմտահայությունը հիմնականում տեղահանված էր ու ոչնչացված: Այդ առումով ռուսական և եվրոպական դեսպանորդների զեկուցագրերը իրենց արտաքին գործերի նախարարներին՝ Փոքր Ասիան հայերից լիովին դատարկված լինելու մասին, ճիշտ ու ճիշտ համապատասխանում էին իրականությանը (Մ. Ներսիսյան, Հայերի ցեղասպանությունը Օսմանյան կայսրությունում, էջ 371):

ՀԱՅԵՐԻ ԲՆԱԶՆՁՈՒՄԸ ԱՔՍՈՐԱՎԱՅՐԵՐՈՒՄ

Տեղահանված հայությունը արքայություն էր դեպի Միջագետքի անապատները՝ հատկապես Ռաս-էլ-Այն (Ռես-ուլ-Այն) ու Դեր-Ձոր (Դեյր-էզ-Ձոր): Ըստ Արամ Անտոնյանի տվյալների՝ միայն տիֆլիզ Իսլահիեում մահացավ 150.000, Կատմայում՝ 60.000, Պապում՝ 80.000, Մեսքենեում՝ 100.000 մարդ (Ա. Անտոնյան, Մեծ ոճիրը, էջ 18–19): Օրեցօր հալվում էր նաև Հալեպում կուտակված հայությունը: Այստեղ գերեզմանոց էին տանում նաև դեռևս կենդանության նշաններ ցույց տվող մարդկանց (Հայերի ցեղասպանությունը, էջ 286):

Այնուհետև սկսվեց անապատներ արքայության բեկորների մասսայական ոչնչացումը: Առաջին մեծ նախճիրը տեղի ունեցավ Ռաս-ուլ-Այնում, որը գտնվում էր Եփրատի վրա և բնակեցված էր չեչեններով: 1916 թվականի սկզբին այստեղ էին հավաքվել շուրջ 50.000 տարագրյալ հայեր: Սկզբնական շրջանում կայմական Յուսուֆ Ջիա բեյը, որը դեմ էր ցեղասպանությանը, նպաստում էր հայերին վրաններում տեղավորելուն և նրանց աշխատանքով ապահովելուն: Սակայն 1916 թվականի փետրվարին այստեղ է գալիս Ադանայի կուսակալ նշանակված ոչ անհայտ Ջևդեթ բեյը և հրամայում է բոլորին կոտորել: Հրամանը չկատարող կայմականը պաշտոնանկ արվեց, և նրան փոխարինեց արյունաբու Քերիմ Ռեֆիկ բեյը, որը մարտի 17–ից սկսեց հայ գաղթականների նոր տեղահանությունն ու կոտորածը: Այդ գործը անմիջականորեն

հանձնարարվեց չեչեն ցեղապետ Արսլան բեյին: Մարտ–հունիս ամիսներին հայերը Ռաս-ուլ-Այնից քշվեցին դեպի Շեդրատե ու ճանապարհին գրեթե բոլորը հոշոտվեցին: Հրաման էր տրված չխնայել ոչ ոքի: Ռաս-ուլ-Այնում և նրա շրջակայքում սպանվեցին 70.000 հայեր:

Ինթիլիում էին հավաքվել 50.000 հայեր՝ հիմնականում կանայք և երեխաներ, Բաղդադի երկաթուղու շինարարության վրա աշխատելու համար: Ջևդեթի հրամանով նրանք արքայություն Մարաշի և Այնթապի ճանապարհով ու մորթոտվեցին: Նրանցից հետո քայլողները ծառերին իրենց մագերից կախված էին տեսնում տասնյակ մերկ աղջիկների (Արամ Անտոնյան, էջ 62):

Սակայն ամենասարսափելին կատարվեց Դեր-Ձորում: Այդ անապատային ոչ մեծ քաղաքը գտնվում էր Եփրատի աջ ափին, որտեղ բնակվում էին արաբներ, չերքեզներ ու չեչեններ: 1915 թվականի մայիսին Դեր-Ձոր հասան առաջին հայ արքայալեզերը, որոնք գեթունցիներն էին: Նրանց հետևեցին նորանոր քարավաններ: Դեր-Ձորի կառավարիչն էր արաբ Ալի-Սուադը, որը նույնպես դեմ էր հայերին կոտորելուն: Նրա աջակցությամբ շուրջ 350–400 հազար տարագիր հայերի բնակավայր դարձավ Դեր-Ձորից կես ժամվա ճանապարհի վրա գտնվող անապատը, որտեղ հայերը վրաններ խփեցին, ու կարծեք թե ավագուտային անապատը կենդանություն առավ: Երբ Ալի-Սուադից պահանջեցին անապատի խորքը քշել ու ոչնչացնել հայերին, վերջինս կտրականապես հրաժարվեց, ուստի անմիջապես պաշտոնանկ արվեց: Դեր-Ձորի կառավարիչ նշանակվեց Կեսարիայի շրջանում իր գազանություններով աչքի ընկած չերքեզ Սալահ Ջեբի բեյը: Մեծաքանակ հայ տարագիրներ էին կուտակված Հալեպի վիլայեթի Պապ, Մաարա, Մումբուջ, Մեսքենե, Տիֆսի, Աբուսհարաթ, Համամ, Ռաքթա, Սերվա և այլ բնակավայրերում: Երբ թուրքական կառավարությունը հրահանգեց նրանց բոլորին քշել Դեր-Ձոր և ոչնչացնել, Հալեպի արաբ կուսակալ Ջեյալ բեյը հայտարարեց. «Ես այս նահանգի վալին եմ, չեմ կարող նրա դահիճը լինել» (Ա. Շիրակյան, էջ 42): Նրա պաշտոնազրկումից հետո կուսակալ նշանակվեց հայատյաց Բեքիր Սամի բեյը, որին էլ ավելի ուշ փոխարինեց գազանաբարո Աբդուլհալիզ բեյը՝ օգնական ունենալով Թալեաթից հատուկ հրահանգավորված Նուրի բեյին: Այդ նրանք էին, որ ջանադրաբար իրականացրին Հալեպի վիլայեթից հայերին Դեր-Ձոր քշելու և ամենավայրագ մեթոդներով ոչնչացնելու ողջ գործողությունը.

որոնց թիվը հասավ 200.000-ի: Նրանցից հրաշքով փրկվեցին 5-6 հազարը միայն (Հուշամատյան, էջ 531-532):

1916 թվականի մայիսի սկզբին Ձեքի բերը ձեռնամուխ եղավ այդ ժամանակ Դեր-Ձորում գտնվող շուրջ 200.000 հայերին մաս առ մաս բնաջնջելու գործին: Հայտարարելով, թե իբր քսորյալները շուտով վերադառնալու են իրենց բնակավայրերը, նա հրահանգեց նախապատրաստվել: Կազմվեց 1000 հայ երիտասարդներից բաղկացած ջոկատ, որն ուղարկվեց իբր ճանապարհները կարգի գցելու նպատակով, սակայն վայրագորեն ոչնչացվեց: Այնուհետև քսորյալներին կարգադրվեց Սուվարի, Շեղադիեի, Ռաս-ուլ-Այնի վրայով «հետ վերադառնալ» չորս մեծ քարավաններով, իրարից հինգ օրվա տարբերությամբ: Առաջին քարավանը Դեր-Ձորից դուրս բերվեց 1916 թ. մայիսի 16-ին: Հասնելով խաբուրի գետափը՝ նրանք ենթարկվեցին ոստիկանների ու շրջակա ցեղերի հարձակմանը: Տղամարդկանց, կանանց, երեխաներին պարզապես մորթում էին ու զցում գետը, խաչում էին, անդամահատում, կենդանի թաղում: Գազանություններով աչքի ընկավ հատկապես չեչեն Մահմադ բերը: Նման քստմանելի եղանակներով Դեր-Ձորի շրջակայքում ոչնչացվեցին ավելի քան 400.000 հայեր (Գ. Պալաքյան, Հայ գողգոթան, էջ 62):

Ընդհանուր առմամբ 1915 թվականին տարագրվեց շուրջ մեկուկես միլիոն արևմտահայություն, որից 800.000-ը կոտորվեց դեռ ճանապարհին, իսկ մնացածները բանջնջվեցին արաբական անապատներում: Փրկվեցին միայն շատ քչերը, այն էլ արաբ ժողովրդի բարյացակամության շնորհիվ: Այդ բեկորները արաբների օգնությամբ իրենց գաղթավայրերը հիմնեցին Դեր-Ձորում, Ռաքքայում, Հատիչեում, Ջեզիրեում և այլ վայրերում:

Հայ գաղթականությունը: Շուրջ մեկ միլիոն արևմտահայեր էլ հարկադրված բռնեցին գաղթի արհավիրքներով լի ճանապարհը: Նրանցից մոտ 400 հազարը ապաստան գտավ Կովկասում և Ռուսաստանում, իսկ մնացածները՝ Մերձավոր Արևելքի երկրներում, Եգիպտոսում, Հունաստանում, Ֆրանսիայում, ԱՄՆ-ում և այլ երկրներում: Ամենուրեք նրանց հետապնդում էին սովն ու համաճարակները:

Անօգնական հայ գաղթականների վիճակը մեղմացնելու նպատակով որոշ գործ կատարեց Ռուսաստանը: Արտգործնախարար Սազոնովը խնդիր դրեց, որ Ռուսաստանը, Ֆրանսիան և Անգլիան համատեղ տրամադրեն մեկ միլիոն ֆրանկ և նվիրատվության ձևով փոխանցեն Պոլսի ամերիկյան դեսպանին՝ հայոց պատրիարքի միջոցով փախստա-

կաններին օգնելու համար: Ֆրանսիական կառավարությունը սկզբունքորեն համաձայնեց, սակայն Անգլիան խուսաճանակեց: Այդ նախաձեռնությունն, այդպիսով, մնաց անհետևանք: Որոշ գումար բաց թողեց միայն Ռուսաստանը, որը չնչին էր կարիքների համեմատ: Ռուսաստանում ստեղծվեցին օգնության բազմաթիվ կոմիտեներ: Այդպիսի օրգաններ ստեղծվեցին նաև արտասահմանում: Ընդհանուր առմամբ հայ գաղթականներին օգնելու համար ռուսահայությունը տվեց 4.580.000 ռուբլի ոսկով, գաղութահայությունը՝ 620.000 ռուբլի, իսկ ցարական կառավարությունը՝ 1.700.000 ռուբլի: Պարզաբանենք, սակայն, որ այդ գումարը նախատեսված էր ոչ թե միայն հայ, այլ նաև մյուս ազգություններին պատկանող գաղթականության համար: Կնչպես դիպուկ կերպով գրել է պրոֆ. Ս. Արզումանյանը, եթե միջոցները քիչ էին, ապա դրանց տնօրինողները շատ էին, որն ստեղծում էր կատարյալ քաոս ու չարաշահումների մթնոլորտ (էջ 470): Ծայր էր առել գանձագողությունը, հավաքված միջոցների հանցագործ վատնումն ու շռայլումը:

Հայերի կոտորածը շարունակվում էր հայ փախստականների սովահարությամբ, և միայն քիչ մասին հաջողվեց դուրս գալ այդ ծանր մղձավանջից:

ԵՐԵՈՒԻ ՀԱՆՑԱՎՈՐՆԵՐԸ: ՏԵՐՈՒԹՅՈՒՆՆԵՐԻ ԴԻՔՈՐՈՇՈՒՄԸ

Նախ՝ Հայոց Մեծ եղեռնի զոհերի թիվը: Ըստ Գիբբոնսի, Լեփսիուսի, Մորգենթաուի, Մանդելշտամի, Ֆայեզ էլ Ղոսեյնի և այլ հետազոտողների տվյալների՝ 1915-1916 թվականներին հայերի կորուստը կազմում էր ավելի քան մեկ միլիոն մարդ: Մինչև պատերազմի ավարտը այդ թիվը հասավ մեկուկես միլիոնի: Հայոց ցեղասպանության սփյուռքահայ հետազոտող երվանդ խաթանասյանը «Հայոց թիվը» (Բոստոն, 1965, էջ 21) աշխատության մեջ, ի մի բերելով օտարերկրյա և հայկական բազմաթիվ աղբյուրների հաղորդած տվյալները, գրում է. «Մեծ եղեռնին հայության նահատակների թիվը նվազագույնը մեկ ու կես միլիոն էր, իսկ ավելի ճիշտ, եթե ընդունենք 2.500.000 իբրև թուրքիայի ամբողջ հայության քանակ, եղեռնի մեր զոհերի թիվը պետք է հաշվել 1.763.000»:

Արևմտահայության նյութական կորուստները կազմեցին շուրջ 15 միլիարդ ֆրանկ: Ավերվեցին ու ոչնչացվեցին բազմաթիվ դարավոր հուշարձաններ, ձեռագրեր, գրքեր և այլ հոգևոր արժեքներ:

Հայոց Մեծ եղեռնի ամենագլխավոր հանցագործը թուրքական բռնակալությունն էր: Երիտթուրքերը ժառանգեցին ու զարգացրին հայերի բնաջնջման համիդյան մեթոդները: Հիշեցնենք, որ դեռևս 1915-ի օգոստոսի 31-ին Թալեաթը ցինիկորեն հայտարարեց, թե ինքը հայկական հարցի լուծման գործում երեք ամսում ավելի շատ գործ կատարեց, քան Աբդուլ-Համիդը 30 տարում: Նա չէր թաքցնում նաև, որ հայերի բռնագաղթն ու կոտորածը կազմակերպել է Թուրքիայի կառավարությունը: Միաժամանակ երիտթուրքական գործիչները ձգտում էին ամեն կերպ արդարացնել իրենց ցեղասպանական գործողությունները, թմբկահարելով, թե հայերը հեղափոխականներ էին, դավաճաններ, ռուսասերներ: Ջենալ փաշան ուղղակի գրում է, որ հայ և թուրք ժողովուրդների թշնամության հանցավորը անիժյալ Մոսկովյան քաղաքականությունն էր (Ջենալ փաշա, Հայկական հարցը, էջ 53-54):

1915 թվականի մայիսի 23-ին մամուլում հրապարակվեց Ռուսաստանի, Անգլիայի և Ֆրանսիայի համատեղ հայտարարությունը Հայաստանում տեղի ունեցող հայերի կոտորածների մասին: Որակելով դրանք իբրև հանցագործություն մարդկության և քաղաքակրթության դեմ, դաշնակցային կառավարությունները հայտարարում են Ղազար, որ նրանք այդ հանցագործությունների համար անձնապես պատասխանատու են համարում թուրքական կառավարության բոլոր անդամներին, ինչպես նաև տեղական իշխանությունների ներկայացուցիչներին (Հայերի ցեղասպանությունը..., էջ 249): Օսմանյան կառավարության՝ 1915 թ. հունիսի 6-ին տված պատասխանը լիովին ժխտում էր ցեղասպանության փաստը, միաժամանակ կեղծ մեղադրանք ներկայացնում հայերին, թե իբր նրանք Անտանտի պետություններից զենք են ստացել, հեղափոխական կազմակերպություններ հիմնել ու ապստամբել, ինչպես նաև կազմակերպել են կամավորական ջոկատներ: Թուրքիայի ներքին գործերի մինիստրությունը, Թալեաթի գլխավորությամբ, շտապեց 1916 թվականին թուրքերեն, գերմաներեն, անգլերեն և ֆրանսերեն հրատարակել «Հայկական կոմիտեների ապստամբական շարժումները սահմանադրության հայտարարությունից առաջ և հետո» փաստաթղթերի ժողովածուն, որտեղ կոտորածների ողջ մեղքը բարդվում է հայերի վրա ու հայտարարվում. «Հայերն իրենք են մեղավոր, որ իրենց կոտորել են,

բնաջնջել... Նրանք վտանգավոր էին թուրքական պետության համար, որովհետև համակրում էին ռուսներին, անգլիացիներին ու ֆրանսիացիներին... Անհրաժեշտ էր նրանց երկրի խորքը քշել... Տեղի են ունեցել սոսկ տխրալի ժայռահեղույուններ, մի քանի չինովնիկներ թույլ են տվել էքսցեսներ, բայց կպատժվեն» (Ղուշամատյան, էջ 1093): Հասկանալի է, որ այդ կեղծագիրն ուներ բացահայտ զրպարտչական բնույթ:

Պատմագրության մեջ դրվել է այն հարցը, թե թուրք ժողովուրդը մեղք ունի՞ հայկական եղեռնի մեջ, թե՞ ոչ: Պետք է ասել, որ սփյուռքահայ գրեթե բոլոր հեղինակները, որոնց մի ստվար մասը նաև դեպքերին ակամատես-ժամանակակիցներ են, հարցին տալիս են միանշանակ դրական պատասխան՝ այո՛, թուրք ժողովուրդն ամբողջությամբ մեղսակից է մեծ ոճրին: Խորհրդահայ պատմագրության մեջ «մարքսիստական մեթոդոլոգիայով» զինված որոշ պատմաբաններ անօգուտ ճիգեր են թափել «թուրք աշխատավոր ժողովրդին» առանձնացնել «ոճրագործ կառավարությունից» ու նրա վրայից վերցնել պատասխանատվությունը, նույնիսկ նրան ներկայացնել իբրև տառապյալ հայերի բարերար: Մեր կարծիքով, որոշ վերապահումներով ընդունելի է պրոֆ. Մ. Արզումանյանի մոտեցումը: Նա գրում է. «Իհարկե, սխալ կլինի հավասարության նշան դնել թուրքական բռնակալ կառավարողների, իշխող դասակարգերի և աշխատավոր մասսաների մեջ: Վերջիններս իրենք էին ճշվում սեփական կեղեքիչներից, իսկ հայկական կոտորածների ժամանակ էլ եղան դեպքեր, երբ նրանք այս կամ այն օգնությունը կազմակերպեցին տարաբախտ հայերին... բայց կարեկցանքի ու օգնության առանձին դեպքերը եղանակ չստեղծեցին, և մեծ ոճիրը կազմակերպվեց հետամնաց ու մոլեռանդ թուրք ժողովրդի, ինչպես նաև մնացած մուսուլմանների (չերքեզների, քրդերի և մյուսների) մասնակցությամբ...»

Թուրք ժողովուրդը պետք է իր մեղքը հատուցի նրանով, որ դատապարտի հայկական կոտորածները, պատժի նրա հանցավորներին և ուղղի պատմական անարդարությունը» (Մ. Արզումանյան, էջ 513-515):

Հայկական եղեռնի երկրորդ գլխավոր հանցավորն ու պատասխանատուն իմպերիալիստական Գերմանիան էր, որը հովանավորում ու աջակցում էր Թուրքիային: Գերմանիան նպատակ ուներ ռուսական կողմնորոշում ունեցող հայերին քշել դեպի արաբական անապատները և նրանց օգտագործել, իբրև բանվորական ու Քաղաղի երկաթուղու վրա: Եվ իզուր չէ, որ սփյուռքահայ մի շարք հեղինակներ հայերի բնաջնջումը սահմանում են «Գերմանական մեթոդ-թուրքական գործե-

լակերպ» արտահայտությամբ: Գերմանական այդ ծրագիրն էր, որ հետագայում կատարելագործեցին ֆաշիստները (Ձոն Կիրակոսյան, էջ 349): Այո՛, փաստերը վկայում են, որ հայերին տեղահանելու և Միջագետքի անապատները քշելու գաղափարը թուրքերին հուշել էին գերմանացիները: Այդ ծրագրի իրականացման գործում քստմնելի դեր կատարեցին Թուրքիայում գերմանական դեսպան Վանգենհայմը, Հալեպի հյուպատոս Ռյուպերը և ուրիշներ: Դիպուկ է նկատել Գր. Պալաքյանը, թե Թուրքիայում գտնվող գերմանացի բոլոր սպաները, հազվագյուտ բացառությամբ, թուրքերի չափ հայատյաց էին (Գր. Պալաքյան, էջ 34–35):

1915 թ. հուլիսին հայերի բնաջնջման դեմ բողոքով հանդես եկավ Հռոմի Բենեդիկտ 15–րդ պապը: Այդ առթիվ նա սեպտեմբերին հատուկ նամակ հասցեագրեց սուլթանին, որը, սակայն, մնաց անպատասխան:

Տերությունների բարձրագույն խոստումներն ու հայտարարությունները, սակայն, մնում էին սոսկ որպես այդպիսիք: Անգլիական կառավարությունը հրաժարվեց անգամ մասնակցել տարագիր արևմտահայությանը նյութական օգնություն ցույց տալու նպատակով 1916 թ. հունվարին Ռուսաստանի նախաձեռնած ծրագրին, ըստ որի՝ Մեծ Բրիտանիային հատկացվում էր 20 հազար ֆունտ ստեռլինգի մասնաբաժին: Իսկ բրիտանական կառավարության հրաժարումը ենթադրում էր նաև ֆրանսիական կառավարության հրաժարում, որովհետև նա իր մասնակցությունը պայմանավորել էր միայն անգլիական կողմի մասնակցությամբ:

Ինչպես գրում է նորագույն հետազոտող Լ. Հովհաննիսյանը, դիվանագիտական բողոքներն ու հայտարարությունները, անշուշտ, անհրաժեշտ էին, բայց, ցավոք, ոչ բավարար՝ հայերի սպանող կանխելու համար (Լիլիթ Հովհաննիսյան, Հայկական հարցը և մեծ տերությունները 1914–1917 թվականներին, Երևան, 2002, էջ 63):

1915 թ. հունիսին Կոստանդնուպոլսի գերմանական դեսպանությունը դիվանագիտական ու քաղաքական նկատառումներով պաշտոնական բողոք–հուշագիր ներկայացրեց թուրքական կառավարությանը: Սակայն Ավստրո–Հունգարիան, Իտալիան և Բուլղարիան չդատապարտեցին արևմտահայերի ցեղասպանությունը:

ԱՄՆ–ի արտգործնախարարությունը երկու անգամ բողոք ներկայացրեց թուրքական կառավարությանը՝ հայերի կոտորածներին վերջ տալու պահանջով:

«Ճիշտ է,— եզրակացնում է Լ. Հովհաննիսյանը,— եվրոպական տերությունները և ԱՄՆ–ը դատապարտեցին արևմտահայերի ցեղաս-

պանությունը որպես մարդկության դեմ գործված հանցագործություն և դրա ողջ պատասխանատվությունը դրեցին երիտթուրքական կառավարության վրա, բայց նրանց Արևելյան քաղաքականության ոլորտում բնաջնջվող հայերի շահերի պաշտպանությունը երկրորդական տեղ էր զրավում: Տերությունները հետամուտ էին՝ իրենց նեղ պետական շահերը պաշտպանելու, իրենց քաղաքական նկատառումներով առաջնորդվելու (Լ. Հ., էջ 68)»:

Դաժան իրականությունն այն էր, որ ճիշտ այն պահին, երբ աշխարհի ամտարբեր աչքերի առջև արևմտահայության արյան գետեր էին գոյանում, 1915 թ. աշնան–1916 թ. գարնան ամիսներին Մեծ Բրիտանիայի, Ֆրանսիայի և Ռուսաստանի միջև գաղտնի բանակցություններ էին ընթանում Օսմանյան կայսրության տարածքների բաժանման վերաբերյալ, որը նրանց համար շատ ավելի կարևոր էր, քան մորթոտվող արևմտահայության ճակատագիրը:

Ասվածի առարկայական արտահայտությունն է Սայքս–Պիկոյի գաղտնի համաձայնագիրը՝ կայացած 1916 թ. մայիսին Լոնդոնում Մեծ Բրիտանիայի արտգործնախարար Է. Գրեյի և ֆրանսիական դեսպան Պ. Կամբոնի միջև, և որը վերաբերում էր Օսմանյան կայսրության ասիական տիրույթների բաժանմանը: Համաձայնագիրն այդպես կոչվեց անգլիացի դիվանագետ Ս. Սայքսի և ֆրանսիացի դիվանագետ Ժ. Պիկոյի անուններով, որոնք նախապատրաստել էին փաստաթուղթը: Բանակցությունների փաստաթղթերում «Հայաստան» և «Հայկական հարց» տերմիններն առհասարակ բացակայում էին:

Իսկ մինչ այդ՝ 1915 թ. կնքված անգլո–ֆրանս–ռուսական մեկ այլ համաձայնագրով դաշնակիցները ճանաչել էին Ռուսաստանի իրավունքները Կոստանդնուպոլսի և նեղուցների, Էրզրոմի, Տրապիզոնի, Վանի, Բիթլիսի նահանգների և Քուրդիստանի մի մասի վրա: Սայքս–Պիկոյի համաձայնագիրը նախատեսում էր տարբեր երկրների անցնող հինգ՝ կապույտ, կարմիր, դարչնագույն, դեղին, կանաչ, ինչպես նաև A, B, C գոտիների ստեղծում: Կապույտ գոտին, որի մեջ էր Կիլիկիան, անցնում էր Ֆրանսիային, կարմիրը՝ Անգլիային, դեղինը՝ Ռուսաստանին, որն իր մեջ ներառում էր Արևմտյան Հայաստանի մեծ մասը:

1917 թ. նոյեմբերի վերջին Խորհրդային Ռուսաստանի կառավարությունը հրապարակեց Սայքս–Պիկոյի մինչ այդ գաղտնի պահվող համաձայնագիրը և չեղյալ հայտարարեց այն (Հայկական հարց: Հանրագիտարան (ռուսերեն): Երևան, 1991, էջ 286–287):

հնչպես եզրակացնում է Լ. Դովհաննիսյանը, 1915–1916 թվականներին, սկսելով Արևմտյան Հայաստանին և Կիլիկիային ինքնավարություն տալու ծրագրից, Եռյակ համաձայնության երկրները հանգեցին դրանց գրավմանն ու բաժանմանը (Լ. Դ., էջ 100):

ԱՇԽԱՐՀԻ ԱՎԱՆԱՎՈՐ ՄԱՐԴԻԿ ԴԱՏԱՊԱՐՏՈՒՄ ԵՆ ՀԱՅՈՑ ՑԵՂԱՍՊԱՆՈՒԹՅՈՒՆԸ

Դարի աննախադեպ ոճրագործությունը՝ հայոց ցեղասպանությունը, չէր կարող չհարուցել աշխարհի առաջադեմ հասարակայնության բուռն զայրույթն ու ցասումնալի բողոքը: Ցեղասպանության զայրագին դատապարտմամբ ու հայ ժողովրդի շահերի պաշտպանությամբ իրենց ձայնը բարձրացրին ռուս, անգլիացի, ամերիկացի, ֆրանսիացի, գերմանացի, լեհ ու այլ ազգերի բազմաթիվ ակամավոր մտավորականներ:

Ամերիկյան գիտնական, փիլիսոփայության դոկտոր Հերբերտ Ադամս Գիրոնսը հրատարակեց «Նորագույն պատմության ամենասև էջը. Վերջին կոտորածները Հայաստանում» մեծաթեք գիրքը, որը հայոց ցեղասպանությունը դատապարտող առաջին ուսումնասիրություններից մեկն է և որի հայերեն առաջին թարգմանությունը լույս է տեսել Նյու Յորքում 1916–ին:

Թուրքական գազանությունների հուժկու դատապարտմամբ Եռանդագին կերպով հանդես եկավ ամերիկյան հռչակավոր գրող–իրապարակախոս Ջոն Ռիդը:

Պատերազմի տարիներին Թուրքիայում ամերիկյան դեսպան Հենրի Մորգենթաուն հրատարակեց հուշերի գիրք, որը չափազանց կարևոր սկզբնաղբյուր է հայոց Մեծ եղեռնի պատմության համար: Արտահայտելով իր խորին համակրանքը մորթոտվող արևմտահայության նկատմամբ՝ հեղինակը տվել է թուրքերի ոճրագործությունները մերկացնող բազմաթիվ արժեքավոր վկայություններ:

1916 թ. ապրիլի 9–ին, ելույթ ունենալով Փարիզում, Սորբոնի համալսարանի դահլիճում, ֆրանսիացի աշխարհահռչակ գրող Անատոլ Ֆրանսն ասաց. «Երբ մենք տեսանք Թուրքիայում այդ դժբախտ զոհը, որի հայացքը լիակատար հույսով ուղղված էր դեպի մեզ, մենք վերջապես հասկացանք, որ Արևելքում մեռնում է մեր Քույրը, որ նա մեռնում է միայն այն բանի համար, որ նա մեր քույրն է: Նրա հանցանքն այն է, որ

նա բաժանել է մեր զգացմունքները, սիրել է այն, ինչ սիրել ենք մենք, մտածել է այնպես, ինչպես մենք, հավատացել է այն ամենին, ինչին հավատացել ենք մենք և մեզ նման ընկալել է իմաստություն, բանաստեղծություն և արվեստ: Դրա մեջ է նրա հանցանքը... Հայաստանը մեռնում է, բայց նա կվերածնվի: Նրան մնացել է շատ քիչ արյուն,— թանկագին արյուն, որից կծնվի մի հերոսական սերունդ»:

Ջայրագին բողոքով հանդես եկավ աշխարհահռչակ ֆրանսիացի գրող Ռոմեն Ռոլանը:

Հայոց ցեղասպանության դեմ վճռաբար հանդես եկավ ֆրանսիական սոցիալիստ, հրապարակագիր Անրի Բարբին: Նա 1916 թ. մարտին այցելեց Արևմտյան Հայաստան, հավաքեց համապատասխան նյութեր և հրատարակեց «Սարսափի երկրին մեջ. Նահատակ Հայաստան. Պոլիս, 1919» գիրքը, որը արևմտահայերի ողբերգությունը օբյեկտիվորեն պատկերող աշխատություն է: Նա միաժամանակ հիացմունքով զրել է հայերի ինքնապաշտպանական հերոսամարտերի մասին:

Դատապարտող ելույթներով հանդես եկան նշանավոր գիտնականներ Անտուան Մեյեն, Ֆրեդերիկ Մակլերը, Վիկտոր Բերարը և ուրիշներ:

Հայոց ցեղասպանությունը լայն արձագանք գտավ Շվեյցարիայում: Շվեյցարական առաջադեմ մտածողները, դեմոկրատական խավերի ներկայացուցիչները մամուլի միջոցով իրենց խորին զայրույթն արտահայտեցին համաշխարհային պատմության մեջ աննախադեպ այդ ոճրագործության առթիվ և պահանջեցին հնարավոր բոլոր միջոցներով կանխել նրա հետագա ընթացքը:

Ուժգնորեն հնչեց բելգիացի նշանավոր գրող Էմիլ Վերհարնի ձայնը, որը հատուկ գիրք նվիրեց պատերազմի իրադարձություններին ու հայոց տառապանքներին: Գիրքը կրում է «Ուազմի կարմիր թևեր» վերնագիրը:

Հայ ժողովրդի անկեղծ բարեկամն էր ու նրա շահերի անհողողող պաշտպան կանգնեց Նորվեգացի աշխարհահռչակ բենեախոյզ–աշխարհագրագետ, Պետերբուրգի գիտությունների ակադեմիայի պատվավոր անդամ Ֆրիտյոֆ Նանսենը: Պատերազմի ժամանակ նա ցնցվեց արևմտահայությանը բաժին ընկած անլուր աղետից և իրեն նվիրեց Եղեռնից փրկված հայության բեկորներին օգնելու գործին: Նա կանգնեց Ազգերի Լիգայի ստեղծած հայ գաղթականության գործերի միջազգային հանձնաժողովի գլուխ: Սահմանվեց «Նանսենյան անձնագիրը», որը տրվում էր աշխարհով մեկ սփռված հայ գաղթականներին, որոնք չունեին որևէ պետության քաղաքացիություն և անձը հաստատող փաստա-

թուղթ: Նրա գրչին են պատկանում «Հայաստանը և Մերծավոր Արևելքը» (Երևան, 1993), «Խաբված ժողովուրդ» (Երևան, 2001) մեծաթեք գրքերը, որոնք նվիրված են հայ ժողովրդի անցյալի լուսաբանմանն ու նորագույն ժամանակաշրջանի վերլուծությանը: Դիմակազերծ անելով եվրոպական դիվանագետների՝ մեծ նորվեգացին երկրորդ գրքում գրել է. «Վայ հայ ժողովրդին, որ խճճվել է Եվրոպայի քաղաքականության մեջ, նրա համար ավելի լավ կլինեք, եթե հայ ժողովրդի անունը երբեք չհիշատակվեր եվրոպական դիվանագետների շուրթերով: Բայց հայ ժողովուրդը երբեք չկորցրեց հույսը: Նա սպասեց, և անընդհատ, համառ աշխատելով, շատ երկար սպասեց: Նա սպասում է մինչև այսօր»:

1925 թ. Նանսենը եղավ Խորհրդային Հայաստանում՝ հայ գաղթականներին տեղավորելու հարցերով, մասնակցեց Շիրակի ջրանցքի բացմանը: Նրա պայծառ անունը հավերժորեն գրանցված է հայ ժողովրդի ճշմարիտ բարեկամների ցանկում:

Եղեռնի օրերին բուլղարական ծախս սոցիալ-դեմոկրատների՝ տեսնյակների համագումարը հատուկ քննության ենթարկեց արևմտահայության ողբերգության հարցը և դատապարտեց այդ հրեշավոր ոճրի հանցագործներին: Զիչ ավելի ուշ նույն արեց բուլղարական կոմունիստական շարժման հիմնադիրներից մեկը՝ Վասիլ Կոլարովը:

Համաշխարհային հասարակայնության բուռն ուշադրությանն արժանացավ անգլիացի հրապարակախոս և պատմաբան Առնոլդ Թոյնբիի 1915 թ. հրատարակած «Հայկական սարսափները. Մի ազգի բնաջնջումը» գիրքը:

1916 թ. Լոնդոնում լորդ Ջեյմս Բրայսի նախաձեռնությամբ ու նրա ներածականով հրատարակվեց արևմտահայերի դժոխային վիճակը պատկերող փաստաթղթերի մեծածավալ ժողովածու: Բրայսը հերքում է բոլոր այն կեղծ փաստարկները, որոնք միտում ունեն արդարացնել թուրքերի ոճրագործությունը:

1916 թ. հունվարի 1–ին Գերմանիայի Ռայխստագի (պառլամենտ) նիստում Հայոց ցեղասպանության մասին վճռական հարցապնդում արեց միջազգային բանվորական շարժման ականավոր գործիչ, պատգամավոր Կարլ Լիբկեռնխտը, որը փաստորեն իր երկրի կառավարությանը համարեց թուրք ոճրագործների հանցակից: Նրա ելույթները լայն արձագանք գտան ամբողջ աշխարհում:

Հայ ժողովրդի ջերմ պաշտպանությամբ հանդես եկավ գերմանացի նշանավոր միսիոներ, աստվածաբանության դոկտոր Յոհաննես

Լեփսիուսը: Տեղեկանալով հայերի տեղահանմանն ու ոչնչացման մասին, Լեփսիուսը նախ ապարդյուն ճիզեր գործադրեց ազդելու Գերմանիայի կառավարության վրա: Այնուհետև նա մեկնեց Կ. Պոլիս, փորձեց ստանալ գերմանական դեսպան Վանզենհայմի աջակցությունը, բայց իզուր: Հաջողություն չունեցավ նաև նրա հանդիպումը Թալեաթի և Էնվերի հետ: Պոլսում նա հանդիպեց նաև Ջավեն պատրիարքի հետ: Հալածանքների ենթարկվելով՝ Լեփսիուսը փախչում է Հոլանդիա և հրատարակում «Հայաստանի ջարդերը» գիրքը, որտեղ փաստական հարուստ նյութի հիման վրա տրված է Հայոց եղեռնի իրական պատկերը: Իբրև վկա մասնակցելով Թալեաթ փաշայի սպանության գործով դատավարությանը՝ նա մեծապես նպաստեց Թալեաթին սպանողի՝ հայ վրիժառու Սողոմոն Թեհլերյանի արդարացմանը:

Հայոց ցեղասպանության դեմ իր ազնիվ ծայնը բարձրացրեց գերմանացի գրող և հրապարակախոս Արմին Վեզները: Պատերազմի ժամանակ նա թուրքիայում գիմվորական թղթակից էր, սանիտարական ծառայության լեյտենանտ: Միջազգետքում նա սեփական աչքերով տեսավ արևմտահայերի ողբերգությունը և երդվեց մինչև վերջին շունչը պայքարել հայերի արդար դատի համար: Եղեռնի վերաբերյալ նա հավաքեց շուրջ 2000 լուսանկարներ: 1919 թ. հունվարին Վեզները ԱՄՆ–ի պրեզիդենտ Վիլսոնին հղեց բաց նամակ՝ «Հայ ժողովրդի արտաքսումը դեպի անապատներ» վերնագրով, որը կարևորագույն փաստաթուղթ է Հայոց եղեռնի մասին: Հեղինակը խնդիր է դնում պատժել հանցավորներին և արդարացիորեն լուծել Հայկական հարցը: 1919 թ. զարմանը Վեզները Բեռլինի թատրոններից մեկում դասախոսություն է կարդում Հայոց եղեռնի մասին, որն ուղեկցվում է Եկրանի վրա ահավոր տեսարաններ պատկերող լուսանկարների ցուցադրումով:

Ա. Վեզները երկու անգամ՝ 1927–ին և 1968–ին, եղել է Խորհրդային Հայաստանում, հիացել հայ ժողովրդի նվաճումներով, այն անվանել իսկական հրաշք:

Հայ ժողովրդի մեծ բարեկամներից էր գերմանացի աշխարհահռչակ գիտնական, հայագետ Յոզեֆ Մարկվարտը: Վեզների դասախոսության ժամանակ նա ապտակել էր մի թուրք ստահակի, տնից վռնդել իրեն կողոպտված հայկական ձեռագիր վաճառել ցանկացող մի թուրք սպայի: 1919–ին Մարկվարտը Բեռլինում հրատարակեց «Հայ ազգի ծագումն ու վերածնունդը» աշխատությունը, որտեղ մերկացրեց թուրք

մարդասպաններին ու նրանց գերմանացի հովանավորներին: Նա իր ազգանունը հայերեն թարգմանեց «Բղեշխյան»:

Մեծագույն հայասեր էր ավստրիացի գրող Ֆրանց Վերֆելը՝ «Մուսա լեռան քառասուն օրը» վեպի հեղինակը, որը լույս տեսավ 1934-ին: Գիրքը արգելվեց հիտլերյան իշխանության կողմից, իսկ ինքը վտարանդվեց: Սակայն գիրքը թարգմանվեց աշխարհի բազմաթիվ լեզուներով:

Արաբ պետական գործիչ, իրավաբան Ֆայեզ էլ Ղոսեյնը 1917 թ. Կահիրեում ֆրանսերեն հրատարակեց «Չերոսական հայության անցյալն: Ջարդերը Չայաստանի մեջ (ակնմատեսի վկայություններ)» գիրքը, որը հայերեն լույս տեսավ դարձյալ Կահիրեում, 1960-ին: Գրքում արտահայտված է արաբ հեղինակի ճշմարտացի մոտեցումը Չայոց եղեռնի նկատմամբ, նրա դատապարտող վերաբերմունքը: Չեղինակն այն համոզման է, որ երիտթուրքերի չարագործությունը ոչ մի կապ չունի մահմեդական կրոնի հետ:

1961-ին Չայոց եղեռնի դեմ իր ձայնը բարձրացրեց լեհ նշանավոր հրապարակախոս Բոգդան Գեմբարսկին՝ մամուլի միջոցով բաց նամակով դիմելով թուրք մտավորականությանը: Նա պահանջում էր ասել ողջ ճշմարտությունը, դատապարտել Չայոց եղեռնի հանցավորներին և հայ ժողովրդին տալ արդարացի փոխհատուցում: Գրապարակի վրա են նրա «Նամակներ աշխարհին» (Երևան, 1990) և «Մահվան դատապարտվածները» (Երևան, 1993) գրքերը:

Եղեռնի ահավոր ժամանակաշրջանում հայ ժողովրդի թիկունքին պատվար կանգնեց ռուս առաջադեմ մտավորականությունը: Դեռ 1916-ին, ռուս նշանավոր գրող Մաքսիմ Գորկին Վահան Տերյանի աջակցությամբ հրատարակեց «Չայ գարկանության ժողովածու», իսկ նրա հիմնադրած «Լետոպիս» ամսագրում հրապարակվեցին հայապաշտպան մի շարք հոդվածներ:

1915 թ. Մոսկվայում լույս տեսավ ռուս ակննավոր գրականագետ, պրոֆեսոր Յուրի Վեսելովսկու «Արևմտյան Չայաստանի ողբերգությունը» գրքույկը, որտեղ հեղինակը մերկացնում է եվրոպական շահադիտական դիվանագիտությունը, որը և հանգեցրեց հայկական կոտորածներին: Նա սովորել է Մոսկվայի հայկական Լազարյան ճեմարանում, գիտեր հայերեն, խորապես ուսումնասիրել էր հայոց պատմությունն ու գրականությունը: Վեսելովսկու գրչին է պատկանում նաև «Մոռացված երկրամասի զավակները» (Մոսկվա, 1916) գրքույկը, ինչպես նաև մի ամբողջ հոդվածաշար, որոնք ցնցող պատկերներով ընթերցողին են ներկայացնում հայ ժողովրդի ողբերգությունը:

Ռուս մեծահամբավ բանաստեղծ և գիտնական Վալերի Բրյուսովը սովորել էր հայերեն, ուսումնասիրել հայկական սկզբնաղբյուրներ: Պատերազմի ժամանակ նա եղավ Երևանում, Էջմիածնում, տեսավ արևմտահայ գաղթականներին, զրուցեց նրանց հետ: Նա գրեց «Չայ ժողովրդի պատմական բախտի տարեգրությունը» աշխատությունը, որի մեջ 9 գլուխներով ներկայացրեց հայ ժողովրդի անցած ուղին՝ Վանի թագավորությունից մինչև 1915 թվական: Նա ձեռնարկեց նաև հայ բանաստեղծության թարգմանության ու տարածման գործին:

Ռուս նշանավոր արևելագետ, ակադեմիկոս Վ. Ա. Գորդլևսկին դեռ պատերազմից առաջ և նրա ընթացքում եղել էր Արևմտյան Չայաստանում, ուսումնասիրել պատմական հուշարձանները, ակնմատես եղել կոտորածներին: Պատերազմի տարիներին ռուս ակննավոր գիտնականը գրեց հայ ժողովրդի պատմության հարցերին նվիրված մի շարք արժեքավոր հոդվածներ, որոնք 1916 թ. ամփոփեց «Չայերը և պատերազմը» աշխատության մեջ: Ցավով նկարագրելով հայ ժողովրդի տառապանքները՝ ռուս գիտնականը միաժամանակ հիացմունքով է խոսում նրանց ինքնապաշտպանական կռիվների մասին:

Չայ ժողովրդի մեծագույն ողբերգության մասին փաստական նյութեր և գիտական լուսաբանություն է տվել ռուս մեծահամբավ պատմաբան, ակադեմիկոս Ե. Վ. Տարլեն «Եվրոպան իմպերիալիզմի էպոխայում» ժողովածուի 5-րդ հատորում: Չայոց եղեռնը նա որակել է իբրև միանգամայն բացառիկ երևույթ համաշխարհային պատմության մեջ՝ սկսած Չինգիզ խանի ժամանակներից: Նա քննարկել է Թալեաթի և Էնվերի դիրեկտիվները հայերի բնաջնջման մասին: Գիտնականը մանրամասնորեն նկարագրել է եղեռնի գործադրության եղանակները, մերժել ցեղասպանությունը հայերի կարծեցյալ ապստամբությամբ պատճառաբանելու ստահող վարկածը: Նա բացահայտել է նաև բուրժուական դիվանագիտության խաղացած սև դերը: Չամբավավոր գիտնականն ամենայն մանրամասնությամբ կանգ է առել Սողոմոն Թեխլերյանի պատմության վրա, ջերմությամբ խոսել հայ վրիժառուի մասին:

Չայոց ցեղասպանության վերաբերյալ կարևոր փաստական նյութեր են պարունակում Մոսկվայի համալսարանի պրոֆեսոր, կադետ Ս. Կոտլյարսկու մի շարք հոդվածները, որոնք մեջ առանձնանում է «Չայ ժողովրդի ողբերգությունը» հոդվածը: Նա հույս է հայտնում, որ ապագան բարեհաճ կլինի տաղանդավոր հայ ժողովրդի տառապած և հյուծված սերունդների համար:

Իր աշխատություններով ու ելույթներով տառապալ արևմտահայությանը զորավիգ կանգնեց ռուս նշանավոր արևելագետ Մաքսիմ Կոպալևսկին:

Արևմտահայության ողբերգական ճակատագրի վերաբերյալ բազմաթիվ նյութեր հրատարակվեցին ռուսական պարբերական մամուլում: Դրանցից էին «Կավկասկոյե սլովո», «Կավկասկի տելեգրաֆ», «Ռուսսկիե վեդոմոստի» թերթերը: Կարևոր դեր խաղաց «Արմյանսկի վեստնիկ» ամսագիրը, որը 1916–1918 թթ. լույս էր տեսնում Մոսկվայում, շաբաթը մեկ անգամ և որի խմբագիրն էր Ա. Ջիվելեգովը: Ամսագրին մասնակցում էին բանաստեղծ Ս. Գորոդեցկին, պոռֆեսոր Ս. Կոտլյարևսկին: Ամսագրի շուրջ 100 համարներում զետեղված են բազմաթիվ հոդվածներ արևմտահայության դառնադեմ ճակատագրի մասին:

Համանման հոդվածներ են հրապարակված նաև «Արմյանե ի վոյնա» ամսագրում, որի 10 համարները հրատարակվել են Օդեսայում, 1916–1917 թվականներին:

ԵՐԻՏԹՈՒՐԵՐԻ ԴԱՏԱՊԱՐՏՈՒՄԸ: ՀԱՅ ԿՐԻՃԱՌՈՒՆԵՐԻ ԱՐԴԱՐ ԴԱՏԱՍԱՆԸ

1918 թ. Մուղրոսի զինադադարից հետո, երբ թուրքիան ճանաչվեց իբրև պարտված պետություն, երիտթուրքական վարչակարգը տապալվեց և Ահմեդ Իզզեթ փաշայի գլխավորած նոր կաբինետը որոշում կայացրեց Օսմանյան կայսրությանը Առաջին համաշխարհային պատերազմի մեջ ներքաշելու և հայերի տեղահանությունն ու կոտորածը կազմակերպելու համար դատական պատասխանատվության ենթարկել երիտթուրքական կառավարության ղեկավարներին, ինչպես նաև «Միություն և առաջադիմություն» կուսակցության կենտրոնական կոմիտեի անդամներին: Դեռևս 1918 թ. դեկտեմբերի 16–ի որոշմամբ, երբ թուրքիայի վարչպետն էր Ահմեդ Թեվֆիկը, կազմվում են հարցաքննիչ հանձնախմբեր՝ Անկարայի նախկին վալի Մազհար բեյի նախագահությամբ, որոնք սկսում են հավաքել արևմտահայության կոտորածներին վերաբերող մեղադրական ապացույցներ՝ ծածկագիր հեռագրեր, պաշտոնական հրահանգներ և հրամաններ, ինչպես նաև ականատեսների վկայություններ:

Օսմանյան կայսրության նահանգները բաժանվում են 10 դատաքննչական շրջանների, յուրաքանչյուր շրջանի համար նշանակվում

են դատախազներ, հարցաքննիչ դատավորներ և քարտուղարներ: Մամուլը լայն աշխատանք է կատարում հանցագործներին բացահայտելու և դատաքննությանը հանձնելու ուղղությամբ:

Ձեռքակալվում են երիտթուրքական մի շարք մինիստրներ և կուսակցության ղեկավարներ, շրջանային պատասխանատու քարտուղարներ, լիազորներ, կուսակալներ, զինվորականներ և պաշտոնատար այլ անձինք: Սակայն հայկական կոտորածների հիմնական կազմակերպիչները հասցրել էին փախուստի դիմել և ծալված թաքնվել Գերմանիայում:

1919 թ. հունվարի 8–ին Կ. Պոլսում կազմվում են Առաջին, Երկրորդ և Երրորդ ռազմական արտակարգ ատյաններ: Նույն թվականի մարտի 8–ին սուլթան Մեհմեդ 6–րդ Վահիդեդդինի (1918–1922) հատուկ հրամանագրով երիտթուրքական կուսակցական պարագլուխներն ու մինիստրները հանձնվում են Կ. Պոլսի ռազմական արտակարգ ատյանի քննությանը: Այդ ժամանակ կառավարական կաբինետը գլխավորում էր Դամադ Ֆերիդ փաշան՝ 1919 թ. մարտի 4–ից մինչև հոկտեմբերի 1–ը:

Երիտթուրքական կառավարության ղեկավարների և կուսակցության կենտկոմի անդամների դատավարությունն սկսվում է 1919 թ. ապրիլի 27–ին Կ. Պոլսում և ընդհատումներով տևում մինչև հունիսի 26–ը: Այն տեղի էր ունենում անգլիական օկուպացիոն զորքերի հսկողության տակ: Դատաքննությունն անցկացնող հանձնաժողովի անդամներն էին գեներալ–լեյտենանտ Մուստաֆա Նազըմ փաշան (նախագահ), գեներալ–մայոր Ջեքի փաշան, գեներալ–մայոր Մուստաֆա փաշան, գեներալ–մայոր Ալի Նազըմ փաշան, գնդապետ Ռեջեթ Ֆերդի բեյը: Մայիսին տեղի ունեցած 6 նիստերի ընթացքում հարցաքննվում են կուսակցության կենտկոմի անդամները, մեծ վեզիր Սայիդ Հալիմ փաշան և մի քանի մինիստրներ: Սակայն անբացատրելի պարագաներում մայիսի 28–ին անգլիական հրամանատարության կողմից 77 ձերբակալվածներ դուրս են բերվում բանտից և աքսորվում Մալթա կղզի, որի հետևանքով դատավարությունն ընդհատվում է: Հունիսին դատավարությունը վերսկսվում է և տեղի ունեցած 7 նիստերում լսվում է հեռակա կարգով 11 և դատավարությանը ներկա 20 կուսակցական և պետական բարձրաստիճան անձանց դատաքննությունը: Հեռակա կարգով դատվողներն էին ներքին գործերի մինիստր, մեծ վեզիր Թալեթ փաշան, ռազմական մինիստր Էմվեր փաշան, ծովային մինիստր Ջեմալ փաշան, երիտթուրքական կուսակցության կենտկոմի անդամ, Թեջքիլաթը մախսուսեի նախագահ Բեհաեդդին Շաբիր բեյը, կենտկոմի անդամ, հանրակրթության մի-

միստր, Թեշքիլաթը մախսուսեի անդամ դոկտոր Նազըմ բեյը, ֆինանս-մեթրի մինիստր Ջավիդ բեյը, հողագործության և առևտրի մինիստր Սուլեյման էլբիստանի բեյը, վերջինիս հաջորդ Մուստաֆա Շերիֆ բեյը, փոստի և հեռագրատան մինիստր Օսկան էֆենդին, կենտրոնի անդամ դոկտոր Ռուզուլի էֆենդին, հասարակական անվտանգության մինիստր, Թեշքիլաթը մախսուսեի անդամ Ազիզ էֆենդին:

Դատարանում ներկա գտնվողների մեջ էին 1913–1916 թթ. մեծ վեզիր Սայիդ Չալիմ փաշան, կուսակցության կենտրոնի գլխավոր քարտուղար Միդհատ Շյուքրի բեյը, Կ. Պոլսի պարետ Ահմեդ Ջևադ բեյը, Անկարայի պատգամավոր Աթիֆ բեյը, կենտրոնի անդամներ Ջիա Գյոքալփը, Քյուչուկ Թալեաթ բեյը, Ռիզա բեյը, արդարադատության և արտգործմինիստր Խալիլ էֆենդին, 1917–1918 թթ. ներքին գործերի մինիստր Իսմայիլ Ջանփուլատ բեյը, հանրակրթության մինիստր Շյուքրի բեյը, պարենավորման մինիստր Քեմալ բեյը և ուրիշներ:

Հանձնաժողովի նախագահը առաջին հերթին հաստատում է մեղադրյալների ինքնությունը, իսկ դատական քարտուղար Շեֆիկ բեյը ընթերցում է մեղադրական եզրակացությունը: Գլխավոր դատախազ Մուստաֆա Նազըմ փաշան համաձայնություն է տալիս բացակայություն հեռակա կարգով դատելուն:

Մեղադրական եզրակացություններում բերված փաստաթղթերը՝ ծածկագիր հեռագրերը, նամակները, վկայում են, որ արևմտահայության տեղահանություններն ու կոտորածները ռազմական կամ կարգապահական միջոցառում չեն եղել, սահմանափակ կամ տեղական բնույթ չեն կրել, այլ եղել են կանխամտածված և իրականացվել են կուսակցության կենտրոնի նախաձեռնությամբ, հատուկ կենտրոնի հրահանգներով ու զաղտնի հրամաններով:

Դատավարության 2–րդ, 5–րդ և 6–րդ նիստերում հարցաքննության է ենթարկվում Թեշքիլաթը մախսուսեին: Բացահայտվում է, որ այդ կազմակերպության հանցագործ գործունեությանը մասնակից են եղել կուսակցության կենտրոնի գլխավոր քարտուղար Միդհատ Շյուքրի բեյը, Անկարայի պատգամավոր Աթիֆ բեյը, հանրակրթության մինիստր Շյուքրի բեյը, մեջլիսի նախագահ Խալիլը, հասարակական անվտանգության մինիստր Ազիզ բեյը, Կ. Պոլսի պարետ Ջևադը: Նրանց ղեկավարել է ներքին գործերի մինիստր Թալեաթը: Լիովին բացահայտվում է այն փաստը, որ տեղահանության և կոտորածի մասին որոշումը կայաց-

վել է երիտթուրքական կուսակցության կենտրոնի զաղտնի միստերից մեկում՝ ծայրերի մեծամասնությամբ:

1919 թ. հուլիսի 5–ին կայացված դատավճռում շեշտը դրվում է արևմտահայության կոտորածների և ունեցվածքի կողոպտման վրա: Կարևոր հանցանշաններից մեկն է համարվում առանց մեջլիսի որոշման Առաջին համաշխարհային պատերազմին մասնակցելու փաստը:

Քաղաքացիական քրեական օրենսգրքի 45–րդ հոդվածի 1–ին կետով դատարանը մահվան վճիռ է կայացնում Թալեաթի, Էնվերի, Ջեմալի և Նազըմի նկատմամբ: Երկուսն ազատվում են, մնացածները դատապարտվում են 15 և ավելի պակաս տարով աքսորի:

«Միություն և առաջադիմություն» կուսակցության շրջանային պատասխանատու քարտուղարների և այլ պաշտոնատար անձանց դատավարությունը տեղի է ունենում 1919 թ. հունիսի 21–ին, 23–ին և 28–ին: Դատավճիռը կայացվում է շատ ուշ՝ 1920 թ. հունվարի 8–ին, Կ. Պոլսի Առաջին արտակարգ ատյանի հանձնախմբի կողմից, որի նախագահն էր գեներալ–մայոր Էսադ փաշան, անդամներն էին երկու գեներալ–մայոր և մեկ գեղապետ: Ամբաստանվում էին 36 անձինք:

Մեղադրական եզրակացության մեջ նշվում է, որ շրջանային պատասխանատու քարտուղարները կուսակցության կենտրոնի և կառավարության կողմից ստացված բանավոր և գրավոր զաղտնի հրամանների համաձայն մասնակցել են Թալեաթ փաշայի և նրա գործընկերների կատարած հանցագործություններին: Հանձնաժողովի նախագահը հերքում է մեղադրյալների կեղծ ցուցմունքները և բացահայտում, որ տեղահանությունը եղել է լուրջ պատրվակ՝ հայերի բնաջնջումն իրականացնելու համար:

Քրեական օրենսդրության 45–րդ հոդվածի 2–րդ և 55–րդ հոդվածի վերջին կետի համաձայն Սինոպի, Էդիրնեի և Բալուլի պատասխանատու քարտուղարները դատապարտվում են 10 տարուց ավելի, իսկ մյուսները՝ մի քանի տարվա բանտարկության:

Վերոհիշյալ դատավարությունների ընթացքում Ստամբուլի ռազմական արտակարգ ատյանը մանրամասն հարցաքննություն էր կատարում նաև գավառներում տեղի ունեցած տեղահանության և կոտորածների անմիջական իրականացողների նկատմամբ: Առաջինը լսվում է Յոզղաթի մութեսարիֆի տեղակալ և Բողազլյանի կայմական Քեմալ բեյի և Յոզղաթի ոստիկանության պետ, մայոր Թևֆիկ բեյի կատարած հանցագործությունների հարցը: Առաջինը դատապարտվում է մահվան, իսկ երկրորդը՝ 15 տարվա տաժանակիր աքսորի: Քեմալի մահավճիռը

վավերացվեց սուլթանի կողմից և 1919 թ. ապրիլի 11-ին նրան կախեցին Կ. Պոլսի Բայազեդի հրապարակում:

Տրապիզոնի հայերի տեղահանությանը և կոտորածին վերաբերող 1919 թ. մայիսի 22-ի դատավճռով մեղադրվում են 8 հանցագործներ: Կատարած ծանր հանցագործությունների համար դատարանը հեռակա կարգով մահվան է դատապարտում Տրապիզոնի վալի Ջեմալ Ազմի բեյին և կուսակցության Տրապիզոնի պատասխանատու քարտուղար Նայիլ բեյին: Մյուսները դատապարտվում են տարբեր ժամկետների տաժանակիր աքսորի կամ բանտարկության:

1919 թ. մայիսի 24-ի դատավճռով, որը վերաբերում էր Կ. Պոլսի արվարձան Բյույուք Դերեի տեղահանությանը, 4 մեղադրյալները դատապարտվում են տարբեր ժամկետներով բանտարկության:

Խարբերդի հայերի տեղահանության և կոտորածին վերաբերող 1920 թ. հունվարի 13-ի դատավճռով կուսակցության կենտրոնի անդամ և Թեչքիլաթը մախսուսեի մախազահ Բեհաեդդին Շաքիրը հեռակա կարգով դատապարտվեց մահվան, իսկ կուսակցության Խարբերդի պատասխանատու քարտուղար Ռեսնեի Նազըմ բեյը՝ 15 տարի տաժանակիր աքսորի:

Այսպիսով՝ ընդհանուր առմամբ թուրքական ռազմական արտակարգ ատյանը մահվան վճիռ կայացրեց հետևյալ 9 ցեղասպանների նկատմամբ. Թալեաթ, Էնվեր, Ջեմալ, Նազըմ, Բեհաեդդին Շաքիր, Ջեմալ Ազմի, Նայիլ բեյ, Քեմալ բեյ, Թևֆիկ բեյ:

Ինչ վերաբերում է Մալթա կղզի աքսորված 120 երիտթուրք ոճրագործներին, ապա նրանց մի մասը փոխանակվեց թուրքական գերության մեջ գտնվող 25 անգլիացի զինվորների հետ, մյուս մասն էլ կամաց-կամաց ազատ արձակվեց: Նրանցից շատերը հետագայում դարձան Մուստաֆա Քեմալի գործընկերները:

Դատավարությունների արձանագրություններն ու որոշումները 1919-1920 թթ. շատ քիչ տպաքանակով տպագրվեցին թուրքական պաշտոնական «Թաքվիմ ի վեքայի» արաբատառ թերթի հավելվածներում: Դրանց պատճենները ՀՀԿՊՊ արխիվին է հանձնել ֆրանսահայ Ռոժե (Կարպիս) Ջրբաշյանը: Իհարկե, դատաքննության նյութերն ամբողջական չեն, որովհետև շատ նյութեր չեն տպագրվել հիշյալ թերթում: Նյութերն ամբողջությամբ ամփոփված են եղել ռազմական արտակարգ ատյանի 293 թղթապանակներում:

Ինչպես իրավամբ նշում է «Հայերի ցեղասպանությունը ըստ երիտթուրքերի դատավարության փաստաթղթերի» (Երևան, ԳԱ հրատ., 1988) գրքի առաջաբանի հեղինակ Ա. Հ. Փափագյանը, պատերազմի ավարտից հետո երիտթուրքերի պարագլուխների դատավարությունը խոշոր երևույթ էր արևմտահայության ցեղասպանությունը համայն մարդկության առաջ բացահայտելու տեսանկյունից: Միանգամայն իրավացի է հայ ականավոր պատմաբան Ջոն Կիրակոսյանը՝ գրելով. «Զինվորական տրիբունալի անդամները 5 հոգի էին, բոլորն էլ թուրքեր... Երիտթուրք ղեկավարներին ներկայացվել էր երկու մեղադրանք. Թուրքիայի ներքաշումը պատերազմի մեջ և հայ ժողովրդի բնաջնջումը: Սա արդեն պաշտոնական ճանաչումն էր հրեշավոր ոճրագործության, որ կատարել էին երիտթուրքական պետական մարմինները...»

Երիտթուրքական կառավարության անկումից հետո թուրքական պետական իշխանություններն իրենք են ընդունել հայոց նկատմամբ կատարված գեներոզը, իրենք են դատել և դատապարտել նրանց անմարդկային գործողությունները» (Ջ. Կիրակոսյան. Երիտթուրքերը պատմության դատաստանի առաջ: Գիրք երկրորդ: Երևան, 1983, էջ 176, 221):

Իհարկե, երիտթուրքերի դատավարությունը երբեք էլ 1,5 միլիոն մահատակված հայերի արյան, կորսված բնօրրանի՝ Արևմտյան Հայաստանի և նյութական ու մշակութային ահռելի կորուստների փոխհատուցումը չէր: Ավելին թուրքական Սոր իշխանություններն ամենևին էլ մտահոգված չէին դատարանի վճիռներն ի կատար ածելու հարցով: Գլխավոր հանցագործները փախել և անլեզալ կերպով ապաստանել էին Բեռլինում, իսկ Մալթայի աքսորականներն ազատ շրջում էին կղզում, իսկ հետո էլ մեծիմասամբ Իտալիայի վրայով սկսեցին վերադառնալ Թուրքիա: Նրանցից շատերը բարձր դիրքեր գրավեցին Մուստաֆա Քեմալի կառավարությունում և բանակում:

Նման պայմաններում երիտթուրքական բորենիների նկատմամբ մահավճիռներ կայացրին ու դրանց իրագործմանը ձեռնամուխ եղան հայ վրիժառուները:

1919 թ. սեպտեմբերի 27-ին Երևանում իր աշխատանքներն սկսեց ՀՀԳ 9-րդ ընդհանուր ժողովը, որը տևեց մինչև հոկտեմբերի վերջը: Համագումարի օրակարգի հարցերից մեկն էլ Մեծ եղեռնի գլխավոր հանցագործներին պատժելու հարցն էր: Հակառակ մի շարք պատգամավորների՝ որոնք գտնում էին, թե նորաստեղծ Հայաստանի Հանրապետությունը կարիք ունի Թուրքիայի հետ բարեկամության (Սիմոն Վրա-

ցյան, Ռուբեն Տեր-Մինասյան, Ռուբեն Դարբինյան և ուրիշներ), ժողովը որոշեց հաշվեհարդար տեսնել հայ ժողովրդի դահիճ թուրք ճիվաղների հետ: Կազմվեց այդ գործը իրականացնող Պատասխանատու մարմին՝ ԱՄՆ-ից պատգամավոր Շահան Լաթալիի ղեկավարությամբ: Նրա օգնականն էր Գրիգոր Մերջանովը:

Շահան Լաթալին (Հակոբ Տեր-Հակոբյան) ծնվել է 1884 թ. Խարբերդի շրջանի Հյուսեյնիկ գյուղում: Համիրյան կոտորածների ժամանակ կորցնում է հորը և բազմաթիվ ազգականների: Խարբերդի Եփրատ Քոլեջում սովորելուց հետո ընդունվում է Պոլսի Պերպերյան վարժարանը, որն ավարտում է 1900-ին: Նա վերցնում է իր սիրելի ուսուցիչ Շահան Պերպերյանի անունը, իսկ Լաթալի մականվան ընտրության պատճառը հայտնի չէ: 1904-ին Խարբերդում անդամակցում է ՀՀԴ-ին: Նույն թվականին տեղափոխվում է ԱՄՆ: 1908-ի Օսմանյան Սահմանադրության հռչակումից հետո վերադառնում է երկիր, ապա նորից անցնում Ամերկա, ընտրվում տեղի ՀՀԴ Կենտրոնական կոմիտեի անդամ: 1924-ին Փարիզում կայացած ՀՀԴ 10-րդ ընդհանուր ժողովում ընտրվում է նորընտիր բյուրոյի անդամ: 1929 թ. Փարիզում կայացած ՀՀԴ 11-րդ ընդհանուր ժողովում հեռացվում է կուսակցության շարքերից՝ խոր տարածայնությունների պատճառով: Զբաղվել է գրական-հասարակական գործունեությամբ, հեղինակ է մի շարք աշխատությունների (տե՛ս Շահան Լաթալի, Թուրքերը և մենք, Երևան, 1992): Գրական անունն է Նեմեսիս:

1961-ին այցելում է Խորհրդային Հայաստան, բուժում ծայրը, հիանում հայրենիքի բարգավաճմամբ: Մահացել է 1983-ի ապրիլի 18-ին, 99 տարեկան հասակում, Բոստոնում:

Թուրք դահիճների ահաբեկումների գործը ծրագրվում է խիստ գաղտնի պայմաններում: Կատարվում են նախապատրաստական աշխատանքներ՝ հետապնդում, զենքի հայթայթում, կազմվում է շուրջ 200 ճիվաղների ցուցակ:

Գլխավոր քիռախը «Թիվ մեկ» ոճրագործի՝ Թալեաթ փաշայի ոչնչացումն էր, որը հանձնարարվում է Սողոմոն Թեխլերյանին: Շահանի պահանջով ոճրագործին սպանելուց հետո հայ վրիժառուն չպիտի փախչեր, որպեսզի դատավարությանը տրվեր քաղաքական բնույթ:

Սողոմոն Թեխլերյանը ծնվել է Երզնկայի մոտ գտնվող Բազառիճ գյուղում: Եղեռնի ժամանակ սպանել էին նրա մորը, կացնահարել եղբայրներին, լլկել երկու քույրերին, նրանց երեխաներին, իսկ ինքը մնացել էր դիակների տակ ու մի կերպ փրկվել:

1921 թ. մարտի 15-ին նա օրը ցերեկով Բեռլինում, Շառլոտենբուրգի Հարդենբերգ փողոցի վրա ծոծրակին ատրճանակի կրակոցով սպանեց դահճապետ Թալեաթ փաշային ու կամավոր հանձնվեց ոստիկանությանը: 1921 թ. հուլիսի 2-3-ին տեղի ունեցավ դատավարություն: Դատում էր Բեռլինի նահանգային դատարանը՝ դոկտոր Լեմբերգի նախագահությամբ: Դատախազն էր Գոլմիկը: Դատապաշտպաններն էին դոկտորներ Գորդոնը, Վերթաուերը և պրոֆեսոր Նիմայերը: Երդվյալ ատենակալները 14 հոգի էին: Կանչված էին բազմաթիվ վկաներ:

Դատավարության ժամանակ Սողոմոնը հանդես եկավ ամբողջ հայ ժողովրդի անունից, նկարագրեց զարհուրելի ոճիրը և մեղադրեց հանցագործներին: Նա հպարտորեն հայտարարեց, որ ինքը լուծել է իր նահատակված ժողովրդի արդաի վրեժը:

Վկաներ դոկտոր Յո. Լեփսիուսը, կարնեցի տիկին Քրիստինե Թերզիբաշյանը, եպիսկոպոս Գրիգորիս Պալաքյանը և ուրիշներ անհերքելի փաստեր բերեցին երիտթուրքերի ոճրագործությունների մասին: Լեփսիուսը հայտարարեց, որ պատերազմից առաջ Թուրքիայում բնակվում էին 1 միլիոն 850 հազար հայեր, որից շուրջ 1 միլիոն 400 հազարը տեղահանվեցին, իսկ ոճրագործ Թալեաթի հրամանագրի մեջ կան «Աքսորավայրն է ոչնչացում» բառերը: Տեղահանվածների միայն 10 տոկոսը աքսորավայր հասավ, մնացած 90 տոկոսը սպանվեց ու առնանգվեց ճանապարհին: Աքսորի նպատակը հայ ազգի ոչնչացումն էր:

Օձագունով կարնեցի տիկին Զ. Թերզիբաշյանը ականատեսի վկայությամբ պատմեց, որ իրենց 21 անձից բաղկացած ընտանիքից մի կերպ փրկվեցին միայն 3-ը:

Եպիսկոպոս Գր. Պալաքյանը պատմեց հայ մտավորականության դժոխային աքսորի ու ոչնչացման մասին:

Դատարանում ելույթ ունեցողների մեծ մասն ընդգծում էին հատկապես Թալեաթի հանցավորությունը և պահանջում արդարացնել մեղադրյալին՝ իբրև ժողովրդական վրիժառուի:

Վկա զեներալ Լիման Ֆոն Սանդերսը փորձեց հիմնավորել, որ հայերի տեղահանությունը կատարվել է ռազմական նկատառումներով, որովհետև հայերը միացել էին ռուսներին ու չէին ցանկանում զինաթափվել: Պաշտպանության տակ վերցնելով Թալեաթին՝ գերմանացի զեներալը փորձում է ժխտել հայերի բնաջնջման վերաբերյալ կառավարական հրամանի առկայությունը և հայտարարում, թե իբր այդ դեպքերը տեղի են ունեցել քրդերի և անճարակ ոստիկանների մեղքով: Նա ճիշդ է

թափում նաև ապացուցելու, որ Գերմանիան ոչ միայն մեղսակից չէ հայոց ցեղասպանությանը, այլև ամեն ինչ արել է հայերի ջարդերն արգելելու համար:

Դեմվելով գերմանացի գեներալի ստահոգ վկայությունների վրա՝ թրքամուղ դատախազ Գուլնիկը պահանջում է թալեաթի սպանությունը դիտել իբրև կանխամտածված ծանր հանցագործություն, որի համար ամբաստանյալը պետք է գնդակահարվի:

Դատապաշտպանները հերքեցին դատախազի փաստարկները: Դոկտոր Գորդոնը համոզիչ կերպով ցույց տվեց, որ թալեաթի սպանությունը տեղին է, և նրա կատարողը պետք է արդարացվի: Նույն միտքը հաստատեցին դոկտոր Վերթաուերը և Քիլի համալսարանի իրավաբանության պրոֆեսոր Նիմայերը:

Գերմանական դատարանը, հակառակ որոշակի շրջանների ճիգերին, արդարացրեց Սողոմոն Թեխլերյանին՝ անպարտ ճանաչելով նրան թալեաթի սպանության համար: Դա նույնպես երիտթուրքերի հրեշավոր ոճրագործության դատապարտում էր: Ներկաները ծափահարություններով ընդունեցին այդ արդարացի դատավճիռը:

Հայ վրիժառուների արդար սուրը հասավ նաև հայ ժողովրդի մյուս գլխավոր դահիճներին: 1921 թ. դեկտեմբերի 6-ին Զոռնում Արշավիր Շիրակյանը սպանեց Թուրքիայի նախկին վարչապետ Սայիդ Հալիմ փաշային:

1922 թ. ապրիլի 17-ին, Բեռլինում նույն օրը կարնեցի Արամ Երկանյանն սպանեց Հատուկ կազմակերպության նախագահ, արյունարբու Բեհաեդդին Շաքիրին, իսկ Արշավիր Շիրակյանը՝ Տրապիզոնի նախկին վալի, հայակեր Ջեմալ Ազմիին:

1922 թ. հուլիսի 25-ին Թիֆլիսում խտորջուրցի երկու երիտասարդներ՝ Պետրոս Տեր-Պողոսյանը և Արտաշես Գևորգյանը, գնդակահարեցին իթթիհատական եռապետության անդամ Ջեմալ փաշային, որը Քաբուլից վերադառնում էր Անկարա:

1922 թ. օգոստոսի 4-ին Միջին Ասիայում սպանվեց թալեաթից հետո երկրորդ հայակեր Էնվեր փաշան, որն անցել էր բասմաչների զինված հրոսակախմբերի գլուխ և անհաջողություն կրելով՝ 300 հեծյալներով փորձում էր փախչել Աֆղանստան:

Ինչ վերաբերում է երիտթուրքական հնգյակի վերջին անդամին՝ իթթիհատական կենտկոմի քարտուղար դոկտոր Նազըմին, ապա նա իբրև Մուստաֆա Քեմալի դեմ կազմակերպված դավադրության մասնա-

կից դատվեց և այլ՝ նախկին իթթիհատականների հետ կախաղան հանվեց 1926-ին Անկարայում (տե՛ս Զ. Կիրակոսյան, Երիտթուրքերը պատմության դատաստանի առջև, Գիրք երկրորդ, Երևան, 1983, էջ 320-323):

Հայ վրիժառուները պատժեցին նաև ազգությամբ հայ դավաճաններին՝ մատնիչներ վահե Եսայանին (Իսհան), Օրթագյուղի մուխթար Արթին Մկրտչյանին, Հմայակ Արամյանցին, Արշավիր Յասյանին և ուրիշների, որոնք թուրքական ոստիկանությանն էին մատնել հայ մտավորականներին ու հետագայում կախաղան հանված 20 հնչակյաններին:

Հայ վրիժառուների արդար դատաստանից չխուսափեցին նաև մուսավաթական Ադրբեջանի վարչապետ Խան-խոյսկին, որին սպանեց Արամ Երկանյանը՝ 1920 թվականին Թիֆլիսում և ներքին գործերի նախարար Բեհբուդ Խան Ջիվանջիրը, որին սպանեց Միսաք Թուլաբյանը 1921 թ. հուլիսի 19-ին Պոլսում, որոնք մեղավոր էին 1918 թ. սեպտեմբերին Բաքվի հայերի ջարդի համար:

Միանգամայն իրավացի է պրոֆ. Մ Արզումանյանը, գրելով, որ դրանք սովորական տեռորիստական ակտեր չէին, այլ քաղաքական սպանություններ, հանցագործների պատժման և արդարության հասնելու այն ժամանակվա պայմաններում միակ հնարավոր ձևը (Մ. Արզումանյան. Հայաստան 1914-1917: Երևան, 1969, էջ 632-634): Դրանք արդարացի ժողովրդավրիժառուական գործողություններ էին, որոնք, իհարկե, չնչին չափով միայն կարող էին ամոքել հայ ժողովրդի ահռելի վիշտը:

ԻՆՔՆԱՊԱՇՏՊԱՆԱԿԱՆ ՀԵՐՈՍԱՍԱՐՏԵՐԸ

Թուրքական պետության ծրագրված ու կանխամտածված ցեղասպանության քաղաքականությանը հայ ժողովուրդը մի շարք վայրերում հակադրեց իր դարավոր դիմադրական ոգին և գիտակցված մահ ընտրելով՝ ինքնապաշտպանական ոյուցազնամարտ մղեց անարգ թշնամու դեմ՝ Տարոն աշխարհից մինչև Վան, Մուսա լեռից մինչև Ուրֆա և Շապին-Գարահիսար: Որքան էլ որ թույլ ու անկազմակերպ էին այդ հերոսամարտերը, այնուամենայնիվ, դրանք հայոց ոյուցազնեղբայրության նոր էջեր էին: Մենք դժվարանում ենք դրանք գոյամարտեր անվանել, որովհետև դա կոիվ չէր գոյությունը պահպանելու համար, մանավանդ որ հաղթանակի հույս ոչ մի տեղ փաստորեն չկար, այլ դա ընտրություն էր պատվավոր մահվան և տարագրության ճանապարհներին ստուգապես ոչնչանալու միջև: Ուրեմն անվանենք դրանք ինքնապաշտպանական հերոսամարտեր կամ ոյուցազնամարտեր, մանավանդ, եթե նկատի ունենանք ուժերի անհամեմատելի անհավասարությունը:

Հիրավի, բնական հարց է առաջանում. ինչպե՞ս եղավ, որ 1915-ին հայկական որոշ շրջաններ ինքնապաշտպանության որոշ պարզեցին և գիտակցված մահվան գնացին, իսկ ուրիշ շրջաններ անճանատուր եղան թուրքական յաթաղանին: Կամ՝ ինչո՞ւ հնարավոր չեղավ համակարգել և փոխօգնության կապ հաստատել ինքնապաշտպանության դիմած տարբեր շրջանների միջև: Փաստորեն, 1915-ին արևմտահայությունը չունեի ինքնապաշտպանության կամ ապստամբության ինքնուրույն ծրագիր: Այդ հարցում խաբուսիկ դեր խաղաց 1908-ի սահմանադրությունը, որը ջլատեց արևմտահայության մարտական և քաղաքական ուժերը: Կարևոր դեր խաղաց նաև հայ հասարակական-քաղաքական որոշ ղեկավար շրջանների դրսևորած անհեռատեսությունը, տարբեր հասարակաշերտերի մեջ գոյություն ունեցող հակասություններն ու անմիաբանությունը:

Պատերազմի հենց սկզբից ջարդվող հայությունը տեղ-տեղ դիմեց տարերային դիմադրության: 1914 թ. նոյեմբերի վերջերին Ոստանի գայմագամ Շուքրի բեյը հարձակվեց Գավաշ և Կարճկան գավառների սահմանագծում գտնվող հայաբնակ Բելու գյուղի վրա: Հայերը մի քանի օր դիմադրեցին և նոր միայն թողեցին գյուղը:

Ուժեղ դիմադրություն կազմակերպվեց Գավաշ գավառի Աթանան գյուղում, խառակոնցի Լևոնի գլխավորությամբ, և կնքվեց երկուստեց համաձայնություն:

1915 թ. փետրվարի սկզբին արյունալի ընդհարումներ տեղի ունեցան Կարկառ գավառակում, ուր կային 18 հայաբնակ գյուղեր: Նրանց դիմադրությունը գլխավորում էր Կարկառի ինքնապաշտպանության հերոս, ձկորցի Գալուստ Պողոսյանը կամ Վուշիկ Գալուն: Մի քանի օր հատկապես ուժեղ մարտեր տեղի ունեցան Ռիի գյուղի մոտ: Ձոռեր տալով՝ հայ բնակչությունը քաշվեց դեպի Մուկա ու Գավաշ: Թուրքերը ցից հանեցին զոհված Վուշիկ Գալոյի գլուխը:

1915 թ. փետրվարին քրդերը Ամարե Չաթոյի գլխավորությամբ հարձակվեցին Ալջավազ գավառի վրա, որն ուներ 21 հայկական գյուղ՝ 6000 բնակչությամբ: Հայերը դիմեցին ինքնապաշտպանության՝ Արճրա գյուղացի Օհան Դարբինյանի և կարաքեշիչցի Մկոյի (Սև հայու տղա մականունով) գլխավորությամբ: Առեն գյուղում հայերը ջարդեցին քրդերին, որտեղ սպանվեց Ամարե Չաթոն: Սակայն եկան թուրքական զորքեր՝ թնդանոթներով և արյունահեղ դատաստան տեսան հայերի հետ:

Մարտի սկզբին թուրք ժանդարմները հարձակվեցին Թիմար գավառի էրերին, Ալյուր և Խավենց գյուղերի վրա: Թիմարի ինքնապաշտպանությունը գլխավորում էր վանեցի Ռուբեն Իսրայելյանը: Բողանց գյուղում 500-անոց թուրքական զորքը մեծ զոհեր տվեց և «հաշտություն» կնքվեց: Դրանից հետո տիրեց չարագուշակ լռություն:

1915 թ. փետրվարի 17-ին պարսկական սահմանում ռուսներից կրած պարտությունից հետո 600 չերքեզ զինվորներով Վան վերադարձավ Ջևդեթը: Նա չերքեզներին տեղավորեց հայկական թաղում գտնվող Համուղ աղայի զորանոցում և կարգադրեց, որ հայ տղամարդիկ երեք օրվա ընթացքում ներկայանան զինվորագրման:

Ապրիլի 5-ին թուրքերը Հայոց Ձորի գավառի Հիրճ գյուղում 50 հայ տղամարդկանց լցրին ախոռը և բոլորին սրախողխող արեցին: Նույն կերպ վարվեցին նաև Արճեշ գավառի Ականց գյուղի 400 հայ տղամարդկանց հետ: Սուտ 1000 տղամարդիկ ոչնչացվեցին Բերկրիի գավառի Բանդի-Մահու գետի ափերին:

Ի պատասխան թուրքերի ջարդարական քաղաքականության՝ տեղ-տեղ հայերը դիմեցին ինքնապաշտպանության: Վանից հյուսիս-արևելք գտնվող Արճակ գավառի Արճակ ու Խառակունիս գյուղերի բնակիչները Շիրին Հակոբյանի գլխավորությամբ գեներ վերցրին, ջարդեցին թուրքերին և քաշվեցին Կալջա լեռը: Այստեղ բարձրացան նաև շրջակա այլ գյուղերի բազմաթիվ բնակիչներ: Այստեղից շուրջ 8000 հայեր, հետ մղելով թուրքերի գրոհը, իջան Ավերակի գյուղը: Գյուղը պաշարվեց, և հայերը, տալով 100 սպանված, շարժվեցին դեպի Վան: Թուրքերին դիմադրություն ցույց տվեցին նաև Լիմ, Ջարանց, Սևուն, Պախենլիկ, Ոսկեբակ և այլ գյուղերի 3000 հայեր, որոնք նույնպես քաշվեցին դեպի Վարազա լեռը:

Ուժեղ դիմադրություն կազմակերպվեց Հայոց Ձոր գավառում, որն ընկած է Վանից հարավ: Գավառի միջով հոսող Խոշաբ գետի ափերին ընկած էին 35 հայկական գյուղեր: Երբ ապրիլի 6-ին թուրքերը ժամդարմապետ Էդիեմ բեյի գլխավորությամբ հարձակվեցին հայկական գյուղերի վրա, հայերը քաշվեցին Քերձ գյուղի լեռը և դիմեցին ինքնապաշտպանության: Ինքնապաշտպանության դիմեցին նաև Անկշտանց, Էրմերի և Կղզի գյուղերի հայերը:

Ապրիլի 7-ին գեների դիմեցին Կեմ և Անգղ գյուղերի բնակիչները՝ տալով 700 զոհ: Իշխանի գոմ գյուղում 1000 թուրքերի ու քրդերի դեմ ելան 100 հայեր, արյունալի մարտ մղեցին և դեպի Վարազ ու Փեսանդաշտ հեռացան նաև Քերձի լեռան վրա ամրացած 2000 հայերը: Դրանով էլ Հայոց Ձորի ինքնապաշտպանությունն ավարտվեց:

Ինքնապաշտպանություն կազմակերպվեց նաև Թիմար գավառում, որի 50 գյուղերից 30-ը հայկական էին: Ապրիլի 8-ին քուրդ ցեղապետ Արիֆի ելուզակները պաշարեցին Տիրամեր գյուղը, միաժամանակ հարձակվեցին հարևան Ջանիկ գյուղի վրա: Այդ և շրջակա Վիրկաբիբ, Սոսրաթ, Շահգեղի, Նորշեն, Գոմս և այլ գյուղերի բնակիչները, կռիվներ մղելով, շարժվեցին դեպի Լիմ կղզին: Ահեղ կռիվներ տեղի ունեցան հատկապես լճափին, որից հետո 12.000 հայեր փոխադրվեցին Լիմ կղզի:

Ապրիլի 12-ին թուրքական զորքերն ու քրդական խուժանը հարձակվեցին Այուր ամենամեծ գյուղի վրա: Այստեղ ինքնապաշտպանությունը գլխավորում էին Աբիսողունը և Սարգիս Մարդոյանը: Սակայն թշնամին խաբեությամբ մտավ գյուղ և կոտորեց բնակչությանը:

1915-ի ապրիլի 25-ին Ջևղեթը 1500 զորքով շարժվեց Վարազի վրա, որը Վասպուրականի Արծվի բույնն էր: Ուժեղ մարտեր մղվեցին Շուշանց գյուղի մոտ: Սակայն ուժերն անհավասար էին, և գյուղի պաշտպանները զիջեցին անցան Վան:

Այսպիսով՝ Վանի վիլայեթի շրջաններում հայ ժողովուրդը հերոսական գոտեմարտ մղեց:

ՎԱՆԻ ՀԵՐՈՍԱՄԱՐՑԸ

1915 թվականի հայերի ինքնապաշտպանության: փառաբանական դարձավ Վանի հերոսամարտը:

Վանը կազմված էր երկու մասից. արևմտյան մասը Քաղաքն էր կամ Քաղաքամեջը՝ հիմնավորց բերողով, պետական հիմնարկներով, գինապահեստով, շուկայով, իսկ արևելյան մասը Այգեստանն էր: Նրանց միացնում էր յոթ կիլոմետր երկարությամբ մի փողոց՝ Աղգայի ջաղդան, որի կենտրոնում գտնվում էր Խաչ-փողանի հրապարակը: Վանն ուներ 41.000 բնակիչ, որից 23.000-ը՝ հայեր, 18.000-ը՝ մահմեդականներ: Քաղաքամեջում ապրում էր 4000 մարդ, որից 3000-ը՝ հայեր: Մնացած բնակչությունն ապրում էր Այգեստանում, որի հայաբնակ թաղերն էին Արարքը, Նորաշենը, Հանկույսները: Քաղաքի և Այգեստանի միջև ընկած էր մի ամայի տարածություն, որտեղ մի ժամանակ տեղավորված էր դատարկված Հայկավանք թաղը: Քաղաքից հարավ-արևելք ընկած էր թրքաբնակ Շամիրամի թաղը, իսկ հարավային Կլոր-դար թաղն ուներ խառը բնակչություն: Թուրքերը հայկական թաղերի թիկունքում ստեղծել էին զորանոցներ՝ Հաջի-Բեքիրի, Թոփրակ-Կալեի, Համուղ-աղայի: Եթե Քաղաքամեջը պարսպապատ էր ու հենված Շամիրամի ժայռերին, ապա Այգեստանը գրեթե զուրկ էր բնական ամրություններից ու շրջապատված էր այգիներով: Միայն հյուսիսային կողմում ձգվում էր մի փոքրիկ լեռնաշղթա, ուր գտնվում էին Ջնգմ մաղարան ու Միերի դուռը:

Պատերազմն սկսվելուց հետո դեպի Վան դիմեցին շուրջ 70.000 գաղթականներ, որը մի կողմից՝ դժվարացնում էր պարենավորման գործը, իսկ մյուս կողմից՝ ծառայում զինվորական ուժի աղբյուր:

Հայերին բնաջնջելու հաստատ մտադրությամբ՝ կանոնավոր ու մեծաքանակ զինվորական ուժերով դեպի Վան շտապեց կուսակալ Ջևդեթը: Նախ նա տեսակցություն ունեցավ դաշնակցական գործիչներ, օսմանյան պառլամենտի Վանի երեսփոխան Վռամյանի (Օննիկ Դերծակյան), Արամ Մանուկյանի հետ և աշխատեց կեղծ ու պատիժ հավաստիացումներով բթացնել նրանց զգոնությունը: Ապա նա պահանջեց, որ Վանի երիտասարդությունը զորակոչվի: 1915 թ. ապրիլի 1–ին Այգեստանի Նորաշեն եկեղեցում գումարված խորհրդակցությունը Վռամյանի և Արամի հորդորներով հավանություն տվեց Ջևդեթի պահանջին: Ապրիլի 2–ին արդեն Վանի առաջնորդական փոխանորդ Եզնիկ վարդապետ Ներկարարյանի անունով կոչ հրապարակվեց՝ քաղաքացիական պարտականությունը կատարելու մասին: Սակայն այդ ամենը առաջացրեց Վանի հայ ազգաբնակչության գայրույթը, որը կանխազգուս էր նախապատրաստվող ահավոր սպանող, մինչդեռ իրենց ղեկավարները հպատակության կոչեր էին անում: Մթնոլորտն ավելի շիկացավ, երբ Ջևդեթը Շատախի դեպքերը քննելու համար այնտեղ ուղարկեց հաշտարար հանձնաժողով՝ դաշնակցական ղեկավար գործիչ Վանա Իշխանի գլխավորությամբ, սակայն ճանապարհին ապրիլի 4–ին, Հիրժ գյուղում կազմակերպվեց նրանց տմարդի սպանությունը: Նույնպիսի խարդախ ճանապարհով սպանվեց նաև Վռամյանը, իսկ Արամը վերջին պահին կարողացավ խուսափել թակարդից:

Ջևդեթը արագորեն համալրեց իր զորքերը, բերեց թնդանոթներ և նախապատրաստվեց հարձակման: Ընդհատվեց կապը Քաղաքամեջի ու Այգեստանի միջև:

Վանի հայությունը փրկությունը տեսավ միայն ինքնապաշտպանության մեջ, երբ դանակն արդեն ոսկորին էր հասել: Խաղաղ ժամանակ վանեցիները պառակտված էին Դաշնակցություն, Հնչակյան և Ռամկավարական կուսակցությունների մեջ, որոնք կատաղի պայքարի մեջ էին միմյանց դեմ: Սակայն ազգային դժբախտության ծանր պահին, բարեբախտաբար, վանեցիները հասկացան այդ գործելակերպի կորստաբերությունը և մի կողմ թողնելով կուսակցական տարածայնությունները՝ համերաշխորեն մարտի ելան թուրք ջարդարարների դեմ:

Վանի ինքնապաշտպանությունը ղեկավարելու համար ստեղծվեց Վանի Հայ ինքնապաշտպանության Ձինվորական մարմին՝ ռամկավար Արմենակ Եկարյանի նախագահությամբ: Նրա մեջ մտան դաշնակցականներ Կայծակ Առաքելը և Բուլղարացի Գրիգորը, ինչպես նաև խորհրդակցաններ՝ դաշնակցական Արամ Մանուկյանը, ռամկավար Գաբրիել Սեմերճյանը, հնչակյան Հրանտ Գալիկյանը, նախկին արմենական, անկուսակցական, նկարիչ Փանոս Թերլեմեզյանը: Ստեղծվեցին նաև պարենավորման, զինբաշխ, հայթայթիչ, կարմիր խաչի, տեղեկատու և այլ մարմիններ:

Հայերն ունեին շուրջ 1500 կռվող և նույնքան էլ հրացան, մաուզեր և սահմանափակ թվով փամփուշտ: Այս փոքարաթիվ ուժերի դեմ կանգնած էր թուրքական կանոնավոր 10–12 հազարանոց բանակը՝ 12 թնդանոթով: Թուրքական զորքերին ղեկավարում էին գերմանական փորձված սպաներ:

Սակայն հայերը ցուցաբերեցին մեծագույն կազմակերպվածություն և խիզախություն: Այգեստանը բաժանվեց պաշտպանական հինգ շրջանների՝ 73 դիրքերով, ուր ամրացան 1053 զինվոր՝ 505 հրացանով, 75 հազար փամփուշտով, 549 մաուզերով ու 40 հազար փամփուշտով: Ձինվորական մարմինը անհրաժեշտ հրահանգներ մշակեց կռվողների համար: Դրանցում հաջողության գրավական էր համարվում կարգապահությունն ու կազմակերպվածությունը, հրամանների ճշգրիտ կատարումը, զնդակների խնայողական ու նպատակային ծախսումը, աչալրջությունը, հարբեցողության խստագույն բացառումը և այլն:

Ձինվորական մարմինը, արգելելով վանեցի մարտիկներին՝ հայհոյել թշնամու կրոնը, միաժամանակ կոչ ուղղեց թուրք ազգաբնակչությանը, պարզաբանելով, որ հանցավոր են ոչ թե ժողովուրդները, այլ կառավարողները, և կոչ արեց պահանջել արյունարբու Ջևդեթից՝ վերացնել քաղաքի պաշարումը: Սակայն այդ կոչը արծազանք չգտավ՝ թուրքերի հետամնացության ու կրոնական ֆանատիզմի պատճառով:

1915 թ. ապրիլի 7–ի առավոտյան թուրքերն սկսեցին հարձակումը: Հարձակվում էին թուրքական թաղերից և հատկապես զորանոցներից, իսկ թնդանոթային համազարկերը ավերածություն էին առաջացնում շուրջբոլորը: Հայերը կռվում էին չտեսնված համառությամբ ու կազմակերպվածությամբ՝ ամուր պահպանելով իրենց դիրքերը: Ավելից՝ կռվի հենց առաջին օրը հայերին հաջողվեց գրավել Խաչ–փողանում գտնվող թուրքական դիրքը՝ հեռագրատունը, և պաշարել Համուդ–աղա-

յի զորանոցը: Այդ զորանոցի գրավումն ուներ կարևոր նշանակություն, որովհետև այն ցցված էր հայկական թաղերի կենտրոնում, որտեղից թուրքերն ուժեղ կրակ էին տեղում շրջակայքի վրա: Ճիշտ է, ապրիլի 8-ին հայ մարտիկները ստիպված էին թողնել Հանկույսների եկեղեցու դիմաց գտնվող Շահբենդեթյանի դիրքը, բայց դրա փոխարեն հաջողվեց հրդեհել անգլիական հյուպատոսարանի շենքը, ուր դիրքավորվել էին մի քանի տասնյակ թուրք ժանդարմներ:

Զինվորական մարմինը սահմանեց «Պատվո խաչ» շքանշան, որն արժաթյա փոքրիկ խաչ էր՝ «Հայ Յեղ.» մակագրությամբ: Դրանով պարգևատրվեցին կռիվներում աչքի ընկած շատ մարտիկներ:

Հերոսամարտի երրորդ օրը՝ ապրիլի 9-ին, վանեցիներին հաջողվեց ոչնչացնել Համուդ-ադայի զորանոցը, որը մեծ վտանգ էր ներկայացնում: Այն կառուցվել էր դեռևս 1904-ին սուլթան Աբդուլ Համիդի օրոք և վանեցիների աչքում թուրքական բռնապետության խորհրդանիշն էր: Երբ Շահբենդեթյանի դիրքի անկումից հետո կապ հաստատվեց Համուդ-ադայի և Թուփրակ-կալեի զորանոցների միջև, վտանգն ավելի մեծացավ: Ուստի զորանոցի խորտակումն ուներ ոչ միայն ռազմական, այլև բարոյաքաղաքական նշանակություն: Ճակատային գրոհով Համուդ-ադայի զորանոցի գրավումը հնարավոր չէր, որովհետև այն գտնվում էր Հանկույսների թաղի կենտրոնում, ուներ բավականաչափ զորք ու զենք, նրան հարում էին թուրքական մի քանի տներ, որոնք նույնպես վերածվել էին դիրքերի: Ուստի Բուլղարացի Գրիգորի առաջարկով որոշվեց պայթեցնել զորանոցը: Այդ նպատակով գործի անցան քյանքան (հողափոր) արհեստավորները՝ Կուլե Խաչոյի և Կարապետի գլխավորությամբ, որոնք հայկական դիրքերից մինչև զորանոցի հիմքը ստորգետնյա անցք փորեցին և ռումբեր դրեցին: Բայց դրանք շատ խորն էին բացվել, և տեղի ունեցած խուլ պայթյունը չվնասեց զորանոցին: Սակայն երկրորդ լիքքի պայթյունի հետևանքով առաջացած հրդեհը լափեց ողջ զորանոցը, որը ցնծություն առաջացրեց պաշարվածների շարքերում: Ձորանոցի ոչնչացման հաջորդ օրը՝ ապրիլի 10-ին, այգեստանցիներին հաջողվեց ետ գրավել Շահբենդեթյանի դիրքը: Այդ գործում կարևոր դեր կատարեց քյանքան Խամբոյի աղջիկ Սևոն՝ 19-ամյա Իսկուհի Համբարձումյանը, որը, կյանքը վտանգելով, հետախուզեց դիրքը և մարտիկներին առաջնորդեց այնտեղ: Քաջարի աղջիկը պարգևատրվեց «Պատվո խաչ» շքանշանով:

Ապրիլի 10-ին Զինվորական մարմինը կոչ հրապարակեց, որում նշվում էր Վանը 24 ժամվա ընթացքում ծնկի բերելու Ջևդեթի ծրագրի

ծախողման մասին և ընդգծվում էր, որ այս կռիվը գոյության կռիվ չէ միայն, այլ կռիվ է ճշմարտության և արդարության համար, ցույց տալու համար, որ հայը գիտի մեռնել զենքը ձեռքին:

Գնալով մարտերն ավելի թեժանում էին, և Այգեստանի հայերը նորանոր քաջագործություններ էին կատարում: Ապրիլի 15-ին Տիգրան Վարժապետ Այիճյանը, ռիսկի ենթարկելով սեփական կյանքը, հրկիզում է Արարուց հրապարակի վրա գտնվող թուրքական ոստիկանությունը, որը լուրջ վտանգ էր ներկայացնում: Տիգրան Վարժապետը նույնպես պարգևատրվեց «Պատվո խաչ» շքանշանով:

Ինքնապաշտպանությունը բարձր կազմակերպվածությամբ սկսվեց նաև Քաղաքամեջում, որը կտրված էր Այգեստանից: Հյուսիսից այն պաշտպանված էր Շամիրամի բերդով ու գահավեժ լեռներով, իսկ մյուս երեք կողմերից շրջապատված էր սեպածն պարիսպներով: Այստեղ էին գտնվում պետական հիմնարկները և հայոց առաջնորդարանը: Քաղաքամեջում կար 3000 հայ բնակչություն: Այստեղ ևս կազմվեց Զինվորական մարմին՝ Հիսուսյան վարժարանի տեսուչ Հայկակ Կոստյանի ղեկավարությամբ: Անդամներն էին Լևոն Գալջյանը, Միհրան Թորամանյանը, Դավիթ Սարգսյանը, Միհրդատ Միրզախանյանը, Հարություն Ներկարարյանը, Սարգիս Շահինյանը: Ստեղծվեցին նաև մատակարարման, կարմիր խաչի և այլ մարմիններ:

Երկու վերստ երկարությամբ ձգվող ինքնապաշտպանության շրջագիծը բաժանված էր 4 շրջանների և բազմաթիվ դիրքերի: Սակայն զենքը քիչ էր՝ 100 հրացան, 210 ատրճանակ, 60 հազար փամփուշտ, իսկ ողջ շրջագիծը բոլոր կողմերից գտնվում էր թուրքերի օղակի մեջ:

1915 թ. ապրիլի 7-ին առավոտյան ժամը 9-ին, Այգեստանից երեք ժամ հետո թուրքերն այստեղ էլ անցան հարձակման: Հայերը ոչ միայն քաջաբար պաշտպանվեցին, այլև հենց առաջին օրը հրդեհեցին փոստ-հեռագրատունը, ոստիկանատունը և դատարանը, որոնք թուրքերի համար ամուր դիրքեր էին: Այդ գործողությունների ժամանակ աչքի ընկան 16-ամյա Արամ Կապարուկյանը և տիկին Աղավճի Վարպետյանը: Երկրորդ օրը՝ ապրիլի 8-ին, հայերը կարողացան ոչնչացնել կառավարական նոր փոստատունը և զինարանը: Նրանք նոր դիրքեր խորտակեցին նաև հաջորդ չորս օրերին:

Տեսնելով, որ զենքի ուժով հնարավոր չէ կոտրել հայերի դիմադրությունը, Ջևդեթը դիմեց խարդախության և նամակ գրեց իր բարեկամ, իտալական հյուպատոս Սպորդոնինին՝ խնդրելով նրա միջնորդությունը, որպես-

զի հայերը զինաթափվեն ու հանձնվեն: Երբ այդ փորձը ձախողվեց, Ջևղեթը դիմեց նոր միջոցի. նա թույլ տվեց գաղթականներին մտնել քաղաք, սով առաջացնելու մտադրությամբ, սակայն դա էլ դրուսթյունը չփոխեց:

Վանի հերոսական ինքնապաշտպանության առաջին տասնօրյակն անցավ հաջող: Այդ մասին ընդգծվում էր ապրիլի 16-ին Ջինվորական մարմնի հրապարակած կոչում: Միաժամանակ փորձեր են արվում խիզախ ու ճարպիկ սուրհանդակների միջոցով կապ հաստատել դրսի հայության, ռուսական բանակի հետ և խնդրել օգնություն: Ապրիլի 12-ից սկսած՝ մի քանի սուրհանդակներ ուղարկվեցին, սակայն դրանցից միայն մեկին հաջողվեց Պարսկաստանի վրայով տեղ հասնել, այն էլ մեծ ուշացումով:

Վանի ինքնապաշտպանության երկրորդ տասնօրյակում նույնպես ծավալվեցին ծանր մարտեր: Ապրիլի 19-ին թուրքերի ձեռնարկած կատաղի հարձակումը ոչ մի արդյունք չտվեց. նրանք տվեցին մեծ կորուստներ ու նահանջեցին ելման դիրքերը:

Ձենք հայթայթելու համար վանեցիներն ստեղծեցին զինարան, փամփշտարան և վառոդարան, որտեղ աշխատում էին համապատասխան մասնագետներ՝ Վանի վարժապետանոցի տնօրեն, քիմիկոս պրոֆեսոր Սիքայել Մինասյանի ղեկավարությամբ: Նրա օգնականներն էին Վարդան Պապիկյանը և Հարություն Կաքավյանը: Այստեղ արագությամբ վերանորոգվում էին վնասված զենքերը, պատրաստվում էր վառոդ, նույնիսկ ձուլվեցին երկու թնդանոթներ:

Կենսական դեր կատարեց 500 արիեստավորներից կազմված «Ամրաշենների խումբը», որոնք անհապաղ հասնում էին ամենավտանգավոր դիրքերը և անմիջապես վերականգնում թնդանոթների պատճառած ավերածությունները: Կռվի առաջին տասնօրյակում նրանք Այգեստանի շուրջ փորեցին խոր և լայն խրամատներ, ստորերկրյա թունելներ և հաղորդակցության այլ ուղիներ: Այդ նրանք էին, որ թշնամու դիրքերի տակ ստորերկրյա անցքեր էին բացում, որտեղ դրված ռումբերով քարուքանդ էին արվում թշնամու դիրքերը: Ամրաշեն խմբի զինվորներից էին Շավարշ Հովվյանը, Ազատ Խորենյանը և Գրիգոր Պաշիրյանը:

Անգնահատելի դեր կատարեց Հովհաննես Բուժիկանյանի ղեկավարած նվազախումբը՝ «Ֆանֆառը», կազմված Վարժապետանոցի մի խումբ աշակերտներից: Նվազախումբը հասնում էր ամենավտանգված դիրքերը և իր աշխույժ նվազով ոգևորում էր մարտիկներին: «Ֆանֆառը» ինքնապաշտպանության ողջ ընթացքում դարձավ Այգեստանի հե-

րոսամարտի խանդավառ ոգին: Նրա հայտնվելը որքան ոգևորում էր հայերին, նույքան էլ նյարդայնացնում և խուճապի էր մատնում թուրքերին: Նվազախմբի ուղեցույց առաջնորդն էր Մարգար Փախչոյանը: Վանեցիների դիմադրողական ուժը ոչ միայն չէր թուլանում, այլև աճում էր, որովհետև նրանք արդեն ձեռք էին բերել մարտնչելու փորձ, և, բացի այդ, նրանց հույս էր ներշնչում ռուսական զորքերի մոտենալը: Իսկ ռուսական զորքը և Անդրանիկի գլխավորած հայ կամավորների 1-ին գունդը 1915 թ. ապրիլի 20-ին Դիլմանի ճակատամարտում ջախջախել էին Խալիլ բեյի գլխավորած թուրքական բանակին և առաջ էին շարժվում դեպի Վան: Ռուսական մեկ այլ զորաբանակ էլ, որի առաջապահն էր Դրոյի գլխավորած հայ կամավորների 2-րդ գունդը, Վանին էր մոտենում Իգդիր-Բերկրի գծով:

Ռուսական զորքերի և հայ կամավորների մոտենալուց ահաբեկված Ջևղեթը ապրիլի 21-ին ձեռնարկեց նոր հարձակում: Ուժեղ ռմբակոծությունից Վանը կորավ հրի ու ծխի մեջ, սակայն վանեցիները, մեծ ու փոքր, անձնուրաց կռվի ելան ատելի ոսոխի դեմ: Չտեսնված համարձակությամբ աչքի էին ընկնում պատանի վանեցիները: Նրանք ոչ միայն կապավորի դեր էին կատարում, փամփուշտ ու պարեն հասցնելով դիրքերը, այլև, մահը արհամարհելով թաց լաթերով հանգցնում էին թուրքական պատրույգավոր ռումբերը, վնասագերծում դրանք և վառողը հասցնում փամփուշտ լցնողներին: Այդ խիստ վտանգավոր գործում աչքի ընկան 12-14-ամյա պատանիներ Ասլանը, Բաբկենը, Արտաշեսը, Ռստանիկը, Մարտիրոսը և շատ ուրիշներ, որոնց մի մասը զոհվեց՝ չհասցնելով կտրել ռումբի վառվող պատրույգը: Այդ խիզախ պատանիների մեջ էր նաև Արամ Թովմասյանը՝ ապագայի շնորհաշատ երգիծաբան Լեռ-Կամսարը: Իսկ հայ կաթոլիկների դպրոցի սան Կիրակոս Կիրակոսյանը անցավ թշնամու դիրքերը, սպանեց թուրք երկու զինվորների և նրանց զենքերով ետ վերադարձավ՝ արժանանալով Պատվո խաչի:

Կռիվները վերսկսվեցին ապրիլի 24-ին, որոնք գնալով ավելի ուժեղացան: Ապրիլի 28-ին Ջևղեթը ձեռնարկեց, կարելի է ասել, վերջին խոշոր հարձակումը, և այդ օրը տեղի ունեցան ամենակատաղի կռիվները, սակայն վանեցիները ոչ մի թիզ հող չզիջեցին:

Ապրիլի 30-ին հայերը գրավեցին Խաչ-Վողանի կարևոր կետերը և մի մեծ շան պոչին նավթոտ թիթեղ կապելով ու վառելով՝ բաց թողեցին դեպի թուրքերի դիրքերը: Դա սարսափի մեջ գցեց առանց այն էլ ընկճված թուրքերին, որոնք դեռևս շարունակեցին կռիվը մինչև մայիսի 3-ը՝

գլխավորապես ռմբակոծելով քաղաքը: Սակայն մոտեցող ռուսական բանակի, հայ կամավորների և Վանի հայության հուժկու հարվածների տակ թշնամին խուճապահար փախուստի դիմեց: Մայիսի 3-ին հայ մարտիկները լիովին ազատագրեցին քաղաքը, հրդեհեցին թուրքական բռնապետության ամրոց Հաջի-Բեքիրի գորանոցը և ապա Վանի բերդի վրա բարձրացրին հայոց դրոշը: Այգեստանցիները և Քաղաքամեջի պաշտպանները բոլոր ցավերն ու տառապանքները մոռացած՝ ցնծությամբ դիմավորեցին միմյանց և ջերմորեն գրկախառնվեցին: Արժե, հավանաբար, հիշատակել, որ երբ Քաղաքամեջի պաշտպանները վերահաշվառեցին ունեցած զինամթերքը, պարզվեց, որ խնայվել է ունեցած ռազմապաշարի կեսը, որովհետև այստեղ ևս հրահանգվել էր և ոչ մի աննպատակ զնդակ չարձակել:

Մայիսի 5-ին երկու քներով Վան մտան հայ կամավորների երկու խմբերը՝ Ներքին Թիմարից Դրոն և Համազասպը, վերին Թիմարից՝ Արճակի վրայով, Քեռին ու Վարդանը (ըստ Հ. Կոստյանի՝ հայ կամավորները և ռուսական բանակը Վան են մտել մայիսի 7-ին (տե՛ս Հ. Կոստյան, Վան-Քաղաքամեջի ապրիլյան կռիվները, Երևան, 1992, էջ 130): Իսկ ավելի շուտ, ըստ Հ. Վևորյանի, Վան էր մտել Դրոյի զորախմբի առաջապահ ջոկատը՝ Դաշնակցական Խեչոյի և Դալի Ղազարի գլխավորությամբ: Ապա մայիսի 6-ին Վան մտավ բուն ռուսական բանակը՝ գեներալ Նիկոլասի հրամանատարությամբ:

Այդպես վերջացավ Վանի 27-օրյա հերոսամարտը, որի ընթացքում հայերը տվեցին 200 սպանված և վիրավոր: Այն հայոց ազատամարտի փայլուն դրվագներից է և պատիվ է բերում հայ ժողովրդին:

ՀԱՏԱԽ

Վանի ինքնապաշտպանությանը զուգահեռ 40-օրյա հերոսական ու հաղթական կռիվ մղեցին Շատախի հայերը:

Շատախ գավառը, որը հայտնի է նաև Ջերմածոր անունով, գտնվում է Վանա լճի հարավում և ներկայացնում է բարձրաբերձ լեռների, անդնդախոր ծորերի և հորձանուտ գետերի մի ուրույն լեռնաշխարհ: Գավառի հյուսիսային սահմանը Արտոս լեռն է իր քներով, արևմուտքում՝ Առնոս լեռը և Մոկս գավառը, արևելքում՝ Նորդուզի և Անձնացյաց գավառները, իսկ հարավային սահմանը Արևելյան Տիգրիսն է, որը հոսում է

գավառի ամբողջ երկարությամբ ձգվող մի վիթխարի ծորի միջով: Երկու կողմերից նրան են միանում մի շարք ծորակներ ու արագահոս գետակներ, որոնք միախառնվելով Տիգրիսին՝ հոսում են դեպի հարավ:

Շատախի 110 գյուղերից 50-ը հայաբնակ էին, մնացածը՝ քրդաբնակ, իսկ թուրքեր առհասարակ չկային: Գավառի կենտրոնը Թաղ գյուղն էր, որը դարձավ ապրիլյան կռիվների հենակետը: Երկու հարյուր տներից բաղկացած գյուղը զուտ հայաբնակ էր և գտնվում էր երեք ամեհի ծորերի միացման տեղում:

Շատախցի հայերից զենքը միշտ անբաժան էր, որով սարսափ է ազդել քրդերի վրա, առաջացրել տեղական թուրքական իշխանությունների ակնածամբը: Այդ պատճառով էլ Ջևղեթը որոշեց առաջինը քանդել այդ վտանգավոր բույնը և ապա հեշտությամբ բնաջնջել ամբողջ նահանգի հայությանը:

Վասպուրականում 1900-ական թվականներին Հ. Հ. Դաշնակցությունը լծվեց հայ ազգաբնակչության ինքնապաշտպանության կազմակերպման գործին: Դաշնակցության գործունեության գլխավոր առանցքը կազմում էր բնական դիրքերով օժտված Լեռնապարի շրջանը, որի մի կարևոր օղակն էլ Շատախն էր: 1904-ից Լեռնապարում գործում էին դաշնակցական գործիչներ Իշխանը (Նիկողայոս Պողոսյան, 1883-1915), Արամը, Սարգիսը, Նիկոլը, Վ. Փափագյանը (Կոմս) և ուրիշներ: Ըստ Ս. Մեսրոպյանի տեղեկության՝ 1908-1914 թթ. Շատախի 10.000 գյուղացիությունը 7000 օսմանյան ոսկի է տրամադրել ինքնապաշտպանության գործին, որը խոսուն ցուցանիչ է (տե՛ս «Վան-Վասպուրականի հերոսամարտը» ժողովածուի «Հերոսամարտ Շատախում և Փեսանդաշտում» զլուխը, հեղինակ՝ Ս. Մեսրոպյան, Երևան, 1990, էջ 74):

1912 թ. Դաշնակցության Վասպուրականի շրջանային ժողովը միաձայնությամբ որոշում է. «Նկատի ունենալով, որ իթթիհատականները թշնամական դիրք են բռնել հայ ժողովրդի նկատմամբ, անհրաժեշտ է զարկ տալ ժողովրդի ինքնապաշտպանության կազմակերպմանը և պատրաստ լինել ամեն անակնկալի»: Այդ որոշման հիման վրա գավառներում ստեղծվեցին ինքնապաշտպանության հատուկ զինվորական մարմիններ: Նույն թվականի հոկտեմբերին Արամի մասնակցությամբ Շատախի շրջանային ժողովն ընտրեց «Անտառի» Ձինվորական մարմին, որի մեջ մտան Հովսեփ Չոլոյանը, Միհրան Տեր-Մարգարյանը և Սամվել Մեսրոպյանը: Ձինվորական մարմինը կազմեց ամբողջ գավառի ինքնապաշտպանության հատակագիծը, տնտեսական կարողության

վիճակագրությունը: Գերոսամարտի նախօրյակին Շատախն ուներ հետևյալ զինական կարողությունը՝ 120 նոր սիստեմի հրացան, 70 տասնոց մաուզեր ատրճանակ, 50-ից ավելի զանազան ատրճանակներ, 100-ից ավելի շեշխանա ծխավոր հին տիպի հրացան, մեծ քանակությամբ վառող, կապար, փամփուշտ: Ձենքն ու զինամթերքը պահեստավորվեց գյուղերից դուրս ապահով տեղերում:

Մշակվեց ինքնապաշտպանական կռվի մի նախագիծ, ըստ որի՝ հնարավոր էր կռվի ընթացքում ամբողջ շրջանը իրար միացնել: 1915 թ. հունվարի 7-ին Ձինվորական մարմինը Թաղում հրավիրեց խմբապետների խորհրդակցություն, որտեղ որոշվեցին ռազմական կարևոր նշանակություն ունեցող վայրերը և պատասխանատու ղեկավարները: Ինքնապաշտպանության ճակատը ներկայացնում էր մոտ 50 կիլոմետր երկարությամբ մի գիծ: Պատրաստություն տեսնվեց 300 զինվորի համար վեց անսվա գեների, ռազմանյութի և պարենի պաշար: Պարենը ամբարվեց Թաղ, Արմշատ, Կաճետ, Կազաի, Ծիծանց, Պոլս, Սիվտկի, Գոմեր և Քրմենց գյուղերում: Երիտասարդությունը մարզվում էր թուրքիկ խմբերի մեջ, ժողովուրդը հոգեբանորեն նախապատրաստվում էր դիմագրավել ամեն մի անակնկալ:

1915 թ. փետրվարի կեսերին խմբապետ խումարցի Պետրոսի սպանությամբ Շատախում դեպքերը գահավեժ ընթացք ստացան: Գավառի ինքնապաշտպանության ղեկավարությունը այդ սպանությունը գնահատեց իբրև թուրքական դավադիր ծրագրի սկիզբ: Մարտի 15-ին Ձինվորական մարմինը Վան ուղարկեց Սամվել Մետրոպյանին և Սիիրան Տեր-Մարգարյանին՝ Դաշնակցության Կենտրոնական կոմիտեից ցուցումներ ստանալու համար: Մարտի 25-ին ձերբակալվեց Ձինվորական մարմնի անդամ Գովսեփ Զոլոյանը: Նրան ազատելու փորձերը հաջողություն չունեցան:

Մարտի 30-ին հրավիրվեց բոլոր խմբապետների խորհրդակցություն, որը հանգեց հետևյալ որոշման. 1. ապարդյուն և վտանգավոր համարել համաձայնության փորձերը կառավարության հետ, 2. հայտարարել զինվորական դրություն և հարաբերությունները խզված համարել իշխանությունների հետ, 3. որոշման մասին հատուկ սուրհանդակի միջոցով տեղեկացնել Կենտրոնական կոմիտեին: Կազմվեց նոր Ձինվորական մարմին, որի մեջ մտան Սամվել Մետրոպյանը, Ազատ Սիմոնյանը և Տիգրան Բաղդասարյանը: Խմբապետները ստանձնեցին իրենց վստահված դիրքերի պաշտպանությունը, որոնք յոթն էին՝ Շահիրուա բերդ,

Հաշկանից կամուրջ, Պոլս, Սողվանց գյուղ, Տիգրիսի վրա գտնվող Խլքտանի, Կաճեթի և Արմշատի կամուրջներ: Հիշյալ վայրերը իրար հետ կապելու համար ստեղծվեցին երկու թուրքիկ խմբեր: Գավառի ինքնապաշտպանության կենտրոնը Թաղն էր, որն ընկած էր Տիգրիսի աջ ափին, այնտեղ, որտեղ Սիվտկին գետը, կիսելով գյուղը, միանում էր Տիգրիսին: Գյուղաքաղաքը բաժանված էր երեք թաղամասերի՝ Վերին, Ներքին և Ջրաղացի: Առաջին երկու թաղերն ընկած էին Սիվտկին գետի աջ ափին, Քյուրյուկ լեռան ստորոտին, որի լանջին ընկած էր բախտորոշ ռազմական կետ հանդիսացող Սողվանց գյուղը: Ջրաղացի թաղը գետի ձախ ափին էր, Ջամլանաբեկ լեռան լանջին: Թաղի դիմաց, Տիգրիսի ձախ ափին գտնվում էին կառավարչատունը, հեռագրատունը, բանտը և զորանոցը: Տիգրիսի վրա երկու կամուրջները կապում էին կառավարչատունը Թաղի հետ: Կռիվների ընթացքում Տիգրիսի ձախ ափը և Ջրաղացի թաղի մի կարևոր մասը, որտեղ էր և հայոց դպրոցը, գտնվում էին թուրքերի ձեռքին: Ձինվորական մարմնի կենտրոնը Թաղի հայոց եկեղեցին էր, իսկ մարտիկները դիրքավորված էին յոթ տներում: Նույնքան դիրքեր էլ ունեին թուրքերը: Հայկական դիրքերում կային 115 մարտիկներ, իսկ թուրքական դիրքերում՝ 150 ժանդարմ, 2000-ի չափ թուրդ աշիրեթներ, երկու թնդանոթ:

Կռիվների սկզբում հայ մարտիկներին հաջողվեց հնարամտորեն հարկադրել անձնատուր լինել Սիվտկին գյուղի 20 հոգուց բաղկացած թուրքական ջոկատին, ինչպես նաև վերացնել Շահիրուա բերդի շրջակայքում գտնվող Խանի և Գոմերի պահակախմբերը: Հայ մարտիկները հաշվեհարդար են տեսնում նաև Սակ գյուղում իջևանած 14 ժանդարմների հետ՝ իրենք էլ տալով երեք զոհ:

Շատախի սույն դեպքերի կապակցությամբ Վանի կուսակալ Ջնդեթը հղանում է դավադիր ծրագիր՝ նա Վռանյանի միջոցով առաջարկում է Կենտրոնական կոմիտեին երկու կողմից հատուկ ներկայացուցիչներ ուղարկել Շատախ՝ իբր կացությունը պարզելու և խաղաղեցնելու համար: Միաժամանակ նա հատկապես մատնանշում է, որ հայերի կողմից գնացողն անպայման լինի Իշխանը: Ապրիլի 3-ի երեկոյան Իշխանը մեկնում է Վանից՝ հետը վերցնելով Շատախի Ձինվորական մարմնի անդամ Սիիրան Մարգարյանին, իր զինակիցներ Վ. Խռանյանին և Քոթթե Պողոսին: Սակայն ճանապարհին Հիրճ գյուղում հանգստանալիս չորսն էլ զոհ են գնում Ջնդեթի կազմակերպած դավադրությանը:

Ապրիլի 4-ին Թաղի թուրքական վարչության և հայերի միջև բանակցություններ սկսվեցին, որոնք, սակայն, անցան ապարդյուն: Ինքնապաշտպանության աշխատանքներին լծվեցին նաև կանայք, որոնք պարեն էին նախապատրաստում, հեռու վայրերից քար էին կրում դիրքերն ամրացնելու նպատակով: Նույն օրն էլ պայթեց առաջին զնդակը, և սկսվեցին հազարավոր համազարկեր: Այսպիսով՝ 1915-ին դարավոր ստրկության և գերության շղթաները փշրելու առաջին քայլը կատարվեց Վասպուրական աշխարհի Շատախ գավառի կենտրոն Թաղ ավանում: Ապրիլի 4-22-ը Թաղում և ամբողջ գավառում ընթացան թեժ մարտեր: Առաջին օրը հայերը այրեցին Ներքին թաղի ոստիկանատունը, ձերբակալեցին մի ոստիկանի և գրավեցին 240 փամփուշտ: Ապրիլի 7-ին հայերն այրեցին ջրաղացի կամուրջը և կտրեցին թուրքերի հաղորդակցության ճանապարհները: Ապրիլի 12-ին հայերը Խլբտանի կամուրջը քանդելու անհաջող փորձ կատարեցին: Ապրիլի 17-ին Հայոց եկեղեցին վերածվեց մի բարդ զինական դարբնոցի: Այստեղ կենտրոնացրին ուսկանների վրայից հանված կապարը, կռաքարեր և այլ մետաղյա իրեր, սկսեցին վառող պատրաստել, նորոգել շարքից ելած զենքերը և փամփուշտներ լցնել: Ապրիլի 18-ին թուրք ոստիկանները փորձեցին անցնել Հաշկանից կամուրջը, սակայն հինգ զոհ տալով՝ նահանջեցին: Ապրիլի 20-ին սկսեց գործել հայերի պատրաստած թնդանոթը, որը հրաշալիորեն քանդում էր թշնամու դիրքերը:

Ապրիլի 4-ի թվակիր նամակով, որը, ինչպես նաև մոտ 25 այլ գրություններ, ընկան հայերի ձեռքը. Շատախի կայնական Համդի բեյը կուսակալ Ջնդեթից խնդրում էր օգնական ուժեր և զինամթերք ուղարկել, որովհետև հայերին իրենց դիրքերից հանելու համար լուրջ զինվորական ուժի անենախիստ կարիք կա: Համդի բեյի ապրիլի 6-ի թվակիր նամակում, ուղղված գումարտակի հրամանատար Քյամիլ բեյին, նշվում էր, որ իրենք արդեն ութ օր է, ինչ կռվում են Թաղի ապստամբների դեմ: Մոտ 500 ֆիդայիներ ամրացել են տներում, որոնց անընդհատ օգնության են գալիս շրջակա ավերված գյուղերից: Եվ եթե առաջիկա օրերին իրենց չհաջողվի գրավել Թաղը և շրջակա բլուրները, այլևս ոչինչ հնարավոր չի լինի անել: Դրա համար անհրաժեշտ է մեկ թնդանոթ և հնուտ սպայի դեկավարությամբ մի զորամաս: Ապրիլի 10-ին Համդի բեյը Ջնդեթին գրում էր, որ Թաղի կռիվը առավել լուրջ կերպարանք է ստանում և սաստկանում, ապստամբներին հասցվող օգնությունը օր օրի ավելանում է: Սպանվել է Նորդուզի մյուդիրը, իսկ Հայոց Չորի, Գյավաշի

և Մուկսի ուժերից ոչ մի տեղեկություն չկա: Ճանապարհ ընկած ռազմա-մյուսը կարող է գրավված լինել հայերի կողմից, առանց որի հնարավոր չէ մաքրել Թաղը, ուստի կայնականը թախանձագին խնդրում էր ռազմամթերք հասցնել: Ապրիլի 12-ին Ջնդեթը ծածկագրով հավաստիացնում էր Համդի բեյին և Նորդուզի կայնական Խալըդ բեյին, որ Շատախի համար ուղարկված է 10 սնդուկ մաուզերի փամփուշտ և մի թնդանոթ: Սակայն ապրիլի 27-ին Համդի բեյը գումարտակի հրամանատար Քյամիլ բեյին գրում էր, որ չնայած Ջնդեթի հավաստիացումներին, ոչ մի թնդանոթ էլ չի ստացվել, և օրը ցերեկով Թաղի կառավարչատուն մտնել-ելնելը հնարավոր չէ, քանի որ մուտքը գտնվում է դիմացի հայկական դիրքի կրակի տակ, որը կարելի է քանդել միայն թնդանոթով, ուստի խնդրում էր շտապ երկու թնդանոթ ուղարկել:

Եվ իրոք, մինչդեռ Շատախի կայնականը դիմումներ էր կատարում կուսակալին և գումարտակի հրամանատարին՝ պահանջելով ռազմամթերք, թնդանոթներ և լրացուցիչ զորամասեր, շատախցիները ամուր փակել էին հաղորդակցության ուղիները, և թուրքերը դրսի հետ հաղորդակցվում էին միայն Մուսկավա գյուղի լեռնային անանցանելի կածաններով:

Ապրիլի 24-ից սկսած՝ շատախցիների դրությունն սկսեց ծանրանալ: Տիգրիսի վրա նոր կամուրջներ կապելով՝ քրդերը մտան Արմշատ և Բուխս հայկական գյուղերը, որտեղ տեղի ունեցան եռօրյա կատաղի կռիվներ, որից հետո հայերը խմբապետ Սեթի գլխավորությամբ քաշվեցին Վարիսետ լեռան դիրքերը՝ թիկունքից Թաղը պաշտպանելու նպատակով: Այստեղ կենտրոնացվեցին շատախցիների լավագույն ուժերը՝ Ազատի, Միհրան Չաթոյանի, Հոլսեփի Գուրունյանի, Սահակ Չոլոյանի գլխավորությամբ:

Ապրիլի 28-ի առավոտյան Թաղի պաշտպանները հեռվում նկատեցին ոչ թե սպիտակ, որին սպասում էին, այլ բարձրացող կարմիր դրոշ, որ նշանակում էր, թե թշնամին մոտենում է, և դրությունը անհուսալի է: Անհրաժեշտ էր սուլիանդակ ուղարկել, և առաջ եկավ 12 տարեկան Սրբոն: Փոքրիկ հերոսուհին վերցրեց նամակը, տեղ հասավ և պատվով կատարեց իր պարտականությունը: Ձինվորական մարմինը տագնապով հետևում էր Սողվանց գյուղի կողմից բարձրացված դրոշակին: Կարճ ժամանակ անց դրոշակը երեք անգամ գլուխն իջեցրեց ու մեկն վայր ընկավ: Դա նշանակում էր, որ Սողվանցն անցել է թշնամու ձեռքը: Դրանով Թաղն ընկավ պաշարման մեջ, և անհրաժեշտ էր կապ

ստեղծել դրսի ուժերի հետ: Այս անգամ սուրհանդակի պարտականությունը հանձն առավ չորս գավակների մայր Ասմարը, որը թշնամու շղթայի միջով, Սիվտկնա ծորով անցնելով 10 կմ ճանապարհ, Ջինվորական մարմնի նամակը հասցրեց Ազատին ու վերադարձավ: Մինչև մայիսի 4-ը պաշարված թաղեցիները վարեցին վճռական դիրքային կռիվներ, երբ Բազիկը 10 մարտիկներով ճեղքեց օդակը և մտավ Թաղ: Մայիսի 5-ին թուրքերը գործի դրեցին նոր ստացած երկու թնդանոթները և սկսեցին ավերել հայերի դիրքերը, որոնք, սակայն, գիշերվա ընթացքում վերականգնվում էին:

Թաղեցիները նորից սուրհանդակ ուղարկեցին Սիվտիկին՝ խնդրելով արագացնել Սողվանի գրավումը: Հարձակումը նախապատրաստում էր Ազատը, որի հետ էին Միհրան Չաթոյանը, Արշակ Պետրոսյանը, Սեթը, Մեսրոպ Ջանոյանը՝ 120 լավագույն մարտիկներով: Նրանք վճռական հարձակումով վերագրավելու էին Սողվանը և թաղեցիներին փրկելու էին պաշարման օդակից: Մայիսի 8-ի առավոտյան սկսվեց Ազատի հարձակումը Քյուրիկ լեռան գագաթից, որտեղից լավեց Մ. Ջանոյանի փողի ձայնը, և մոլեգնած գրոհի դուրս եկան նաև Թաղի պաշտպանները: Թաղի եկեղեցու 38 օր լռած եկեղեցու զանգերը կրկին սկսեցին ղողանջել: Հաղթանակը կատարյալ էր. Սողվանը վերագրավվեց և նրա վրա կրկին սկսեց ծածանվել սպիտակ դրոշը: Մուսն ընկնելուն պես Ազատը մտավ Թաղ, և նույն պահին էլ հայտնի դարձավ, որ հայ կամավորական զնդերը մտել են Վան, իսկ Արամը թաղեցիներին էր ուղարկել երկու արկղ փամփուշտ և երկու հրացան: Մայիսի 11-ին քողերը լքեցին Թաղի շրջակայքի իրենց դիրքերը և դիմեցին փախուստի: Այսպես, Շատախի 42-օրյա հերոսամարտը ավարտվեց փայլուն հաղթանակով:

Մայիսի 11-ին ստացվեց Դրոյի նամակը, որը հայտնում էր, որ իր հազար կամավորներով հասել է Սիվտիկին: Մայիսի 12-ին Թաղը շուքով ու մեծարանքով ընդունեց Դրոյին, իսկ վերջինս հիացմունքի ու դրվատանքի խոսքերով ողջունեց ռազմիկ շատախցիներին:

1915 թ. ապրիլի սկզբներին ինքնապաշտպանական կռիվներ տեղի ունեցան նաև Ռշտունիքում կամ Գավաշ գավառում՝ Լևոն Շաղոյանի ղեկավարությամբ: Երբ Ռստանի կայմականը զենքեր պահանջեց Գավաշի ժողովրդից և ապա հարձակում ձեռնարկեց հայկական Փայխներ, Նոր Գյուղ, Մոխրաբերդ և այլ գյուղերի վրա, գավաշցիները մարտերով հեռացան և ապաստանեցին սահմանակից Փեսանդաշտում: Այստեղ պատսպարվեց մոտ 6000 մարդ:

Փեսանդաշտը մի ավազան-դաշտ է 13 կիլոմետր երկարությամբ և 8 կիլոմետր լայնությամբ՝ շրջապատված լեռներով: Այնտեղ էին գտնվում Առեղ, Կայնամիրան, Շիտան և Կաղազիզ հայկական չորս գյուղերը: Վարչական բաժանմամբ Փեսանդաշտը մտնում էր Շատախի գավառի մեջ:

Փեսանդաշտի ինքնապաշտպանությունն ուներ չորս դիրք՝ Բարադոտիկի, Շահրուրա-Բերդի, Կարոսլախի և Նառի: Ջինական ընդհանուր ուժն էր 150 հրացան և 70 ատրճանակ:

Ապրիլի 14-16-ը թուրքերն ուժգին հարձակումներ կատարեցին հատկապես Բարադոտիկի ուղղությամբ, որի ինքնապաշտպանությունը անձամբ ղեկավարում էր Լևոն Շաղոյանը՝ իր տրամադրության տակ ունենալով 80 հրացանավորներ և 40 ատրճանակավորներ: Թշնամու գրոհներն ուղեկցվում էին լեռնային թնդանոթի ուժգին կրակով: Սակայն այդ բոլոր գրոհներն ավարտվում էին անհաջող և թշնամու մարդկային կորուստներով: Ապրիլի 17-ին թուրքերը ձեռնարկեցին վերջին հարձակումը՝ փորձելով Արտոս լեռան գագաթով անցնել փեսանդաշտցիների թիկունքը: Սակայն Լևոն Շաղոյանի հմուտ գործողությունների շնորհիվ թուրք ժանդարմները ծուղակի մեջ ընկան և հինգ սպանված ու բազմաթիվ վիրավորներ թողնելով՝ դիմեցին փախուստի:

Մայիսի 10-ին Փեսանդաշտ մտան հայ կամավորական զնդերը:

Թուրք ջարդարարներին դիմադրելու թույլ փորձեր են եղել նաև տարբեր նահանգներում, որոնց մասին, սակայն, չգիտես ինչու, մի տեսակ ընդունված չէ խոսել: Մինչդեռ, մեր կարծիքով, նմանօրինակ թեկուզ աննշան ղեպքերը պետք է մեկիկ-մեկիկ հավաքել, ի մի բերել և ներկայացնել ըստ պատշաճի, ինչպես նաև որոնումներ ու պրպտումներ պիտի կատարել այդ ուղղությամբ:

Այսպես՝ հիշատակություն կա, որ Տրապիզոնից ու նրա շրջակայքից բռնագաղթված շուրջ 100 հայ տղամարդիկ Թեքքե կայանում հարձակվել են պահակների վրա, զինաթափ արել նրանց և հեռանալով լեռները՝ շարունակել են կռվել թուրք բարբարոսների դեմ: Կամ՝ ցեղասպանության առաջին իսկ օրերին Ջենալ Ազմի փաշայի հրամանով 40 հայ տղամարդու ծով են դուրս բերել՝ խեղդամահ անելու նպատակով, սակայն մահապարտները մերկ ձեռքերով հարձակվել են ուղեկցող թուրք ոստիկանների վրա, բոլորին ոչնչացրել և իրենք էլ գոհվել: Փրկվել են միայն երկու հայեր, որոնց անունները հայտնի են՝ Ադամ Հովսեփյան և շապինգարահիսարցի Անդրանիկ:

Տրապիզոնցի Գարուբյուն Սարգսյանն իր երկու որդիների՝ Գուրգենի և Պարույրի հետ միասին ծրագրել են սպանել ջարդարար Ջեմալ Ազմիհն և ապա զենքի կոչել հայերին: Սակայն նրանք ընկել են թուրք ոստիկանության ձեռքը և սպանվել: Տրապիզոնցիներ Սեդրակ Սեյրանյանն ու Երվանդ Տերտերյանը իրենց տները վերածել են կրակակետերի, մինչև վերջին գնդակը կռվել թուրք հրոսակների դեմ և անձնասպան եղել:

Թուրք մարդասպանների դեմ զենք է բարձրացրել Սև ծովի ափին՝ Տրապիզոնի մոտ գտնվող Կովատ Շամի հայ բնակչությունը, որը, մեր կարծիքով, հայոց 1915 թվականի դյուցազնամարտի ցարդ արժանվույնս չլուսաբանված փառահեղ էջերից է: Այդ դյուցազնամարտի վերաբերյալ արխիվային կարևոր փաստաթուղթ է հայտնաբերել ու հրատարակել Մ. Արզումանյանը (Գայաստան 1914–1917, Երևան, 1969, էջ 387): Ըստ այդ արժեքավոր փաստաթղթի՝ Տրապիզոնի ջարդի ու դիմադրության օրերին հայոց կաթողիկոս Գևորգ 5–րդը դիմել է ցարական իշխանություններին՝ խնդրելով ռուսական սևծովյան նավատորմի օգնությունը Կովատ Շամի և Տրապիզոնի բնակչությանը: «Թախանձագին խնդրում էմ Ձերդ գերազանցությանը փրկել իմ ազգին գազանացած ֆանատիկներից,— գրել է կաթողիկոսը,— օգնության գալ դժբախտ մարտիկներին, որոնք վերջին ճիգերն են թափում հանուն Քրիստոսի հավատի ու նվիրվածության Ռուսաստանի»:

Իհարկե, պատերազմական հանգամանքների բերումով ռուսական նավատորմը չկարողացավ օգնության հասնել, և տրապիզոնահայությունը կոտորվեց, սակայն շուրջ 600 խիզախ հայորդիներ, այդ թվում նաև համաձայնակցող ջարդվեցին Տրապիզոնի լեռները և երկար ժամանակ զենքը ձեռքին մարտնչեցին թուրք հրոսակների դեմ: Նրանց հերոսական պայքարի ղեկավարներն էին Ջիլ Օհաննեսը, Միքայել Ջեթունջյանը, Գալուստ Զեհյանը և ուրիշներ: Նրանց անօրինակ պայքարը տևեց մինչև 1923 թվականը, երբ աննկուն հայորդիներին ի վերջո հաջողվեց նավակներով դուրս գալ ռուսական ափ: Կարծում ենք նաև, որ հայոց ինքնապաշտպանության այս եզակի դրվագը դեռ սպասում է իր Ֆրանց Վերֆեյլին:

ՄՈՒՀԻ ԵՎ ՍԱՍՈՒՆԻ ՀԵՐՈՍԱՍԱՐՏԸ

Մուշի և Սասունի ինքնապաշտպանությունը հայոց 1915 թվականի դյուցազնամարտի թերևս ամենաանբավարար լուսաբանված էջերից

է: Առ այսօր լուրջ պարզաբանումների կարիք են զգում այդ ինքնապաշտպանության ժամանակամիջոցի, ղեկավարների, արդյունքների, գնահատականի և հարակից այլ հարցեր:

Նախ ասենք, որ խորհրդահայ պատմագրության մեջ այդ ինքնապաշտպանության կազմակերպման ու ղեկավարման գլխավոր դերը վերագրվել է Ռաշնակցությանն ու նրա գործիչներին, ուստի և նրանց ողջ գործունեությունը որակվել է իբրև արկածախնդրական ու վնասակար: Այսպես՝ խորհրդահայ անվանի պատմաբան Ջոն Կիրակոսյանը, որը ծանրակշիռ ավանդ ունի հայոց ցեղասպանության պատմության լուսաբանման բնագավառում, «Առաջին համաշխարհային պատերազմը և արևմտահայությունը, Երևան, 1965» մեծարժեք մեմագրության մեջ գրում է, որ երբ Մուշի մյուսեսարիֆ Սերվեթ բեյը մշեցիներին և սասունցիներին առաջարկեց վերադարձնել հայ դասակից զինվորներին, միանալ թուրքական բանակին և կռվել ռուսական բանակի դեմ, մերժում ստացավ: Վերջիններս հայտարարեցին, որ բռնի տեղահանման կամ կոտորածների դեպքում իրենք կդիմեն ինքնապաշտպանության: Գտնելով, որ նման դիրքորոշումը բնականաբար կատաղեցնելու էր թուրքական իշխանություններին, որոնք անհաջող փորձեր ձեռնարկեցին հաշվեհարդար տեսնելու ինքնապաշտպանության կազմակերպման մասին այդքան անպազուգուռ հայտարարությունների հեղինակները շատ աղոտ պատկերացում ունեին թուրքական կառավարության հակահայկական պլանների մասշտաբների մասին, իսկ ուժերի հարաբերությունը դուրս էր որևէ համեմատությունից: Մինչդեռ, ըստ նրա, տարիներ շարունակ Տարոնում և Սասունում բուն դրած դաշնակցական «լիազոր–ղեկավարները» ոչ միայն փաստորեն ոչնչով չէին նպաստել վտանգի դեպքում ժողովրդի պաշտպանությունը կազմակերպելու գործին, այլև այդ տարիներին եղբայրանալով երիտթուրքերին՝ համագործակցում էին նրանց հետ: Այդ կապակցությամբ Ջ. Կիրակոսյանը վկայակոչում է սփյուռքահայ հեղինակներ Սարգիս և Միսակ Բդեյաններին, որոնք իրենց համատեղ աշխատության մեջ (Սարգիս և Միսակ Բդեյան, Գարազատ պատմություն Տարոնո, Կահիրե, 1962, էջ 294) հավաստում են, թե սահմանադրության վեց տարիների ընթացքում նրանք ամենուրեք բոլորին քարոզում էին, թե այլևս զենքի ուժով չէ, որ պիտի ձեռք բերել ինքնուրույնություն (Ջ. Կիրակոսյան, Նշվ. աշխ., էջ 308): Սփյուռքահայ հեղինակների վկայությունների հիման վրա Ջ. Կիրակոսյանը ցույց է տալիս, որ Մուշ–Սասուն գործուղված դաշնակցական լիազոր–ղեկավար

Ռուբեն Տեր-Մինասյանը մինչև 1914 թվականը հարում էր երիտասարդ թուրքերի քաղաքականությանը և նույնիսկ Կարինի իրենց համագումարում առաջարկում էր հայկական կամավորական խմբեր կազմել և պատերազմ ծագելու դեպքում թուրքական բանակի կազմում կռվել ռուսական բանակի դեմ: «Այսպիսի մտայնություն և վարքագիծ ունեցող, տարիներ շարունակ պրոթուրքական քաղաքականությանը տուրք տված մարդը,— շարունակում է Ջ. Կիրակոսյանը,— ինչ խոսք, որ չէր կարող գլխավորել ժողովրդի ինքնապաշտպանության գործը» (Ջ. Կ., էջ 309): Ուստի նա անվերապահորեն համերաշխում է Մուշի ինքնապաշտպանության ղեկավարներից Եղիշե քահանա Տեր-Պարսամյանին, ըստ որի Ռ. Տեր-Մինասյանը եղավ առաջինը ժողովրդին լքողը և իր գլուխն ազատողը (Եղիշե քահ. Տեր-Պարսամյան: Տարոնո ինքնապաշտպանությունն ու ջարդը 1914–1915, Ֆրեզնո, 1920, էջ 27): Ջ. Կիրակոսյանը եզրակացնում է, որ Մուշում և Սասունում ինքնապաշտպանության գործը բարձիթողի վիճակում էր, ժողովուրդը զինված չէր, և մի քանի հարյուր հրացանով ու ատրճանակով հնարավոր չէր դիմագրավել թուրքական կանոնավոր զորքի հարձակմանը:

Ջ. Կիրակոսյանը գտնում է, որ այն, ինչը չէր հաջողվել անել Մշո դաշտի ժողովրդին փրկելու համար, ինքնապաշտպանության գործի լավ կազմակերպման դեպքում հնարավոր էր անել Սասունում՝ օգտվելով ճակատում թուրքական զորքերի պարտություններից և Սասունի ժողովրդին դեպի ռուսական գործը շարժելով: Սակայն, ինչպես նշում է հեղինակը, բացի սասունցիների առանձին–առանձին խմբերի հերոսական դիմադրությունից, կազմակերպված, ընդհանուր ղեկավարության ներքո ծրագրված ոչինչ չարվեց: Ռուբեն Տեր-Մինասյանը և Վահան Փափազյանը (Կոնս) Մշո դաշտի տեղահանությունից և կոտորածից առաջ արդեն բարձրացել էին Սասուն՝ իրենց հետ տանելով կռվող ուժեր, զենք ու պարեն, պատճառաբանելով, թե անցյալի փորձով թուրքերն առաջինը կհարձակվեն լեռնային Սասունի վրա և հետո միայն կանցնեն դաշտի հայության կոտորածին: Եվ հենց նման մտածելակերպն ու գործելակերպն էլ, ըստ վերը նշված սփյուռքահայ հեղինակների, աղետավոր եղավ թե՛ Մուշի, թե՛ Սասունի հայության համար: Այդ նույն հեղինակների վկայությամբ դաշնակցական ղեկավարներն արհամարհեցին ժողովրդական պայքարի մեջ թրծված մարդկանց՝ Հաջի Հակոբ Կոտոյանի, Մանուկ Շառոյանի և այլոց կարծիքը, որոնք անհրաժեշտ էին գտնում առաջին հերթին կազմակերպել Մշո դաշտի ինքնապաշտպանությունը: Եվ

պատահական չէր, որ դեռ այն ժամանակ Վ. Փափազյանը սասունցիների կողմից որակվեց իբրև «տմարդի ու ստոր արարած» (էջ 313):

Իրականությանը ամենևին չի համապատասխանում Ջ. Կիրակոսյանի այն հայտարարությունը, թե իբր Ռ. Տեր-Մինասյանն իր հիշողությունների յոթ հատորներում, ինքնագովերգությամբ զբաղվելով, «մոռացել է» հիշատակել Մուշի և Սասունի ժողովրդի ինքնապաշտպանությունը ձախողելու գործում իր պատասխանատվության մասին (Նշվ. աշխ., էջ 313): Բանն այն է, որ նշված իրադարձությունների մասին խոսք է գնում ոչ թե բոլոր յոթ հատորներում, այլ միայն յոթերորդ հատորի երկրորդ մասում, որի հեղինակը ոչ թե Ռուբեն Տեր-Մինասյանն է, այլ նրա զինակիցներից մեկը՝ համբավեա Մուշեղը (Սասունցի Մուշեղ, Մուշեղ Ավետիսյան), որի գրչին էլ պատկանում են գովեստները Սասունի ինքնապաշտպանության ղեկավարներից մեկի հասցեին:

Հենց իր՝ Ջոն Կիրակոսյանի շարադրանքի համաձայն իրականությունն այն էր, որ Սասնա լեռներին ապաստանել էր շուրջ 50 հազար ժողովուրդ, որին պաշարել էր թուրքական 30 հազարանոց կանոնավոր զորքը: Թշնամուն քիչ թե շատ կազմակերպված դիմադրություն հաջողվեց ցույց տալ Տալվորիկի շրջանում, որից հետո որոշվեց թե՛ ժողովրդին և թե՛ կռվող ուժը հավաքել Անդոկի հովտում: Միակ ելքը թշնամու օղակը ճեղքելը և ռուսական բանակին միանալն էր, որը սակայն շատ քչերին հաջողվեց: Հիսուն հազարանոց անբոխը ղեկը կորցրած նավի նման լեռնաշխարհի մի անկյունից մյուսն էր շարտվում: Համընդհանուր խուճապի պայմաններում բոլորի համար մի նոր նշանաբան է ձևավորվում՝ թող ազատվի, ով կարող է: Ինքնապաշտպանական կռիվները շարունակվեցին Տալվորիկի անմատչելի լեռնային քերձերի վրա, Շովասարում և այլ վայրերում: Հազարավոր սասունցիներ գոհ գնացին թշնամու սրին ու գնդակին, սովին ու սառնամանիքին:

Սասունի սարերում ապաստանած 50 հազար հայ բնակչությունից 1915 թվականի աշնանը մաս–մաս, խումբ–խումբ կռվկաս հասան 10–15 հազար մարդ, մնացածը գոհ գնաց թուրքական յաթաղանին (Նշվ. աշխ., էջ 317):

Սասունի հերոսամարտի դաշնակցական ղեկավարների վերաբերյալ նույնաման բացասական վերաբերմունք ունի Մ. Արզումանյանը (Մ. Արզումանյան, Հայաստան, 1914–1917, Ե., 1969): Ցույց տալով 1915 թ. գարնանը տարոնահայության գլխին կախված ռեալ վտանգը, հեղինակն այն միտքն է հայտնում, որ տեղի հոգևոր և դաշնակցական ղեկա-

վարձերը պարտավոր էին զգալ վերահաս աղետը և ժողովրդին նախապատրաստել ինքնապաշտպանության, մանավանդ որ նրանք 1894 և 1904 թվականներին ապստամբել էին թուրք ջարդարարների դեմ և ձեռք բերել ազատագրական պայքարի անհրաժեշտ փորձ: Սակայն այդ դեկավարները վճռական պահին ցուցաբերեցին անճարակություն և ձախողեցին տարոնցիների հնարավոր ինքնապաշտպանությունը, որոնց գուցե և հասներ մոտեցող ռուսական բանակը (էջ 391): «Հատկապես հանցավոր դեր կատարեց Տարոնի (Դուրան Բարձրավանդակի) դաշնակցական ղեկավարությունը,— շարունակում է Մ. Արզումանյանը,— որն այն ժամանակ գտնվում էր երկու տիաս «պարոնների»՝ Ռուբեն փաշայի (Տեր-Մինասյան) և «Կոմսի» (Վահան Փափազյան) ձեռքին... Նրանք անձնապես իրար չէին սիրում, բայց դա թուրքովին չխանգարեց, որ երկուսն էլ վարեին մինևույն ոճրագործ գիծը և ձախողեին տարոնցիների ինքնապաշտպանության գործը:

Թեև օրեցօր ծանրանում էր տարոնահայության վիճակը և հարկավոր էր ճիշտ կողմնորոշվել ու վճռական միջոցառումների դիմել, սակայն անճարակ գտնվեցին դաշնակցական շեֆերը և իրենց անմիտ գործողություններով օբյեկտիվորեն միայն նպաստեցին հայերի բնաջնջմանը (էջ 392): Նման եզրակացությանը Մ. Արզումանյանը տալիս է հետևյալ հիմնավորումը. 1915 թ. մայիսի սկզբին ռուսական բանակն արդեն հասել էր Բուլանդիս և մինչև Մուշ մնացել էր ընդամենը մեկ օրվա ճանապարհ: Մուշի և նրա դաշտի հայությունը հմուտ ղեկավարության դեպքում կարող էր հեշտությամբ ոչնչացնել տեղական թուրքական և քրդական փոքրաթիվ ուժերը և առաջ շարժվել դեպի ռուսական բանակը: Ուրեմն,— եզրակացնում է հեղինակը,— Տարոնի ինքնապաշտպանությունը պետք է սկսվեր Մուշից ու նրա դաշտից, ինչպես որ առաջարկում էր մշեցի հայտնի հայդուկ Հաջի Հակոբ Կոտոյանը: Սասնավորապես վերջինս առաջարկում էր թուրքերի դեմ ուղղել այն երկու հրանոթները, որոնց տեղափոխությունը ռուսների դեմ հանձնարարված էր հայերին, գրավել Մուշ քաղաքի կառավարական զինապահեստը, շենքերը և իշխանությունը վերցնել իրենց ձեռքը: Սակայն, ինչպես ցույց են տալիս ականատեսի վկայությունները (Երվանդ Շարաֆյան, Տարոնի եղեռնը, Ականատեսի վկայություններ, Սան Ֆրանցիսկո, 1965, էջ 14), Վահան Փափազյանը խստորեն առարկեց այդ փրկարար ծրագրին և պահանջեց հանգիստ սպասեն մինչև ռուսների գալը: Եվ տեղի ունեցած ժողովը մերժեց Հ. Կոտոյանի առաջարկը:

Ինչ վերաբերում է Ռուբեն փաշային, ապա նա, ըստ Մ. Արզումանյանի, դեռևս վաղուց՝ 1915-ի փետրվարի սկզբին էր փախել Սասուն և իր «Մորթապաշտ հոգին քողարկելու համար» ասում էր, թե Տարոնի ինքնապաշտպանությունը կարող է իրականացվել միայն Սասունի լեռներից, ուստի և բոլոր վայրերի, այդ թվում նաև Մուշի ու նրա դաշտի զինված ուժերը պետք է բարձրանան այնտեղ: «Դա բացահայտ ոճրագործություն էր,— ամփոփում է Մ. Արզումանյանը,— որովհետև նախ՝ մնացած բնակչությունը (կանայք, երեխաներ, ծերեր) մատնվում էին թուրքերի և քրդերի հոշոտմանը, և երկրորդ՝ հեշտացվում էր թուրքական հետագա հարձակման գործը հենց Սասունի վրա... Ռուբեն փաշան, այդ հայկական Դոն Կիխոտը, անցկացրեց իր ավանտյուրիստական գիծը, որը փաստորեն գյուտ դարձավ թուրքերի համար» (էջ 394):

Դժվար չէ նկատել, որ Մ. Արզումանյանի եզրակացությունները հենված են ոչ թե անառարկելի փաստարկների, այլ դաշնակցական ղեկավարներին հակոտնյա որոշ ականատեսների վիճահարույց ենթադրությունների վրա: Մի՞թե կարելի է պնդել, թե Հ. Կոտոյանի առաջարկած Մուշի գրավման պլանը անպայման կպսակվեր հաջողությամբ: Եվ վերջապես, Սասուն բարձրանալու որոշումն ընդունվել է, ինչպես նշվեց, տեղի ունեցած ժողովում և ոչ թե եղել է դաշնակցական ղեկավարների պարտադրանքը: Ուրեմն նման բացասական որակումների և եզրակացությունների հիմքը ոչ այնքան փաստերն են, որքան հակադաշնակցական ելակետը, որը մեր համոզմամբ մերժելի պիտի լինի պատմագրության մեջ:

Մեր կարծիքով, Սասունի ինքնապաշտպանության ղեկավարներին անհիմն կերպով «խրար չսիրող», «ոճրագործ» և նման այլ ոչ սազական արտահայտություններով պիտակավորելու փոխարեն հարկ է ընդգծել այդ գործիչների անհավատալիորեն աննկուն կամքն ու անձնագործությունը, ծայրահեղ աննպաստ պայմաններում մինչև վերջին հնարավորությունը ժողովրդի ինքնապաշտպանությունը գլխավորելու անուրանալի փաստը: Հիշյալ և ուրիշ կոմունիստ պատմաբանների մոտ տվյալ հարցում առկա է դաշնակցության գործունեությունը ամեն կերպ սևացնելու միտումնավորությունը, որից էլ անխնա կերպով տուժում է պատմության անկողմնակալ շարադրանքը:

Սասունի 1915 թ. ինքնապաշտպանության դաշնակցական ղեկավարների վերաբերյալ բացասական վերաբերմունքը, ճիշտ է, փոքր-ինչ ավելի մեղմ երանգներով, առկա է նաև Հայկազ Պողոսյանի

«Սասունի պատմություն», Երևան, 1985, աշխատությունում: Նա նույնպես գտնում է, որ Մուշը չգրավելու և Սասուն բարձրանալու Վահան Փափազյանի և Ռուբեն Տեր-Մինասյանի դիրքորոշումը սխալ էր: Հերոսամարտի ավարտին Սասունի ինքնապաշտպանության ողջ մնացած մասնակիցներին տված Ռուբենի հրահանգը՝ ով ինչպես կարող է փրկվելու մասին, Հ. Պողոսյանը գնահատում է իբրև սեփական անձը փրկելու մտահոգությամբ ժողովրդին թշնամու ողորմածությանը հանձնելու կոչ, որը, մեր կարծիքով, հեռու է իրականությունից: Սասունի հերոսամարտի իրական դրվագներին ծանոթ ընթերցողի ականջին խորթ է հնչում նաև հեղինակի այն ձևակերպումը, թե իբր Ռուբեն Տեր-Մինասյանը և Վահան Փափազյանը, երբ տեսան, որ Մշո դաշտը և Սասունը հեղեղվեցին հայերի արյունով, թողեցին իրենց ժողովրդի բեկորներին բախտի կամքին, փախան թիֆլիս՝ փրկելով իրենց կաշին (Հ. Պողոսյան, Նշվ. աշխ., էջ 321): Եվ, մեր կարծիքով, թիֆլիսում Ռուբենի հասցեին Ռոստոմի հանդիմանությունը՝ «Չկրցա՞ր հոն նահատակվիլ», ոչ թե փախուստի վավերացում է, այլ պահի անցողիկ արտահայտություն: Ի դեպ, այդ հանդիմանանքին Ռուբենը պատասխանել է շատ չոր ու կտրուկ, և այլևս այդ մասին խոսք չի եղել: Հասկանալի չէ նաև, թե ինչի հիման վրա է Հ. Պողոսյանը անարդարացի համարում Կարո Սասունուն, որը պաշտպանության տակ է վերցնում Ռուբենին (Կ. Սասունի, Պատմություն Տարոնի աշխարհի, Պեյրուք, 1956): Նախորդ հեղինակների նման Հ. Պողոսյանն էլ նշում է, որ երբ 1916 թ. գարնանը ռուսական զորքերը գրավեցին Մուշը, Սասունից Մուշ իջան շուրջ 10 հազար մարդ, չհիշատակելով, իհարկե, Ռուբենի և Կոմսի որևէ ծառայություն այդ խլակների փրկության գործում:

Պատմական Հայաստանի Տուրուբերան նահանգը կամ Տարոնի աշխարհը իր Սասուն գավառով դեռևս 19-րդ դարի վերջերից վերածվել էր հայ ժողովրդի ազատագրական շարժման միջնաբերդի, և պատահական չէր, որ թե՛ սուլթանական, թե՛ իթթիհատական իշխանությունները առաջին հերթին ցանկանում էին վերջ դնել նրա գոյությանը:

1915 թ. նախօրյակին Մուշի հոգևոր առաջնորդն էր Ներսես Եպիսկոպոս Խարախանյանը: Այստեղ գործում էր ՀՀԴ «Դուրան-Բարձրավանդակի» Կենտրոնական կոմիտեն, որի անդամներից էին Աշեցի Մճո Պոլեյանը, Կորյունը, Վարդան Վարդապետը, Ռուբենը (Ռ. Տեր-Մինասյան), Սեմանցի Քաթիպ Մանուկը և ուրիշներ: Եռտող այստեղ Ե-

կավ նաև Օսմայան խորհրդարանի հայ երեսփոխան Վահան Փափազյանը (Կոմս):

Տարոն-Տուրուբերանը մտնում էր Բիթլիսի (Բաղեշի) նահանգի մեջ, որի նահանգապետն էր իթթիհատական զործիչ Մուստաֆա Արդուլ Հալըզը: Բիթլիսի նահանգը բաժանված էր չորս գավառների կամ մյուսթեսարիֆությունների՝ Բաղեշի, Մուշի, Գենջի և Սղերդի: Մուշի գավառապետը կամ մյուսթեսարիֆն էր դարձյալ մուլի իթթիհատական Սերվեթ Բեյը: Սասունի լեռնաշխարհը բաժանված էր նշված չորս գավառների մեջ:

Պատերազմի հենց սկզբից Մուշը դարձավ գինվորական պահեստային ուժերի կենտրոնատեղի: Դեռևս 1914-ի հուլիսի 21-ին հայտարարված զորահավաքի միջոցով թուրքական կառավարությանը հաջողվեց մեկ ամսվա ընթացքում Տարոնի հայկական գյուղերը մեծ մասամբ դատարկել տղամարդկանցից և ունեցվածքից: Սակայն Սասունի Ծովասարի, Շատախի և Տալվորիկի շրջանները գրեթե զինվոր չտվեցին: Ձորակոչվեց միայն Խիանքի, Խուլքի և Բսանքի հայ երիտասարդության մի մասը, որոնց մեծ մասը, սակայն, հետագայում փախուստի դիմեց և վերադարձավ իր լեռները: Փաստորեն 1915-ի հունվարից սկսած Սասունի շրջանները ինքնապաշտպանության դրության մեջ էին՝ շրջապատված քրդական ցեղախմբերի և թուրքական զորամասերի կողմից:

Ինչպես նշում է սփյուռքահայ հեղինակ Նազարեթ Պերպերյանը, մինչ թուրքերը տենդագին լցված էին Տարոնի հայությանը ամեն կերպ թուլացնելուն ու բարոյալքելուն, հայ ազգային և հեղափոխական ղեկավարությունը շարունակում էր տուրք տալ օրինավոր և հավատարիմ քաղաքացու զգուշավոր կեցվածքին: Տարոնի հայության ազգային ղեկավարությունն ստանձնած Մուշի առաջնորդարանը՝ ղեկավարվելով Պուլսից ստացված ցուցումներով, խոհեմության և կառավարության պահանջներին ենթարկվելու շրջաբերականներ էր ուղարկում շրջանները՝ հայությանը կոտորածներից փրկելու մտահոգությամբ: Այդ շրջաբերականներին հաճախ հետևում էին ՀՀԴ Դուրան-Բարձրավանդակի Կենտրոնական կոմիտեի նույնիմաստ շրջաբերականները: Պա ցույց էր տալիս, որ հայ ղեկավար շրջանները մոտալուտ կոտորածների վտանգն ըմբռնում էին անցյալի չափանիշներով, այսինքն՝ համոզված էին, որ տեղի է ունենալու միայն հեղափոխականների հալածանք և սպանություն («Հերոսապատում Մեծ եղեռնի», Բեյրուք, 1978, էջ 205):

Այնուամենայնիվ, 1915-ի հունվարի սկզբին ՀՀԴ Դուրան-Բարձրավանդակի Կենտրոնական կոմիտեի նախածեռնությամբ Մուշում

հրավիրվեց խորհրդակցական ժողով՝ նվիրված ինքնապաշտպանության կազմակերպմանը: Նկատի ունենալով Տարոնի հայության պաշարված վիճակը, ժողովը որոշեց ամբողջ Տարոնը բաժանել ինքնապաշտպանական ութ շրջանների: Ժողովի որոշմամբ Ռուբենը և Իսա Կոչյունը սկսեցին շրջել Մշո դաշտի գյուղերում՝ ինքնապաշտպանությունը կազմակերպելու համար:

Առաջին բախումը տեղի ունեցավ 1915-ի հունվարի 25-ին, Մշո դաշտի Ցրոնք գյուղում: Կառավարությունն այստեղ ուղարկեց 500 զինվորներից բաղկացած մի ջոկատ՝ հարյուրապետ Իսմայիլի գլխավորությամբ, փախստական զինվորներ փնտրելու պատրվակով: Կարճատև մարտից հետո ցրոնքցիների ինքնապաշտպանական խմբերը քաշվեցին լեռները: Թուրք զինվորները հրի մատնեցին գյուղի 150 տները:

Փետրվարի 6-ին բախում տեղի ունեցավ Գոմս գյուղում, որի ինքնապաշտպանության պատասխանատուն էր Կորյունը: Այդ օրը հարկ հավաքելու պատրվակով գյուղ եկավ իթթիհատական Շեյխ Մեհմեդ Էմինը՝ 15 ոստիկաններով և իջևանեց Կորյունի տանը: Նա գաղտնի հրահանգ ուներ դավադրաբար սպանելու այդ պահին Գոմսում գտնվող Ռուբենին և Կորյունին: Սակայն Կորյունին հավատարիմ մի քուրդ նրան տեղեկացրեց դավադրության մասին: Վերջինս հրդեհեց սեփական տունը, իսկ հայ մարտիկները ոչնչացրին փախչող ոստիկաններին: Գոմսի այդ միջադեպն ապստամբության ազդանշան դարձավ: Ռուբենն ու Կորյունը Գոմսի ֆիդայական ուժերով շարժվեցին դեպի Սասուն: Հաջորդ օրը գազազած Սերվեթ բեյն իր մոտ կանչեց Մուշի հայոց հոգևոր առաջնորդ Ներսես եպիսկոպոս Խարախանյանին, Օսմանյան խորհրդարանի անդամ Վահան Փափազյանին (Կոմս) և պահանջեց Կորյունի ու Ռուբենի անձնատվությունը, որը, սակայն, մերժվեց: Ստեղծված հանձնախումբը պարզեց, որ իրոք Շեյխ Էմինը դավադրություն է նյութել: Մերժվեց նաև Սերվեթի հաշտության առաջարկը Ռուբենին և Կորյունին:

Շենիկ գյուղում փետրվարի 10-ին Ռուբենը հրավիրեց Սասունի խմբապետների ժողով, որին մասնակցում էին Կորյունը, Միջոն, Փեթարա Մանուկը, Սեմալցի Իշխանը (Մանուկ), Գեղիեզուզանցի Կիրակոսը, Շենիկցի Ղազարը և Չալոն, Ահարոնքցի Գալուստը, Սասունցի Մուշեղը: Ռուբենի զեկուցումից հետո ծրագրվեց Սասունի ինքնապաշտպանությունը, ճշտվեցին շրջաններն ու նրանց պատասխանատուները: Սասունի ընդհանուր ճակատը բաժանվեց պաշտպանության յոթ գլխավոր հատվածների:

1. Տալվորիկի, Խուլբի և Խիհանքի շրջանը հանձնվեց խմբապետ Մուշեղին, որի օգնականներն էին հին ֆիդայիներ Թաթարը, Համզեն, Բազեն և Ռզոն:

2. Փսանքի ճակատը հանձնվեց Ստեփան վարդապետին և Դավիթ երիցյանին:

3. Գեղիեզուզանի շրջանը պիտի ղեկավարեին Կորյունը և Միջոն:

4. Շենիկի և Սեմալի ուղղությունը տրվեց Իշխան Մանուկին, Քյաթիպ Մանուկին, Չոլոյին և Ադամին:

5. Աղբի շրջանը հանձնվեց Աղբնա Մարտին:

6. Կեփիի լեռնամասը տրվեց Չորա Արթինին ու նրա եղբայր Մկրեին:

7. Ալիանքի լեռնամասը վստահվեց Շենիկցի Պողոսին, Սեմալցի Տերտերին, Գրգեի Վարդանին ու Ղազարին:

Մինչ Սասունն արդեն դիմել էր ինքնապաշտպանության, Մուշ քաղաքը և Մշո դաշտը սպասողական դրության մեջ էին: Նախկին ֆիդայիների մեջ ուժեղ էր Սասունին ապավինելու տրամադրությունը: Դրա արտահայտությունը եղավ հռչակավոր ֆիդայի, ՀՀԴ Դուրպն-Բարձրավանդակի Կենտրոնական Կոմիտեի գլխավոր ղեմերից մեկի՝ Մկրտիչ Բուլեյանի (Մճո) առանց ընդհանուր որոշման իր 30 կովոդ ուժերով Առաքելոց վանք բարձրանալը, որից հետո խումբը մեկնեց Սասուն: Ապրիլի 23-ին վախճանվեց Խարախանյան Սրբազանը, իսկ ապրիլի 28-ին ծանր հիվանդացավ Կոմսը, որն անզգա վիճակում մնաց մինչև մայիսի 23-ը: Այդպիսով Մուշի երկու գլխավոր ղեկավարները հեռացան հրապարակից:

Սպասողական վիճակին վերջ տվեցին իրենք՝ թուրքերը, որոնք 1915 թ. մայիսի 1-ին հարձակվեցին Մշո դաշտի հյուսիսում գտնվող Խնուսի շրջանի վրա: Մինչև մայիսի 10-ը Խնուսի հայկական գյուղերը ամբողջովին կոտորվեցին ու թալանվեցին համիդիե զորքերի և քուրդ խուժանի կողմից: Խնուս գավառի շուրջ 25 հազար հայությունից փրկվեցին մի քանի հազար մարդ՝ հասնելով ռուսական զորքերի գոտի: Նրանցից հարյուրավոր երիտասարդներ համալրեցին հայ կամավորական գնդերը:

ՄՈՒՇ ԶԱՂԱՔԻ ՀՆԳՕՐՅԱ ԴԻՄԱԴՐՈՒԹՅՈՒՆԸ

Մուշում Խարախանյան Սրբազանին հաջորդեց Վարդան վարդապետը, իսկ Կոմսի հիվանդության պատճառով կուսակցական ղեկավար

րությունը ծանրացավ հին ու փորձառու ֆիդայի Հաջի Հակոբ Կոտոյանի ուսերին:

Ցավոք, մինչև 1915 թ. հուլիսի 10-ը Մուշի հայությունը մնաց սպասողական անորոշ դրության մեջ և զենք բարձրացրեց միայ այն ժամանակ, երբ քաղաքը կտրվել էր դաշտի գյուղերից և թշնամին արդեն լցվել էր քաղաք: Հետևանքը եղավ այն, որ Մուշի դիմադրությունը բոլորը չէ, որ մասնակցեցին, որովհետև մի զգալի մասը հեռացել էին Սասուն: Բացի այդ, դիմադրությունը անհրաժեշտ կազմակերպվածությունը չունեցավ և հերոսական, բայց կարճատև եղավ:

Առանց դիմադրության հանդիպելու թուրք-քրդական ուժերին հաջողվեց գրավել Մուշի շրջակա բարձունքները և այնտեղ թնդանոթներ տեղադրել:

Հուլիսի 10-ին Մուշի կառավարիչ Սերվեթ Բեյն իր մոտ հրավիրեց Վարդան վարդապետին և 28 երևելիների, որոնք հակված էին կառավարությանը ենթարկվելուն: Սակայն Մուշի հին ու փորձառու մարտիկներ Հաջի Հակոբը, Մուխսի Ֆարհադի Արոն, Լ. Ասլանյանը և Տիգրան Մկրտչյանը որոշում են երկու խմբի բաժանված Սասուն բարձրանալ: Մուխսի Ֆարհադի Արոյի խմբին հաջողվեց ճեղքել թուրքական շղթան և Սասուն բարձրանալ, իսկ մյուս խումբը վերադարձավ քաղաք: Չորի թաղի խումբը Հակոբ Կոտոյանի գլխավորությամբ մնաց քաղաքում և Սասուն անցնելու փորձ չկատարեց:

Հուլիսի 10-ի առավոտյան Վարդան վարդապետը 12 հոգով ներկայացավ Սերվեթին, որը նրանց համոզեց տեղահանվել: Պատվիրակությունը վերադարձավ և պահանջեց, որ քաղաքը հետևի հրահանգին: Դրան ընդդիմացան ՀՀԴ Մուշի վարիչները:

Միաժամանակ թուրքական ոստիկանական մի ջոկատ մտավ Առաջնորդարան և ձերբակալեց Վարդան վարդապետին ու շուրջ 70 հոգու: Մուշի դիմադրական ուժերը գտնվում էին երեք թաղամասերում՝ իրարից բավական հեռու:

Ս. Մարինե թաղում էր գտնվում Դուրան-Բարձրավանդակի Կենտկոմի անդամ Տիգրան Մկրտչյանը՝ իր 15 մարտիկներով: Նրա հետ էին Ազգային քաղաքական ժողովի անդամներ Հ. Տեր-Չաքարյանը, Եղիշե քահանա Պարսամյանը և Մամիկոն Պետրոսյանը, որոնք հակառակվել էին Վարդան վարդապետին:

Չորի թաղում էր Կենտկոմի անդամ Լևոն Ասլանյանը՝ 6-7 մարտիկներով:

Տեղի ունեցավ նշված երեք մարտիկների խորհրդակցություն, որտեղ որոշվեցին դիմադրության կետերը և նրանց ղեկավարները: Հերոսամարտի ընդհանուր ղեկավար նշանակվեց Հաջի Հակոբ Կոտոյանը, օգնական՝ Տիգրան Մկրտչյանը:

Հուլիսի 11-ի երկուշաբթի առավոտյան ոստիկանների ուղեկցությամբ Վերին թաղ մտավ ժանդարմական մի ջոկատ և շարժվեց դեպի Լևոն Ասլանյանի տունը: Դուռը թակելով և պատասխան չստանալով՝ թուրքերն սկսեցին կրակել: Լսվեցին պատասխան կրակոցներ, և մի քանի ժանդարմներ սպանվեցին: Միաժամանակ սկսեցին որոտալ թուրքական հրանոթները և կռիվն ստացավ ընդհանուր բնույթ:

Հանդիպելով դիմադրության՝ թուրքերն սկսեցին հրդեհել հայկական թաղերը: Հաջորդ օրը՝ հուլիսի 12-ին, կռիվը վերածվեց մի անխնա գոտեմարտի: Ամբողջ գիշերը թուրքական թնդանոթները ռմբակոծեցին Վերին թաղի դիրքերը: Սակայն թաղի պաշտպանները վերականգնում էին քանդված դիրքերը, ամրացնում նորերը: Կանայք հաց ու ջուր էին հասցնում կռվողներին: Սակայն ռումբերի տարափը գնալով ուժգնանում էր՝ դիմադրությունը դարձնելով անհնար: Թաղի պաշտպանների մեծ մասը տեղափոխվեց Չորի թաղ: Լևոն Ասլանյանը և Հակոբ Կոտոյանը որոշեցին վերջին ճակատամարտը տալ Չորի թաղում: Հուլիսի 13-ի առավոտյան Չորի թաղ անցան Վերին թաղի բոլոր պաշտպանները:

Հաջի Հակոբի կարգադրությամբ նշանառու Չախչախենց Յոսիկը շարքից հանեց երկու թուրք թնդանոթածիզներին, բայց ինքն էլ զոհվեց: Կազմակերպվեց Յոսիկի և Ջըրյի թաղումը, որի արարողությունը կատարեց Եղիշե քի. Պարսամյանը:

Չնայած ստացած երեք թեթև վերքերին՝ Հաջի Հակոբը շրջում էր դիրքերը, ոգևորում մարտիկներին:

Գիշերը տեղի ունեցավ վերջին խորհրդակցությունը: Դիմադրության ղեկավարները հայտնեցին, որ կռիվն անհույս է: Հաջի Հակոբը պահանջեց, որ կռվող խմբերը, պաշտպանության տակ առնելով անզեն ժողովրդին, ճեղքեն պաշարման օղակը և անցնեն մոտակա լեռները, իսկ ինքը որոշեց մնալ և կռվել մինչև վերջին շունչը: Կեսգիշերին մարտիկները և ժողովուրդը խումբ առ խումբ սկսեցին կռվելով հեռանալ, սակայն քաղաքից հաջողվեց դուրս գալ ընդամենը 700 հոգու: Մնացածները Հաջի Հակոբի գլխավորությամբ հուլիսի 13-14-ին մղեցին Մուշի մահվան ճակատամարտը: Այդ վերջին կռիվների ժամանակ Հաջի Հակոբի հետ միասին հիշվում են նաև Մամիկոն Պետրոսյանի և Միսակ

Կոնցրյանի անունները: Պատմությունը չի արձանագրել, թե որքան էր Հաջի Հակոբի շուրջ խմբված ժողովրդի թիվը, որովհետև այդ կռիվների վկա չմնաց: Հայտնի է միայն, որ Հաջի Հակոբն այդ երկու օրը մնաց իր դիրքերում և քաջությամբ դիմավորեց մահը:

Հուլիսի 13-ի կեսգիշերին քաղաքից դուրս եկած ուժերից Շահկա Արոն շուրջ 100 հոգով, որոնցից կեսն անզեն, հանդուգն հարձակմամբ ճեղքեց թուրքական զորաշղթան և հասավ Հավատորիկ: Մեկ ուրիշ խումբ խիզախ Չաքարիայի գլխավորությամբ կռվով հասավ Մշո այգիներին, որտեղ 4-ժամյա մարտի բռնվեց թուրքերի հետ ու բոլորը նահատակվեցին:

Տեր Եղիշեի հետ մոտ 200 հոգի, մեծ մասամբ անզեն պատանիներ ու երեխաներ, հասան Մոկուների այգիներին: Այս ու այն կողմից այստեղ հասան նաև Սարո Խապանդարյանի, Հրանտ Հալլաթյանի, Տիգրան Մկրտչյանի զինյալները: Դաշտի գյուղերում ապաստանելու հույսերը մարեցին, որովհետև պարզվեց, որ դրանք կոտորված ու հրի են մատնված դեռևս 5-6 օր առաջ: Ամենուրեք դիակներ էին փռված: Մոկուների այգիներում ապաստանածները մտադրվեցին անցնել Քանի լեռները, բայց լույսը բացվեց, և անցումն անկարելի դարձավ: Տիգրան Մկրտչյանը ստիպված էր կրակ բացել առաջացող թշնամու վրա, և կռիվն սկսվեց: Առաքելոց վանքի կողմից թուրքական զորքերը և չեթները կրակ էին թափում պաշտպանվող հայերի վրա, բայց վերջիններս ամուր կառչած մնացին իրենց դիրքերում և քիչ զոհեր տվեցին: Մութն ընկնելուն պես, անցնելով Բերդակ գյուղի միջով, ողջ մնացածները բարձրացան Քանի լեռները: Դա Մուշ քաղաքի հերոսամարտի ավարտն էր:

ՄՇՈ ԴԱՇՏԻ ԴԻՄԱԴՐԱԿԱՆ ԿՈՒՎՆԵՐԸ

Ի տարբերություն Մուշ քաղաքի, որի հերոսամարտը կարճատև եղավ, Մշո դաշտի դիմադրական կռիվները շարունակվեցին մի քանի ամիս: Դաշտի գյուղերը, 1915-ի մայիսից սկսած, շրջապատված էին քրդական զինված հորդանների և թուրք ժանդարմների կողմից: Հունիսի վերջից սկսած ընդհատվեց կապը հայկական գյուղերի միջև: Մինչ Մուշ քաղաքում և Սասունում մտածում էին, որ հարվածի ժանրության կենտրոնն իրենք պիտի դառնան, և դաշտի կռվողների մի մասը Սասուն էր բարձրանում, կառավարությունը պատրաստվում էր առաջին հարվածը հասցնել

Մշո դաշտի գյուղերին: Սակայն դաշտը լավ զինված չէր: Ձրկվելով Սասուն բարձրացած իր ղեկավար մարտիկներից և լավ զենքերից, Մշո դաշտը միայն թույլ դիմադրություն կարող էր ցույց տալ: Դրա հետ միասին դաշտի ժողովուրդն էլ ուներ այն մտայնությունը, թե անզեն ժողովուրդը, կանայք ու երեխաները չպիտի կոտորվեն, այլ թուրքը պիտի հարվածեր միայն աչքի ընկնող ֆիդայիներին ու զինված տղամարդկանց:

Նման պայմաններում դաշտի գյուղերը մեծամասնությամբ չկարողացան դիմադրել և մի քանի օրվա մեջ կոտորվեցին: Այդուհանդերձ, գտնվեցին գյուղեր, որոնք հերոսաբար ծառացան թշնամու դեմ: Դրանցից են Կառնենը, Ս. Կարապետ վանքի շրջանը, Ավոանը, Ալիջանը, Վարդենիսի շրջանը:

Կառնեն գյուղը գտնվում էր Մուշ քաղաքից երկու կիլոմետր արևմուտք: Գյուղի ինքնապաշտպանությունն սկսվեց Մուշ քաղաքի հերոսամարտին զուգահեռ: Այն գլխավորում էր փորձված ֆիդայի Կառնենցի Մկրտիչը: Կառնենցիների դիմադրությունը տևեց մեկ ամբողջ օր՝ մինչև հուլիսի 12-ի ուշ գիշերը, և զինամթերքի սպառմամբ բոլորը հերոսաբար նահատակվեցին իրենց դարավոր գյուղի խորտակված պատերի տակ:

Ալիջան գյուղը գտնվում էր Մուշ քաղաքից հյուսիս-արևելք: Դեռևս մարտին Ալիջանցի Տիգրանը մի քանի ընկերներով բախվել էր թուրք ոստիկանների հետ, բարձրացել Սասուն ու միացել Ռուբենին ու Կորյունին:

Ալիջանի ինքնապաշտպանության գործը կազմակերպելու համար հուլիսի սկզբին այստեղ եկավ Հայկ Միրջանյանը: Նրա տանը տեղի ունեցավ խորհրդակցություն և որոշվեց զենքի դիմել: Ալիջանցիները զինաթափեցին գյուղ մտած ժանդարմներին: Դիմադրությունը ղեկավարում էին Հայկ, Մխիթար և Միսակ Միրջանյանները: Կռվին մասնակցում էին նաև կանայք: Սասուն բարձրացած Տիգրանին փոխարինում էր տղամարդու հագուստ հագած նրա քույրը: Ալիջանի հերոսամարտը տևեց չորս օր: Թշնամին ահագին կորուստ ունեցավ: Չորս օր անց ալիջանցիներն ստիպված էին բարձրանալ Քանի լեռները:

Ավրան գյուղը դիմադրեց մեկ օր՝ Հայկ Տեր-Վարդանյանի և Մակար Խարախանյանի գլխավորությամբ, իսկ շրջակա անտառներին ու լեռներին ապավինած ավրանցիները կռվեցին ևս 12 օր ու բոլորն էլ նահատակվեցին:

Վարդենիս գյուղը բավականին հեռու էր Մուշից: Այն գտնվում էր Սշո դաշտի արևելյան ծայրագավառը կազմող Չխուրի շրջանում: Շրջանի ապավենը Շամբ կոչվող ծանծաղ լիճն էր՝ շրջապատված եղեգնուտով: Լճի ափերին ընկած էին մի քանի գյուղեր: Վտանգի պահին վարդենիսցիները ծրագրել էին պատսպարվել ու կռվել հենց այդ եղեգնուտներում: Կոտորածից առաջ Շամբի եղեգնուտներ էին փոխադրվել մթերապաշար և անհրաժեշտ իրեր, ինչպես նաև Վարդենիս, Արտոնք, Դարս և այլ գյուղերի անզեն բնակչությունը:

Վարդենիսի և շրջակա գյուղերի ինքնապաշտպանությունը տևեց 15 օր, որից հետո եղեգնուտներին ապավինած ժողովրդի համար արշալույս բացվեց. թշնամին սկսեց լեղապատառ փախչել՝ առնելով ռուսական զորքերի մոտենալու լուրը: Այդպիսով՝ Վարդենիսի շրջանից մոտ վեց հազար հոգի փրկվեցին և հայկական կամավորական զնդերի պաշտպանությամբ ու ռուսական զորքերի հետ նահանջեցին ու հասան Արարատյան դաշտ:

Սուրբ Կարապետի շրջանի մեջ, որը տարածվում էր Ալվրանից արևմուտք, մտնում էին Ձիարեթ, Մեշտի, Բաղլու, Սորտար, Դոկլան, Կվարս, Բաղլու և այլ գյուղեր, որոնց թիկունքում բարձրանում էր Սերկի լեռը: Գյուղերին մոտիկ էին նաև Ս. Կարապետի անտառը և ձորը:

Մարտ ամսից սկսած կառավարությունը թուրքական զորքեր էր կենտրոնացրել Ս. Կարապետ վանքում և նրա շուրջը: Երբ հուլիսի 7-ին ջարդի ազդանշան տրվեց, անմիջապես իրագործվեց Բաղլուի, Մեշտիի, Ձիարեթի և Սորտարի պաշարումն ու կոտորածը: Նույնքան արագ էլ կատարվեց նշված գյուղերի ժողովրդի մեծ մասի և զինված խմբերի նահանջը դեպի Ս. Կարապետի լեռն ու անտառը, որտեղ պիտի մղվեին ինքնապաշտպանական կռիվները: Ինքնապաշտպանությունը ղեկավարում էին առասպելական քաջի համբավ վայելող Սորտարցի Արամը, Բաղլուի Գովոն, Գոմսա Մոսոն և Մելիքը, ուսուցիչ Մկրտիչ Տեր-Մկրտչյանը և մի քանի խմբապետներ: Այստեղ էր կուտակվել 15-20 հազար հալածական ու անոթի ժողովուրդ: Դիմադրական ուժերն ունեին ընդամենը հարյուր մարտական հրացան, մի այդքան էլ ատրճանակ ու որսի հրացան՝ աղքատիկ զինամթերքով: Սակայն Ս. Կարապետի շրջանի ինքնապաշտպանությունը եղավ այնքան ուժեղ, որ թշնամուն թվում էր, թե ֆիդայիական զորավոր ուժեր կան այնտեղ: Կռիվները երկար տևեցին, սակայն սովն ու զինամթերքի պակասը պատճառ դարձան, որ շատերը փորձեցին ճեղքել թշնամու օղակը և բարձրանալ Սասուն, կամ

միանալ ռուսական զորքերին: Ոմանց դա հաջողվում էր, իսկ մի մասն էլ նահատակվում էին: Կռիվը շարունակողները Սորտարցի Արամի գլխավորությամբ անընդհատ տեղից տեղ էին փոխադրվում: Հայրորդի այդ հերոսը կռիվը շարունակեց մինչև 1916 թ. հունվար, երբ մի քանի ընկերներով փորձեց անցնել Սուլուխի կամուրջը և հասնել ռուսական զորքերին, բայց նահատակվեց ճիշտ այնտեղ, որտեղ ընկել էր Գևորգ Զաուշը: Սակայն Արամի պաշտպանած ժողովրդի բեկորներին հաջողվեց ազատվել և անցնել Արևելյան Հայաստան:

Տարոնի ինքնապաշտպանության հերոսական դրվագներից են Նեմրութի եռամսյա կռիվները: Երբ 1915 թ. ապրիլին սկսվեց Վանի ինքնապաշտպանությունը, Վանի շրջանի մի շարք գյուղերի բնակիչներ չկարողացան ապաստանել Վանում և ստիպված գաղթեցին Ախլաթ: Արամ Մանուկյանը նամակ ուղարկեց այդ շրջանի ղեկավարներից հին ֆիդայի Փալապեխ Կարապետին՝ հրահանգելով հավաքել զինյալ ուժերը և լեռ բարձրանալ: Վերջինս հին ֆիդայի Շամիրամցի Սողոյի հետ միասին իրենց շուրջը համախմբեցին շուրջ 300 երիտասարդների և Նեմրութի անտառում ժողով գումարեցին՝ շրջանի դիմադրական կռիվները կազմակերպելու համար: Սակայն, դժբախտաբար, վճռական որոշում չկայացվեց և ապստամբությունն ուշացավ: Դա հնարավորություն տվեց կառավարությանը նեմգործն ձերբակալել երկու հին ֆիդայիներից: Սակայն վերջիններիս վաղօրոք տրված հրահանգի համաձայն ապրիլի վերջերին Նեմրութ լեռը բարձրացան շուրջ երեք հարյուր կռիվներ՝ մեծ մասամբ անզեն: Դիմադրությունը ղեկավարում էին Սողոյի եղբայրը՝ Շամիրամցի Արամը, համագյուղացի Մուշեղը, Կծակ գյուղից հին ֆիդայի Այվազ Գևորգյանը, Տափավանք գյուղից Հարություն Տերոյանը:

Նեմրութի հերոսամարտն սկսվեց ապրիլի 15-20-ին և շարունակվեց մինչև հուլիսի 15-ը՝ երեք ամիս, որից հետո ռուսական բանակը առաջացավ դեպի Դատվան ու Ախլաթ, և Նեմրութի հերոսները միացան նրան ու համալրեցին հայ կամավորական զնդերը:

ՍԱՍՈՒՆԻ ՀԵՐՈՍԱՄԱՐՏԸ

Հայ ազատագրական շարժման միջնաբերդը՝ Սասունը, ըմբոստացման ուղին էր բռնել դեռևս 1914 թ. վերջերին: Մինչև 1915 թ. մարտը Սասունը տեղադրվելու նախապատրաստվում էր ինքնապաշտպանու-

թյան: Ռուբենն ու Կորյունը Սասուն էին անցել 1915-ի փետրվարին և հրավիրել Շենիկի խորհրդակցությունը: Մի քանի շաբաթ անց նրանց միացավ Աճոն:

Թշնամին Սասուն ներխուժելու երկու ճանապարհ ուներ: Առաջինը Խուլբի ճանապարհն էր դեպի Տավրոսիկ և Անտոք, երկրորդը՝ Հավետունի շրջանից դեպի Բաաք: Երկրորդ գծի վրա կային բազմաթիվ, պատգանցի, մասնագանցի քրդական աշիրեթներ: Առավել կարևորը Խուլբի ճանապարհն էր, որին էլ կառավարությունն ուղղեց առաջին հարվածը:

Խուլբի կռիվները: 1915 թ. ապրիլի սկզբներին թուրքական կառավարական զորքերը, չեթեներն ու քրդերը հարձակվեցին Աիրոնք գյուղի վրա, որով և կռիվներն սկսվեցին: Շրջանի մարտական ուժերը բաժանվեցին մի քանի խմբերի: Աիրոնքի երիտասարդների մի խումբ ամրացավ գյուղի անտառներում, ժայռերի վրա և կռիվ սկսեց հարավից հարձակվող քրդերի դեմ: Խումբը ղեկավարում էին Մանոն, Հովհաննես Տեր-Մամբրեյանը՝ Հրայրի հորեղբորորդին, Կիրոն և Խաչոն: Մեկ այլ խումբ գործում էր Ընծքարի անտառներում ու կիրճերում: Երրորդ խումբը կազմված էր Գեղերվանքի ու Քարթրդի մարտիկներից, որոնք պաշտպանում էին Անտոքի հարավային փեշերը՝ Իշխանածորից մինչև Աիրոնք: Իսկ հայկական գյուղերի ժողովուրդն ապաստանել էր հեռավոր գոմերում ու քարանձավներում:

Շուտով հարձակվողներին միացան նաև Խիանքի քրդերը՝ Սասունի հարավից, որոնք շարժվեցին դեպի Սպիտակ լեռ ու Տավրոսիկ: Այս երկու շրջաններում կռիվները տևեցին ապրիլից մինչև հունիսի վերջերը, երբ Խուլբի և Խիանքի հայությունը երիտասարդ կռիվողների հետ միասին քաշվեց Անտոք՝ Սասուն վճռական քսանօրյա ճակատամարտին մասնակցելու համար:

Կուրտիկի կռիվները: Սասունի կռիվները փաստորեն սկսվեցին 1915-ի մարտի վերջերին: Ռուսական զորքերի և հայ կամավորների դեպի Վան, Մանազկերտ և Բուլանըխ առաջանալու կապակցությամբ Սերվեթ բեյը ստիպված էր հրաժարվել կանոնավոր զորքերով Սասունի վրա հարձակվելու մտադրությունից և այդ գործը հանձնարարեց քրդական հրոսակախմբերին: Սակայն կանոնավոր զորքի մեկական վաշտ զետեղվեցին Ս. Կարապետի, Ս. Հովհաննեսի և Առաքելից վանքերում: Բացի այդ, կառավարությունը երկու վաշտ ուղարկեց՝ Կուրտիկի ամբողջ լեռնաշղթան գրավելու համար: Ռուբենը և Կորյունը չէին կարող դա հանդուրժել, ուստի սկսվեց դիրքային կռիվը, որը տևեց շուրջ երեք ա-

միս: Թուրքերի հենարանը Ս. Հովհաննեսի վանքն էր: Առաջին օրերի գրոհների ձախողումից հետո թուրքերն ստիպված էին հրաժարվել Կուրտիկի բարձունքներին տիրելուց և ամրացան լեռնաշղթայի հյուսիսային լանջերի վրա: Նրանց միակ նպատակն էր սպառել հայերի զինամթերքը, որովհետև Սասուն մտնելու հրահանգ դեռևս չուներին:

Կուրտիկի կռիվների ընդհանուր ղեկավարն էր Փեթարա Մանուկը, որը հին ֆիդայի էր, Գևորգ Չաուչի մարտական զինակիցը 1904-1907-ին: Նրա հետ էին Փեթարի հին ֆիդայիներ Ախոն, Իսրոն, Կիրակոսը, Թադոն, Գոմերը:

Տավրոսիկի ճակատը: Սասունի հարավից ու հարավարևմտյան կողմից սկսված կռիվները ապրիլի երկրորդ շաբաթվա ընթացքում ծավալվեցին մինչև Սպիտակ լեռ: Գրավելով Սպիտակ լեռը՝ քրդերը պատրաստվում էին շարժվել դեպի Տավրոսիկ, սակայն Գեթինի և Տավրոսիկի հայ մարտիկները փակեցին Սպիտակ լեռան լեռնանցքը: Այդ ճակատի հրամանատարն էր խմբապետ Մուշեղը: Նրա ռազմավարությունն էր՝ փակել բոլոր կիրճերը և թույլ չտալ, որ թշնամին հարավից մտնի Տավրոսիկ: Ճակատի կռիվներին մասնակցում էին նաև Ընկուզնակ, Իշխանածոր և Աղբի գյուղերի մարտիկները:

Այսպիսով՝ ապրիլից սկսած, Սասունը չորս կողմից պաշարված էր, և այդ վիճակը տևեց մինչև հուլիս: Տևական կռիվ էր մղվում Կուրտիկից մինչև Սպիտակ լեռ, Իշխանածոր, Ընկուզնակ և Աղբի տարածվող մի երկար ճակատի վրա, որը 150 կմ շրջագիծ ուներ:

Շուտով վերը նշվածին ավելացավ Բաանաց գավառի ճակատը: Բաանքի հայության մի մասը Դավիթ երիցյանի գլխավորությամբ քաշվեց Տավրոսիկ, իսկ մյուս մասը Ստեփան Վարդապետի, Աղջոյի և Իշխան Շառոյի գլխավորությամբ ապաստանեց Գոմուց վանքում և այնտեղից նոր ճակատ բացեց Սասունի հարավարևելյան լեռնամասերի վրա:

Մինչև հունիս բոլոր ճակատների վրա սասունցիները հերոսաբար դիմադրում էին բոլոր հարձակումներին: Բայց ռուսական բանակի առաջխաղացումն ուշանում էր և հետզհետե ավելի սուր էր զգացվում ռազմամթերքի և պարենի պակասը: Քրդերի ձեռքն անցան Խիանքը, Խուլբի մեծ մասը և Բաանքը: Հունիսի կեսերին պաշարման օղակն ավելի նեղացավ: Դիմադրական կռիվները հետզհետե փոխադրվեցին Անտոք, որը կենտրոնական դիրք էր գրավում: Հարավային շրջանների ժողովուրդն ու կռիվողները տեղավորված էին Տավրոսիկի, Անտոքի և Գեթինի լեռներում ու անտառներում:

Տալվորիկից մինչև Կուրտիկ և Ծովասարի ստորոտից մինչև Անտոքի հարավային փեշերը 30 կմ երկարություն և 40 կմ լայնություն ունեցող մի շրջան էր մնացել սասունցիների ձեռքում: 1200 քառ. կմ տարածությամբ այդ շրջանում հավաքվել էին ոչ միայն Սասունի ժողովուրդն ու մարտիկները, այլև Մշո դաշտից ու այլ վայրերից այստեղ հասած գաղթականները: Այդ բազմությանը կերակրելու հարցը մղծավանջային էր դարձել: Միակ լուծումը մոտակա քրդական գյուղերի վրա հարձակվելն էր, որը կունենար նաև ռազմագիտական նշանակություն: Այդ նպատակով կազմվեցին հարվածող խմբեր՝ հին ֆիդայիներ Չուլոյի և Շենիկցի Ղազարի գլխավորությամբ: Այդ խմբերը հունիսի վերջին երկու շաբաթների ընթացքում շեշտակի հարձակումներ կատարեցին քրդերի վրա և ձեռք բերեցին զգալի քանակությամբ մթերապաշար: Միաժամանակ այդ հարձակումների շնորհիվ քրդերը խուճապի մատնվեցին և Անտոքի ճակատից հետ քաշվեցին 25 կմ:

Հունիսի վերջերին, տեսնելով, որ թուրքերի հարձակումը Սասունի վրա ուշանում է, Ռուբենը խորհրդակցություն գումարեց, և որոշվեց օգնության հասնել Մուշ քաղաքին: Սասունցի կռվողները շարժվեցին դեպի Կուրտիկ ու Ծիրինկատար, բայց այդտեղ հանդիպեցին փախստական մշեցիների և տեղեկացան, որ քաղաքի հերոսամարտն ավարտված է և հայկական թաղերը մոխրակույտների են վերածված:

Վահան Փափազյանը (Կոմս), որը հունիսի սկզբին Մատթոսի հետ Սասուն էր բարձրացել և գտնվում էր Սեմալում, կռվողների խմբով անմիջապես մեկնեց Հավատորիկ, որտեղ ապաստանել էին Մուշից փրկված կռվողները և նրանց հետ միասին դիրք բռնեցին թուրքական վաշտերի դեմ: Դիրքեր ստեղծվեցին նաև Մառնիկում ու Բերդակում:

Մուշի հերոսամարտից ու հրկիզումից անմիջապես հետո թուրքական ուժերը սկսեցին բարձրանալ դեպի Ծիրինկատար, Կուրտիկ և Առաքելոց վանքի վերին ծորերը: Կուրտիկի վրայով թնդանոթներով զինված թուրքական զորամասերն ուղղվեցին դեպի Շենիկ և Սեմալ, որոնք հերոսական Սասունի առաջին դարպասներն էին: Թուրքերի գլխավոր նպատակն էր ոչնչացնել Մուշից և Մշո դաշտից ազատված հայ մարտիկներին, որոնք Կոմսի և Մատթոսի գլխավորությամբ դիրքեր էին գրավել Հավատորիկի և Մառնիկի բարձունքների վրա: Այդ դիրքերի վրա հայ մարտիկները կռվում էին երեք ամսից ավելի, ուստի ուժասպառ էին եղել: Փոքրաքանակ սասունցիները երկու օր ուժեղ դիմադրու-

թյուն ցույց տվեցին, բայց ի վերջո թշնամու գերազանց ուժերի ճնշման տակ տեղի տվեցին և անցան Շենիկ ու Սեմալ:

Հուլիսի 19-ին թուրքական հարձակումը կանոնավոր ճակատամարտի բնույթ ստացավ: Մի քանի դիրքերից թնդանոթները որոտում էին դեպի Շատախի հայկական գյուղերը (Սասունի Շատախ — Մ. Կ.), դեպի Գելիեզուզան և Անտոք: Հարավ-արևմուտքից Խուլբի և Խիանքի ուղղությամբ հարձակվում էին քրդական ուժերը, իսկ Հագոյի շրջանից թուրքական ուժերն ու քրդական աշիրեթները բարձրանում էին Բսանաց լեռները և ուղղվում դեպի Տալվորիկ:

Նման պայմաններում Ռուբենը, Կորյունը և Մճոն վերադասավորեցին ուժերը և դիմադրությունը կենտրոնացրին վեց ճակատների վրա: Տալվորիկի և Խիանքի ճակատը ղեկավարում էր խմբապետ Մուշեղը, որի օգնականներն էին Ալիջանցի Տիգրանը և Բսանցի Ղավիթ Երիցյանը: Շենիկ-Սեմալի ճակատի ղեկավարությունը հանձնվեց Չուլոյին, Շենիկցի Ղազարին, Սեմալցի Քյաթիպ Մանուկին և Ադամին: Աղբիի ճակատը վստահվեց Աղբկա Մարտեին և Մշեցի Արոյին: Գեբին-Խուլբի ճակատը հանձնվեց Իշխանծորցի Արթինին, Հեղինցի Վահան Վարդանյանին և Սաղտունցի Հովհաննեսին: Գելիեզուզանի ճակատներն իրարից հեռու էին, ընդգրկվում էին Անդոքի բոլոր կողերը և հանձնված էին Կորյունի և Մճոյի ղեկավարությանը: Մարտական ղեկավարներն էին Մորուք Կարոն, Ղազար Պետոյանը, Սրգոյի Հովսեփը, Քյաթիպ Կիրակոսը, Մարգեն, Տեր Զաջի Ադամը, Ղազար Ֆահրատյանը և Գարոյի Պետրոսը: Կենտրոնը ղեկավարում էր Ռուբենը, որի կողքին էին Մուխսի Ֆարհատի Արոն, Պզտիկ Արամը, Ավրանի Արամը և Հրայրի Եղբայրը՝ Մանոն, իրենց պահեստային խմբերով:

Սասունի պաշարված շրջաններում հավաքված էր շուրջ 15 հազար ժողովուրդ, բոլորն էլ կորովի և կռվի ընդունակ: Սասունը վերադարձել էր 1894 և 1904 թվականներին՝ այս անգամ ավելի ընդարձակ մասշտաբներով:

Շենիկի ուղղությամբ թուրքական բանակին հաջողվեց գրավել Մերկե-Մոզանի բարձունքները: Հայ մարտիկները նահանջեցին և անրացան Սեմալի, Շենիկի և Կուրտիկի գծի վրա: Նույն օրը քրդերը հարավից բռնեցին հարձակում ձեռնարկեցին Տալվորիկի և Իշխանծորի ուղղությամբ, սակայն Սպիտակ լեռան կիրճերում Իշխանծորի լանջերին հանդիպեցին ուժեղ դիմադրության: Խմբապետ Մուշեղի, Ալիջանցի Տիգրանի, Ղավիթ Երիցյանի և Տալվորիկի իշխանների մարտիկները անսասան

մնացին և գիրկընդխառն բախվեցին թշնամուն: Սկսվեց մահ-պատերազմ, և Տալվրոիկում կարծես երկրաշարժ էր: Երեկոյան կողմ քրդերը զինադադար առաջարկեցին, որը և ընդունվեց:

Շենիկի ճակատում Ռուբենը, Կորյունը և Մճոն որոշեցին գիշերային կայծակնային հակահարձակման անցնել թուրքական թնդանոթների դեմ, որոնք բարձր դիրքերից 15–20 կմ տարածության վրա փոթորկալի կրակ էին տեղում: Ընտրված մարտիկների մի թևն ուղղվեց դեպի Մճլնու աղբյուրը, մյուս թևը՝ դեպի Ալիանքի բարձունք: Հարձակվողներն աճաղմուկ, սառը զենքով վերացրին պահակներին և հասան թնդանոթներին: Նրանք արագորեն ոչնչացրին թնդանոթածիզներին և գրավեցին երեք թնդանոթները: Այնուհետև այդ նպաստավոր դիրքերից հայ մարտիկները մրրկածուխ կրակ տեղացին մոտակա դիրքերի թուրքական զորամասերի վրա՝ պատճառելով նրանց մեծ կորուստներ, իսկ կենդանի մնացածները դիմեցին խուճապահար փախուստի: Շենիկը վերագրավված էր: Գրավված էին նաև թուրքական երեք թնդանոթները, սակայն առանց ռումբերի ու մասնագետի: Ռուբենի կարգադրությամբ սասունցիները հանեցին թնդանոթների փակադակները, այլ կարևոր մասեր ու վերադարձան իրենց կենտրոնատեղին:

Համալրելով ուժերը և բերելով նոր թնդանոթներ՝ հուլիսի 23–ին թուրքերն սկսեցին նոր, ավելի լայնածավալ հարձակում, որը տևեց մինչև օգոստոսի 2–ը: Անտոքի ամբողջ շրջանում դիրքերը ձեռքից ձեռք էին անցնում: Չնայած բացահայտ առավելությանը, թուրքերին հաջողվում էր օրական առաջանալ հազիվ մեկ կիլոմետր: Այնուամենայնիվ, պաշարման օղակը զնայով սեղմվում էր: Քաշվելով դեպի Անտոք՝ հայկական ուժերը շարունակում էին դիմադրությունը, սակայն թուրքական թնդանոթներն ավելի ու ավելի ուժեղ էին որոտում:

Օգոստոսի 2–ին տեղի ունեցավ Սասունի հերոսամարտի վերջին արարը: Թշնամուն հաջողվեց Շենիկի ճակատից ճեղքել դիմադրության կուռ շղթան՝ խլելով Կորյունի ու նրա նման հերոսների կյանքը, որոնք այլևս նահանջելու տեղ չունեին, որովհետև նահանջը կնշանակեր Սասնո ժողովրդի ստույգ կոտորածը:

Տասնօրյա հերոսական ճակատամարտից և Շենիկի անկումից հետո տեղի ունեցավ վերջին խորհրդակցությունը, որտեղ մարտական խմբերի ղեկավարները որոշեցին տարբեր ուղղություններով հարձակվել թշնամու վրա և ամբողջ ժողովրդի հետ ճեղքել պաշարման շղթան: Այդ ծրագիրը գործադրվեց օգոստոսի 3–ի գիշերը: Կովոլ խմբերին ու

ժողովրդին հաջողվեց ապաստանել անառիկ լեռների ապահով վայրերում: Ռուբենի, Վահան Փափազյանի (Կոմս), Մարտիրոսի և ուրիշ խմբապետների ղեկավարությամբ կովոլներին հաջողվեց ուղղություն վերցնել դեպի հյուսիս-արևելք և օգոստոսի վերջերին հասնել ռուսական բանակին:

Ի տարբերություն շատ այլ հեղինակների, սփյուռքահայ հեղինակ Նազարեթ Պերպերյանը գտնում է, որ թեև Սասունի հերոսամարտը օգոստոսի 3–ին ավարտվեց, բայց ընդունված ռազմավարությունը փաստորեն հաջողություն ունեցավ, որովհետև սեպտեմբերի կեսերին Սասունի ժողովրդի 90 տոկոսը տակավին ողջ էր և ապաստանել էր անառիկ լեռներում: Թուրք-քրդական ուժերի բոլոր փորձերը՝ կոտորել Սասնո ժողովրդին, միշտ ապարդյուն էին անցնում, որովհետև դիմադրությունը շարունակվում էր՝ արդեն հրոսակային կռիվների ձևով ու անընդհատ տեղափոխությամբ: Սասնա լեռները մինչև 1916–ի գարունը պահպանեցին իրենց զավակներին, մինչև որ ռուսական զորքի առաջխաղացմամբ թուրք-քրդական ուժերը նահանջեցին և հայ կամավորական զնդերը վերանվաճեցին Տարոնը՝ 1916–ի առաջին ամիսներին:

Սասունի հայությունը մեկ ամբողջ տարի՝ 1915–ի փետրվարից մինչև 1916–ի փետրվար, կարողացավ դիմադրել թուրքին, որից հետո իր վճռական մասնակցությունը բերեց Հայաստանի Առաջին հանրապետության ստեղծմանը:

ՇԱՊԻՆ–ԳԱՐԱԳԻՍԱՐԻ ԻՆՔՆԱՊԱՇՏՊԱՆՈՒԹՅՈՒՆ

Շապին–Գարահիսարն իբրև բնակավայր հայտնի է դեռևս Տիգրան 2–րդի ժամանակներից: Նրա սպարապետ և Փոքր Հայքի կառավարիչ Միհրդատը ամրացնում է Կոլոնիա բնակավայրի բնական դիրքերը և ճակատամարտ տալիս հռոմեական զորավար Պոմպեոսի դեմ: Հայկական բանակը պաշարվում, ի վերջո պարտվում և լքում է իր դիրքերը: Պոմպեոսը գրավում է այդ անառիկ բերդը, այնտեղ կառուցում մի շարք ջրամբարներ, գաղտնուղի: Հռոմեական եռապետության անկումից հետո բերդը գրավում է հռոմեական կայսր Նիկողայոս Կոլթը և իր անունով կոչում Նիկոպոլիս: 18–րդ դարում թուրքերը հույներից գրավեցին Նիկոպոլիսը և այն վերանվանեցին Շապին–Գարահիսար, որովհետև շրջանի լեռներում կային շապի (պաղլեզ, շիբ) հանքեր: Հայերը կարճ ժամանա-

կում գրադեցնում են Շապին–Գարահիսարի և շրջակայքի լավագույն դիրքերը, բացում Սամսոն–Սվազ առևտրական խճուղին: Խարբերդ, Ակն, Արաբկիր, Մալաթիա և Սվազ քաղաքները Պոլսի հետ հարաբերվում էին Շապին–Գարահիսարի ճանապարհով: Քաղաքի շրջակայքում բարգավաճում են նաև մի շարք հայկական գյուղեր՝ Բյուրք, Այծպտեր, Մշակնոց, Կթանոց, Գոմեշտուն, Միս, Աղվարիս, Էնտիրես, Աղվանիս, Սկինտիկ, Դմլուճ, Սպանան, գյուղաքաղաք Թամզարա:

Շապին–Գարահիսարում բարձր հիմքերի վրա էր կրթական գործը: Բացի թաղային և անհատական դպրոցներից կային երկու ազգային երկսեռ դպրոցներ, Արամյան և Ս. Փրկիչ վարժարանները:

Ձորակղզի ժամանակ Շապին–Գարահիսարի հայերը տվեցին 400 զինվոր, որոնց մեծ մասը, սակայն, խույս տվեց ծառայությունից և վերադարձավ տուն: Դասալիքներ որոնելու պատրվակով կառավարությունն սկսեց խուզարկություններն ու հետապնդումները: Ձերբակալվեցին քաղաքի երևելիները, որից հետո թուրքերը ձեռնամուխ եղան հայերին զինաթափելու գործին: Այդ խժոժություններն իրականացնում էր բանտից նոր ազատված ավագակապետ Քել Դասսանը: Նրա հրամանով ձերբակալվեցին ու խոշտանգվեցին շուրջ 20 հայեր:

Թեև Շապին–Գարահիսարի հայ գործիչները ժողովրդին հրահանգել էին չկրակել, բայց պատրաստ լինել, 1915–ի հունիսին հայկական թաղերից մեկում համբերությունից դուրս եկած հայերը կրակ բացեցին թուրք ոստիկանների վրա և բախումն սկսվեց: Հրացանածությունը տարածվեց ողջ քաղաքով մեկ: Քաղաքի եկեղեցու թաղ, Բերդի թաղ, Միջին թաղ և այլ հայկական թաղերի բնակիչները դիմեցին ինքնապաշտպանության, որը ղեկավարում էին Գարեգին, Անդրանիկ և Ավետիս Պարոնվարդյան եղբայրները: Թուրքերը հայերի աչքի առջև կացնահարեցին կամ գնդակահարեցին բանտարկված հայերին, և այդ ոճրագործությունը ավելի համախմբեց շապինգարահիսարցիներին:

Ինքնապաշտպանության ընդհանուր ղեկավարությունը հանձնարարվեց Ղուկաս Դովլաթյանին (Ղուկաս Աղբար), որը վայելում էր բոլոր հոսանքների համակրանքն ու վստահությունը: Իսկ մարտական գործողություններն անմիջականորեն ղեկավարում էր Անդրանիկ Օզանյանի վաղամեռիկ կնոջ՝ Վերոնիկայի եղբայրը՝ Գարեգին Թաշճյանը (Հր. Սիմոնյան, Անդրանիկի ժամանակը, Գիրք Ա, էջ 471):

Հայերն սկսեցին իրենց ամուր դիրքերից կրակ տեղալ թուրքական թաղերի վրա, սակայն ի վերջո ստիպված էին փոխադրվել քաղա-

քի հիմնավորը բերդը, որը կառուցված և ամրացված էր դեռևս հռոմեացի զորավարների ձեռքով և ուներ բնական ու արհեստական ամրություններ: Բերդում ապաստանեցին 5062 հոգի, որից 1500–ը՝ արական սեռի: Նրանցից կռվի ընդունակ էին 250–ը: Մնացածները ծերեր էին, կանայք, երեխաներ, պատանիներ, հիվանդներ:

Բերդում ձեռնարկվեցին կազմակերպչական աշխատանքներ՝ պարենավորում, ջրամատակարարում, զինական նախապատրաստություն, որպիսիք տարվում էին զիշեր–ցերեկ: Ամեն ոք ցուցաբերում էր կարգապահություն և զոհողության գիտակցություն՝ արհամարհելով թշնամու գերազանց ուժերը: Կազմվեց Ձինվորական խորհուրդ:

Բերդում ապաստանած ժողովուրդը մի քանի ժամկա ընթացքում բերդը վերածեց լավ ամրացված ամրոցի: Քարե հաստ պատերով նորոգվեցին աշտարակները, խարխուլված պարիսպները, նոր պատնեշներով իրար կապվեցին դիրքերը: Դիրքեր կառուցվեցին իշխող յոթ ճակատների վրա, կազմվեցին դրանք պաշտպանող խմբեր՝ յուրաքանչյուրը 8–25 հոգուց կազմված, իրենց պետերով, տասնապետներով, հերթապահներով, փոխանորդներով:

Մտահոգության լուրջ հարց էր սննդամթերքի, ջրի և վառելանյութի մատակարարումը: Մեկ շաբաթում սպառվեց քաղաքից բերված մթերապաշարը, երկու օրում խմեցին բերդի լճակների նեխած, գարշահոտ, ջրաբույսերով ու միջատներով թանձրացած ջուրը: Ամառային տապի պայմաններում բերդում սկսվեց ջրի սոսկալի տագնապ: Սկսեցին մաքրել քարերով լցված հին ջրհորներից մեկը և ջուր հայտնաբերվեց, որը որոշ ժամանակ մեղմեց ջրի պակասը:

Բերդի պաշտպաններն ունեին 150 մաուզեր, 50 կարաբին և այնպիսի հրացան, հունական, բուլղարական հրացաններ, 40 հեծելազորային բազմահարված «Ֆիլինտա» տիպի հրացան և 80–ի չափ ձեռնառումբեր:

Ինքնապաշտպանության ղեկավար Ղուկաս Աղբարը հրահանգ տվեց՝ ոչ մի անտեղի գնդակ, ոչ մի ռումբ՝ առանց գոնե 5 թուրք սպանելու: Կարգապահություն հաստատելու համար Ձինվորական խորհուրդը տվեց հետևյալ հրահանգները՝ 1. բացարձակ հնազանդություն խմբապետներին, 2. կուսակցական վեճեր և խռովություններ հարուցող անձը կգնդակահարվի, 3. առանց Ձինվորական խորհրդի թույլտվության ոչ ոք իրավունք չունի հեռանալ բերդից, 4. անհնազանդները տեղում կենթարկվեն մահապատժի:

Անճղի բաշխումը կատարվում էր ըստ ընտանիքի անդամների թվի: Հացը պատրաստվում էր երկու քարայրերի մեջ: Երեսուն կանայք աշխատում էին 24 ժամ և օրական թխում մոտ 8 հազար հաց: Խիստ դժվար էր վառելիք ճարելը: Գտնված ջուրը կրկին սպառվեց և սկսեցին նոր ջրիտորներ որոնել: Թուրքերն սպանեցին մի պատանու, որը գիշերով դուրս էր եկել բերդից և վերադառնում էր լիքը ջրամանով:

Բերդ մտնելու հինգերորդ օրը Սեբաստիայի կուսակալն իբրև բանագնաց նամակով այնտեղ ուղարկեց մի հայ կնոջ՝ զենքը վայր դնելու և անձնատվության առաջարկությամբ: Փոխարենը կայսերական ներում էր խոստացվում բոլորին, առաջարկվում էր ցանկացած տեղում կառուցել նոր բնակավայր՝ այրված Շապին-Գարահիսարի փոխարեն: Չհնազանդվելու դեպքում կուսակալն սպառնում էր թնդանոթային կրակով հիմնահատակ ավերել բերդը:

Թուրքական խորամանկությանը քաջածանոթ հայերը մերժեցին հաշտության առաջարկը՝ հայտնելով, որ իրենք հաշտվել են մահվան հետ ու չեն վախենում թնդանոթներից:

Առավոտյան թուրքերն սկսեցին հրետակոծությունը: Հայերը հավաքում էին ժայռերի խռոչներում պայթած ռումբերի բեկորները, տանում զինարան, փամփուշտներ ձուլում ու «վերադարձնում» թշնամուն: Դուկաս Աղբարի հնարամտության շնորհիվ թուրքական թնդանոթներից մեկը լռեց, որովհետև հայերը նշանառու կրակով շարքից հանեցին թնդանոթածիզներին:

Հաջորդ լուսաբացին թուրքերը վերսկսեցին գնդակոծությունը՝ երեք հրանոթներով: Դուկաս Աղբարը և Ջինվորական խորհուրդը որոշեցին մինչ այդ պահված ռումբերը բաժանել դիրքերին: Մինչև կեսօր հայերը նախապատրաստվում էին և պատասխան կրակ չէին բացում: Այդ լռությունից քաջալերված՝ թուրքերն սկսեցին շարժվել դեպի վեր: Հայկական դիրքերից կրակ տեղացին, և թուրքերն անկանոն նահանջեցին:

Թուրքական հարձակումը վերսկսվեց հաջորդ օրը: Այս անգամ վերև էր մագլցում թուրք խուժանը, իսկ զինվորները մնացել էին ներքևում: Սկսվեց թեժ կռիվ, որը շարունակվեց մինչև երեկո, երբ հարձակվողները կրկին նահանջեցին: Նույնը կրկնվեց նաև հաջորդ մի քանի օրերին:

Բերդի պաշտպանները հույսեր էին կապում ռուսական զորքերի առաջխաղացման հետ: Նրանք սպասում էին նաև Սեբաստացի Մուրադին և Անդրանիկին, որոնք, սակայն, ուշանում էին: Մի օր էլ Սեբաստիա-

յի ճանապարհի վրա մի սև զանգված նշմարվեց, որից ենթադրեցին, թե եկողը Մուրադն է:

Այս սպասողական դրության մեջ ուտելիքն սպառվեց: Ուտելիք կարելի էր ձեռք բերել միայն շրջակա թուրքական գյուղերի վրա հարձակվելով, որը գրեթե անհնար էր:

Կրկին ճերմակ դրոշով երևաց պատգամաբեր հայ կինը, և կռիվը դադարեց: Երկրորդ նամակով կուսակալը երդվում էր ունեցվածքի և պատվի ապահովություն շնորհել հայերին, խոստանում պատժել հայերի մատնանշած հանցավոր թուրքերին և կրկին առաջարկում հանձնվել: Հանձնվել՝ նշանակում էր մատնվել Շապին-Գարահիսարի դաշտային շրջանի հայկական գյուղերի արյունոտ ճակատագրին, որին իրենք ականատես էին եղել բերդի բարձր դիրքից: Պարզ էր նաև, որ մի քանի օրից լիովին սպառվելու էր պարենն ու զինամթերքը: Ուրեմն միակ ելքը կռվելն ու պատվով մեռնելն էր:

Բերդի պաշարումից 18 օր անց երրորդ անգամ ճերմակ դրոշով երևաց պատգամաբեր կինը: Սակայն նրան ճանապարհեցին, հայտնելով, որ կռվելու են մինչև վերջին փամփուշտը:

Եվ հարձակումը չուշացավ: Հունիսի 20-ի լուսաբացին թնդանոթների համազարկերի ուղեկցությամբ թուրք զինվորների շղթաները քայլող անտառի նման սկսեցին բարձրանալ դեպի բերդ: Հայերը պատասխանեցին միախանուռ ու անդադար կրակով՝ հաշվի չառնելով փամփուշտի խնայողության պահանջը: Նրանք գերագույն ճիգերով էին մնում դիրքերի վրա, ամեն կողմից լսվում էին օգնության կանչեր: Պեկավարները անելանելի դրության մեջ էին. ինչպե՞ս դիմադրել թուրքական 5-6 հազարանոց կանոնավոր բանակին և նույնքան էլ խուժանին: Թշնամին հասել էր բերդի պարիսպներին: Հանկարծ Շմալի կոչվող դիրքում ռումբեր պայթեցին և թշնամին կանգ առավ: Սակայն Սառնիճներ կոչվող դիրքի կողմից զգեստափոխված և հայերի հագուստներ հագած թուրքերը կարողացան անարգել մոտենալ և ոչնչացնել գրեթե բոլորին: Թշնամուն հաջողվեց գրավել բերդի դուռը և քանդել մուտքը պաշտպանող պատվարը: Սակայն այդ ճգնաժամային պահին բերդի դռան առջև մի ռումբ պայթեց, որը նետեց Գ. Կարմիրյանը: Հացթուխ կանայք ևս ռումբ էին պահանջում: Այդ պահին 14 տարեկան Գ. Թնեքեյանը իր կյանքի գնով հրաշքով հայթայթեց ռումբը: Այն պայթեց դռան առջև և սպանեց 5-6 զինվորների, իսկ մյուսներն ահաբեկված թաքնվեցին քարերի տակ: Օգտվելով թշնամու խուճապից՝ հայ կռիվները հարձակվե-

ցին թշնամու վրա: Առջևից վազում էր երեմիա Բայուցյանը: Թուրքերը փախուստի դիմեցին: Նրանց հնձում էին վերևից տեղացող փամփուշտները, հայ կանանց ու երեխաների նետած քարերը: Պատկերը նույն կերպ փոխվեց նաև մյուս ճակատներում: Թշնամին հեռացավ՝ թողնելով անթիվ դիակներ: Ժողովուրդը տոնում էր իր հաղթանակը՝ պարով ու լացով, որովհետև միաժամանակ լուսնի լույսի տակ թաղում էին իրենց հարազատներին, այդ թվում ինքնապաշտպանության ղեկավարներից Յ. Գարակյոզյանին, Ավագ Տուրիկյանին, Ռուբեն և Գրիգոր Պարոնվարդյան եղբայրներին, Ե. Վեցիկյանին և ուրիշներին:

Հաջորդ մի քանի օրերին հարաբերական անդորր էր տիրում: Բայց ինչ որ չկարողացավ անել թշնամին, արեց սովը: Ոչ մի տեղից օգնություն չստացվեց: Անդրանիկ Պարոնվարդյանը և Նշան Սերեճյանը գնացին թուրքերի հետ բանակցելու, բայց այլևս չվերադարձան:

Ղուկաս Աղբարը ժողովի հրավիրեց բոլոր մարտիկներին: Նա հրահանգեց գիշերային ուժեղ հարձակումով ճեղքել պաշարման օղակը, իջնել դաշտ և կռիվը շարունակել շրջակա լեռներում և թուրքերին սպառնալ շրջակա թուրքական գյուղերի ոչնչացմամբ, եթե նրանք վայրագորեն վարվեն բերդում մնացած կանանց ու երեխաների հետ: Ծրագրված էր առավոտյան հարձակվել Գլխիվար Սառնիճ կոչվող դիրքից, ապա հավաքվել Թամգարայի վանքի պարտեզում ու որոշել իրենց հետագա ուղղությունը: Սակայն առավոտյան տեսան, որ թշնամին ամրացրել է այդ դիրքը, որովհետև երկու սերաստացի երիտասարդներ մատնել էին հայերի ծրագիրը:

Մշակվեց նոր ծրագիր, որը գաղտնի պահվեց: Պարենի ու ռազմամթերքի պաշարները բաժանվեցին նահանջին մասնակցել ցանկացողներին: Նոր ծրագիրը նախատեսում էր հարձակումն սկսել Բերդի դռնից: Գիշերային կարգախոսն էր «Կծիկ»:

Նահանջն սկսվեց Դռան առջևից: Սկսեցին իջնել զգուշորեն, առանց աղմուկի: Սակայն թշնամին կռահեց հայերի մտադրությունը: Սկսվեց գիրկընդխառն կռիվը: Նահանջին մասնակցող շուրջ հազար հոգուց հարյուրը նահատակվեցին այդ գիշերային մարտում: Մնացածները, երեք ճակատի վրա հարվածելով թշնամուն, անցան դաշտ, որտեղ ցրվեցին և մոտ երկու տարի տարբեր վայրերում կռվելուց հետո բոլորն էլ սպանվեցին:

Հունիսի 28-ին բերդի վրա պարզվեց անձնատվության սպիտակ դրոշը: Չհավատալով աչքերին՝ թշնամին վեց ժամ սպասեց և նոր միայն

հաղթանակի փողերով ու թմբուկներով բարձրացավ բերդ՝ այնտեղ կատարելու համար Հայոց ցեղասպանության արարներից մեկը: Հաջորդ սերունդների շուրթերին մնաց դյուցազնական Շապին-Գարահիսարի հերոսական անունը: Իսկ շապինգարահիսարցի Արամ Հայկազն իր հուշերի գրքում գրեց. «Աղոթելու տեղ կանի՞ծեմ այն Աստվածը՝ որ մեր ճակատագիրը գրեց» (Արամ Հայկազ, Շապին-Գարահիսար ու իր հերոսամարտը, Նյու Յորք, 1957, 459 էջ):

Ինչպես նշում է ակադեմիկոս Յ. Սիմոնյանը, դահիճներն առանձին դաժանությամբ հաշվեհարդար տեսան Անդրանիկի հարազատների հետ՝ նման քստմնելի եղանակով վրեժխնդիր լինելով սարսափազդու ժողովրդական հերոսից: Նրանք ոչնչացրին Անդրանիկի եղբոր ու հորեղբոր ընտանիքները: Նրանք թվում էր Անդրանիկի հորեղբոր որդին՝ նշանավոր հնչակյան գործիչ և անվանի մտավորական Գագիկ Օզանյանը, որի գրչին են պատկանում «Պատմություն հայ լեզվի և բանահյուսության», «Հայաստանում: Հայուն պատմական դերը» արժեքավոր աշխատությունները (Հ. Ս., էջ 471):

ՄՈՒՍԱ ԼԵՌԱՆ ՀԵՐՈՍԱՄԱՐՏԸ

Անտիոք քաղաքից արևմուտք տարածվում է մի փոքրիկ լեռնաշղթա, որն Ամանոսյան լեռների հարավային ճյուղերից է: Այդ լեռնաշղթան բաժանված է երկու մասերի. Արևելյան մասը կոչվում է Ջեբել էլ Ահմար, որի բարձր գագաթը 2550 մետր է, իսկ Արևմտյան մասը՝ Ջեբել Մուսա, կամ Մովսեսի լեռ՝ մոտ 1800 մետր բարձրությամբ մի գագաթով: Այդ լեռները ծածկված են անտառներով ու պուրակներով, ունեն առատ ջրեր:

Մուսա լեռան բարձունքների վրա գտնվում են հայկական վեց գյուղեր, որոնք կազմում են Սուեթիայի (պատմական Սելևկիա նավահանգստի անունից) շրջանը: Այդ գյուղերից կարևորագույնը Բիթիասն է, որը 1915-ին ուներ 195 ընտանիք կամ 1050 բնակիչ: Նրանցից տարագրության ճամփան բռնեցին 450-ը:

Բիթիասից մեկ կիլոմետր հարավ-արևմուտք գտնվում է Հաջի-Հաբիբլի գյուղը, որն ամենաբազմամարդն է՝ 257 ընտանիք կամ 1284 բնակիչ: Նրանցից կամուփին տարագրության ճանապարհը բռնեցին 384-ը:

Միջերկրական ծովի ափից 7 կմ հեռու, Մուսա լեռան լանջին գտնվում է Յողուն-Օլուք գյուղը՝ 600 մետր բարձրության վրա, բաղկացած 255 ընտանիքից՝ 1233 բնակիչ: Նրանցից տարագրության դիմեցին 57-ը: Նրանից մեկ կիլոմետր հարավ գտնվում է Խտր-Բեկ գյուղը՝ 95 ընտանիք, 1149 բնակիչ, 65 տարագրյալ: Նրանից էլ երկու կիլոմետր հարավ գտնվում էր Վազֆ գյուղը՝ 82 ընտանիք, 470 բնակիչ, 84 տարագրյալ:

Յողուն-Օլուքից 5 կմ դեպի արևմուտք՝ Մուսա լեռան լանջերից մեկի վրա է գտնվում Քեբուսիե գյուղը՝ Միջերկրականի ափից ոչ շատ հեռու: Նրա բնակչության ճնշող մեծամասնությունը՝ 1040 հոգի, բռնեցին տարագրության ճամփան և մնացին Դեր-Չորի ավազուտներում: Չտարագրվեցին 85 հոգի:

Այսպիսով՝ հայկական վեց գյուղերի բնակչության ընդհանուր թիվն էր 6811 հոգի, որից 2580-ը նախընտրեց բռնել տարագրության ճանապարհը, իսկ մնացած 4231 հոգին, որից 1711 կին, 1237 տղամարդ և 1283 երեխա, նախընտրեցին ապավինել իրենց պահապան լեռանը: Ընդհանուր առմամբ կանանց թիվը գերակշռում էր, որովհետև տղամարդիկ բանակ էին գորակոչված:

1915 թ. հուլիսի 26-ին տեղահանվելու հրահանգ ստացավ հարևան Քեսապի հայ բնակչությունը: Կային միամիտներ, որոնք հավատացին կառավարության կեղծ խոստումներին, թե իրենց մեկնումը ժամանակավոր է: Սակայն իրենց բանակատեղերից փախած հայ զինակոչիկները սարսափելի բաներ էին պատմում իրենց տեսածի մասին: Ուստի ամմտություն էր կուրորեն ենթարկվել տեղահանության հրամանին:

Քեսապից չորս օր հետո՝ հուլիսի 30-ին, Սուետիայի շրջանն էլ ստացավ տեղահանության հրահանգ՝ ստորագրված Անտիոքի կայմականի կողմից: Սուետիայի մյուզիքը հրահանգի մեկական օրինակ ուղարկեց հայկական վեց գյուղերի գյուղապետներին:

Սուետիան Սելևկիա բառի աղավաղումն է և վերաբերում է մի գյուղաքաղաքի, որը գտնվում է Անտիոքից 28 կմ դեպի արևմուտք: Այն Սուետիա նույնանուն գավառակի կենտրոնն էր:

Տեղահանության նախապատրաստվելու համար տրվում էր ութ օր: Սուետիայի տեղահանության պատրվակներից մեկն էլ այն էր, որ Անտանտի դաշնակիցները մեծ ուժեր էին կենտրոնացրել 150 կմ հեռու գտնվող Կիպրոս կղզում, և ծովեզերքից ոչ շատ հեռու երթնելու էին անգլիական ու ֆրանսիական ռազմանավեր:

Սուետահայերը կանգնած էին երկընտրանքի առջև: Ամելիքը որոշելու համար Յողուն Օլուք գյուղի քահանա Աբրահամ Տեր Գալուստյանի տանը հրավիրվեց խորհրդակցություն, որին մասնակցում էին հայկական գյուղերի ներկայացուցիչները: Ոչ ոք չէր մասնակցում միայն Քեբուսիեից: Նրանց որոշումից էր կախված վեց հազարից ավելի մարդկանց ճակատագիրը: Խորհրդակցությունը տևեց ամբողջ գիշեր, եղան բուռն վիճաբանություններ, հայտնվեցին հակոտնյա տեսակետներ: Ինքնապաշտպանության դիմելու գաղափարին դեմ արտահայտվեցին Բիթիասից՝ Մովսես Ռենճիլյանը, Հաջի Հաբիբլիից՝ Գրիգոր Մարգարյանը և գերապատվելի Հարություն Նոխուրյանը: Ինքնապաշտպանությունը կողմնակից էին Մովսես Տեր-Գալուստյանը, Ավետիս Մասմանյանը, Թովմաս Այնթապյանը, Տեր Աբրահամ Տեր-Գալուստյանը, Տեր-Վարդան Վարդերեսյանը, Մելքոն Գույումճյանը և ուրիշներ:

Եվ այսպես՝ 6811 հոգուց մեկ երրորդը՝ 2050 մարդ, բռնեցին տարագրության ճանապարհը, իսկ մնացած 4231-ը որոշեցին դիմագրավել արյունարբու թշնամուն: Դրանցից զենք կրելու ընդունակ էին շուրջ 800-ը, իսկ զենքը քիչ էր՝ 133 հունական Կրա հրացան, 7 մաուզեր, 450 հնատիպ և որսորդական հրացաններ: Յուրաքանչյուր հրացանին ընկնում էր 80-100 փամփուշտ: Դրանից բացի կար բավականաչափ վառող ու կապար՝ 30.000 փամփուշտի համար:

Չափազանց կարևոր էր ինքնապաշտպանության համար հենակետ ընտրելու հարցը: Ոմանք առաջարկեցին ամբողջ ժողովրդին հավաքել ամենալավ դիրք ունեցող գյուղի մեջ, և այն վերածել ամրոցի: Ի վերջո վերապատվելի Տիգրան Անդրեասյանի և Մովսես Տեր-Գալուստյանի առաջարկով որոշվեց հաստատվել Մուսա լեռան գագաթին, որի բարձրությունը 1800 մետր էր, տարածքը՝ 70-80 քառ. կմ:

1915 թ. հուլիսի 31-ին սկսվեց լեռը բարձրանալու գործողությունը, որը տևեց երեք օր: Դա կատարվում էր մեծագույն դժվարություններով, որովհետև պատերազմի ընթացքում կառավարությունը բռնագրավել էր բոլոր փոխադրական միջոցներն ու քաշող ուժը: Ամեն մի գյուղից ծայր առավ մարդկային բազմություն՝ հակերով ու պարկերով ծանրաբեռնված, իսկ հովիվները քշում էին կովերին, այծերին ու ոչխարներին: Վերելքը զնալով դժվարանում էր:

Օգոստոսի 1-ին ժողովրդի մեծ մասը հասավ Թաթար Ալան կոչված սարահարթը՝ լեռան գագաթից բավական ներքև: Հետագա բարձ-

րացողներին տեղավորեցին ԳճՃԱ, Գուզդազ, Տանլաճըզ և Գափլան Տուզաղը վայրերում:

ժողովրդի տեղաշարժը աննկատ չմնաց, և Սուետիայի մյուզիորը երեք անգամ պահանջեց հայերից հրաժարվել իրենց մտադրությունից, բայց անպատասխան մնաց:

Մուսա լեռան բարձունքներն ունեին աննպաստ կլիմա: Եթե ներքևում կիզիչ արև էր, ապա վերևում տևական, սառցային ու թանձր մշուշ էր, որը պարուրում էր մարդկանց մարմինը, թրջում հագուստները և թափանցում մինչև ոսկորները: Ուզմագիտական տեսակետից այդ մշուշն ուներ իր առավելություններն ու անպատեհությունները: Տղամարդիկ ձեռնամուխ եղան ծառերից կացարաններ պատրաստելու գործին:

Օգոստոսի 5-ին մյուզիորը նամակով մուսալեռացիների մոտ ուղարկեց մի պատվիրակություն, որի մեջ էին տարագրության կողմնակիցներ Տեր Վարդան Վարդերեսյանը, Հաջի Խաչեր Մարտիրոսյանը, Վերապատվելի Հարություն Նոխուրյանը և Գևորգ Եերայեթյանը: Պատվելի Նոխուրյանը ճիգ չէր խնայում համոզելու ըմբոստներին՝ հրաժարվելու «արկածախնդրությունից» և իրենց ճակատագիրը վստահել «բարեխնամ» կառավարությանը: Սակայն մյուզիորի այս փորձն էլ հաջողություն չունեցավ:

Օգոստոսի 7-ին տեղի ունեցավ Թաթար Ալանի ընդհանուր ժողովը: Յուրաքանչյուր շրջան ուներ 15 ներկայացուցիչ: Սակայն ժողովը նոր էր սկսվել, երբ լուր հասավ, որ 200 թուրք ասկյարներ շարժվում են դեպի հայերի դիրքերը: Եվ սկսվեց առաջին կռիվը: Թշնամին թերագնահատել էր հայերի ուժը, այնպես որ, վեց ժամ տևած ընդհարումից հետո թուրքերը նահանջեցին՝ թողնելով տասը սպանված և քսան վիրավոր: Այդ հաղթանակն ունեցավ հոգեբանական նշանակություն և ամրապնդեց ժողովրդի կորովը:

Օգոստոսի 10-ի լուսաբացին Պազաճըզ կոչված դիրքի պահակները Հաջի Հաբիբի գյուղի շրջակայքում նշմարեցին զինվորական կուտակումներ: Արևածագին գյուղի մոտ տեղադրված թնդանոթներն սկսեցին ռմբակոծել հայկական դիրքերը: Իջավ մշուշը, և, օգտվելով դրանից, թշնամին ընդհուպ մոտեցավ հայկական դիրքերին ու կրակ բացեց: Դիմադրությունն անկազմակերպ էր, որովհետև դեռևս չկար հրամանատարություն, իսկ հարձակվող թուրք զինվորների թիվը հազարին մոտ էր: Պազաճըզի պաշտպաններն ստիպված էին թողնել իրենց դիրքերն ու բարձրանալ ավելի վեր: Սկսվեց ուժեղ անձրև, և լեռան պաշտպանների փողից լցվող հրացանները թրջվելով՝ լռեցին: Անձրևը դժվա-

րացնում էր նաև թուրքերի առաջխաղացումը: Հայերը դիրք բռնեցին Օմարի Գետին կոչված վայրում և ստացան օգնական ուժեր: Թշնամին ևս կրկնապատկեց ուժերը, և տեղի ունեցավ կատաղի ընդհարում: Յոթամյա դիմադրությունից հետո հայերը քայլ առ քայլ նահանջեցին: Թուրքերը տիրացան Թաթար Ալանին և վտանգեցին Գլճայի բնակատեղին: Ժողովուրդը լքեց իր կացարանները և ապաստանեց Գուշ Երղազի հյուղերում: Ընդհանուր առմամբ ճակատամարտը տևեց 12 ժամ, որտեղ թշնամին տվեց 100, հայերը՝ 3 սպանված: Իրենց քաջությամբ աչքի ընկան Պետրոս Գալուստյանը և Հակոբ Գարակյոզյանը: Առաջինը հինգ գնդակով սպանեց չորս թնդանոթածիզների, իսկ երկրորդը կրակեց մինչև վերջին փամփուշտը և ստացած վերքերից հաջորդ օրը մահացավ:

Գլճայի բնակիչները հաստատվեցին Տանլաճըզում: Երեք բնակավայրերն էլ գտնվում էին մի գծի վրա, հարավից հյուսիս՝ Տանլաճըզ, Գափլան Տուղազի և Գուշաղազ: Յուրաքանչյուր շրջան ուներ իր վարչությունը և զինվորական մարմինը: Այդ երեք շրջանների տեղական մարմինները Տանլաճըզում հրավիրեցին ժողով՝ իրենց գործողությունները համակարգելու նպատակով: Ստեղծվեց Կենտրոնական վարչական ժողով և զինվորական կենտրոնական վարչություն, որի վերահսկիչ նշանակվեց 21-ամյա Մովսես Տեր-Գալուստյանը: Կենտրոնական վարչական ժողովի ատենապետն էր պատվելի Տիգրան Անդրեսայանը:

Մովսես Տեր-Գալուստյանի առաջին գործը եղավ կազմակերպել մարտական ուժերը: Դրանք բաժանվեցին 43 տասնյակների՝ իրենց տասնապետերով: Կազմվեց նաև 25 հոգանոց հարվածային մի խումբ: Հրամանները փոխանցելու գործը վստահվեց պատանիների մի խմբի, որին տրվեց «Թելեֆոնի տղաք» անունը: Իզական սեռը կամ կռվում էր դիրքերում, կամ հոգում կռվողների կարիքները: Պատրաստվեցին ընդարձակ զորանոցներ, որտեղից բացակայել չէր կարելի: Փորվեցին խրամատներ, ծառերի կոճղերից պատրաստվեցին պատնեշներ: Հաշվառվեց սահմանափակ քանակությամբ պարենամթերքը: Մնում էր մտածել փրկության մասին, որի միակ ճանապարհը ծովում երթևեկող դաշնակիցների ռազմանավերն էին: Դրանց ուշադրությունը գրավելու համար որոշվեց ծովի դիմաց պարզել երկու սպիտակ սավաճներ, որոնցից մեկի վրա կարված էր կարմիր խաչ, իսկ մյուսի վրա կարմիր թելով հյուսված էին «Քրիստոնյաները վտանգի մեջ են» բառերը: Գիշերը կրակ վառելու առաջարկությունը մերժվեց՝ անվտանգության նկատառումներով: Իսկ երկու դրոշմները պիտի պարզվեին միայն ռազմանավ երևալու

դեպքում: Այդ գործը հանձնարարվեց 4 հոգու, որոնք հաջորդաբար գիշեր-ցերեկ հերթապահում էին: Եթե հեռավորությունը մատչելի լիներ, նրանցից մեկն անմիջապես պիտի ծովը նետվեր և նավին հասցնեք մետաղյա տուփի մեջ դրված խնդրագիրը: Նրանում կային այսպիսի տողեր. «Տեր, դիմում կրնենք ձեզի, հանուն Աստծո և մարդկային եղբայրության, հանուն Քրիստոսի... և կխնդրենք որ ազատեք մեր կյանքը և պատիվը: Հաճեցեք, տեր, փոխադրել մեզ Կիպրոս կամ ուրիշ ազատ երկիր մը... Եվ կամ եթե կարելի չէ, հաճեցեք փոխադրել գոնե մեր կիները, ծերերն ու մանուկները ու մեզի տվեք ուտելիք, զենք և զինամթերք, որպեսզի ձեզի հետ, ձեր կողքին կովենք թուրքական ուժերուն դեմ... Ազատեցեք մեր կյանքը, ազատեցեք մեր պատիվը, քանի դեռ շատ ուշ չէ»:

Որոշվեց նաև ծովեզերքի ճանապարհով մի քանի հոգու ուղարկել Իսկենդերուն (Ալեքսանդրետ), որտեղ ավելի շատ էին ռազմանավեր երևում: Օգոստոսի 12-ի գիշերը երեք հոգի ճանապարհվեցին դեպի Իսկենդերուն: Սակայն մի քանի օրից նրանք վերադարձան ձեռնունայն: Նրանք մեծ դժվարությամբ հասել են Ֆարթիսի գյուղը, որի մոտ խարիսխ ձգած ռազմանավը հեռացել էր մեկ օր առաջ:

Գիշտ է, երկրորդ ճակատամարտին հաջորդեց երկարատև հարաբերական անդորրություն, սակայն պարենի ճգնաժամը գնալով խորանում էր:

Օգոստոսի 19-ին Աստվածածնի տոնի առթիվ գլխավոր գորանոցի մոտ հանդիսավոր պատարագ մատուցվեց, որին ներկա էր գրեթե ողջ ժողովուրդը: Պատարագը դեռ չէր վերջացել, երբ հայտնի դարձավ, որ թշնամին մեծ ուժերով շարժվում է դեպի լեռը: Հարձակվում էին մոտ 4000 զինվոր՝ տասնյակ թնդանոթներով և անհամար խուժան: Հարձակումը կատարվում էր 6 ուղղություններով: Թանձրացող մշուշը նպաստավոր էր դառնում հայերի համար, որոնք քաջ ծանոթ էին հարազատ լեռան բոլոր ժայռերին, փոսերին, առվակներին, ծառերին, կածաններին և դրանցից յուրաքանչյուրը որոգայթ կարող էր դառնալ թշնամու համար:

Երբ մշուշը փոքր-ինչ ցրվում էր, հայ առաջապահները դիպուկ կրակով հնձում էին թշնամու զինվորներին:

Թուրքերն իրենց ուժերը կենտրոնացրին Թաթար Ալանի ուղղությամբ, որտեղից հեշտ կլիներ գրավել մյուս դիրքերը: Հարձակվող գորագնդին հետևում էին 50 ջորիներ՝ բեռնված ռազմամթերքով ու թնդանոթներով: Մեկ ուրիշ զորագունդ էլ առաջանում էր ծորի ճանապարհով:

Թուրքերը երկու հայ լրտեսների միջոցով հստակ պատկերացում ունեին հայերի դիրքերի և զինվորական ուժի մասին: Չնայած կատաղի դիմադրությանը, թուրքերին հաջողվեց գրավել առաջին գիծը: Տանլաճըզի ներքևից հոսում էր Մեծ Ջուրը, որից անմիջապես այն կողմ սկսվում էր զառիվայրը: Երբ թուրքական ուժերն անցան Ջուրը, Տանլաճըզի վերևում դիրք մտած հայ կանայք նրանց վրա հսկայական քարեր ու ժայռաբեկորներ գլորեցին, որոնցից անհնար էր պաշտպանվել: Դրանից հետո երկու կողմերն էլ ուժերը կենտրոնացրին Թաթար Ալանի ուղղությամբ: Թուրք զինվորներն ալիք առ ալիք նետվում էին առաջ, դեպի հայկական դիրքերը: Թաթար Ալանը վերածվել էր մահվան արեճայի: Երբ գիշերն իջավ Մուսա լեռան վրա, թշնամին տիրացել էր Թաթար Ալանին և գտնվում էր հայերի վերջին դիրքերից հազիվ 200 մետր այն կողմ: Լուսաբացին հայերը կռվում էին մեկը տասի դեմ: Կեսօրից հետո սկսվեց գլխավոր հարձակումը: Հայերը կռվում էին «Դիմադրել, չնահանջել ու մեռնել» կարգախոսով: Գրաված Թաթար Ալանից թշնամին արկեր էր տեղում բնակավայրերի ու զորանոցների վրա, իսկ ժողովուրդը խուճապահար փախչում էր դեպի մոտակա անտառները: Եթե թշնամուն հաջողվեր առաջանալ նա մի քանի հարյուր մետր, հայերն ստիպված կլինեին անձնատուր լինել կամ անձնասպանություն գործել: Մղձավանջային այդ պահին եղան նաև դասալիքներ, որոնք լքեցին դիրքերը և թաքնվեցին անտառների խորքերում:

Ճակատամարտը մղվում էր մի բլրի շուրջ, որը կոչվեց «Մահվան բլուր»: Այն զինվորը, որը ոտք էր դնում այդ բլրի ստորոտին, շանթահարված գետին էր գլորվում վերևից տեղացող կրակից: Եթե Մահվան բլուրը հանկարծ ընկներ թշնամու ձեռքը, վճռված կլինեին 4000 հայերի ճակատագիրը և Մուսա լեռան ինքնապաշտպանությունը կդասվեր անխոհեմ արկածախնդրությունների շարքին: Դրա համար էլ դիրքերը չէին լքում նույնիսկ ծանր վիրավորվածները: Թշնամին յոթգլխանի դևի պես փորձում էր շրջապատման օղակի մեջ վերցնել Մահվան բլուրը: Եվ այդ պահին կատարվեց անհավատալի մի բան: Դիրքերը լքած մարտիկներից շատերը հետ վերադարձան: Նրանցից մեկը առաջարկեց կազմել 50 հոգուց բաղկացած խումբ և անակնկալ հարվածել թշնամու թիկունքին, որը և իրագործվեց: Թշնամու աջ թևը սկսեց խուճապահար նահանջել: Բլրի պաշտպանները, օգտվելով դրանից, դուրս եկան իրենց դիրքերից ու խոյացան նրանց վրա՝ մահ սփռելով թշնամու շարքերում: Եվ պատահեց հրաշքը. թշնամին սկսեց հուսահատական աղաղակներով նահանջել:

ջել, և, շատ չանցած, հրանոթներն ու հրացանները լռեցին: Հայերը տվել էին 10, թշնամին՝ 500—ից ավելի զոհ: Լուսաբացին ամբողջ Մուսա լեռը հայերի ձեռքում էր: Հայերի ռազմավարն էր՝ մի քանի ջորի, 9 մաուզեր և 10 հազար փամփուշտ:

Դավաճան երկու եղբայրները հրապարակայնորեն դատվեցին և զորանոցի առջև զնդակահարվեցին:

Այդ վճռական պարտությունից հետո թուրքերը փոխեցին ռազմավարությունը. որոշեցին պաշարել Մուսա լեռը և ժողովրդին սովի մատնել:

Այդ ամբողջ ժամանակամիջոցում ոչ մի ռազմանավ չէր եկաց: Որոշվեց կրկին մարդ ուղարկել Ալեքսանդրես՝ ռազմանավ որոնելու համար, ինչպես նաև պատրաստել փոքրիկ առագաստանավ՝ Կիպրոս հասնելու նպատակով:

Այսպես անցավ ողջ օգոստոս ամիսը: Օրեցօր ոչ միայն ավելի էր սրվում պարենավորման վիճակը, այլև մոտենում էին աշնան ցրտերը, որն անկարելի կդարձներ նման բարձրության վրա գոյատևելը:

Վերջապես սեպտեմբերի 5—ին ծովի կապույտ ջրերի հեռվում երևաց մոխրագույն մի զանգված, որից ծխի քուլաներ էին բարձրանում: Ժողովուրդը մի մարդու նման վազեց դեպի «Ազատության լեռը», որի վրա արդեն տնկված էին երկու դրոշմերը: Նավը մոտենում էր մեծ արագությամբ: Այն խարխիս գցեց ծովեզերքից մի քանի կիլոմետր հեռու: Նրանից բաժանվեց մի մակույկ, որը եկավ ու կանգ առավ մի փոքրիկ ծովածոցում: Մի քանի մուսալեռացիներ տեղավորվեցին մակույկում, որը առաջացավ դեպի նավը: Նրա կողքին գրված էր «Գիշեն» անունը: Խաչեր Տունանյանը, որը լավ ֆրանսերեն գիտեր, իր ընկերներով բարձրացավ նավի կամրջակի վրա, ներկայացավ նավապետ Պրիստինին, նրան մանրամասն ներկայացրեց կացությունը և նրանից խնդրեց պարենամթերք ու ռազմամթերք՝ պայքարը շարունակելու համար: Նավապետը խոստացավ հայերի խնդրանքը հաղորդել Կիպրոսում գտնվող գլխավոր հրամանատար ծովակալ Դարթիժ դը Ֆուրնիեին: Ծովակալն իր հերթին պիտի դիմեր Փարիզ, որտեղից պիտի ստացվեին վերջնական հրահանգները: Նավի սպաների թվում էր Տիրան Թեքեյանը:

Հայերի պատվիրակությունը մեծ պատիվների արժանացավ և նույն մակույկով վերադաձավ ծովեզերք՝ իր հետ բերելով ուտեստեղեն, դեղորայք, թարմ հաց և այլն: Մուսա լեռան վրա գտնվող հայերի ճակատագիրը պիտի որոշվեր ութ օր հետո: Հայերը ռազմանավի հրամանատարին հայտնել էին նաև, որ թուրքերը Քերուսիե գյուղի եկեղեցում կու-

տակել են մեծ քանակությամբ զենք ու ռազմամթերք, իսկ գյուղը լիքն է հայ զաղթականներով: Ռազմանավը մի քանի կիլոմետր իջավ հարավ և սկսեց ռմբակոծել թուրքերի ռազմական պահեստները:

Դրանից հետո Գիշենը բացակայեց երկու օր: Սեպտեմբերի 7—ի առավոտյան թուրքական մեծ ուժերը կրկին նետվեցին լեռան կողմ ի վեր՝ Շեյխ Օրդուի կողմից: Գակատամարտը տևեց 10 ժամ: Հայերի ամտեղիտալի դիմադրության առջև իրիկնադեմին թշնամին կրկին նահանջեց՝ տալով մեծ թվով սպանվածներ ու վիրավորներ:

Սեպտեմբերի 9—ի կեսօրին ժողովուրդը ցնծության աղաղակներ արձակեց. Փրկության լեռան կողմն էր գալիս իրենց պահապան հրեշտակը՝ «Գիշեն» ռազմանավը, իսկ նրան հետևում էր «Ղեսեքս» ռազմանավը:

Սեպտեմբերի 10—ին տեղի ունեցավ Մուսա լեռան վերջին ու վճռական ճակատամարտը: Թմբուկների բարձրացրած աղմուկով ու սպառնական աղաղակներով հայկական դիրքերին վկայեցին մոտենալ հազարավոր չեթեմեր ու կանոնավոր վաշտեր: Նրանք այնքան խիտ էին, որ նշանառության կարիք չկար: Լեռան պաշտպանների թիկունքը հսկում էին փրկարար նավերը: Գետին էին փռվում թշնամու ամբողջ շարքեր: Մուսալեռացիները գերազանցում էին մեկը մյուսին: Հատկապես աչքի ընկավ Եսայի Յաղությանը, որը հայտնվում էր ամենավտանգավոր դիրքերում: Նրա վճռականությունն ու զինվորական հմտությունը մեծապես նպաստեցին այդ օրվա հաղթանակին: Հետ չէին մնում նաև հայ կանայք: Խուժանը տեղի տվեց ու սկսեց նահանջել, որը վերաճեց փախուստի՝ տալով հարյուրավոր սպանվածներ: Հայերից զոհվեցին երկուսը, մի քանիսը վիրավորվեցին:

Ճակատամարտի ավարտին երկու ռազմանավերն սկսեցին գնդակոծել թուրքերի ռազմական բազաներն ու գյուղերը:

Երբ ռմբակոծությունն ավարտվեց, Գիշենից մի մակույկ եկավ ափ: Հայերին հայտնվեց ֆրանսիական կառավարության որոշումը, որ անհմար է օգնական զորքեր ափ հանել և շարունակել դիմադրությունը: Ծովակալ Դարթիժ դը Ֆուրնիեին հրահանգ էր ստացել Մուսա լեռան հայերին փոխադրել ապահով վայր՝ Կիպրոս կամ Եգիպտոս: Հարահանգվում էր առանց ժամանակի կորցնելու ժողովրդին հավաքել ծովեզերքին, որտեղից նրանք մակույկներով կփոխադրվեին ռազմանավեր:

Գիրքերում թողնելով փոքրաքանակ ուժեր՝ ժողովրդին հրահանգ տրվեց իջնել ծովեզերք: Այդ գործողությունը տևեց երկու օր:

Սեպտեմբերի 12-ի առավոտյան «Գիշեն» և «Դեսեքս» ռազմանավերին միացան ուրիշ երեք ռազմանավեր՝ «Դեստրե», «Աղմիրալ Շարմեն», «Ֆոտր», և սկսվեց փոխադրման գործողությունը տասնյակ մակուկների միջոցով: Փրկարար նավերի թվում էր նաև ֆրանսիական «Ժամնա ԴՄրկ» շոգենավը, ինչպես նաև անգլիական մեկ շոգենավ: Իրիկնադեմին ռազմանավերը բարձրացրին իրենց խարխուխները: Նրանց հրահանգ էր տրված մեկնել Եգիպտոսի Պորտ Սայիդ նավահանգիստը:

Ֆրանսիական բանակի կազմում ստեղծվեց Հայկական լեգեոն, որի առաջին գիմնորագրյալները Մուսա լեռան մարտիկներն էին: Լեգեոնն աչքի ընկավ Արաբայի ճակատամարտում և արածամացավ մարշալ Ալենքիի բարձր գնահատականին:

Տարիներ անց Սուեիայի հայությունը դաշնակից զորքերի հետ վերադարձավ իր գյուղերը:

Մուսա լեռան հերոսամարտի մասին ամմահ վեպ ստեղծեց ավստրիացի գրող Ֆրանց Վերֆելը՝ «Մուսա լեռան քառասուն օրը» վերնագրով, որը լույս տեսավ 1933-ին: 1938-ին գերմանացիները գրավեցին Ավստրիան, և վեպի հեղինակը, որը կասկածելի էր գերմանացիների համար, անցավ Փարիզ: Այնուհետև նա կնոջ հետ մեկնեց ԱՄՆ: Մահացավ Կալիֆոռնիայում 1945-ի օգոստոսի 26-ին: Վեպը թարգմանված է 36 լեզուներով:

1938-ին Պոլսում թուրքերն այրեցին «անիծյալ վեպի» հազարավոր օրինակներ: 1961-ին անգլերեն երկրորդ տպագրությունը լույս տեսավ երկու միլիոն տպաքանակով և շուտով սպառվեց: Վեպը բարձր է գնահատել Վիլյամ Սարոյանը:

Երկրորդ աշխարհամարտի տարիներին Սլովենիայի պարտիզանները Ռոզ լեռը կոչեցին «Սլովենիայի Մուսա լեռ»:

ՌԻՐՖԱՅԻ ՀԵՐՈՍԱՍՆՐՏԸ

Ուրֆայ կամ Եդեսիա քաղաքը գտնվում է Միջագետքի հյուսիսային սահմաններում, ծովի մակերևույթից 553 մետր բարձրության վրա: Ուրֆայի գավառն ուներ շուրջ 10 հազար քառ. կմ տարածք և իբրև ինքնուրույն մյութեսարիֆություն՝ ենթարկվում էր Պոլսին:

Ուրֆա քաղաքը հաղորդակցության ուղիների հանգույց էր: Բացի հայերից, այնտեղ բնակվում էին նաև թուրքեր, քրդեր, ասորիներ, ա-

րաբներ: Ուրֆայի հնագույն անունն էր Ուռեա, իսկ Ուրֆա դարձավ թուրքական տիրապետության ժամանակաշրջանում: Ուրֆայի շրջանը Սելևկյան թագավորության անկումից հետո կոչվեց Օսրոյեն, իսկ Մակեդոնացու արշավանքներից հետո քաղաքը կոչվեց Եդեսիա: Հայերը Ուրֆայում բնակություն են հաստատել հնագույն ժամանակներից սկսած:

1895-ին՝ համիդյան կոտորածների ժամանակ, Ուրֆան հերոսաբար կռվեց և շուրջ մեկ ամիս դիմադրեց թշնամական հարձակումներին: Կոտորածների զոհ գնացին շուրջ 8 հազար ուրֆացի հայեր:

20-րդ դարի սկզբին Ուրֆա քաղաքի հայության թիվն անցնում էր 30 հազարից, իսկ մոտակա միակ հայկական Կարմուճ գյուղում բնակվում էին ևս 5 հազար հայեր:

1908-ի Օսմանյան Սահմանադրության հռչակումից հետո Ուրֆայում ստեղծվեցին Հնչակյան և Դաշնակցության կազմակերպություններ: ՀՀԴ-ն ձեռնամուխ եղավ զինամթերման գործին, որի համար ստեղծվեց երեք հոգուց կազմված գաղտնի մարմին՝ Մկրտիչ Յոթնեղբայրյան, Կիրակոս Դերձակյան, Կարապետ Գարագաշյան: Կատարվում էին զինավարժություններ, կազմվում թուրքիկ խմբեր, պատրաստված էր ինքնապաշտպանության հատակագիծ: Դաշնակցական կազմակերպության մեջ կարևոր դեր էին խաղում Հակոբ Գասապյանը, Վուրդ Յոթնեղբայրյանը, Սարգիս Գասապյանը, Կարապետ Թափթափյանը, Կիրակոս Դերձակյանը, Մկրտիչ Յոթնեղբայրյանը, Հարություն Ռասբլելենյանը: Կազմակերպության ղեկավարն էր Հարություն Տեր-Խորենյանը:

1915 թ. մայիսի սկզբից մինչև հուլիսի վերջերը Ուրֆան դարձավ հայ տարագիրների իջևանը: Շուտով ձերբակալություններ սկսվեցին հենց Ուրֆայում: Իբրև մյութեսարիֆ այստեղ ժամանեց իթթիհատական Ալի Հայդարը՝ հայտնի ջարդարարներ Խալիլ ու Ահմեդի հետ, որոնք Թեշքիլթաթը Մախսուսեի անդամներ էին:

Ուրֆայի Հայոց քաղաքական ժողովը խորհրդակցություն հրավիրեց առաջնորդարանում: Հանգանակվեց մեծ գումար՝ թուրք պաշտոնյաներին կաշառելու համար: Կուսակցությունների ներկայացուցիչներն առաջարկում էին նոր ձերբակալությունների դեպքում զենքի դիմել, որին համաձայն էին Առաջնորդ Արտավազը վարդապետը և ավետարանականների պատվելին: Սակայն մի շարք պահպանողականներ դեմ էին: Վիճաբանությունների թունդ պահին ժողովի դահլիճ մտավ Մկրտիչ Յոթնեղբայրյանը, որը փախստական և հետապնդման մեջ էր: Երբ նա տեղեկացավ համակերպվելու և «խոհեմ» քաղաքականություն

վարելու որոշման մասին, գայրացած ցավ հայտնեց, որ ժողովուրդը հետևում է թուլամորթ ու համակերպվող մարդկանց խորհուրդներին: Նա հայտարարեց, որ ինքը թույլ չի տա, որ Ուրֆայի ժողովուրդը տարագրվի: «Իսկ դուք բոլորդ անխուսափելիորեն պիտի երթաք մորթվելու՝ հակառակ ձեր պատրաստած կաշառքներուն»,— ավարտեց իր խոսքը Սկրտիչը: Տեղին է մի փոքրիկ հատված բերել Ուրֆայի ասորիների առաջնորդ, պատվելի ճռնապանի հուշերից: «Կուսակցությունները չուզեցին առաջնորդել ինքնապաշտպանության գործը... Ուստի ինքնապաշտպանության միակ խիզախ և անկախ պատասխանատու և առաջնորդը եղավ Յոթնեղբայրյան Սկրտիչ: Ան իր եղբոր Սարգիսին և Ռասթկելենյանին ու իր մյուս ընկերներուն հետ կռվեցավ և քաջաբար միասին նահատակվեցավ...

Ուրֆայի հայ երևելիները ամեն պարագային տակ ինքնապաշտպանության գաղափարին հակառակ կեցան: Միայն վերջին րոպեին կրցան տեսնել իրականությունը, բայց ուշ էր» (Յերոսասպատում Մեծ եղեռնի, Եվա Դերվիշյան, Ուրֆայի ինքնապաշտպանությունը կամ դյուցազնաշունչ հայության վկան, Պեյրուք, 1978, էջ 358–359):

Ուրֆայի հայության մղծավանջն սկսվեց հունիսի 8–ին, երբ ձերբակալվեցին 16 երևելիներ և կուսակցական գործիչներ: Երկու օր անց նրանք քստորվեցին 10 ժամվա ճանապարհի հեռու գտնվող Բագգա գյուղաքաղաքը: Այստեղ բանտում քրդական տարագով ծալոված նրանց այցելեց Սկրտիչը և հայտնեց, որ հաջորդ օրը հարձակում է լինելու բանտի վրա ու բոլորին ազատելու են, սակայն բանտարկյալները չհամաձայնեցին (նույն տեղում, էջ 360): Մի քանի օր անց Ուրֆայի մեծամեծները կոտորվեցին Բագգայից մեկ ժամ հեռու գտնվող մի վայրում:

Հունիսի 25–ին Ուրֆայում սկսվեցին զանգվածային նոր ձերբակալություններ: Հուլիսի 10–ին կառավարչատուն կանչեցին Արտավազդ վարդապետին և պահանջեցին 48 ժամվա մեջ հավաքել հայկական թաղերում գտնվող բոլոր զենքերը: Հայերը հանձնեցին ոչ պիտանի զենքերը: Հուլիսի 26–ին Առաջնորդին նույնպես ձերբակալեցին: Հուլիսի 28–ի գիշերը բոլոր բանտարկյալներին հանեցին բանտից ու տարան դեպի Տիգրանակերտ, սակայն Ուրֆայից մի քանի ժամվա հեռավորության վրա գտնվող Շեթթան Դերեսի վայրում բոլորին կոտորեցին:

Օգոստոսի 4–ին թուրք զինվորներն ու չեթները հանկարծակի պաշարեցին Ուրֆայից երկու ժամ հեռավորության վրա գտնվող Գուտե-

մե և Կարա Քյոփրու վայրերում գտնվող ավելի քան 1500 անգեն հայ զինվորներին ու բոլորին կոտորեցին:

Սկրտիչ Յոթնեղբայրյանը թաքնվում էր Հարություն Ռասթկելենյանեց տանը: Տեղեկանալով այդ մասին՝ թուրք ոստիկաններն Ահմեդի ու Բաքր չաուչի գլխավորությամբ պաշարեցին ողջ թաղը: Երբ թուրքերը փորձեցին բռնաբարել Հարությունի մորը, վերջինս թաքստոցից դուրս թռավ և մաուզերով գնդակահարեց, գետին տապալեց Բաքրին, իսկ Ահմեդը փախավ: Սկրտիչը փոխեց թաքստոցը: Այլևս անհիմաստ էր սպասել և տեղահանության հրամանն ստանալուց հետո միայն զենքի դիմել, ինչպես որոշված էր: Ուրֆացիները որոշեցին չհապաղել: Կռիվը պետք է սկսվեր այն դեպքում, երբ Մայր եկեղեցու զանգերը ուժգնորեն ու անընդհատ ղողանջեին:

Սեպտեմբերի 29–ի առավոտյան թուրք ոստիկանները պաշարեցին Գուտեմեի կոտորածից միակ փրկվածների՝ Սարգիս և Գրիգոր Տարախչյանների թաքստոցը: Եվ... սկսեցին ղողանջել եկեղեցիների զանգերը: Քառորդ ժամ անց բոլորն իրենց դիրքերում էին: Յերոսամարտն սկսված էր:

Սկրտիչ Յոթնեղբայրյանի հրամանով թաղում գտնվող թուրք ոստիկանները զինաթափվեցին, իսկ դիմադրողներն սպանվեցին: Նա հրահանգեց նաև թուրքական և հայկական թաղերի միջև նոր պատնեշներ չբարձրացնել, այլ ամրացնել թուրքական թաղերին նայող տները: Բոլոր դիրքերին բաժանվեցին ռումբեր:

Սեպտեմբերի 30–ի արշալույսին թուրք խուժանը երեք խմբի բաժանված հարձակվեց հայկական թաղերի վրա: Հայերը թույլ տվեցին, որ ամբոխը մտնի թաղերից ներս և ռմբահարեցին նրանց: Առաջին այդ օրը թուրքերը թողեցին 450 դիակ, հայերը տվեցին 8 զոհ:

Կռիվից հետո Յոթնեղբայրյանն ու Ռասթկելենյանն այցելեցին բոլոր դիրքերը: Նրանք ստեղծեցին Ձինվորական խորհուրդ, որի մեջ մտան Հարություն Սիմյանը, Խորեն Կյուպեյանը, Լևոն Եղբերլերյանը, Հովհաննես Իմիրզյանն ու Արմենակ Աթարյանը: Ընտրվեց Պարենավորման մարմին, պատրաստվեց հիվանդանոց: Բացվեց զինագործարան, որտեղ լցնում էին դատարկ փամփուշտները, նորոգում զենքերը: Խորհրդի կենտրոնն էր Չամիչենց տունը:

Ձինվորական խորհրդի կարգադրությամբ հայկական թաղամասը բաժանվեց վեց շրջանների, որոնք բոլորը միասին ունեին 32 դիրք: Յուրքանցյուր շրջան ուներ իր խմբապետը, ամեն տասնյակ՝ իր տասնա-

պետն ու փոխանորդը: Երկու խումբ թողնվեց կենտրոնում՝ իբրև պահեստային ուժ:

Հոկտեմբերի 1-ի գիշերը թուրքերը մտան կաթուղիական եկեղեցու բակը: Մկրտչի հրահանգով ծուղակ սարքվեց և բոլորը ոչնչացվեցին: Նույնը կատարվեց նաև Թեմրին թաղում Գևորգ Ալահայտոյանի գլխավորությամբ: Գերված երկու թուրք զինվորների գեները Մկրտչը հանձնեց կռվին մասնակցած օրիորդ Խանում Քեթենճյանին և օրիորդ Մարիամ Զիլինկիրյանին:

Շուտով հայտնի դարձավ, որ Հալեպից դեպի Ուրֆա է գալիս Ֆախրի փաշան՝ 6000 զորքով ու թնդանոթներով, ինչպես նաև Սուլեյման բեկը՝ 600 կռվողներով: Ուրֆա էին իջնում նաև շրջակա քրդական աշիրեթները:

Հոկտեմբերի 3-ի առավոտյան հայկական թաղի ուղղությամբ արձակվեց առաջին թնդանոթի ռումբը: Նույն գիշեր Հ. Ռասթելենյանին հաջողվեց նոր ծուղակի մեջ զցել թուրքերին:

Մկրտչի եղբայրը՝ Սարգիս Յոթենդրայրյանը՝ Քոռ Սաքոն, Գևորգ Ալահայտոյանը և հինգ ուրիշ քաջեր կարողացան քրդական տարազով աննկատ մոտենալ Ֆախրի փաշայի թնդանոթներին, դիպուկ կրակով ոչնչացնել թնդանոթածիզներին, հանել թնդանոթներից մեկի փակադակը և վերադառնալ:

Հոկտեմբերի 7-ի առավոտյան Հայր Աբրահամի դիրքի մարտիկները նկատեցին, որ դիմացի բլրի լանջին բարձրացել են երկու պատնեշներ, որոնց հետևում տեղադրված են թուրքական թնդանոթներ: Քիչ անց առաջացավ մի թուրք բանազնաց հիսնապետ, որն իր հետ բերել էր Ֆախրի փաշայի նամակը՝ ուղղված Մկրտչի Յոթենդրայրյանին: Փաշան հիացմունք էր հայտնում հայերի քաջության կապակցությամբ և առաջարկում էր հանձնվել՝ խոստանալով, որ դիմադրության մասնակիցները ոչ միայն չեն պատժվի, այլև կարևոր պաշտոններ կստանան թուրքական բանակում: Հակառակ պարագայում թուրք փաշան սպառնում էր քարուքանդ անել ամբողջ հայկական թաղը: Պատասխանի համար ժամանակ էր տրվում մինչև կեսօր:

Մկրտչը հրավիրեց Ձինվորական խորհրդի և խմբապետների խորհրդակցություն: Նա շատ լավ գիտեր, որ ուշ կամ շուտ իրենց կռիվը վերջանալու է, որովհետև աշխարհից կտրված, թուրքական պետության կենտրոնում գտնվող քաղաքը երկար չէր կարող դիմադրել: Ուրֆացի կտրիճներին մնում էր մեռնել քաջաբար ու հպարտ: Քաջ ծանոթ լինելով

թուրքի խոստումների ու երդման արժեքին՝ Մկրտչը պատասխանեց, որ Ուրֆայի հայությունը պիտի կռվի մինչև վերջին մարդը և ավելացրեց, որ մեկ ժամից ինքն սպասում է Ֆախրի փաշային Մասմանայի դիրքում՝ դիրքից դիրք խոսակցություն ունենալու համար: Խոսակցությունը կայացավ, որի ընթացքում փաշան հայ հերոսին երդումով խոստացավ հազարապետի պաշտոն, որին ի պատասխան Մկրտչը թվարկեց հայ ժողովրդի նկատմամբ կատարված բոլոր ոճիրները, որոնք պատմությունը չի ներելու, և թուրքական պետությունը պետք է կործանվի արյան հեղեղներում:

Բանակցություններից հետո Գալաբոյանի դիրքերից թշնամին երկու թնդանոթներից անկանոն կրակի հեղեղ թափեց հայկական թաղերի վրա: Թուրքերը նոր կրակակետ հաստատեցին նաև մինարեթի վրա:

Հոկտեմբերի 8-ին Ֆախրի փաշայի զորքերը նոր ուժեղ հարձակում սկսեցին: Նրանք տների պատերը ծակելով ջանում էին անցնել հայկական Թեմրին թաղը: Նրանց հաջողվեց հավաքվել հայկական տներից մեկի բակում, բայց նրանց վրա դանակներով հարձակվեցին հայ տղամերը: Երեկոյան դեմ թուրքերին հաջողվեց գրավել մի քանի տուն, որը վտանգեց Թեմրին թաղից մինչև Պզտիկ Սեյդան գտնվող շրջանը: Սակայն Մկրտչի մտահղացմամբ Գևորգ Ալահայտոյանը թուրք զինվորի տարազով խաբեց թշնամուն և իմացավ գիշերային կարգախուսը, իսկ 30 հայ մարտիկներ, դարձյալ թուրքի տարազով ծալված, ծուղակի մեջ զցեցին հայկական թաղերին անժանոթ թուրք զինվորներին ու կոտորած սարքեցին: Թուրքերը տվեցին 200 սպանված, իսկ մնացածները փախան հայկական թաղերից:

Հոկտեմբերի 9-ի կիրակի օրը թուրքերին հաջողվեց ամրանալ Թվֆուր կոչվող բլրի գագաթին, որը գտնվում էր հայկական թաղի թիկունքում, և այնտեղից կարելի էր հարվածել հայերի բոլոր դիրքերին ու տներին: Ուղիղ ժամը 12-ին բլրի գագաթից սկսեցին որոտալ թուրքական թնդանոթները: Մկրտչը և Հարությունը շրջում էին դիրքից դիրք ու ժողովրդի մեջ նկատում սարսափ ու վարանում: Այդ ժամանակ զինված օրիորդների երեք խմբեր՝ օրիորդներ Խանում Քեթենճյանի, Մարիամ Զիլինկիրյանի և Կեմչյանի ղեկավարությամբ անցնում են դիրքից դիրք ու քաջալերում կռվողներին: Դիրքերի մարտիկներն սկսում են երգել հայրենասիրական երգեր: Կոչ անելով փամփուշտ չխնայել՝ Մկրտչը դուրս մետվեց իր դիրքից, ծնկեց փողոցի կենտրոնում ու դիմահար կրակով տապալեց առաջ վազող թուրք զինվորին: Հայկական դիրքե-

րից մեկից բազմաթիվ ռուսներ տեղացին հարձակվող թուրքերի վրա, որոնք տվեցին բազմաթիվ սպանվածներ ու սկսեցին փախչել: Հաղթանակը կատարյալ էր: Մակայն այդ պահին թշնամու զնդակը մխրձվեց Մկրտչի աջ ծունկը, և նա տեղափոխվեց հիվանդանոց: Մկրտչի վիրավորվելու լուրն արագորեն տարածվեց ժողովրդի մեջ:

Հիվանդացավ նաև Հարություն Ռասբկելենյանը: Քառասուն աստիճան ջերմությամբ նա սլանում էր դիրքից դիրք՝ կռվողներին խրախուսելու համար, իսկ վերջիններս, 12 օր ու գիշեր կռվելով, հիվանդ էին և ուժասպառ, փոխարինողներ չկային, որովհետև շատ հայ մարտիկներ սպանված էին: Նահատակված էին լավագույն կռվողներ Գարատաշյանը, Վլաջաջյանը, Էդբերլերյանը, Արզուհալաճյանը, Լզլզույանը, Սևքարյանը և ուրիշներ, սպառվելու վրա էր ձեռնառումների պաշարը, դատարկվում էր դինամիտի պահեստը:

Նման պայմաններում հիվանդանոցում, Մկրտչի անկողնու մոտ խորհրդակցության հավաքվեցին Զինվորական մարմնի անդամները՝ կռվի նոր ծրագիր մշակելու համար: Բոլորը միաբերան ուխտեցին կռվել մինչև վերջին փամփուշտը ու վերջին մարդը:

Հոկտեմբերի 10-ի լուսադեմին թուրքական թնդանոթները վերսկսեցին ավերիչ ռմբակոծությունը: Մեկը մյուսի հետևից քանդվում էին հայերի տները, և պաշարման օղակը գնալով սեղմվում էր: Ուրֆացի մարտիկները կռվում էին ավերակների հետևից, անընդհատ «ամենայն տեղ մահը մի է» երգելով:

Հոկտեմբերի 11-ին Մկրտչը նամակ ստացավ գերմանացի Ս. Է. քարտից, որը ցանկություն էր հայտնում հանդիպել հերոսի հետ: Տեսակցության ժամանակ գերմանացի սպան փորձեց համոզել Մկրտչին, որ հետագա դիմադրությունն ավելորդ է, և պետք չէ ժողովրդի բնաջնջման պատճառ դառնալ: Նա խոստացավ հերոսին փոխադրել Գերմանիա, ապահովել զինակիցների կյանքը: Գերմանացու երեսին շարտելով նրա խաղացած բացասական դերը Ուրֆայում՝ Մկրտչը խստորեն պատասխանեց. «Եթե ձեր մեջ տակավին քաղաքակիրթ և քրիստոնյա մարդու զգացում կա, փրկեցեք անապատներում մեջ անգն ու անպատսպար կոտորվող բազմությունները: Ո՛ւր են մեր ղեկավարները, ո՛ւր է մեր առաջնորդը, բերեք միայն այս վերջինը ու անմիջապես վար դնեմ զենքերս»: Էքարտը հեռացավ՝ սպառնալով անձամբ ղեկավարել թնդանոթածությունը (նշվ. աշխ., էջ 393–394):

Հոկտեմբերի 12-ին թնդանոթածությունն ավելի սաստկացավ, և թուրքերը կատաղի հարձակման անցան: Թուրքերը մեծ թվով դիակներ էին թողնում, բայց զոհեր էին տալիս նաև հայերը, որոնց այլևս փոխարինողներ չկային: Պաշարման օղակը սեղմվում էր և վտանգ կար, որ ժողովուրդը մաս առ մաս պիտի ընկներ թուրքերի ձեռքը: Ռասբկելենյանն առաջարկեց, որ կռվող տղաներն իրենք սպանեն իրենց մայրերին ու քույրերին, որպեսզի նրանք չընկնեն թուրքերի ձեռքը: Մկրտչին առաջարկեց մի քանի օրվա դիմադրությունից հետո, երբ այլևս հնարավոր չլինի շարունակել կռիվը, մնացած ուժերով ճեղքել Թլֆտուր-Պետենին ճակատը և ապաստանել շրջակա լեռներում:

Հոկտեմբերի 13-ին չորս ժամվա ռմբակոծությունից հետո թշնամին կրկին հարձակվեց բոլոր դիրքերի վրա: Կռվի էին ելել անգամ փամփուշտ լցնող վարպետները: Թուրքերի ձեռքն անցան նաև մինչ այդ չգրավված տները: Ահավոր կռիվներ տեղի ունեցան հատկապես Հայր Աբրահամի շրջանում: Հայերի զնդակներն իզուր չէին անցնում, ճանապարհները լցվում էին թուրք զինվորների դիակներով, բայց նրանց տեղ կռվի դաշտ էին հասնում նորերը:

Հացորդ օրը հայկական թաղի տարածքը զգալի չափով փոքրացած էր: Մկրտչին ու Հարությունն իրենց շուրջը հավաքեցին վերջին ուժերը, ամրացնել տվեցին նոր դիրքեր, ճշտեցին զինամթերքի քանակը, դասավորեցին մարտիկներին: Տնից տուն, փողոցից փողոց շրջելով, նրանք խրախուսում էին ժողովրդին, որ հանձնվելու մասին չմտածեն: «Քաջությամբ վերջացնենք քաջությանը սկսած գործը», — այս էր նրանց վերջին կարգախոսը:

Մինչև հոկտեմբերի 18-ը կռիվը շարունակվեց նույն սաստկությամբ: Սկսել էր մաղել աշնանային անձրևը, ամենուրեք ավերակներ էին, վառողի ու նեխած դիակների անտանելի հոտ: Այդ պայմաններում անգամ Մկրտչը հղացել էր նոր ծրագիր, որն իրագործելու համար Հարություն Միմյանը նոր ռումբեր էր լցնում: Հայերը ամերիկյան հյուպատոսարանի վրա ճերմակ դրոշ բարձրացրին, և երբ թուրքերը լցվեցին շենքի բակը, հայերը թաքստոցներից դիպուկ կրակով ոչնչացրին բոլորին: Դա վերջին դասն էր Ֆախրի փաշային:

Նույն գիշեր կարճ խորհրդակցությունից հետո հայերը փորձեցին ճեղքել պաշարման օղակը և հեռանալ լեռները, բայց հուժկու կրակի տակ ընկան և վերադարձան դիրքերը՝ այնտեղ մահն ընդունելու համար:

Ողբերգական էր ժողովրդի վիճակը. բազմաթիվ ընտանիքներ սկսեցին դիմել հավաքական անձնասպանության:

Հաջորդ օրը թուրքերն ամեն կողմից խուժեցին հայկական թաղերը և մտան Մայր եկեղեցու գավիթը: Չարաղետ մի գնդակ զարկեց Հարություն Ռասթկելենյանի ճակատին և ընկավ «խաչից նոր իջեցված Քրիստոսի տեսքով» հերոսը:

Յուլիանների 20-ին դիմադրությունը շարունակվում էր միայն երկու թաղերում, իսկ գրավված թաղերում բազմաթիվ կանայք ու աղջիկներ անձնասպան էին լինում: Հրանոթային կրակը դադարեց, և թուրքերը դիրքեր գրավեցին բազմաթիվ հայկական թաղերում ու տներում: Դատենք երեք օր, մինչև որ ընկան ուրֆացի վերջին կտրիճները, և գործը տիրացավ Ուրֆայի ամբողջ հայկական թաղամասին:

Յուլիանների 23-ի կիրակի օրը խոր ու մեռելային լռություն էր: Այդ օրը Ուրֆայի հայության մեկամսյա աննախընթաց հերոսամարտը հասավ իր վախճանին: Եվ Ֆախրի փաշան բացականչեց. «Ինչ կլինեն մեր վիճակը, եթե այդ ծանր օրերին մի քանի Ուրֆաներ մեր դեմ այդպես ծառանային»:

Վերջին օրերին Սկրտիչ Յոթնեղբայրյանին պատգարակով դիրքից դիրք էին պտտեցնում, և միայն նրա երևալը ուժ էր տալիս ուժասպառ մարտիկներին: Մի վերջին ճիգով նա աջ ու ձախ կրակեց թուրք զինվորների վրա և վերջին գնդակով կյանքն ավարտեց փառավոր մահով: Ֆախրի փաշան թնդանոթի 24 համազարկով թուրք խուժանին տեղեկացրեց հսկայի մահը:

Կազմակերպվեց հուլիանների 18-ին ճակատից խոցված Հարություն Ռասթկելենյանի թաղումը, որի մասնակիցներից մեկն ասել է. «Նա խաչից նոր իջեցրած Քրիստոսի տեսք ուներ, ճակատին՝ արյունի պսակ»:

Հայոց աշխարհի համար ընկան նաև Գևորգ Ալախայտոյանը, Սարգիս Յոթնեղբայրյանը, Հարություն Սիմյանը, Արմենակ Աղդարյանը, Լևոն Չերչյանը, Վաղարշ Մեսրոպյանը, Գառնիկ Շամլյանը և շատ ու շատ ուրիշներ:

Եվ եթե մի ամբողջ ամիս տևեց Ուրֆայի հերոսամարտը, ապա դրա մեջ իրենց մեծ բաժինն ունեն Ուրֆայի հայուհիները: Նրանք ոչ միայն գթության քույրեր էին, այլևս զենքը ձեռքին դիրքերի վրա կռվողներ, իրենց ամուսիններին ու եղբայրներին ոգեշնչողներ: Փամիշտակալներով գոտեպնդված տիկին Եղիսաբեթ Յոթնեղբայրյանը Սկրտիչի

կինն էր ու նրա համհարզը: Չինավառ տիկին Սուլթան Սիմյանը Ռասթկելենյանի քույրն էր: Հայ կնոջ պատիվն ու փառքը մինչև երկինք բարձրացնողներից էին նաև օրիորդ Մարիամ Չիլինկիրյանը, օրիորդ Խանում Քեթենճյանը, տիկին Խաթուն Գոնտուրաճյանը և շատ ուրիշներ: Նրանք կամ ընկան դիրքերում, կամ օրհասական վերջին գրոհից հետո թույն ընդունեցին, իսկ շատերն էլ, իրենց զավակների ձեռքից բռնած նետվեցին իրենց ձեռքով հրդեհված տների բոցերի մեջ:

ՀԱՅ ԺՈՂՈՎՈՒՐԴ 1917 Ձ. ՓԵՏՐՎԱՐՅԱՆ ԿԵՆՏՐՈՆԱԿԱՆ ԺԱՄԱՆԱԿԱՆՈՒԹՅԱՆ ՈՒՆԵՑՈՒՄ

ՕՉԱԿՈՍԻ ԱՏԵՂՈՒՄԸ

Առաջին համաշխարհային պատերազմը «ամենազոր դիրիժորի մամ» (Վ. Ի. Լենինի խոսքերն են — Մ. Կ.) արագացրեց ցարիզմի կործանումը, որովհետև այն ծայրահեղորեն սրեց սոցիալ-տնտեսական ճգնաժամը և դասակարգային հակասությունները Ռուսաստանում: Երկրի տնտեսությունը փլուզվեց, իսկ բնակչության հիմնական մասը մատնվեց սովի: Նույնը տեղի ունեցավ նաև Անդրկովկասում: Հայաստանում կրճատվեցին ցանքատարածությունները, անասնազվիսաքանակը, նվազագույնի հասավ պղնձի, գինու-կոնյակի արտադրությունը, ստեղծվեց պարենային ծանր կացություն, աշխատավոր ժողովուրդը մատնվեց ծայրահեղ աղքատության ու սովի:

Նման պայմաններում աշխուժացավ հեղափոխական շարժումը, որն ընդգրկեց նաև բանակը: Աճող հեղափոխական շարժման, տնտեսական քայքայվածության և ռազմաճակատներում կրած պարտությունների հետևանքով ցարիզմը խոր ճգնաժամ էր ապրում:

1917 թ. հունվարի 9-ին 1905 թ. «Արյունոտ կիրակիի» տարեդարձը նշելու համար Պետրոգրադում գործադուլ արեց 145 հազար մարդ: Հզոր գործադուլներ տեղի ունեցան նաև Մոսկվայում, Խարկովում, Նիժնի Նովգորոդում, Բաքվում և այլ քաղաքներում: Այդ գործադուլները մասսայական քաղաքական ցույցերի սկիզբը դրեցին: Փետրվարի կեսերին և ցույցերի ալիքը խիստ բարձրացավ: Բանվորները ցույցի էին դուրս գալիս «Կորչի պատերազմը», «Հաց», «Կեցցե հանրապետությունը» լոզունգներով: Ի պատասխան դրա՝ կառավարությունը մշակեց Պետրոգրադի պաշտպանության պլանը: Պետրոգրադի բանվորների թիվը հասնում էր 400 հազարի:

1917 թ. փետրվարի 23-ը (մարտի 8-ը) իրադարձությունների զարգացման շրջադարձային օր եղավ: Այն դարձավ Փետրվարյան բուլժուա-դեմոկրատական հեղափոխության առաջին օրը: Այդ օրը գործադուլ էին անում Պետրոգրադի 50 ձեռնարկությունների շուրջ 128 հազար բանվորներ, որոնց մեջ մեծ թիվ էին կազմում կանայք: Պետրոգրադի ՈՍԴ(բ)Կ բոլշևիկյան կոմիտեի կոչով բանվորները նշեցին Կանանց միջազգային օրը: Փետրվարի 24-ին (մարտի 9-ին) արդեն գործադուլ էր անում շուրջ 200 հազար մարդ: Չնայած ոստիկանական ուղեկալներին, Վիբորգյան շրջանի բանվորների նշանակալի մասն անցավ քաղաքի կենտրոնական մասը և հորդեց Լիտեյնի և Նևսկի պողոտաները: Փետրվարի 25-ի (մարտի 10-ի) առավոտյան կամուրջների վրա և քաղաքի կենտրոնում բանվորներին դիմավորեցին զինվորական ուղեկալները: Փետրվարի 25-ին Պետրոգրադում սկսվեց համընդհանուր գործադուլ, որին մասնակցում էին 300 հազար բանվորներ: Նույն օրը Պետրոգրադի բոլշևիկյան կոմիտեն թռուցիկներով կոչ արեց զինվորներին՝ միանալ բանվորներին: Կոմիտեի երեք անդամներ ձերբակալվեցին:

Փետրվարի 26-ի (մարտի 11-ի) կիրակի օրվա կեսօրին տասնյակ հազարավոր բանվորներ շարժվեցին քաղաքի կենտրոն՝ վստահ լինելով, որ իրենց վրա չեն կրակի: Սակայն Պետրոգրադի ռազմական օկրուգի հրամանատար գեներալ Ա. Խաբալովը, կատարելով Նիկոլայ 2-րդ ցարի հրամանը՝ մայրաքաղաքում կարգուկանոնը վերականգնելու մասին, կարգադրեց զորքերին կրակ բացել ցուցարարների վրա, որի հետևանքով 40 մարդ սպանվեցին և նույնքան էլ վիրավորվեցին: Սակայն Պավլովյան զնդի զինվորների մի մասն անցավ ցուցարարների կողմը: Փետրվարի 27-ի առավոտյան ցուցարարների կողմն անցավ Վոլինյան զնդի ողջ պահեստային մասը, որի զինվորները բանվորների հետ գնացին բանտ և ազատեցին քաղաքատարկյալներին, հրդեհեցին Օկրուգային դատարանի շենքը: Չինվորներից ստացած զենքով բանվորներն սկսեցին ավերել ոստիկանական բաժանմունքները: Այնուհետև բանվորներն ու զինվորները գրավեցին Կրոնվերկյան զինապահեստը և գրավեցին 40 հազար հրացան և 30 հազար ատրճանակ: Փետրվարի 27-ի առավոտյան ապստամբեցին շուրջ 10 հազար զինվորներ, ցերեկը նրանց թիվը հասավ 25 հազարի, իսկ երեկոյան՝ 67 հազարի: Փետրվարի 28 (մարտի 13)-ին զինվորներն ու բանվորները գրավեցին ծովակալության շենքը (Ադմիրալտեյստվո), Ձմեռային պալատը և Պետրոպավլովյան ամրոցը:

Սիկուլայ 2-րդի ցուցումով Ստավկան շտապ ստեղծեց պատժիչ ջրկատ՝ զեներալ Ն. Իվանովի հրամանատարությամբ և նետեց Պետրոգրադի վրա: Մակայն ջրկատի զինվորները դեռ մայրաքաղաքի մատուցներում անցան հեղափոխական գործերի կողմը: Ցարական վերջին կառավարության մինիստրները ձերբակալվեցին և բանտարկվեցին Պետրոպավլովյան ամրոցում: Հեղափոխությունը Պետրոգրադում հաղթանակեց:

Զինված ապստամբության բուն ընթացքում Պետրոգրադի հեղափոխական պրոլետարիատը ձեռնամուխ եղավ Բանվորների դեպուտատների Սովետի ստեղծմանը: Ձեռնարկություններում Սովետի դեպուտատների ընտրություններն սկսվեցին դեռևս փետրվարի 24-25-ին: Փետրվարի 27-ի ցերեկը ժողովրդի հսկայական զանգվածները հասան Պետական դումայի շենքին, զինվորներն արձակեցին ժամապահներին և դրեցին իրենց պահակախումբը: Մենշևիկներ Ն. Զխեիձեն և Սկոբելևը մտան ներս և դումայի մենշևիկ պատգամավորների հետ միասին իրենց հայտարարեցին «Բանվորների դեպուտատների սովետի ժամանակավոր գործադիր կոմիտե»: Ժամանակավոր գործադիր կոմիտեն կոչ արեց բանվորներին և զինվորներին՝ ընտրել Պետրոգրադի Սովետի դեպուտատներ և նրա առաջին նիստը մշակակեց փետրվարի 27-ի երեկոյան ժամը 7-ին: Առաջին նիստին մասնակցեց 250 դեպուտատ, ընտրվեց Գործադիր կոմիտե, որի նախագահ ընտրվեց մենշևիկ Ն. Զխեիձեն, նախագահի ընկերներ՝ տրուդովիկ Ա. Կերենսկին և մենշևիկ Սկոբելևը: Գործադիր կոմիտեն բաղկացած էր 39 հոգուց, որից 6-ը բոլշևիկ, 13 մենշևիկ, 6 էսեռ, 2 տրուդովիկ, անկուսակցականներ: Պետրոգրադի սովետի դեպուտատների թիվը հասնում էր 3000-ի, որից 800-ը՝ բանվորներ, 2000-ը՝ զինվորներ: Բանվորների և զինվորների ներկայացուցիչների մեծամասնությունը անկուսակցականներ էին և այդ պահին զնում էին Գործկոմի մենշևիկա-էսեռական մեծամասնության հետևից: Պետրոգրադի սովետը դարձավ հեղափոխական իշխանություն: Կազմակերպվեցին զինվորական և պարենային հանձնաժողովներ, ստեղծվեց բանվորական զինված միլիցիա, հսկողություն սահմանվեց տպարանների, երկաթուղու վրա: Սովետի մենշևիկա-էսեռական ղեկավարությունը կառավարություն կազմելուն մասնակցելու հարց չէր դնում, մինչդեռ բոլշևիկները հրապարակեցին Մանիֆեստ՝ ժամանակավոր հեղափոխական կառավարություն ստեղծելու կոչով:

Փետրվարի 27-ին, երբ ապստամբած ժողովուրդը ներխուժեց Տավրիկյան պալատ, դահլիճներից մեկում Պետական դումայի ներկայացուցիչներն ընտրեցին Պետական դումայի ժամանակավոր կոմիտե, որի մեջ մտան Պետական դումայի նախագահ, օկտյաբրիստ Մ. Ռոձյանկոն (նախագահ), կադետ Ն. Նեկրասովը (տեղակալ), օկտյաբրիստ Ի. Դմիտրյուկովը, պրոգրեսիստ Ա. Կոնովալովը, տրուդովիկ, հետո էսեռ Ա. Կերենսկին, մենշևիկ Ն. Զխեիձեն, օկտյաբրիստ Ս. Շիլյովսկին, կադետ Պ. Միլյուկովը, անկուսակցական Մ. Կարաուլովը, կենտրոն խմբից Վ. Լվովը, պրոգրեսիստ Վ. Ռեյսկին: Փետրվարի 28-ի երեկոյան Մ. Ռոձյանկոն հայտարարեց ժամանակավոր կոմիտեի կողմից կառավարական ֆունկցիաներն իր վրա վերցնելու մասին:

Պետրոգրադի Սովետը և ժամանակավոր կոմիտեն գործում էին միմյանցից անկախ: Ժամանակավոր կոմիտեն որոշեց արագացնել նոր կառավարության ձևավորումը և այդ նպատակով Մոսկվայից հրավիրեց Համամիութենական երկրային (զեմսկի) միության նախագահ իշխան Գ. Ե. Լվովին: Մարտի 1-ին բանակցություններ սկսվեցին Պետրոգրադի Սովետի գործկոմի և ժամանակավոր կոմիտեի միջև՝ նոր կառավարություն կազմելու մասին: Մարտի 2-ին Սովետի ընդհանուր ժողովը համաձայնություն տվեց ժամանակավոր կառավարություն կազմելու մասին:

Մարտի 3-ին Սիկուլայ 2-րդ ցարը և հետո ցարական ընտանիքի անդամները հայտարարություն արեցին գահից հրաժարվելու մասին:

Զուգահեռաբար Սովետի ընտրություններ եղան նաև Մոսկվայում: Այստեղ ընտրվեց նաև ժամանակավոր հեղափոխական կոմիտե, որի նախագահ ընտրվեց մենշևիկ Ա. Նիկիտինը:

Պետրոգրադում 1917 թ. մարտի 2-ին (15-ին) Պետական դումայի ժամանակավոր կոմիտեն կազմավորեց ժամանակավոր կառավարություն, որը գոյատևեց մինչև 1917 թ. հոկտեմբերի 25-ը (նոյեմբերի 7-ը): Այն գործադիր իշխանության բարձրագույն մարմին էր, որը կատարում էր նաև օրենսդրական ֆունկցիաներ: Առաջացավ երկիշխանություն՝ բանվորների, զինվորների ու գյուղացիների դեպուտատների Սովետներ և ժամանակավոր կառավարություն: Կերջինիս մեջ մտան կադետ, իշխան Գ. Ե. Լվովը՝ մինիստր-նախագահ և ներքին գործերի մինիստր, կադետ Պ. Միլյուկովը՝ արտաքին գործերի մինիստր, օկտյաբրիստ Ա. Գուլկովը՝ ռազմա-ծովային մինիստր, կադետ Ն. Նեկրասովը՝ հաղորդակցության մինիստր, պրոգրեսիստ Ա. Կոնովալովը՝ առևտրի և արդյունարեության, անկուսակցական Մ. Տերեշչենկոն՝ ֆինանսների, կադետ Ա.

Մանուիլովը՝ լուսավորության, կաղետ Ա. Շինգարյովը՝ հողագործության, էտե Ա. Կերենսկին՝ արդարադատության մինիստր, Վ. Լվովը՝ Սինոդի օբեր-դատախազ, օկտյաբրիստ Ի. Գոդնևը՝ պետական վերահսկիչ:

Տեղերում ժամանակավոր կառավարության իշխանությունը իրականացնում էին նահանգային և զավառական կոմիսարները: Ժամանակավոր կառավարության ստեղծմամբ Փետրվարյան հեղափոխությունը փաստորեն ավարտվեց: Այն պետք է գործեր մինչև Համառուսաստանյան Սահմանադիր ժողովի հրավիրումը:

Փետրվարյան հեղափոխության հաղթանակի լուրը հասավ նաև Անդրկովկաս ու Հայաստան: Մարտի սկզբներին ցույցեր ու միտինգներ տեղի ունեցան ամբողջ Հայաստանում՝ Կարսում, Սարիղամիշում, Ալեքսանդրապոլում, Երևանում, Մեծ Ղարաքիլիսայում, Էջմիածնում, Լոռիում, Ղարաբաղում, Նախիջևանում, Վանում, Բայազետում, Ալաշկերտում, Էրզրումում, Երզնկայում և այլուր: Առավել նշանավորը Կարսի կայազորի ապստամբությունն էր, որին միացան տեղի բանվորները, արհեստավորները, մտավորականությունը: Այստեղ շարժումը գլխավորում էին բոլշևիկները: Մարտի 6-ին ուղքի կանգնեց Կարսի 40 հազարանոց կայազորը: Ապստամբները ձերբակալեցին բերդի պարետին, շտաբի պետին, քաղաքի պարետին, նահանգապետին, բազմաթիվ սպաների ու զեներալների: Մինչև մարտի 10-ը ապստամբները գրավեցին փոստը, հեռագրատունը, ձերբակալվեց ոստիկանության և ժամդարմերիայի լրիվ կազմը, ոչնչացվեց Կարսի ռազմական դատարանը:

Ալեքսանդրապոլում ցույցերի ալիքը գագաթնակետին հասավ մարտի 10-ին:

Հեղափոխությունը համեմատաբար թույլ արծազանք գտավ Երևանում, որը գլխավոր մայրուղիներից հեռու ընկած զավառական քաղաք էր: Այնուամենայնիվ, այստեղ ևս կայացան զինվորական և աշխատավորական ցույցեր:

Ալավերդու բանվորությունը ձեռնարկատերերին ներկայացրեց տնտեսական պահանջներ: Հանրահավաքներ տեղի ունեցան Ախալքալաքում և Ախալցխայում: Մարտի 5-ին Կովկասի փոխարքա Նիկոլայ Նիկոլանիչ Ռոմանովը հրաժարական տվեց:

1917 թ. մարտի 9-ին ժամանակավոր կառավարությունն Անդրկովկասում ստեղծեց իր տեղական մարմինը՝ ՕԶԱԿՈՄ-ը՝ Անդրկովկասյան Հատուկ Կոմիտեն, որի կազմի մեջ նտան կաղետներ Խառլամովը (նախագահ), Պապաջանյանը, Պերներզևը, Ջաֆարովը, սոցիալ-ֆեդե-

րալիստ Աբաշիձեն: Մարտի 10-ին Աբաշիձեին փոխարինեց մեռնիկ Չխենկելին: Օզակոմի վրա դրվեց պատերազմի իրավունքով գրավված Արևմտյան Հայաստանի քաղաքացիական վարչության կառավարումը:

Հայաստանում ևս ստեղծվեցին բանվորների և զինվորների պատգամավորների խորհուրդներ: 1917 թ. մարտին խորհուրդներ ստեղծվեցին Ալավերդում, Ղափանում, Երևանում, Ալեքսանդրապոլում, Կարսում, Շուշիում, Սարիղամիշում, Խնուսում, Կաղզվանում, Ախալքալաքում, Օլթիում, Երզնկայում, Վանում, Բայազետում և այլուր: Դրանց կողքին գործում էին Օզակոմի նահանգական և մարզային կոմիսարիատներն ու գործադիր կոմիտեները: Կային նաև գյուղական գործադիր կոմիտեներ, որոնք նույնպես Օզակոմի իշխանության մարմիններ էին:

Օզակոմի կառավարման ժամանակաշրջանն ընդունված է համարել անիշխանության ժամանակաշրջան, որն արտահայտվում էր առաջին անհրաժեշտության մթերքների ու ապրանքների անընդհատ աճող թանկությամբ ու շատ վայրերում մոլեգնող սովով: Տեղի ունեցող բազմաթիվ ժողովներն ու համագումարները, որոնք առաջ էին քաշում գանազան ծրագրեր, բարձրացնում էին նաև ժողովրդի պարենավորման հարցը, բայց դրանք հարցը չէին լուծում: Մինչդեռ պարենային ճգնաժամի գլխավոր պատճառը շարունակվող պատերազմն էր, որին զումարվում էր Օզակոմի ու նրա տեղական մարմինների՝ ժամանակի թելադրանքով պայմանավորված անճարակությունն ու անգործությունը:

Կատարյալ աղքատություն, սով ու թշվառություն էր տիրում ողջ Հայաստանում, որն իր հերթին թալան ու գողություն էր ծնում: Գյուղերի բնակչությունը օրը ցերեկով թալանի էր ենթարկվում, իսկ Օզակոմի իշխանությունները անգործության էին մատնված: Անզոր էր նաև Երևանի նահանգային իշխանությունը:

Տնտեսական հիմքի վրա ծագեցին հուզումներ, որոնք լայն չափեր ընդունեցին հենց Երևանում: Այդ հուզումների ընթացքում տեղի էին ունենում մթերքի պահեստների, շուկաների, խանութների ավերում ու թալան: Երևանում անկարգությունները զսպվեցին զորքով: Հայաստանում մեծ պրոբլեմ էր նաև քրդական ավազակախմբերի թալանչիական հարձակումները բնակչության վրա:

ԺԱՄԱՆԱԿԱՎՈՐ ԿԱՌԱՎԱՐՈՒԹՅԱՆ 1917 Թ. ԱՊՐԻԼԻ 26–Ի ԿԱՐԳԱԴՐՈՒԹՅՈՒՆԸ ԱՐԵՎԱՏՏՅԱՆ ՀԱՅԱՍՏԱՆԻ ՄԱՍԻՆ

1917 թ. ապրիլի 26–ին հրապարակվեց ժամանակավոր կառավարության որոշումը՝ Արևմտյան Հայաստանի կառավարման մասին: Այն ստորագրել էին ժամանակավոր կառավարության մինիստր–նախագահ, իշխան Գ. Լվովը, արտաքին գործերի մինիստր Պ. Միլյուկովը և Գործերի կառավարիչ Վլ. Եաբոկովը: Կարգադրությունը պարունակում էր հետևյալ հոդվածները.

Հոդված 1. Պատերազմի իրավունքով գրավված Թուրքահայաստանի քաղաքացիական կառավարումը վերցվում է Կովկասյան իշխանությունների, ինչպես նաև Կովկասյան ռազմաճակատի հրամանատարության իրավասությունից և անմիջականորեն ենթարկվում ժամանակավոր կառավարությանը:

Հոդված 2. Երկրամասի քաղաքացիական կառավարումը հանձնվում է ժամանակավոր կառավարության նշանակած Թուրքահայաստանի ընդհանուր կոմիսարին:

Հոդված 3. Թուրքահայաստանի ընդհանուր կոմիսարի մոտ գտնվում է քաղաքացիական մասի օգնականը:

Հոդված 4. Ընդհանուր կոմիսարը, իր քաղաքացիական մասի օգնականի զեկուցման համաձայն, անմիջապես ներկայացնում է իր նկատառումները Թուրքահայաստանի շրջանների կառավարման մասին:

Այսպիսով՝ ինչպես գրում է Ս. Վրացյանը, Թուրքահայաստանի խնդիրը նորից դրվում էր միջազգային հողի վրա, հանվում էր կովկասյան միջցեղային կրթոտ հարաբերությունների միջավայրից և կապվում ուղղակի կենտրոնական կառավարության հետ, որն ինքնին մեծ հաջողություն էր հայերի համար (Ս. Վրացյան, Հայաստանի Հանրապետություն, Երևան, 1993, էջ 27):

Նորագույն ուսումնասիրողներից Վահան Մելիքյանն այն կարծիքն է հայտնում, որ ժամանակավոր կառավարության որոշման գլխավոր նպատակը Արևմտյան Հայաստանի անեքսիան էր և նրա վարչական ենթարկումը կենտրոնին (Վ. Մ. Մելիքյան, 1917 թ. Փետրվարյան հեղափոխությունը և Հայաստանը, Երևան, 1997, էջ 148): Նա գտնում է նաև, որ նշված որոշումը օրենսդրական տեսք հաղորդեց Արևմտյան Հայաստանի կառավարմանը և Հայաստանի անկախության կորստից հետո ա-

ռաջին անգամ ճանաչվեց Արևմտյան Հայաստանի գոյությունը (նշվ. աշխ., էջ 149):

Ժամանակավոր կառավարության մայիսի 15–ի հրամանով Թուրքահայաստանի և պատերազմի իրավունքով գրավված մարզերի կոմիսար նշանակվեց գեներալ–կոմիսար Պյոտր Ավերյանովը, որը մայիսի 25–ին անցավ իր պարտականությունների կատարմանը:

Հուլիսին հաստատվեց Ռուսաստանի պետական սահմանը Արևմտյան Հայաստանում, որն անցնում էր Բայբուրդ–Դերջան–Մամախաթուն–Խնուս–Մանազկերտ–Արճեշ–Բերկրի–Սարայ քաղաքներով:

Ինչպես վկայում է Ս. Վրացյանը՝ գործը չուշացավ: Հատկացվեցին մեծագումար վարկեր, ձեռնարկվեցին միջոցներ՝ գաղթականության վերադարձի ուղղությամբ: Կարճ ժամանակում Թուրքահայաստանը և մանավանդ Տարոնն ու Վասպուրականը վերակենդանացան: Ամեն տեղ բռնել էր հայ ազգաբնակչությունը, գյուղերը վերաշինվում էին, արտերը ծածկվում էին կանաչով: Գործում էին զանազան բարեգործական հաստատություններ, ստեղծվում ինքնապաշտպանական խմբեր: Արևմտյան Հայաստանը հարություն էր առնում մոխիրների տակից (Ս. Վ., էջ 29):

Գեներալ–կոմիսար Պ. Ավերյանովի 1917 թ. սեպտեմբերի 9–ի հրամանով նախկին վիլայեթների փոխարեն Արևմտյան Հայաստանի տարածքներից ստեղծվեցին երեք մարզեր՝ Էրզրումի, Խնուսի, Վանի: Այստեղ համապատասխանաբար կոմիսարներ նշանակվեցին Յա. Գլոտովը, Ն. Նիկոնենկոն, Կոստի Համբարձումյանը:

Օգոստոսի 8–ին սահմանվում է գեներալ–կոմիսարի քաղաքացիական մասի երկրորդ տեղակալի պաշտոն, որն զբաղեցնում է Ռաշնակցության նշանավոր գործիչ, բժիշկ Հակոբ Ջավրիսը (Ջավրիյան):

1917 թ. օգոստոսի 31–ին Պ. Ավերյանովը ժամանակավոր կառավարությանն է ներկայացնում Արևմտյան Հայաստանում մարզային ու քաղաքային միլիցիա ստեղծելու օրենքի նախագիծ:

Միանգամայն համամիտ ենք Վ. Մելիքյանի այն եզրակացությանը, որ Արևմտյան Հայաստանը առաջին անգամ իր պատմության մեջ ուղղակիորեն ենթարկվեց Ռուսական պետությանը, և Ռուսաստանի կողմից հայկական հողերի կցումը, անեքսիան, տվյալ պատմական իրողության մեջ անվիճելիորեն դրական քայլ էր, նույնիսկ Հայկական հարցի լուծում էր նշանակում (Յ. Ս., էջ 154):

ԱՐԵՎՍՏԱՅԱՅԵՐԻ ԱՌԱՋԻՆ ՀԱՄԱԳՈՒՄԱՐԸ

Փետրվարյան հեղափոխությունից հետո անհավատալի կենսու-
նակություն դրսևորեց Մեծ եղեռնի արհավիրքն ապրած արևմտահայ
ժողովուրդը և քայլեր ձեռնարկեց սեփական ճակատագրի տնօրինման
ուղղությամբ: Այդ առումով մեծ դեր կատարեց Արևմտահայերի առաջին
համագումարը, որը կայացավ Երևանում՝ 1917 թ. մայիսի 2–11–ը: Հա-
մագումարի ոգին Անդրանիկն էր: Դեռևս ապրիլին նա Թիֆլիսում հիմնել
էր մի ընկերություն, որը պետք է զբաղվեր արևմտահայությանը հուզող
հարցերով և այդ նպատակով հիմնադրեց «Հայաստան» թերթը, որի նա-
խաձեռնողներ դարձան Անդրանիկը և Վ. Թոթովենցը: Թերթը հենց այդ-
պես էլ կոչվում էր՝ «Անդրանիկի օրգան»:

Համագումարին ներկա էին 80 պատգամավորներ և 400 հյուրեր:
Համագումարի պատվավոր նախագահ ընտրվեց Անդրանիկը: Նախա-
գահության կազմում էին Լևոն Շանթը, Վրթանես Փափագյանը, Արտակ
Դարբինյանը:

Համագումարի հանդիսավոր բացումը կատարեց Անդրանիկը,
իսկ բացման խոսքն ասաց Արամ Մանուկյանը:

Համագումարն ընտրեց 15 հոգուց կազմված Արևմտահայ ազգա-
յին խորհուրդ, որոնցից 8–ը դաշնակցականներ էին: Խորհրդի մեջ
մտան Անդրանիկը, Սմբատ Բորոյանը (Մախլուտո), Հրանտ Գալիկյանը,
Արտակ Դարբինյանը, Ջապել Եսայանը, Ավ. Թերզիբաշյանը, Գ. Հայկու-
նին (բոլշևիկ), Հմ. Մանուկյանը, Լևոն Շանթը, Վ. Պապիկյանը, դոկտոր
Խ. Բոնապարտյանը, Կարո Սասունին, Հակ. Տեր–Ջաքարյանը, Վահան
Փափագյանը (Կոմս): Խորհուրդն իր կողմից ընտրեց 5 հոգուց բաղկա-
ցած բյուրո՝ Վահան Փափագյան, Արտակ Դարբինյան, Հ. Տեր–Ջաքա-
րյան, Կ. Սասունի, Հ. Գալիկյան: Գրավված վայրերի և Անդրկովկասի
զանազան կենտրոններում կազմվեցին Արևմտահայ բյուրոյի մասնա-
ճյուղեր, որոնք դարձան արևմտահայության ներկայացուցիչները: Բյու-
րոյին հաջողվեց համախմբել գաղթականների օգնության գործով
զբաղվող բոլոր մարմիններին:

Արևմտահայ խորհրդին կից ստեղծվեցին կրթական, որբանոցա-
յին, առողջապահական պարենավորման, իրավաբանական, աշխա-
տանքի, տեղեկատու հանձնաժողովներ:

Արևմտահայ խորհուրդը գոհունակությամբ արձանագրեց, որ
մինչև 1917 թ. գարունը Կովկասից Վան, Բիթլիս, Կարին և Տրապիզոն են
ներգաղթել շուրջ 150 հազար արևմտահայ գաղթականներ:

Համագումարը միաձայնությամբ ընդունեց բանաձև, որը ձևակեր-
պում էր հետևյալ հետագա անելիքները. 1. թուրքահայ ժողովրդի ֆիզի-
կական գոյության պահպանում և նրա քայքայված տնտեսության վերա-
կանգնում, 2. հայրենիքի վերաշինություն, 3. նոր սերնդի կրթական, ֆի-
զիկական և քաղաքացիական դաստիարակություն: Դրանով համագու-
մարն ավարտեց իր աշխատանքները:

ՀԱՅՎԱԿԱՆ ԱԶԳԱՅԻՆ ԶՈՐԱՄԱՍԵՐԻ ԱՏԵՂՃՈՒՄԸ

Փետրվարյան հեղափոխության հետևանքով 1917 թ. գարնանը
Կովկասյան բանակը հայտնվեց չափազանց ծանր դրության մեջ, որի
գլխավոր պատճառը ներքին անկազմակերպվածությունն էր: Ծայր ա-
ռավ անկասելի դասալքությունը, բանակում սով ու համաճարակ էր: Այդ
ամենը ստիպեցին ժամանակավոր կառավարությանը և ռուսական բա-
նակի զերագույն հրամանատարությանը՝ փոխել ազգային զորամիավո-
րումների նկատմամբ իրենց վերաբերմունքը և դրանց ստեղծմանը խո-
չընդոտելու փոխարեն հովանավորել այն: Վերաբերմունքի նման փոփո-
խության բուն նպատակն էր հանձին ազգային զորամասերի ձեռք բերել
առավել կարգապահ, մարտունակ և հուսալի զորամիավորումներ:

1917 թ. ապրիլի վերջերին կոնկրետ քայլեր ձեռնարկվեցին ար-
դեն գոյություն ունեցող հայկական հրաձգային գումարտակների հե-
տագա ընդլայնման ուղղությամբ: Մայիսի 5–ին Կովկասյան ռազմաճա-
կատի հրամանատար, գեներալ Յուդենիչը հեռագրով խնդրեց Գերա-
զույն շտաբի թույլտվությունը՝ հայկական վեց գումարտակները գնդերի
վերածելու մասին: Յուրաքանչյուր գունդ ունենալու էր սկզբում երկու,
ապա՝ երեք, իսկ հետո՝ չորս գումարտակ: Սակայն մայիսի 10–ին Մոզի-
լյովի զորակայանից ստացվեց մերժողական պատասխան՝ վկայակոչե-
լով պարենային դժվարությունները: Սակայն մայիսի 27–ին Յուդենիչը
նոր զեկուցագիր ուղարկեց Մոզիլյով, որով ավելի հանգամանորեն էր
հիմնավորում հայկական գնդերի ստեղծման անհրաժեշտությունը: Չե-
կուցագրում շեշտվում էր, որ հայկական գումարտակներում կարգապա-
հությունը համեմատաբար բարձր է, հեղափոխության «կազմալուծող»

ազդեցությունը նրանց վրա քիչ է, իսկ ռազմաճակատում հայերը վստահելի և մարտունակ ուժ են: Այս անգամ Յուդենիչը խնդրում էր թուլյատրել հայկական գումարտակներից կազմել երկգումարտականոց գնդեր և միավորել դրանք հայկական մեկ բրիգադի մեջ, իսկ հետագայում գնդերի կազմը հասցնել երեք գումարտակի:

1917 թ. մայիսի վերջին իր գործունեությունն սկսեց ռուսական բանակում ծառայող հայ բարձրաստիճան զինվորականությունը: 1917 թ. մայիսի 22-ին փոխգնդապետ Յ. Տիգրանյանի, Ն. Մելիք-Փարսադանյանի և աշուղ Ջիվանու որդու՝ տեռ Պ. Լևոնյանի նախաձեռնությամբ Պետրոգրադում ստեղծվեց Հայկական զինվորական հանձնաժողովը, որի նախագահ դարձավ Գերագույն շտաբի գեներալ-մայոր Լ. Տիգրանյանը: Շուտով նրա կազմի մեջ մտավ Գերագույն շտաբի անդամ, Պետրոգրադի ռազմական օկրուգի գլխավոր շտաբի պետ գեներալ-մայոր Հակոբ Բագրատունին (տե՛ս Յ. Ավետիսյան, Գեներալ Հակոբ Բագրատունի, ՊԲՀ, 1997, Յ. 1): Այդ հանձնաժողովի նպատակն էր Կովկասյան ռազմաճակատում կենտրոնացնել ռուսական բանակում ծառայող շուրջ 120 հազար հայ զինվորականներին և կազմավորել գոնե մեկ հայկական կորպուս:

Մայիսի 31-ին զինվորական հանձնաժողովի պատվիրակությունը Ռազմածովային մինիստր Ա. Կերենսկուն հանձնեց մի զեկուցագիր՝ հայկական չորս դիվիզիաներ կազմելու մասին, որը և արժանացավ մինիստրի հավանությանը:

Պրանից հետո Պետրոգրադի Հայկական զինվորական հանձնաժողովը լուծարվեց և ռազմաճակատային սպա Արսեն Շահմազյանի նախագահությամբ թիֆլիսում հիմնվեց Հայ զինվորական միությունը:

Համանման խնդրանքով հունիսի 10-ի նամակով Ա. Կերենսկուն դիմեցին նաև Օզակոմի նախագահ Վ. Խառլամովը և նրա անդամ Մ. Պապաջանյանը, որը և համաձայնություն տվեց հայկական հրաձգային գումարտակները անհապաղ գնդերի վերածել և նրանցից դիվիզիաներ ձևավորել: Մակագրված նամակը հանձնվեց Գերագույն շտաբ՝ Գերագույն զորահրամանատար, գեներալ Ա. Բրուսիլովին, որն էլ 1917 թ. հունիսի 19-ի թիվ 480 հրամանով արտոնեց ստեղծել հայկական վեց գունդ՝ յուրաքանչյուրը երկու գումարտակից: Մի քանի օր անց՝ հունիսի 28-ի թիվ 540 հրամանով Ա. Բրուսիլովը թուլյատրեց կազմվելիք 6 գնդերի հիման վրա ստեղծել մեկ Հայկական հրաձգային բրիգադ (տե՛ս Ա. Նազարյան, Հայկական զորամասերի կազմավորումը Կովկասյան ճակատում

1914–1918 թվականներ, Երևան, 1999, էջ 103): Հայկական բրիգադի ձևավորման գործը հանձնարարվեց գնդապետ Պավել Բեժանբեկին:

1917 թ. օգոստոսի վերջերին հայկական հրաձգային 6 գնդերի հրամանատարներն էին.

1-ին գունդ՝ փոխգնդապետ Ղ. Կարաքեչիչյան,

2-րդ գունդ՝ գնդապետ Ս. Սամարցյան,

3-րդ գունդ՝ գնդապետ Լ. Հովսեփյան,

4-րդ գունդ՝ փոխգնդապետ Ա. Հովսեփյան,

5-րդ գունդ՝ գնդապետ Պ. Փիրումյան,

6-րդ գունդ՝ փոխգնդապետ Մ. Մելիք-Սուրադյան:

Ինչպես նշում է Ա. Նազարյանը, ռուսական բանակում այդ ժամանակ մեծ տարածում գտավ «հարվածային» կամ «մահապարտներ» անվանումով զանազան գումարտակների և գնդերի հռչակումը՝ գորքի մարտական ոգին բարձրացնելու նկատառումով: 1917 թ. հուլիսին հայկական 5-րդ, ապա՝ 2-րդ գնդերը նույնպես սկսեցին կրել «մահապարտներ» անվանումը, այլ ոչ թե Սարդարապատի ճակատամարտի ժամանակ, ինչպես նշվում է շատ աշխատություններում (Ա. Նազարյան, էջ 107, ծան. 85, էջ 221):

1917 թ. գարնանից Անդրկովկասում և Հայաստանում գնալով ուժեղանում էին թուրք-թաթարական և քրդական ավազակախմբերի զինված խժոժությունները: Ընդառաջ գնալով այդ կապակցությամբ հայերի դիմումներին՝ 1917 թ. օգոստոսի 30-ին ժամանակավոր կառավարության որոշմամբ Կովկասյան գործող բանակի կազմում ստեղծվեց Երևանյան ջոկատը, որի գլխավոր խնդիրն էր մաքրել ռազմաճակատի թիկունքը քրդական և մահմեդական ավազակախմբերից: Իսկ այդ ժամանակ Երևանի նահանգում 50 հազար քուրդ բնակչություն կար: Չոկատի հրամանատար նշանակվեց գեներալ-մայոր Շիլինկովը: Չոկատի գործողություններն ընդգրկում էին Երևանի, Էջմիածնի, Սուրմալուի, Շարուր-Ղարալագյազի, Նախիջևանի գավառները, Բայազետի, Ղարաքիլիսայի, Բերկրիի օկրուգները, Մակվի խանության հյուսիսը:

1917 թ. գարնանը փորձ կատարվեց առանձին զորամիավոր կազմակերպել արևմտահայերից: Թիֆլիսում ԱՄՆ-ի հյուպատոս Ֆ. Սմիթը մայիսի 29-ին հանդիպեց Անդրանիկի հետ: Խոսք գնաց արևմտահայերից 30 հազարանոց զորք կազմավորելու մասին, սակայն այդ գործը հետաձգվեց:

Հայկական կամավորական ջոկատների շատ խմբապետներ ու զինվորներ ցանկություն հայտնեցին վերադառնալ զինվորական ծառայության: Երանց իրավունք տրվեց վերադառնալու գործող բանակի շարքերը՝ ընդհանուր հիմունքներով ծառայելու համար:

Վանի, Էրզրումի և Խնուսի մարզերում կազմակերպվեցին հայկական ժողովրդական միլիցիայի ջոկատներ, որոնց ընդհանուր թիվը հասավ 3 հազարի, իսկ ճանապարհների հսկողության համար կազմվեցին հեծյալ խմբեր: Այդ ինքնապաշտպանական-ժողովրդական ոչ կանոնավոր զորամիավորները գլխավորում էին նախկին մեծահամբավ ֆիդայիները: Բաբերդի ջոկատի պետն էր Սեպուհը, Երզնկայինը՝ Սեբաստացի Մուրադը, Խնուս-Մուշում՝ Մանուկը և Մուշեղը, Ալաշկերտում՝ Սմբատը, Վանում՝ Լևոն Շաղոյանը և Բուլղարացի Գրիգորը: Ալաշկերտի զինվորական շրջանի ոստիկանապետ նշանակվեց Համազասպը: Նման կարգի խմբեր ստեղծվեցին գրեթե բոլոր հայաբնակ վայրերում, իսկ այդ ժամանակ Արևմտյան Հայաստան էր վերադարձել մոտ 200 հազար արևմտահայություն: 1917 թ. ամռան վերջին ոչ կանոնավոր այդ զորամասերում կար մոտ 4-5 հազար մարդ:

ՀԱՅ ԵԿԵՂԵՑԱԿԱՆ ՀԱՄԱԳՈՒՄԱՐԸ

Հետփետրվարյան ժամանակաշրջանի հայ կյանքի կարևորագույն իրադարձություններից մեկն էլ հայ եկեղեցական համագումարն էր, որը կայացավ Էջմիածնում 1917 թ. հունիսի 12-25-ին: Հայոց եկեղեցին ողջունեց Փետրվարյան հեղափոխությունը և գտավ, որ այն նպաստավոր է հայ ժողովրդի շահերի տեսակետից: Համագումարին ներկա էին 67 հոգևորականներ: Համագումարն ուներ հինգ բաժանմունքներ՝ եկեղեցու բարեփոխության, տնտեսական, դպրոցական-կալվածական, վարչական, ռուսահայ եկեղեցական կյանքի:

Համագումարը եկեղեցու ներքին կյանքի խնդիրներին զուգահեռ բարձրացրեց նաև համահայկական հույժ կարևոր հիմնահարցեր, քննարկեց դրանց լուծման ուղիները: Հայ եկեղեցին հնարավորություն ունեցավ անկաշկանդորեն բարձրացնել իրեն հուզող խնդիրները: Համագումարում դրսևորվեցին Ամենայն հայոց կակթողիկոս Գևորգ 5-րդի առաջադիմական հայացքները:

ՀԱՅՈՑ ԱԶԳԱՅԻՆ ՀԱՍՈՒՆՈՐՈՒՄԻ ԿԿՑՈՒԹՅՈՒՆԸ: ՀԱՅՈՑ ԱԶԳԱՅԻՆ ԽՈՐՀՐԴԻ ՍՏԵՂԾՈՒՄԸ

Փետրվարյան հեղափոխության ժամանակաշրջանի հաջորդ կարևորագույն իրադարձությունը հայ իրականության մեջ՝ Հայոց ազգային համախորհրդակցության հրավիրումն ու Ազգային խորհրդի ստեղծումն էր:

Փետրվարյան հեղափոխությունից հետո, 1917 թ. մարտի 7-ին, Թիֆլիսի Հայոց առաջնորդարանում հրավիրվեց հայ քաղաքական ուժերի միավորիչ հավաք, որը շարունակվեց մինչև հունիս և որին մասնակցում էին զանազան կազմակերպությունների 50 ներկայացուցիչներ: Բազմաթիվ այլ հարցերի թվում քննարկվեց նաև ազգային գործերը ղեկավարելու համար ժամանակավոր միջկուսակցական մարմին ստեղծելու հարցը: Այդ նպատակով որոշվեց Երևանում հրավիրել հայոց Ազգային համագումար, որն այդպես էլ չկայացավ, իսկ մինչ այդ Թիֆլիսում հրավիրել Ազգային համախորհրդակցություն՝ բոլոր դասերի, դասակարգերի ու հոսանքների ներկայացուցիչներից:

Հայոց Ազգային համախորհրդակցությունը կայացավ Թիֆլիսում, Ռուսթավելու պողոտայի վրա գտնվող Հայ դերասանական ընկերության թատրոնի շենքում, 1917 թ. սեպտեմբերի 29-ից մինչև հոկտեմբերի 13-ը: Օրակարգի հարցերն էին՝ ժամանակավոր կառավարության քաղաքականության և տվյալ քաղաքական պահի գնահատման, Օգակոմի նկատմամբ վերաբերմունքի, նոր վարչական սահմանագծման, զենստվային (տեղական կառավարման) իշխանություններ մտցնելու, պարենավորման, գաղթականության, ազգամիջյան հարաբերությունների, Կովկասյան ճակատի պաշտպանության, վտանգված վայրերի ապահովության, դպրոցների ազգայնացման և այլ հարցեր: Ներկայացուցիչներ ունեին նաև Կովկասի, Մոսկվայի (Ստ. Մամիկոնյան) ու Պետերբուրգի (Ն. Ադոնց) հայությունը:

Խորհրդաժողովի առաջին ու գլխավոր գործը եղավ քաղաքական պահի մասին ընդունած բանաձևը՝ բացարձակ վստահություն ու կատարյալ աջակցություն ժամանակավոր կառավարությանը, աշխատել վերջացնել պատերազմը դաշնակիցների հետ համախորհուրդ և մինչ այդ ամեն կերպ նպաստել ինքնապաշտպանության գործին:

Ազգային Համախորհրդակցությանը մասնակցում էին ՀՀԳ-ն, Ս. Գ. Հնչակը, ՀԺԿ-ն, սպեցիֆիկները, ՌՍԴԲԿ, մենշևիկները և տեռները:

ՀԺԿ-ն (Հայ ժողովրդական կուսակցություն) հիմնադրվել է 1917 թ. մարտի 17-ին Թիֆլիսում հայ սահմանադրական-դեմոկրատների՝ կադետների կողմից, որոնք համախմբված էին «Մշակի» շուրջը: 1917 թ. սեպտեմբերին տեղի ունեցած ՀԺԿ 1-ին համագումարում ընդունվեց կուսակցության ծրագիրը, կանոնադրությունը և ընտրվեց Կենտկոմի կազմը: Կենտկոմի նախագահ ընտրվեց Միք. Պապաջանյանը, փոխնախագահ՝ Ս. Հարությունյանը: Կուսակցության հայտնի գործիչներից էին Հ. Առաքելյանը, Լ. Ղուլյանը, Ղ. Մելիք-Ղարազյոզյանը և ուրիշներ: Կենտրոնական օրգաններն էին «ժողովրդի ձայն» (Թիֆլիս), «Ժողովուրդ» (Երևան), «Ժողովրդական թերթ» (Աշխաբադ) թերթերը:

ՀԺԿ-ի դիրքորոշումն էր՝ Անդրկովկասի հայաբնակ վայրերում ստանալ տարածքային-ազգային, իսկ Ռուսաստանի հայաբնակ վայրերում՝ կուլտուր-ազգային ինքնավարություն: Արևմտյան Հայաստանի հարցը նրանք համարում էին միջազգային դիվանագիտության հարց: Ժողովրդականները խնդիր էին դնում վերականգնել հայ եկեղեցու բոլոր իրավունքները, ինչպես նաև բարեփոխումներ մտցնել եկեղեցու գործերում:

ՀԺԿ-ն ողջունեց Փետրվարյան հեղափոխությունը, կոչ արեց աջակցել ժամանակավոր կառավարությանը և գտնում էր, որ ազգային-սոցիալական բոլոր հիմնահարցերի լուծումը պետք է վերապահել հրավիրվելիք Սահմանադիր ժողովին:

Սոցիալ-դեմոկրատական բանվորական հայ կազմակերպությունը (ՍԴԲԿ, «Սպեցիֆիկներ») ձևավորվել է 1903-ին՝ ժննում, հետո տեղափոխվել Կովկաս: Կորիզը կազմել են ՀՀԳ-ից հեռացած մի խումբ մտավորականներ: Հիմնադիր գաղափարախոսներից էին Երվանդ Պայլանը, Գարեգին Կոզիկյանը (Եսալիմ), Բախշի Իշխանյանը և ուրիշներ: Ավելի ուշ նրանց միացավ Դավիթ Անանունը: Նրանք հաճախ էին խոսում Հայաստանի առանձնահատուկ՝ սպեցիֆիկ պայմանների մասին, և բուլշևիկները նրանց անվանեցին «սպեցիֆիկներ»: Նրանք դնում էին կուլտուր-ազգային ինքնավարության պահանջ:

Հայ մենշևիկներից էին՝ Գևորգ Ղարաջյանը (Արկոմեդ), Արշակ Զուրաբյանը, Հայկ Ազատյանը, Արամայիս Երզնկյանը, Սիմոնիկ Փիրունյանը: Հայաստանի խորհրդայնացումից հետո նրանց մի մասը դարձան բուլշևիկներ:

Հայ տեռների կուսակցությունը Ռուսաստանի տեռական կուսակցության մասնաճյուղն էր, կոչվում էր Սոցիալիստ-հեղափոխական կուսակցության հայ կազմակերպություն: Ձևավորվել է 1907-ին, Բաքվում՝ Լևոն Աթաբեկյանի գլխավորությամբ: Նրանք ընդունում էին անհատական տեռորը, կողմնակից էին հողը գյուղացիներին բաժանելուն, մասնավոր սեփականությանը: Կուսակցության ակտիվ գործիչներից էին Լ. Աթաբեկյանը, Վ. Մինախորյանը, Գ. Մելիք-Շահնազարյանը, Հ. Ղազանչյանը և ուրիշներ:

Համախորհրդակցությանը մասնակցելու համար ընտրված էին 185 պատգամավոր՝ 10.000 բնակչից մեկը: Ամենաշատ՝ 91 պատգամավոր ուներ ՀՀԳ-ն, որը տվյալ ժամանակաշրջանում հայ ազգային-քաղաքական կյանքի տիրապետող և ուղղություն տվող ուժն էր:

Համախորհրդակցությանը մասնակցելու հրավեր ուղարկվեց նաև հայ բուլշևիկներին, սակայն ՌՍԴԲԿ բուլշևիկների՝ Թիֆլիսի կոմիտեի նախագահ Ա. Միկոյանը Համախորհրդակցության նախագահին գրավոր հայտնեց, որ իրենք բոյկոտում են համախորհրդակցությունը, որովհետև տվյալ պահին բուլշևիկների գլխավոր մտահոգությունը տեղի ունեցած բուրժուա-դեմոկրատական հեղափոխությունը սոցիալիստական հեղափոխության փուլին հասցնելն է: Իսկ Շուշիում լույս տեսնող «Նեցուկ» թերթում բուլշևիկ Ներհակը (Աշոտ Հովհաննիսյան) գրեց, թե իրենք չեն կարող ժամավաճառ լինել այդ ազգային կատակերգության մեջ, քանի որ իրենց համար առաջնայինը բանվորական հարցն է ու դասակարգային պայքարը:

Օրակարգում բացառվում էր հայ ժողովրդի ազգային ինքնորոշման հարցը, որովհետև այդ փուլում հայ հասարակական-քաղաքական շրջանները ազգային վերածննդի հեռանկարը կապում էին միայն և միայն Ռուսաստանի հետ:

Համախորհրդակցությունը հանգեց այն որոշման, որ պետք է համախմբել բոլոր ուժերը՝ Կովկասյան ռազմաճակատի պաշտպանության համար:

Խորհրդակցությունը գտավ, որ Ռուսաստանի պետական կառուցվածքը պիտի լինի դաշնակցային (ֆեդերատիվ) հանրապետությունը: Անդրկովկասը պիտի ենթարկվի վարչական նոր բաժանման և այնտեղ պիտի մտցվի զեմստվային՝ տեղական ինքնակառավարում: Երկրամասում պիտի կազմավորվեն Ռուսաստանի հետ կապված երեք ազգային՝

հայկական, վրացական, թաթարական (ադրբեջանական) ինքնավար կենտրոններ:

Համախորհրդակցությունն ընտրեց երկու ղեկավար մարմին.

1. Ազգային ժողով՝ բաղկացած քաղաքական կուսակցությունների, խոշոր քաղաքների ազգաբնակչության, արևմտահայերի, գանազան կազմակերպությունների ներկայացուցիչներից: Այն ունենալու էր 35 անդամ, որից 25-ը՝ կուսակցություններից, 4-ը՝ Մոսկվայից, Պետրոգրադից, Նոր Նախիջևանից և Բաքվից, 1-ը՝ Կաթողիկոսի ներկայացուցիչ, 1-ը՝ Արևմտահայ ազգային խորհրդից, 2-ը՝ Օգակոմի ներկայացուցիչներ, 2-ը՝ Պետրոգրադի զինվորական և քաղաքական մարմինների ներկայացուցիչներ: Ազգային ժողովն ունենալու էր օրենսդրական իրավունքներ:

2. Ազգային խորհուրդ՝ բաղկացած քաղաքական կուսակցությունների ներկայացուցիչներից: Այն Ազգային ժողովի գործադիր մարմինն էր՝ բաղկացած 15 անդամներից.

1. Ավետիս Ահարոնյան (Մախագահ) — դաշնակցական
2. Ռ. Տեր-Մինասյան — դաշնակցական
3. Խ. Կարճիկյան — դաշնակցական
4. Ն. Ադաբյան — դաշնակցական
5. Կ. Ղազարյան — դաշնակցական
6. Ա. Մանուկյան — դաշնակցական
7. Հ. Տեր-Օհանյան — էսէռ
8. Լ. Աթաբեկյան — էսէռ
9. Ղ. Տեր-Պետրոսյան — հնչակյան
10. Ա. Երզնկյան — մենշևիկ
11. Ս. Հարությունյան — ժողովրդական
12. Հ. Այվազյան — ժողովրդական
13. Տ. Բեկզադյան — անկուսակցական
14. Ս. Մամիկոնյան — անկուսակցական
15. Պ. Ջաքարյան — անկուսակցական

Ավելի ուշ Ազգային խորհուրդներ ստեղծվեցին նաև Երևանում և Բաքվում:

Հայոց ազգային խորհուրդը դարձավ 1918 թ. ստեղծված Հայաստանի Հանրապետության սաղմը:

ՀՈԿՏԵՄԲԵՐՅԱՆ ՀԵՂԱՓՈԽՈՒԹՅՈՒՆԸ ԵՎ ՀԱՅԱՍՏԱՆԸ

ՀՈԿՏԵՄԲԵՐՅԱՆ ՀԵՂԱՓՈԽՈՒԹՅԱՆ ՀԱՂԹԱՆԱԿԸ

Սոցիալիստական հեղափոխությունն իրականացնելու նպատակով 1917 թ. հոկտեմբերի 16-ին ՌՍԴ(բ)Կ Կենտրոնական կոմիտեն վերջնական որոշում ընդունեց զինված ապստամբության մասին: Այն ղեկավարելու համար ընտրվեց Ռազմա-հեղափոխական Կենտրոն՝ ՌՀԿ, որի մեջ մտան Ա. Բուբնովը, Ֆ. Չերժինսկին, Յա. Սվեդոլովը, Ի. Ստալինը, Մ. Ուրիցկին, որը մտավ Ռազմա-հեղափոխական Կոմիտեի մեջ՝ իբրև նրա ղեկավար միջուկ:

Պետրոգրադում զինված ապստամբության բոլշևիկյան ուժերի ավանգարդը մայրաքաղաքի Կարմիր զվարդիան էր, որի մարտիկների թիվը հասավ 40 հազարի, որոնց պաշտպանում էին Ռուսաստանի այլ քաղաքների շուրջ 200 հազար կարմիրզվարդիականներ: Ապստամբության նախօրյակին Պետրոգրադի կայազորի հեղափոխական զինվորների թիվը հասնում էր 150 հազարի: Բոլշևիկների կողմն անցած Բալթիկյան նավատորմն ուներ ավելի քան 80 հազար նավաստի և շուրջ 700 մարտական և օժանդակ նավեր: Նրանց հետևից էին գնում ռազմաճակատների և թիկունքային կայազորների միլիոնավոր հեղափոխական զինվորները: Այդ ուժերը հենվում էին երկրի հեղափոխական բանվորների և չքավոր գյուղացիության վրա:

ժամանակավոր կառավարությունը, հենվելով մենշևիկների և էսէռների վրա, հավաքում էր հակաբոլշևիկյան ուժերը, բայց արդեն նրա քաղաքական մեկուսացումն ակներև էր. ուժերի հսկայական գերակշռությունը հեղափոխության կողմն էր:

Հոկտեմբերի 24-ի երեկոյան Վ. Ի. Լենինը թողեց կոնսպիրատիվ բնակարանը և տեղափոխվեց հեղափոխության շտաբ՝ Սմոլնի:

Նախ և առաջ կարմիրզավարդիականները, հեղափոխական զինվորներն ու նավաստիները հսկողության տակ վերցրեցին Նևայի կամուրջները և քաղաքի կարևորագույն կետերը, գրավեցին Պետրոգրադի մատույցները՝ փակելով ռազմաճակատից մայրաքաղաք կանչված զորքերի ճանապարհը: Ժամանակավոր կառավարությունը ռեալ ուժ չունեց դիմադրություն ցույց տալու համար:

Հոկտեմբերի 25-ի առավոտյան հեղափոխական ուժերը գրավեցին երկաթուղային կայարանները, էլեկտրակայանները, Պետրանկը, փոստն ու հեռախոսակայանը, գլխավոր կառավարական հիմնարկները: Չմեռային պալատը, Գլխավոր շտաբը, Մարիինյան պալատը և մի քանի այլ կետեր դեռևս մնում էին ժամանակավոր կառավարության ձեռքին:

Հոկտեմբերի 25-ի (նոյեմբերի 7-ի) առավոտյան ժամը 10-ին Ռազմա-Հեղափոխական Կոմիտեն հանդես եկավ «Ռուսաստանի քաղաքացիներին» կոչով, որով ազդարարվում էր հեղափոխության հաղթանակը և հայտարարվում, որ ժամանակավոր կառավարությունը տապալված է և իշխանությունն անցել է Պետրոգրադի խորհրդի օրգան ՌԿԿ-ի ձեռքը: Նույն օրը երեկոյան 10 անց 40 թուպեին Սմոլնիում բացվեց Բանվորների և զինվորների դեպուտատների խորհուրդների Համառուսաստանյան Երկրորդ Համագումարը, որը երկրի աշխատավոր ժողովրդի անունից հռչակեց ամբողջ իշխանության անցումը խորհուրդներին:

Հոկտեմբերի լույս 26-ի (նոյեմբերի 8-ի) գիշերվա ժամը 2-ն անց 10 թուպեին Չմեռային պալատը գրոհով գրավվեց և ժամանակավոր կառավարությունը ձերբակալվեց: Հոկտեմբերյան զինված ապստամբությունը Պետրոգրադում հաղթանակեց:

Հոկտեմբերի 26-ին (նոյեմբերի 8-ին) Վ. Ի. Լենինի գեկուցումից հետո խորհուրդների համագումարն ընդունեց *Դեկրետ հաշտության մասին* և *Դեկրետ հողի մասին*:

Համագումարն ընտրեց Համառուսաստանյան Կենտրոնական Գործադիր Կոմիտե՝ ՀԿԳԿ և ստեղծեց առաջին խորհրդային կառավարությունը՝ ժողովրդական Կոմիսարների խորհուրդ՝ ժողկոմխորհ՝ Վ. Ի. Լենինի նախագահությամբ:

Հակահեղափոխական ուժերը Կերենսկու, գեներալ Կրասնովի և Գերագույն հրամանատարի գլխավոր շտաբի պետ Դուխոնինի գլխավորությամբ խռովություն բարձրացրին՝ խորհրդային իշխանությունը տա-

պալելու նպատակով, որը հոկտեմբերի 31-ին (նոյեմբերի 13-ին) հեղափոխական ուժերի կողմից լիկվիդացվեց:

Պետրոգրադում զինված անարյուն ապստամբության հաղթանակից հետո, որի ընթացքում սպանվեց ընդամենը 6 և վիրավորվեց 50 մարդ, զինված ապստամբություն սկսվեց նաև Մոսկվայում: Այստեղ հեղափոխական ուժերը հանդիպեցին հակահեղափոխության դաժան դիմադրությանը: Հոկտեմբերի 25-ից (նոյեմբերի 7-ից) սկսած ընթացան համառ մարտեր, և միայն նոյեմբերի 2-ին (15-ին) Մոսկվայում հաստատվեց խորհրդային իշխանություն:

Հոկտեմբերի 25-27-ը (նոյեմբերի 7-9-ը) խորհրդային իշխանություն հաստատվեց Մինսկում, Կրոնշտադտում, Իվանովո-Վոզնեսենսկում, Լուգանսկում, Կազանում, Դոնի Ռոստովում, Եկատերինբուրգում, Ոսեթում, Սամարայում, Սարատովում: Հետագա օրերին խորհրդային իշխանություն հաստատվեց Բաքվում՝ հոկտեմբերի 31-ին (նոյեմբերի 13-ին), Տաշքենդում, Վլադիվոստոկում: Նոյեմբերի վերջերին իշխանությունը խորհուրդներին անցավ 28 նահանգական քաղաքներում, բոլոր արդյունաբերական կարևորագույն կենտրոններում և գլխավոր ռազմաճակատներում: Կենտրոնում սկսված հեղափոխությունն անարգել տարածվեց ամբողջ երկրում:

Երկրի մի շարք շրջաններում տեղի ունեցան հակահեղափոխական խռովություններ, որոնք, սակայն, հեղափոխական ուժերի կողմից ճնշվեցին: 1917 թ. հոկտեմբերից մինչև 1918 թ. փետրվար խորհրդային իշխանություն հաստատվեց ողջ Ռուսաստանի հսկայական տարածքում, Ուկրաինայում, Մերձբալթիկայում, Բելոռուսիայում, Հյուսիսային Կովկասում, Սիբիրում, Ղազախստանում և Միջին Ասիայում:

Մի շարք պատճառների հետևանքով պայքարը խորհրդային իշխանության համար Անդրկովկասում՝ ձգձգվեց մինչև 1920-1921 թվականները:

ԻՐԱՆԻՈՒԹՅՈՒՆՆ ԱՆԴՐԿՈՎԿԱՍՈՒՄ ՀԵՂԱՓՈՒՒՅՈՒՅՈՒՄԻՑ ՀԵՏՈ

1917 թ. նոյեմբերի 2(15)-ին հրատարակվեց «Ռուսաստանի ժողովուրդների իրավունքների դեկլարացիան», որտեղ տրված են խորհրդային իշխանության ազգային քաղաքականության հիմնական սկզ-

բունքները՝ Ռուսաստանի կազմի մեջ մտնող ժողովուրդների իրավահավասարություն և սուվերենություն, ազատ ինքնորոշման իրավունք՝ ընդհուպ մինչև Ռուսաստանից անջատվելն ու ինքնուրույն պետություն կազմելը, ազգային և կրոնական բուրբ տեսակի արտոնությունների ու սահմանափակումների վերացում, ազգային փոքրամասնությունների ազատ զարգացում:

Դեկլարացիային համապատասխան՝ խորհրդային Ռուսաստանը ճանաչեց Լեհաստանի և Ֆինլանդիայի անկախությունը, Ուկրաինայի, Բելոռուսիայի, Մերձբալթյան և մյուս ժողովուրդների ազատ ինքնորոշման իրավունքը: Դեկլարացիան լիովին տարածվում էր նաև հայ ժողովրդի վրա:

Ռուսաստանի համար չափազանց մեծ կարևորություն ներկայացնող ազգային հարցի լուծմանը ցանկալի ընթացք տալու նպատակով կենտրոնական կառավարության համակարգում ստեղծվեց Ազգությունների գործերի ժողովրդական կոմիսարիատ, որի կազմում գործում էին տարբեր ազգությունների կոմիսարիատներ: 1917 թ. դեկտեմբերին ժողկոմսովետի որոշմամբ ստեղծվեց նաև Հայկական գործերի կոմիսարիատը՝ անվանի հեղափոխական գործիչ, բուլշևիկ Վառլամ Ավանեսովի (Սուրեն Մարտիրոսյան) ղեկավարությամբ: Նրա տեղակալն էր հայ մեծ բանաստեղծ, բուլշևիկ Վահան Տերյանը: Կոմիսարիատն ուներ կուլտուր-լուսավորական, հրատարակչական, զաղթականության ու սոցիալական ապահովության, ռազմական, ինֆորմացիայի ու կապի, ազիտացիայի և վիճակագրության բաժիններ: Կոմիսարիատը կապեր ուներ Ռուսաստանի բոլոր հայաբնակ վայրերի հետ:

1917 թ. նոյեմբերի 2(15)–ին բուլշևիկներին հաջողվեց Բաքվում հռչակել խորհրդային իշխանություն, և ականավոր բուլշևիկ Ստեփան Շահումյանը դարձավ Բաքվի բանվորների և զինվորների սովետի գործկոմի նախագահ:

Անդրկովկասի ազգային քաղաքական կուսակցությունները թշնամաբար ընդունեցին Հոկտեմբերյան հեղափոխության լուրը և որոշեցին չճանաչել Ռուսաստանի խորհրդային իշխանությունը: Այդ առթիվ ահա թե ինչ է գրում Ս. Վրացյանը. «Հոկտեմբերյան հեղաշրջումը Թիֆլիսում հանդիպեց խիստ բացասական վերաբերումի: Բացի ընդհանուր պատճառներից, որով բուլշևիկյան կոմունիզմը նկատվում էր ցնորական մի ճիգ պատմությունը գիտական ընկերվարությունից (սոցիալիզմից — Ս. Կ.) դեպի ուտոպիա և, հետևաբար, աշխատավոր մարդկության

բնաշրջումը առողջ ճանապարհից շեղելու, Անդրկովկասում կային և հատուկ պատճառներ. վրացի սոցիալ-դեմոկրատ մենշևիկների համար բուլշևիզմը, Մախ և առաջ, կուսակցական հակառակորդ էր... Հայերի համար հոկտեմբերյան հեղաշրջումը անընդունելի էր, ամենից առաջ, բուլշևիկների դեպի պատերազմն ու ճակատի պաշտպանության գործը բռնաժողովրդի պատճառով. բուլշևիկների մեջ նրանք տեսնում էին քայքայող ուժ, մինչդեռ վայրկյանը պահանջում էր Ռուսաստանի հզորությունը: Սահմեղականների աչքին բուլշևիզմը դասակարգային թշնամի էր. մահմեդական ներկայացուցիչների մեծ մասը խաներ ու բեկեր էին» (Ս. Վրացյան, Հայաստանի Հանրապետություն, Երևան, 1993, էջ 53):

ԱՆՊՐԿՈՎԿԱՍՅԱՆ ՍԵՅՄԻ ԵՎ ԿՈՄԻՍԱՐԻԱՏԻ ՍՏԵՂՈՒՄԸ

Ռուսաստանի նորաստեղծ խորհրդային իշխանությունը չճանաչելու, ընդգծված հակախորհրդային դիրքորոշման, Կենտրոնի հետ կապը կորցնելու և Օզակոմի վերջնական հեղինակագրկման պայմաններում բնականաբար առաջացավ Անդրկովկասյան տեղական նոր իշխանություն ստեղծելու պահանջը: Այդ նպատակով նոյեմբերի 15(28)–ին Թիֆլիսում հրավիրվեց մի խորհրդակցություն, որին մասնակցում էին Անդրկովկասի բանվորների, զինվորների և գյուղացիների խորհուրդների, Թիֆլիսի բանվորների և զինվորների խորհրդի, Թիֆլիսի քաղաքային խորհրդի, Հանրային ապահովության կոմիտեի, Օզակոմի, քաղաքական կուսակցությունների և Սահմանադիր ժողովի պատգամավորների ներկայացուցիչներ: Քննարկելով ստեղծված իրավիճակը՝ խորհրդակցությունը որոշեց ստեղծել տեղական իշխանություն՝ Անդրկովկասյան Սեյմ՝ իբրև օրենսդիր մարմին և Անդրկովկասյան կոմիսարիատ՝ իբրև Սեյմի գործադիր մարմին: Սեյմի կազմության հիմք ընդունվեց Համառուսաստանյան Սահմանադիր ժողովի համար Անդրկովկասից ընտրված պատգամավորների քանակը. որոշվեց եռապատկել կուսակցական ցանկերով ընտրված պատգամավորների թիվը: Սեյմի նախագահ ընտրվեց մենշևիկ Նիկոլայ Չխեիժեն: Սեյմի անդամներից 32–ը մենշևիկներ էին (25 վրացի, 4 հայ, 2 ռուս, 1 գերմանացի), 30–ը՝ մուսավաթականներ, 27–ը՝ դաշնակցականներ: Կային նաև էսեռներ և այլ կազմակերպությունների ներկայացուցիչներ:

Անդրկովկասյան կոմիսարիատի նախագահ, արտաքին հարաբերությունների ու աշխատանքի կոմիսար նշանակվեց Պետական դումայի անդամ, մենշևիկ Եվգենի Գեգեչկորին: Նոր կառավարությունը բաղկացած էր 12 կոմիսարներից: Ներքին գործերի կոմիսար նշանակվեց մենշևիկ Ա. Հիսենկելին, ռազմական և ռազմա-ծովային կոմիսար՝ Էտե Ղ. Ղոնսկոյը, երկրագործության կոմիսար՝ Էտե Ա. Ներուչևը, առևտրի և արդյունաբերության կոմիսար՝ մուսավաթական Մ. Ջաֆարովը, հաղորդակցության կոմիսար՝ մուսավաթական Մելիք-Ասլանովը, արդարադատության՝ մուսավաթական Խան-Խոյսկին, պետական վերահսկիչ՝ մուսավաթական Բերուսովը:

Հայերին տրվեց երեք տեղ. ֆինանսների կոմիսար՝ դաշնակցական խաչատուր Կարծիկյան, խնամատարության կոմիսար՝ դաշնակցական Համո Օհանջանյան, պարենավորման կոմիսար՝ հնչակյան Գևորգ Տեր-Ղազարյան:

Երկրամասի ժողովուրդներին ուղղված դեկլարացիայում Անդրկովկասյան կոմիսարիատը հայտարարեց, որ Կոմիսարիատը ժամանակավոր մարմին է և գոյություն է ունենալու մինչև Համառուսաստանյան Սահմանադիր ժողովի գումարումը: Սահմանադիր ժողովի ընտրությունները տեղի էին ունեցել 1917 թ. նոյեմբերի 12-ին: Այն բացվեց 1918 թ. հունվարի 5-ին և բոլշևիկների կողմից ցրվեց հաջորդ օրը՝ հունվարի 6-ին:

Իրականում Անդրկովկասյան առանձին կառավարության՝ Կոմիսարիատի ստեղծումը ուղղակիորեն նշանակում էր Անդրկովկասը կտրել խորհրդային Ռուսաստանից, որը մեր խորին համոզմամբ չէր բխում անդրկովկասյան ժողովուրդների և, մասնավորապես, հայ ժողովրդի շահերից ու կործանարար էր նրա համար:

Անդրկովկասում ստեղծված իրադրությունը չէր կարող չմտահոգել խորհրդային Ռուսաստանի կառավարությանը, որն իր հերթին չէր ճանաչում Անդրկովկասյան Կոմիսարիատի իշխանությունը: ՌևՖՍՀ ժողկոմսովետի 1917 թ. դեկտեմբերի 16-ի նիստում քննարկելով Կովկասում ստեղծված դրությունը՝ որոշում կայացվեց կոմունիստական կուսակցության Կենտկոմի անդամ, բանվորների և զինվորների Բաքվի սովետի նախագահ Ստեփան Շահումյանին նշանակել Կովկասի գործերի ժամանակավոր արտակարգ կոմիսար՝ մինչև Կովկասում խորհրդային իշխանության հաստատումը: Մեծ դժվարություններ հաղթահարելով՝ 1918 թ. հունվարի 22-ին Ստ. Շահումյանը եկավ Թիֆլիս և անցավ

իր պարտականությունների կատարմանը: Արտակարգ կոմիսարի մանդատը և 500 հազար ռուբլի դրամ դարձյալ մեծ դժվարությամբ Թիֆլիս էր հասցրել լեգեներար Կամոն՝ Սիմոն Արշակի Տեր-Պետրոսյանը: Հունվարի 31-ին Թիֆլիսում ձուևերեն լույս տեսավ «Ժողկոմսովետի Կովկասյան տեղեկատուն», որտեղ հրատարակվեց Ստ. Շահումյանի դիմումը՝ ուղղված Կովկասի բոլոր խորհուրդներին, բանվորներին, զինվորներին և գյուղացիներին: Այնտեղ ասված էր. «Կովկասը կանգնած է անդունդի եզրին: Փրկեցեք նրան: Ստեղծեք այստեղ ինտերնացիոնալ բանվորա-գյուղացիական կառավարություն, որը Ռուսաստանի սովետական կենտրոնների ու ժողովրդական կոմիսարների սովետի հետ սերտ միասնություն ստեղծելով՝ վերջ կդնի Կովկասի հակահեղափոխությանը...» («Հայ ժողովրդի պատմություն», ԳԱ հրատ., հ. 7, էջ 27): Հունվարի 25-ին անդրերկաթուղու բանվորների ժողովում Ստ. Շահումյանը հանդես եկավ զեկուցումով, որից հետո ընդունված բանաձևում դատապարտվում է Անդրկովկասյան կոմիսարիատի հակախորհրդային քաղաքականությունը և պահանջվում է Անդրկովկասում հաստատել խորհրդային իշխանություն:

1918 թ. փետրվարի 14-ին Անդրկովկասյան կոմիսարիատն առաջարկեց Ստ. Շահումյանին՝ 24 ժամվա ընթացքում թողնել Վրաստանի սահմանները, և անցնելով ընդհատակ, փետրվարի 20-ին Ստ. Շահումյանը հարկադրված վերադարձավ Բաքու:

Ահա թե Ստ. Շահումյանի առիթով ինչ է գրում Ս. Վրացյանը. «Ժողովրդական Կոմիսարների խորհուրդը Ստ. Շահումյանին նշանակել էր Անդրկովկասի կոմիսար, և սա աշխատում էր հեղաշրջում առաջ բերել Թիֆլիսում: Բոլշևիկները ձգտում էին օգտագործել գործը, որի մեջ նրանց ազդեցությունը օրեցօր ավելանում էր, և որին գրգռում էին Անդրկովկասյան Կոմիսարիատի դեմ, որը, իբր թե, Անդրկովկասը անջատել էր Ռուսաստանից: Փոխանակ բանակի մեջ վայելած համակրանքից օգտվելով՝ թուրքերի դեմ պատվար կանգնեցնելու, Շահումյանը և իր ընկերները ճգնում էին զինվորությանը մասնակից դարձնել Կոմիսարիատի դեմ մղած իրենց պայքարին և աստիճանաբար ճակատից հետ էին քաշում զորամասերը...» (Ս. Վրացյան, էջ 54):

ՈԱԶՄԱՃԱԿԱՏԻ ԲԱՅՔԱՅՈՒՄԸ

Հոկտեմբերյան հեղափոխությունից հետո Կովկասյան ռազմաճակատի քայքայումը, որն սկսվել էր դեռևս Փետրվարյան հեղափոխության օրերին, մեծ չափերով արագացավ: Հրապարակվել էր հողի մասին դեկրետը, և ռուսական բանակի ուշքն ու միտքը Ռուսաստան վերադառնալն էր, ուր հող էին բաժանում: Ուստի, ինչպես պատկերավոր նկարագրում է Ս. Վրացյանը, առանց սպասելու վերին հրամանատարության սահմանած կարգին, ռուս զինվորները մաս–մաս, հազարներով ու տասնյակ հազարներով լքում էին դիրքերը, թողնում բազմամիլիոն հարստություններ, ռազմամթերքի ու պարենի անհաշիվ պաշար և հրացանը գրկած՝ նետվում էին վագոնները, շտապում դեպի տուն: Նույն՝ Ս. Վրացյանի վկայությամբ՝ Կովկասյան մահմեդականները թուրքերի թելադրանքով մի կողմից աշխատում էին արագացնել ռուսական զորքերի փախուստը, մյուս կողմից էլ փորձում էին հափշտակել նրանց զենքն ու զինամթերքը: Եվ այդ հողի վրա տեղի էին ունենում արյունալի ընդհարումներ նահանջող ռուսական զորամասերի ու մահմեդական ազգաբնակչության միջև:

Այդ կարգի ընդհարումներից ամենաբնորոշը Շամխորի կոտորածն էր, որը տեղի ունեցավ 1918 թ. հունվարի 9–12–ին, Թիֆլիս–Բաքու երկաթգծի Դալար և Շամխոր կայարանների միջև: Կովկասյան ռազմաճակատից տուն վերադարձող զինվորական էշելոնների վրա հարձակվեցին Անդրկովկասյան կոմիսարիատի ուղարկած զրահագնացքը՝ վրացի Աբխազավայի հրամանատարությամբ, Ելիզավետպոլի (Գյանջա) մուսուլմանական ազգային խորհրդի կազմակերպած բանդաները՝ թուրք էտե Ասլան բեկ Սաֆիջյուրդսկու գլխավորությամբ և Մադալովի գլխավորած «Վայրենի դիվիզիան»: Դարանակալած ոճրագործները մի քանի օր շարունակ զնդակոծում էին ռուսական էշելոնները: Հանկարծակիի եկած ռուս զինվորները կռվեցին մինչև հունվարի 20–ը և մի կերպ ճանապարհ բացեցին դեպի Բաքու՝ տալով մոտ 2000 սպանված ու վիրավոր: Մահմեդական խաժամուժին հաջողվեց գրավել 15 հազար հրացան, 70 զնդացիր, 20 թնդանոթ և այլ ռազմամթերք: Ինչպես վկայում է Ս. Վրացյանը, Սաֆիջյուրդսկին, հեծած առջևի թնդանոթին՝ հաղթականորեն մուտք գործեց Գանձակ (Ս. Վրացյան, էջ 57):

Իբրև արտակարգ կոմիսար՝ Ստ. Շահումյանը վճռական բողոք հայտնեց Շամխորի դեպքերի առիթով և այն համարեց մեծագույն ոճրագործություն:

ՀԱՅԱԿԱՆ ԿՈՐՊՈՒՄԻ ԿԱԶՄԱՎՈՐՈՒՄԸ

1917 թ. վերջերին Կովկասյան ռազմաճակատի քայքայումից և այնտեղից ռուսական զորքերի հեռանալուց հետո ազգային զորամասերի շուտափույթ կազմավորումը դարձավ օրվա հրամայական պահանջ:

1917 թ. նոյեմբերի 16–ին Մոզիլյովի զորակայանը պաշտոնապես կարգադրեց ռուսաստանյան բանակային կորպուսների համաձայն կազմավորել Հայկական կորպուս, ուստի կորպուսի ձևավորման սկիզբ պետք է համարել այդ հրամանը տալու օրը՝ 1917 թ. նոյեմբերի 16–ը (տե՛ս Ա. Նազարյան, Հայկական զորամասերի կազմավորումը Կովկասյան ճակատում, Երևան, 1999, էջ 150):

1917 թ. նոյեմբերի 19–ին, Կովկասյան ռազմաճակատի գլխավոր հրամանատար զեներալ Պրժնալսկու հրամանով սկսվեց Հայկական բանակային կորպուսի անմիջական ձևավորման գործընթացը: Պրժնալսկու հմր. 796 կարգադրությամբ կորպուսի հրամանատար նշանակվեց զեներալ–մայոր Թովմաս Նազարբեկյանը (1855–1931): Դեռևս Դիլմանի ճակատամարտում (1915 թ. ապրիլի 16–18) տարած փայլուն հաղթանակի համար նա, իբրև 2–րդ կովկասյան հրաձգային դիվիզիայի պետ, պարգևատրվել էր Գեորգիևյան խաչով:

1917 թ. նոյեմբերի 30–ի հմր. 136 հրամանով զեներալ Պրժնալսկին որոշեց Հայկական կորպուսի կառուցվածքային կազմը, որը վերջնականապես հաստատվեց դեկտեմբերի 6–ի հմր. 142 հրամանով, ըստ որի՝ կորպուսի մեջ մտան 1–ին և 2–րդ հայկական հրաձգային դիվիզիաները, Հայկական առանձին հեծելազորային բրիգադը, կորպուսի օժանդակ զորամասերը:

Հայոց ազգային խորհրդի կողմից Գրոն (Պրաստամատ Կանայան) նշանակվել էր գոյություն ունեցող և ստեղծվելիք հայկական բոլոր զորամասերի ընդհանուր կոմիսար:

1918 թ. փետրվարի դրությամբ Հայկական բանակային կորպուսն ուներ հետևյալ կառուցվածքային և հրամանատարական կազմը.

Կորպուսի հրամանատար՝ զեներալ-մայոր Թովմաս Նազարբեկյան, շտաբի պետ՝ փոխգնդապետ Սկյարնիչ, հրետանու պետ՝ գնդապետ Կոստանդին Չամազյան (Չամազով):

Փետրվարի 25-ին շտաբը ժամանեց Ալեքսանդրապոլ:

Առաջին դիվիզիա-հրամանատար՝ զեներալ-մայոր Մովսես Սիլիկյան, օգնական՝ գնդապետ Դանիել-բեկ Փիրումյան, շտաբի պետ՝ կապիտան Ա. Վեքիլյան:

Դիվիզիայի մեջ մտնող 1-ին գունդը (գնդապետ Կարաբեշիշյան) գտնվում էր Էրզրումում, 2-րդ գունդը (գնդապետ Սամարցյան)՝ Խնուսում, 5-րդը (գնդապետ Պ. Փիրումյան)՝ Վանում, 7-րդը (գնդապետ Ալ. Բեյ-Մամիկոնյան)՝ Սարիղամիշում, 1-ին հրետանային բրիգադը (գնդապետ Զ. Աբարատյան)՝ Թիֆլիսում:

Երկրորդ դիվիզիա-հրամանատար՝ զեներալ-մայոր Սիքայել Արեշյան, օգնական՝ գնդապետ Ա. Տեր-Սարգսյան, շտաբի պետ՝ գնդապետ Պ. Աթայան:

Դիվիզիայի կազմի մեջ մտնող 3-րդ գունդը (գնդապետ Փիրումյան) գտնվում էր Թիֆլիսում, 4-րդ գունդը (գնդապետ Ա. Յովսեփյան)՝ Էրզրումում, 6-րդ գունդը (գնդապետ Մ. Մելիք-Մուրադյան)՝ Ղամարլու-Մակու շրջանում, 8-րդ գունդը (իշխան Յ. Արղուբյան)՝ Ղարաքիլիսայում, 2-րդ հրետանային բրգադը (գնդապետ Կոստանյան)՝ Ալեքսանդրապոլում:

Չեծելազորային բրիգադ — հրամանատար՝ գնդապետ Նիկոլայ Ղորղանյան:

Բրիգադի մեջ մտնող 1-ին հեծյալ գունդը (կապիտան Յ. Փիրումյան) գտնվում էր Թիֆլիսում, 2-րդ հեծյալ գունդը (փոխգնդապետ Չալինյան)՝ Էջմիածնում:

Բացի այդ, Ալեքսանդրապոլում, Բաքվում, Կարսում, Երևանում, Թիֆլիսում, Նախիջևանում կային պահեստային գնդեր և գումարտակներ, հեծյալ հարյուրակներ, որոնք նույնպես մտնում էին Չայկական բանակային կորպուսի մեջ: Արդեն 1918 թ. գարնան սկզբին Չայկական բանակային կորպուսում կար հետևակային 16 գունդ, 6 գումարտակ, 3 հեծյալ գունդ, 2 հրետանային բրիգադ՝ 8 մարտկոց, մեկ ավիաչուկատ՝ 3 ինքնաթիռով, 3 ավտոմոբիլային վաշտ, օժանդակ այլ զորամասեր: Սակայն այդ զորամասերի մեծ մասը հաստիքային կազմի առումով լրացված չէր: Գործող զորամասերում գտնվում էր ընդամենը 7790 մարտիկ՝ 6970 հետևակային և 820 հեծելազորային: Ներքին ու արտաքին բարդ

պայմաններում կորպուսի անձնակազմը հաստիքային քանակությամբ համապատասխան համալրելն այդպես էլ չհաջողվեց:

Արևմտահայ զինուժը: 1917 թ. դեկտեմբերի 12-ին Թիֆլիսի Չայոց բեմի առաջնորդարանում գումարվեց Արևմտահայ ազգային խորհրդի ընդլայնված խորհրդաժողովը, որը քննարկեց ռազմաճակատի պաշտպանության գործում արևմտահայերի ռազմական մասնակցության հարցը: Որոշվեց ստեղծել արևմտահայերից կազմված Երկրապահ դիվիզիա: Ընդունված որոշումների իրագործման համար Արևմտահայ ազգային խորհրդի կազմից ընտրվեց գործադիր մարմին՝ Չայաստանի ապահովության խորհուրդ, որի նախագահ ընտրվեց Վ. Փափազյանը, անդամներ՝ Սեպուհը, Կարո Սասունին, Ա. Թերզիբաշյանը, Ժ. Սիրզախանյանը, Յ. Գալիկյանը և ուրիշներ: Չայոց ազգային խորհրդի և Արևմտահայ խորհրդի միացյալ նիստում որոշվեց (9 կողմ, 3 դեմ) Երկրապահ դիվիզիայի հրամանատար նշանակել Անդրանիկին: Չեներալ Մ. Սիլիկովն ստացավ մեկ ծայն:

Կովկասյան ռազմաճակատի ռուսական բարձր հրամանատարությունը Արևմտահայ դիվիզիայի ձևավորման համար հսկայական միջոցներ ու սպայական կադրեր տրամադրեց: Գլխավոր հրամանատար Պրժևալսկու 1917 թ. դեկտեմբերի 15-ի հրամանով ենթապորուչիկ Անդրանիկ Օզանյանը պարզատրվեց սուրբ Վլադիմիրի 4-րդ աստիճանի սրով ու ժապավենով և սուրբ Ստանիսլավի 2-րդ աստիճանի սրով: Մեկ շաբաթ անց՝ 1917 թ. դեկտեմբերի 22-ին, Պրժևալսկու հմր. 167 գաղտնի հրամանով Արևմտահայ դիվիզիան անվանվեց Չատուկ հայկական հրաձգային դիվիզիա, որի հրամանատար նշանակվեց Անդրանիկ Օզանյանը: Նրա կազմի մեջ մտան կամավորական սկզբունքով ձևավորված հայկական հետևակային չորս՝ Էրզրումի, Ղարաքիլիսայի, Խնուսի և Վանի գնդերը, հեծյալ մեկ գունդ, պահեստի մեկ գունդ, լեռնային 6 մարտկոց, 2 գնդացրային պարկ: Ծախսերը հոգալու էր Արևմտյան Չայաստանի զեներալ-կոմիսարի շտաբը:

Ռուսական բանակի կամոնակարգով դիվիզիայի հրամանատարը պետք է ունենար զեներալի աստիճան: Չեներալ Պրժևալսկու գեկույցի հիման վրա Անդրկովկասյան կոմիսարիատը որոշում կայացրեց Անդրանիկին տալ զեներալ-մայորի աստիճան:

Չեներալ Պրժևալսկու 1918 թ. հունվարի 4-ի հմր. 32 հրամանով կազմավորվեցին ևս երեք արևմտահայ հրաձգային գնդեր և գոյություն

ունեցող 7 գնդերի հիման վրա կազմավորվելու էին երեք առանձին հայկական իրաձգային բրիգադներ:

1918 թ. հունվարի 16-ի հմր. 77 հրամանով Կովկասյան ռազմաճակատի զորքերի հրամանատարի ժամանակավոր պաշտոնակատար գեներալ Լեբեդինսկին կարգադրեց արևմտահայերից կազմավորել ավելի խոշոր զորամիավորում՝ Հատուկ հայկական հավաքական ջոկատ, որը կարող էր ունենալ դիվիզիայից (18–20 հազար) ավելի՝ մինչև 30 հազար կազմ: 1918 թ. հունվարի 23-ին գեներալ Լեբեդինսկին տեղեկացրեց գեներալ-կոմիսար Պ. Ավերյանովին, որ Հատուկ հավաքական ջոկատի հրամանատար նախատեսված Անդրանիկ Օզանյանին շնորհվել է զառույթ (դերակալ) գեներալ-մայորի աստիճան: Դա նշանակում էր գեներալ-մայորի պաշտոնակատար, քանի որ Անդրանիկը զինվորական կրթություն չուներ, բայց նրան ենթարկվում էին գնդապետներ, փոխգնդապետներ, կապիտաններ, պորուչիկներ: Անդրանիկի՝ գեներալ Թ. Նազարբեկյանին ենթարկվածությունը կրում էր սոսկ անվանական բնույթ:

1918 թ. փետրվարի կեսերին Հատուկ հայկական հավաքական ջոկատն ուներ հետևյալ կառուցվածքն ու հրամանատարական կազմը.

Ջոկատի հրամանատար՝ դերակալ գեներալ-մայոր Անդրանիկ Օզանյան, շտաբի պետ՝ գնդապետ Միխայիլ Ջինկևիչ:

1-ին հատուկ բրիգադ — հրամանատար՝ գնդապետ Սորել: Կազմը՝ էրզրումյան հետևակային գունդ (գնդապետ Թորգոմ Արսենյան), երգնկայի հետևակային գունդ (կապիտան Կարապետ Հասանփաշայան), մեկ պահեստային, մեկ հեծյալ գունդ, լեռնահրետանային դիվիզիան, գնդացրային պարկ:

2-րդ հատուկ բրիգադ — հրամանատար՝ գնդապետ Ղ. Հովսեփյան: Կազմը՝ Ղարաքիլիսայի (փոխգնդապետ Արեշյան) և Խնուսի (փոխգնդապետ Գեղամյան) հետևակային գնդերը, օժանդակ զորամասեր:

3-րդ հատուկ բրիգադ — հրամանատար՝ գնդապետ Տ. Բաղդասարյան: Կազմը՝ Վանի երեք հետևակային գնդերը, Մակվի, Ջեթունի գնդերը, հրետանային դիվիզիան, գնդացրային պարկ:

Ջոկատի կազմում էին նաև Մուրադի, Սեպուհի, Պանդուխտի, Դալի Ղազարի և այլոց գլխավորած կամավորական խմբերը և ժողովրդական միլիցիայի զորամիավորումները:

Ըստ զորավար Անդրանիկի տվյալների՝ Հատուկ հավաքական ջոկատի կազմում կար 9000 կանոնավոր զորք և 16.000 անկանոն ուժ, երկուսը միասին՝ 25.000:

«ԹՈՒՐԲԱՅԱՅԱՍԱՆԻ» ՄԱՍԻՆ ԴԵԿՐԵՏԸ

1917 թ. նոյեմբերին ՌեսԽՍՀ ժողկոմսովետը ստեղծեց կառավարական հանձնաժողով՝ Արևմտյան Հայաստանի վերաբերյալ դեկրետի նախագիծ մշակելու նպատակով: Հանձնաժողովի մեջ մտնում էին Ի. Ստալինը, Վ. Ավանեսովը, Վ. Տերյանը, Ս. Լուկաշինը, ձախ էտե Պ. Պռոշյանը, մենշևիկ Աքսելրոդը, դաշնակցական Ս. Ջորյանը (Ռոստոմ): Հանձնաժողովը կազմեց զեկուցագիր Արևմտյան Հայաստանի մասին և դեկրետի նախագիծ, որը ներկայացվեց ՌեսԽՍՀ ժողկոմսովետի քննարկմանը:

Արևմտյան Հայաստանի մասին համառոտ զեկուցագրում ներկայացվում էր արևմտահայերի դառը ճակատագիրը, նրանց բնաջնջման ընթացքը: Ցույց էր տրվում, որ եթե դեռևս 17-րդ դարում հայերն իրենց հայրենիքում կազմում էին բնակչության 98 տոկոսը, ապա 1914-ին արդեն կազմում էին միայն 42 տոկոս, իսկ մնացած 58 տոկոսը հույներ, քրդեր, եզդիներ, ղզլբաշներ և թուրքեր էին: Եվ, այնուամենայնիվ, պատերազմն սկսվելուց առաջ հայերը ամենամեծ թիվը կազմող ազգային խումբն էին, իսկ բոլոր մուսուլմանները միասին 38 տոկոս էին: Ներկայացվում էր նաև 1915 թ. ցեղասպանությունը արևմտահայության նկատմամբ:

Ձեկուցագրի ոգով էլ կազմված էր դեկրետի նախագիծը, որով նախատեսվում էր անհրաժեշտ քանակությամբ ռուսական զորքեր թողնել էրզրումի, Վանի, Բիթլիսի վիլայեթներում, մինչև որ ազատ քվեարկությամբ կորոշվի Արևմտյան Հայաստանի անկախության հարցը և կկազմակերպվի հայկական ժողովրդական միլիցիա: Ըստ Բ. Բոդյանի՝ դեկրետի նախապատրաստման և ընդունման գործում վճռական դեր է խաղացել Ստ. Շահումյանը:

1917 թ. դեկտեմբերի 29-ին ՌեսԽՍՀ ժողկոմսովետը Վ. Ի. Լենինի նախագահությամբ քննարկեց և ընդունեց դեկրետ Արևմտյան Հայաստանի մասին, որը հրապարակվեց դեկտեմբերի 31-ին: Դեկրետում ասվում էր. «ժողովրդական կոմիսարների սովետը հայտարարում է հայ ժո-

ղովորին, որ Ռուսաստանի բանվորական և գյուղացիական կառավարությունը պաշտպանում է Ռուսաստանի կողմից օկուպացված «Թուրքահայաստանի» հայերի ազատ ինքնորոշման իրավունքը՝ ընդհուպ մինչև լիակատար անկախություն»:

Ժողովոսովետը դեկրետի կենսագործման համար անհրաժեշտ էր գտնում ապահովել հետևյալ պայմանները. 1. զորքերի դուրսբերումը Արևմտյան Հայաստանից և հայկական ժողովրդական միլիցիայի անհապաղ կազմակերպումը, 2. տարբեր երկրներում ցրված զաղթական հայերի, վտարանդիների, ինչպես նաև պատերազմի ժամանակ թուրքական իշխանությունների կողմից բռնի կերպով Թուրքիայի խորքերն աքսորված հայերի անարգել վերադարձը Արևմտյան Հայաստան, 3. Արևմտյան Հայաստանի ժամանակավոր կառավարության կազմակերպումը՝ դեմոկրատական հիմունքներով ընտրված հայ ժողովրդի Դեպուտատների խորհրդի ձևով:

Դեկրետի կենսագործումը դրվում էր Կովկասի գործերի ժամանակավոր Արտակարգ կոմիսար Ստեփան Շահումյանի վրա:

Սովետների համառուսաստանյան երրորդ համագումարը հաստատեց դեկրետը:

Սակայն մի շարք արտաքին ու ներքին աննպաստ պայմանների պատճառով հայ ժողովրդի բաղձանքներին համահունչ այդ դեկրետը չիրագործվեց, մնաց թղթի վրա: Նախ և առաջ Խորհրդային Ռուսաստանի վրա հարձակումը վերսկսեց Գերմանիան և նրան պարտադրեց Բրեստ-Լիտովսկի թալանչիական պայմանագիրը, որով Խորհրդային Ռուսաստանից անջատվեց մոտ 1 միլիոն քառ կմ. տարածք՝ 46 միլիոն բնակչությամբ: Դրան զուգահեռ 1918 թ. հունվարի վերջերին Արևմտյան Հայաստան ներխուժեցին թուրքական զորքերը: Ռուսական բանակում ստեղծված դեմոքրիլիզացիոն իրավիճակի պայմաններում Խորհրդային Ռուսաստանն ի վիճակի չէր կանխելու թուրքերի առաջխաղացումը: Բացասական դեր կատարեց նաև Անդրկովկասյան սեյմի հակախորհրդային դիրքորոշումը:

Չնայած Արևմտյան Հայաստանի մասին ՌԽՖՍՀ ժողովոսովետի դեկրետը չիրագործվեց, սակայն այն ունեցավ պատմական նշանակություն. դրանով Խորհրդային կառավարությունը ճանաչեց հայ ժողովրդի պատմական իրավունքները Արևմտյան Հայաստանում (Լ. Խուրշուդյան. ՌՍՖՍՀ ժողովրդական կոմիսարների սովետի «Թուրքահայաստանի մասին» դեկրետը, Բանբեր Երևանի համալսարանի, 1987, հ. 3):

Ակադեմիկոս Գ. Գալոյանն ավելի է լայնացնում դեկրետի պատմական նշանակության շրջանակները: Այդ առթիվ նա գրում է. «Խորհրդային կառավարության հրովարտակն ինքնին ուներ քաղաքական լուրջ հնչեղություն, քանի որ միջազգային դիվանագիտական փաստաթղթերում առաջին անգամ էր դրվում Արևմտյան Հայաստանին լրիվ անկախություն տալու հարցը: Սրանում էր այդ հրովարտակի պատմական նշանակությունը:

Այսուհետ անհնար դարձավ Հայաստանին անկախություն տալու հարցի չնկատելն ու շրջանցելը, իսկ հետագայում այն վճռորոշ նշանակություն ունեցավ Սևրում թուրքերի հետ դաշնակիցների պայմանագիրը կնքելիս:

Չի կարելի բացառել նաև այն իրողությունը, որ այդ հրովարտակի ազդեցության տակ դաշնակից տերությունները, այդ թվում և ՍՄՆ-ը, պետական մակարդակով բազմաթիվ որոշումներ ընդունեցին Հայաստանին անկախություն տալու վերաբերյալ» (Գալուստ Գալոյան, Հայաստանը և մեծ տերությունները 1917–1923 թթ., Երևան, 1999, էջ 21):

ԻՐԱԴՐՈՒԹՅՈՒՆԸ ԿՈՎԿԱՍՅԱՆ ՈԱՋՍԱՏԱԿԱՏՈՒՄ 1918 Թ. ԳԱՐՆԱՆԸ

Դեռևս 1917 թ. դեկտեմբերի 2(15)–ին Բրեստ-Լիտովսկում զինադադար կնքվեց Խորհրդային Ռուսաստանի և Բառյակ միության (Գերմանիա, Ավստրո-Յունգարիա, Բուլղարիա, Թուրքիա) միջև՝ 28 օրով, դեկտեմբերի 4–ից մինչև 1918 թ. հունվարի 1(14)–ը, որը կարող էր խախտվել 7 օր առաջ նախազգուշացնելուց հետո միայն: Ձինադադարը տարածվում էր նաև Կովկասյան ռազմաճակատի վրա:

Սակայն Անդրկովկասյան Կոմիսարիատը, որը չէր ճանաչում Խորհրդային Ռուսաստանի կառավարությանը, զենեռալ վիշինսկու գլխավորությամբ պատվիրակություն ուղարկեց Երզնկա, որտեղ 1918 թ. դեկտեմբերի 5(18)–ին կնքվեց «Պայմանագիր պատերազմի Կովկասյան–թուրքական ռազմաբեմում գործող ռուսական ու թուրքական բանակների միջև զինադադարի մասին»: Ձինադադարը կնքվեց մինչև հաշտության պայմանագրի կնքումը և կարող էր խախտվել այդ մասին 14 օր առաջ զգուշացնելուց հետո միայն:

1917 թ. դեկտեմբերի 9(22)-ին սկսվեցին Բրեստ-Լիտովսկի հաշտության բանակցությունները, որտեղ Խորհրդային Ռուսաստանի պատվիրակության ղեկավարն էր Ա. Իոֆֆեն: Խորհրդային կառավարությունը Վահան Տերյանին նշանակեց պատվիրակության կազմում հայկական հարցի խորհրդական, որին Վ. Լենինի ստորագրությամբ տրվեց վկայական: Պատվիրակության քարտուղարն էր հայ բուլշևիկ Լևոն Կարախանը:

Սակայն բանակցությունների ընթացքում Գերմանիան Խորհրդային Ռուսաստանին վերջնագիր ներկայացրեց և խախտելով 7 օրվա մասին պայմանավորվածությունը՝ անցավ հարձակման:

Գերմանացիների հարձակումից էլ առաջ՝ 1918 թ. փետրվարի 12-ին, խախտելով երզնկայի գինադադարը և պատճառ բերելով այսպես կոչված «հայկական գազանությունները»՝ Կովկասյան ռազմաճակատում հարձակում սկսեցին թուրքերը: Նույն օրը թուրքական բանակը գրավեց Երզնկան, հաջորդ օրը՝ Բայբուրդը: Փետրվարի 24-ին թուրքերը գրավեցին Տրապիզոնը, իսկ Երզրումի ռազմաճակատում՝ Մամախաթունը:

Այդ օրերին Զյազիմ Կարաբեքիր փաշայի գլխավորած ուժերին համառ դիմադրություն էին ցույց տալիս հայկական փոքրաթիվ ուժերը՝ գնդապետ Մորելի գլխավորությամբ:

Ալեքսանդրապոլում համալրելով իր ուժերը՝ ռազմաճակատ մեկնեց Անդրանիկը: Նրա առջև խնդիր էր դրված պաշտպանել Երզրումն ու նրա շրջակայքը: Փետրվարի 18-ին Անդրանիկը մեծ դժվարությամբ հասավ Երզրում և քաղաքը գտավ խուճապի մատնված: Նա ձեռնամուխ եղավ քաղաքի պաշտպանության կազմակերպմանը: Հայերի փախուստը դադարեց:

Երզրումի շրջանում ահեղ մարտեր սկսվեցին 1918 թ. փետրվարի վերջերին, որոնք տևեցին երկու շաբաթից ավելի: Այդտեղ թուրքերի դեմ կռվում էին Անդրանիկի կամավորական դիվիզիան և առաջին հայկական հետևակային բրիգադը՝ գնդապետ Մորելի հրամանատարությամբ: Հարձակվող թուրքական զորքերը թվակազմով երեք անգամ գերակշռում էին հայկական ուժերին: Անդրանիկն աներևակայելի ջանքեր էր թափում, բայց ապարդյուն: Հայկական զորքերն սկսեցին հետ քաշվել: Նահանջել սկսեցին նաև ռազմաճակատի զորքերը՝ Բեժանբեկովի հրամանատարությամբ: Մարտի 12-ին թուրքական զորքերը գրավեցին Երզրումը:

Մինչ այդ, 1918 թ. փետրվարի 10(23)-ին թիֆլիսում բացվեց Անդրկովկասյան Սեյմը, որի մեջ մտան դեռևս 1917-ի նոյեմբերին Համառուսաստանյան Սահմանադիր ժողովի՝ Անդրկովկասից ընտրված պատգամավորները: Ընտրությունների արդյունքում վրաց մենշևիկներն ստացել էին 12, ադրբեջանական մուսավաթը՝ 10, դաշնակցականները՝ 9 մանդատ: Այդ թվերը եռապատկվեցին և Սեյմում ընդգրկվեցին համապատասխանաբար 36, 30 և 27 պատգամավորներ: Կային նաև էտեռներ և այլ կուսակցությունների ներկայացուցիչներ՝ ընդհանուր թվով 125 պատգամավոր: Սեյմի նախագահ ընտրվեց մենշևիկ Ն. Հիսեիժեն:

Սեյմը, անընդունակ լինելով դիմադրություն կազմակերպելու հարձակվող թուրքերին, համաձայնեց հաշտության բանակցություններ սկսել Տրապիզոնում:

1918 թ. փետրվարի 16-ի նիստում Սեյմը գործնականորեն զբաղվեց Տրապիզոնում կնքվելիք հաշտության խնդրով: Միաձայնությամբ ընդունվեց հաշտության հետևյալ հիմնական պայմանները.

1. Ստեղծված պայմաններում Անդրկովկասյան Սեյմը իրեն համարում է իրավատեր՝ կնքելու հաշտություն թուրքիայի հետ:

2. Կնքվելիք հաշտության դաշնագրին իբրև հիմք պիտի դրվի 1914 թ. ռուս-թուրքական սահմանը, որը գոյություն ուներ նախքան պատերազմը:

3. Պատվիրակությունը ջանալու է ձեռք բերել Արևելյան Անատոլիայի ժողովուրդների՝ հայերի, ասորիների, լազերի համար ինքնորոշման իրավունք և, ի մասնավորի, թուրքահայաստանի համար ինքնավարություն՝ թուրքական պետության շրջանակներում: Հայերի համար առանց այն էլ ծանր այդ կետը ընդունվեց մեծ դժվարությամբ, որովհետև մուսավաթականները դա համարում էին միջամտություն «եղբայրական թուրքիայի» ներքին գործերին:

ՏՐԱՊԻԶՈՆԻ ԲԱՆԱԿՑՈՒԹՅՈՒՆՆԵՐԸ

Սեյմի 5-րդ՝ փետրվարի 17-ի նիստում հաստատվեց Տրապիզոն մեկնող պատվիրակության կազմը՝ Ա. Հիսեիժեի (նախագահ) և 11 անդամներ, այդ թվում հայերից՝ Հովհ. Քաջազունի և Ալ. Խատիսյան: Պատմաբան Լեոն (Առաքել Բաբախանյան) և Ռուբեն Տեր-Մինասյանը պատվիրակության մեջ մտան իբրև խորհրդականներ:

Պատվիրակությունը նույն օրը՝ փետրվարի 17-ին, պիտի մեկներ Տրապիզոն, երբ ստացվեց Բրեստ-Լիտովսկի բանակցություններում խորհրդային պատվիրակության քարտուղար Լևոն Կարախանի հեռագիրը, որով հայտնվում էր, որ փետրվարի 4-ին գերմանացիները ներկայացրել են նոր վերջնագիր և մերժել են մինչև դաշնագրի ստորագրումը դադարեցնել ռազմական գործողությունները, ուստի իրենք որոշել են ստորագրել դաշնագիրը, որը դեռևս քննարկման ընթացքում է։ Տեղեկացվում էր նաև, որ վերջնագրի ամենածանր կետն է Արդահանի, Կարսի և Բաթումի անջատումը Ռուսաստանից։

Լ. Կարախանի հեռագիրը վրդովմունք առաջացրեց Սեյմում, որտեղ ընդունվեց բողոքի հետևյալ հեռագիրը. «Բրեստ-Լիտովսկի հաշտության խորհրդածողովին, Պետրոգրադ՝ Սովնարկոմին, Լոնդոն, Փարիզ, Վաշինգտոն, Դեյն, Տոկիո, Կ. Պոլիս, Բեռլին, Վիեննա՝ արտաքին գործոց նախարարներին, Կիև՝ Կենտրոնական ռադային, Օդեսա՝ Սովդեպին. Զամածայն Սեյմի վճռի՝ Անդրկովկասյան կառավարության Անդրկովկասին և նրա սահմաններին վերաբերող ամեն մի դաշնագիր, որ կնքվում է առանց իր գիտության ու մասնակցության, համարվում է գուրկ միջազգային արժեքից և պարտավորեցուցիչ ուժից իրեն համար։ Այսու հայտնվում է նաև ի գիտություն հանրության, որ Անդրկ. Սեյմը արդեն ընտրել է հաշտության պատվիրակություն, որն ըստ Թուրքիայի հետ կայացված նախնական համաձայնության, պատրաստվում է մեկնել Տրապիզոն՝ վերջնական հաշտություն կնքելու նպատակով» (Ս. Վ., էջ 83)։

Անդրկովկասյան պատվիրակությունը Տրապիզոնի նավահանգիստ հասավ փետրվարի 23-ին միայն։ Պատվիրակությունը մի քանի օր ստիպված էր մնալ նավում, քանի որ թուրքական պատվիրակությունը դեռ չէր ժամանել, իսկ քաղաքը գրավված էր թուրքական զորքերի կողմից։

Վերջապես փետրվարի 27-ին Տրապիզոն հասավ 5 հոգուց կազմված թուրքական պատվիրակությունը՝ նախկին ծովային մինիստր Ռաուֆ բեյի զլխավորությամբ, և անդրկովկասյան պատվիրակությանը թույլ տրվեց նավից իջնել ցամաք։

Տեսնելով անդրկովկասյան բազմամարդ պատվիրակությանը (40-ից ավելի մարդ), թուրքերը հեզմանքով ասացին, որ եթե նրանք եկել են Տրապիզոնը գրավելու նպատակով, քիչ են, իսկ եթե եկել են բանակցելու համար՝ չափազանց շատ են։

Տրապիզոնի հաշտության կոնֆերանսը բացվեց 1918 թ. մարտի 1-ին։ Արևելյան շրջադրությամբ ու ճոռոմ լեզվով բացելով կոնֆերանսը՝ Ռաուֆ բեյը կտրուկ պահանջ դրեց ստույգ հայտարարություն անել Անդրկովկասյան հանրապետության էության, ձևի, քաղաքական ու վարչական կազմակերպության մասին և հարցում արեց, թե արդյո՞ք կատարված են այն պայմանները, որոնք պահանջվում են միջազգային իրավունքով պետություն կազմելու համար։

Հաջորդ՝ մարտի 2-ի նիստում, Անդրկովկասյան պատվիրակությունը պատասխանեց, թե առաջադրված հարցերը հերթի են դրված Անդրկովկասյան Սեյմում, որն ստեղծված է ընդհանուր ընտրական իրավունքի սկզբունքով, իսկ Անդրկովկասը դե ֆակտո պետություն է, որը դեռ չի հայտարարել պետություններին իր անկախությունը։

Մարտի 3-ի նիստում Ռաուֆ բեյը հայտարարեց, որ Անդրկովկասյան պետության կազմակերպությունը չի համապատասխանում միջազգային իրավունքին և այդ պետությունը դեռ հայտարարություն չի արել իր անկախության մասին, ուստի Օսմանյան կառավարությունը խնդրում է պաշտոնական հայտարարություն անել այդ մասին։

Անդրկովկասյան պատվիրակության վիճակն էլ ավելի ծանրացավ, երբ նույն օրը՝ 1918 թ. մարտի 3-ին կնքվեց Բրեստ-Լիտովսկի բալանչիական հաշտության պայմանագիրը, որով հօգուտ Քառյակ միության, Ռուսաստանից զավթվում էր մոտ մեկ միլիոն քառ. կմ տարածք։ Խլվում էին ոչ միայն Արևմտյան Զայաստանը, այլև Կարսն ու Արդահանը։ Պայմանագրի 4-րդ հոդվածում, որը նվիրված էր Կովկասին, ասված է. «Ռուսաստանը կանի իրենից կախված ամեն ինչ, որպեսզի ապահովի Արևելյան Անատոլիայի պրովինցիաների արագ մաքրումը և նրանց կանոնավոր վերադարձը Թուրքիային։ Արդահանի, Կարսի ու Բաթումի օկրուգները ևս անհապաղ մաքրվում են ռուսական զորքերից։ Ռուսաստանը չպետք է խառնվի այդ օկրուգների պետական-իրավական և միջազգային-իրավական հարաբերությունների նոր կազմակերպմանը, այլ այդ օկրուգների բնակչությանը կվերապահի նոր իրավակարգի հաստատումը՝ հարևան պետությունների, հատկապես Թուրքիայի համաձայնությամբ» (Ս. Արզումանյան, Արհավիրքից վերածնունդ, Երևան, 1973, էջ 104-105)։

Խորհրդային պատվիրակությունը հանդես եկավ հատուկ դեկլարացիայով, որի մեջ ընդգծվում է, թե տվյալ հաշտությունը ոչ թե համաձայնության արդյունք է, այլ մի կողմի բռնի ուժի թելադրանք մյուսին.

ուստի և այն անքեփոհիստական է ու իմպերիալիստական: Դեկլարացիայում Արդահանի, Կարսի ու Բաթումի մասին ասված է, որ Գերմանիան այդ մարզերը խլում է հօգուտ Թուրքիայի, որոնք ոչ մի անգամ չեն գրավվել թուրքական զորքերի կողմից:

Բրեստ-Լիտովսկում, բացի հիմնական պայմանագրից, ստորագրվեց նաև «Ռուս-թուրքական լրացուցիչ պայմանագիր», որը նախատեսում էր ռուսական զորքերի եվակուացիա Արևելյան Անատոլիայի գրաված շրջաններից՝ 6-8 շաբաթվա ընթացքում: Ռուսաստանը սահմանագծում 150 կիլոմետրի վրա պետք է պահպաներ մեկ դիվիզիա, իսկ մնացած զորքերը, ինչպես նաև հայկական զորամասերը, պետք է գորացրվեին: Վերականգնվում էր 1877-1878 թթ. ռուս-թուրքական պատերազմից առաջ զոյություն ունեցած սահմանագիծը:

Սակայն կրկին վերադառնանք Տրապիզոն: Մարտի 7-ին, կոնֆերանսի 4-րդ նիստում Ա. Զխենկելին հայտարարեց, որ Բրեստ-Լիտովսկի դաշնագիրը պարտավորեցուցիչ և ընդունելի չէ Անդրկովկասի համար, որը պատրաստվում է Թուրքիայի հետ կնքել հաշտություն:

Ռաուֆ բեյը պատասխանեց, որ օսմանյան պատվիրակությունը պնդում է Բրեստ-Լիտովսկի դաշնագրի վրա և ավելացրեց, որ բանակցությունները շարունակելու համար Անդրկովկասը պետք է հռչակի իր անկախությունը: Մարտի 8-ի հինգերորդ նիստում Զխենկելին նորից ընդգծեց Բրեստ-Լիտովսկի դաշնագիրն իրենց կողմից մերժելու մասին, որին ի պատասխան՝ Ռաուֆ բեյը վճռակամորեն հայտարարեց, որ դաշնագիր կնքելու համար բանակցությունները կարող են սկսվել միայն այն ժամանակ, երբ Անդրկովկասյան պատվիրակությունը հրաժարվի Բաթումի, Կարսի և Արդահանի սանջակների վրա ունեցած հավակնություններից: Իսկ ինչ վերաբերում է Թուրքահայաստանի ինքնավարության հարցին, ապա դա թուրքական ներքին խնդիր է և չի կարող քննության առնվել, որովհետև օսմանյան պատվիրակությունը թույլ չի տա միջամտել իր ներքին գործերին:

Բանակցություններն ընդհատվեցին, և Անդրկովկասյան պատվիրակությունը մի քանի հոգու, այդ թվում և Գ. Քաջագնունուն, ուղարկեց Թիֆլիս՝ նոր հրահանգներ ստանալու համար: Մարտի 13-ի նիստում Սեյմը որոշում ընդունեց պատվիրակության ղեկավար Ն. Զխենկելուն արտակարգ լիազորություններ տալու մասին:

Երզրումի անկումով (1918 թ. մարտի 12) փաստորեն ամբողջ Թուրքահայաստանը նորից անցավ թուրքերի ձեռքը և հայկական շրջանները նորից դարձան ավերակ ու անմարդաբնակ: Թուրքերի դեմ դիմադրությունը փաստորեն ստացավ հայ-թուրքական պատերազմի բնույթ, և բացառապես հայ ժողովրդից էր կախված պատերազմի վախճանը: Անդրկովկասյան Սեյմը ոչ միայն չէր նպաստում պատերազմին, այլև իր ներքին հակամարտություններով ավելի էր թուլացնում ճակատի պաշտպանության գործը:

1918 թ. մարտի 2-ին Զայկական կորպուսի հրամանատար, գեներալ Թ. Նազարբեկյանը նշանակվեց ճակատի հրամանատար, որը ձգվում էր Օլթիից մինչև Մակու: Օլթի-Բաթում գիծը պիտի պաշտպանեին վրացական զորքերը: Այդ երկու ճակատների ընդհանուր հրամանատարն էր գեներալ Լեբեդինսկին:

Գեներալ Թ. Նազարբեկյանի տրամադրության տակ կար 36 զուսմարտակ զորք, մոտ 15.000 զինվոր, որոնք պետք է պաշտպանեին 250 կմ երկարությամբ ձգվող ռազմաճակատը:

Զայկական ուժերի դեմ գործում էին թուրքական 5-րդ, 11-րդ և 36-րդ դիվիզիաները՝ Երզրում-Սարիղամիշ հատվածում, 1 դիվիզիա Ալաշկերտում և 1 դիվիզիա Վանա լճի շուրջը: Թուրքերն ունեին թվական գերազանցություն:

Զայերը ցույց էին տալիս ուժեղ դիմադրություն, և թուրքերը յուրաքանչյուր թիզ հողը գրավում էին մեծ զոհեր տալով:

Զայ-թուրքական ընդհարումները սկսվեցին մայրսի առաջին կեսին: Մարտի 10-ին թուրքական զորքերի ճնշման տակ հայկական զորքերը հետ քաշվեցին դեպի Խան-Դերե, իսկ մարտի 21-ին թուրքերը 6 զուսմարտակով լայն ճակատով շարժվեցին դեպի Կարաքուրտ, Բարդուս և այդ կետերը գրավելուց հետո հարձակվեցին Խան-Դերեի վրա: Նրա պաշտպանությունը հանձնարարվեց Դոյոյին, որն այդ օրերին եկել էր Սարիղամիշ: Սկսվեց արյունահեղ ճակատամարտ, որը տևեց մի քանի օր: Մարտի 23-ին, երբ Կարսից կտրվելու վտանգ առաջացավ, գեներալ Արեշյանը նահանջի հրաման տվեց: Մարտի 23-ի լույս 24-ի գիշերը հայկական զորքերը թողեցին Սարիղամիշը՝ նախօրոք պայթեցնելով պահեստներն ու ռազմական օբյեկտները:

Սարիղամիշի անկումով հայկական գործերը դուրս եկան Ալաշ-կերտից: Հայկական գործեր մնացին միայն Վանում, որոնք պաշտպանվեցին մինչև ապրիլի կեսերը և ապա կռվով նահանջեցին դեպի Պարսկաստան:

ԱԴՅՅ ԱՏԵՂՈՒՄԸ

Արտակարգ լիազորություններ ստանալուց հետո Ա. Չխենկելին մարտի 28 (ապրիլի 10)–ին Ռաուֆ բեյին հաղորդեց, որ ինքն ընդունում է Բրեստ–Լիտովսկի դաշնագիրը և պատրաստ է շարունակելու բանակցությունները՝ հիմնվելով դրա վրա: Պատվիրակության հայ անդամներ Յ. Քաջազունին և Ալ. Խատիսյանը նույնպես գտնում էին, որ ստեղծված պայմաններում Բրեստ–Լիտովսկի դաշնագրի ընդունումը պետք է համարել փոքրագույն չարիք: Սակայն ապրիլի 13–ին Ռաուֆ բեյն այդ գրությանը պատասխանեց, որ բանակցությունները շարունակելու համար անհրաժեշտ է, որ Անդրկովկասը հայտարարի իր անկախությունը: Հաջորդ օրը՝ արդեն նոր տոմարով ապրիլի 14–ին կոմիսարիատի նախագահ Ե. Գեգեչկորիի հեռագրով պատվիրակությունը հետ կանչվեց Տրապիզոնից: Բանն այն է, որ Սեյմի մարտի 31–ի նիստում վրացի և հայ պատգամավորները կտրականապես դեմ արտահայտվեցին Բրեստ–Լիտովսկի պայմանագիրն ընդունելուն և կոչ արեցին զենքը ձեռքին ճակատ մեկնել ու պաշտպանել հայրենի հողը: Ուստի և Սեյմը միաձայնությամբ ընդունեց պատվիրակությանը Տրապիզոնից հետ կանչելու որոշում, որը փաստորեն նշանակում էր, որ Անդրկովկասը պաշտոնապես պատերազմի մեջ էր մտնում Թուրքիայի հետ: Պատերազմը վարելու համար ընտրվեց երեք հոգուց կազմված հատուկ մարմին՝ Ե. Գեգեչկորի, Խ. Կարճիկյան, Ն. Ռամիշվիլի: Ընդունվեց նաև կոչ՝ ուղղված Անդրկովկասի ժողովուրդներին, որով Անդրկովկասյան ընդհանուր հայրենիքը պաշտպանելու համար զենքի էին կոչում բոլորին (Ս. Վ., էջ 103–105):

Ինչպես իրավացիորեն նշում է Ս. Վրացյանը (էջ 105) Սեյմի որոշումը՝ պատերազմը շարունակելու մասին, նորություն էր միայն վրացիների համար, որովհետև հայերն արդեն իսկ պատերազմի մեջ էին: Այդ էր պատճառը, որ վրացի ղեկավարները դիմեցին աղմկոտ քայլերի, և նույնիսկ ժողովանիան և Ծերեթելին հրացան առած մեկնեցին ռազմաճակատ: Թիֆլիսում ստեղծվեց պատերազմական բարձր տրամադրու-

թյուն: Սակայն այդ ոգևորությունը կարճ տևեց, որովհետև ստացվեց Բաթումի անկման լուրը. թուրքերն առանց դիմադրության հանդիպելու այն գրավեցին ապրիլի 11–ին: Վրացական գործերն անընդիատ նահանջում էին, աճում էր դասալքությունն ու բարոյալքումը:

Վրացիների անհաջողությունները սուր ցավ էին պատճառում հայերին: Սարիղամիշի անկումից հետո ՀՀԴ Արևելյան բյուրոյի նախաձեռնությամբ Ալեքսանդրապոլում հրավիրվեց համագալսի խորհրդաժողով, որը պետք է որոշեր հայերի վարքագիծը պատերազմի հարցում: Պատերազմի և խաղաղության մասին զեկուցում կարդաց Յ. Քաջազունին, որն աշխատեց համոզել թուրքական պայմաններն ընդունելու անհրաժեշտությունը: Սակայն մեծամասնությունը պաշտպանեցին պատերազմը շարունակելու անհրաժեշտությունը:

Ստեղծված բարդ իրավիճակը շատ ճիշտ է ներկայացրել Ս. Վրացյանը, որն այդ առթիվ գրում է. «Թիֆլիսում, սակայն, ամեն բան որոշված էր. վրացիներն ու թուրքերը վճռել էին՝ վերջ տալ պատերազմին, ընդունել թուրքական վերջնագիրը և հայտարարելով Անդրկովկասի անկախությունը՝ վերսկսել հաշտության բանակցությունները: Այս քայլն անելիս վրացիները որոշ հույսեր էին կապում գերմանացիների հետ... իսկ կովկասյան թուրքերի համար Թուրքիան ցանկալի բարեկամ էր:

Այսպիսով՝ հայերի համար ստեղծվում էր ահավոր կացություն. միանալ վրացիներին ու թուրքերին՝ նշանակում էր ձեռք քաշել ոչ միայն ամբողջ Թուրքահայաստանից, այլև Ռուսահայաստանի մի երրորդ մասից, և դեռ հարց էր՝ կգոհանայի՞նք արդյոք թուրքերը միայն Բրեստ–Լիտովսկի պայմանագրով: Չմիանալ՝ նշանակում էր անջատվել հարևաններից, մնալ մեռակ, կտրված ամբողջ աշխարհից, շրջապատված մահմեդական ծովով, թուրքական բանակի սպառնալիքի տակ՝ դատապարտված ստույգ մահվան: Պետք էր ընտրել չարիքներից փոքրագույնը, և հայերը միացան այդ որոշմանը» (Ս. Վ., էջ 108):

Մեր պատկերացմամբ, սակայն, «ուրիշ ճանապարհներն» ի սկզբանե փակելու և ինքնապահովագրման միտումով է գրված շարունակությունը, որտեղ ասվում է, թե կային նաև խորհրդային Ռուսաստանի ճանապարհը ցույց տվող մարդիկ, որոնք առաջարկում էին ձեռք մեկնել բոլշևիկներին, սակայն... Ռուսաստանը շատ էր հեռու Հայաստանից, իսկ բոլշևիկների ուժը՝ ավելի քան խնդրական: «Ուրիշ ճանապարհ չկար, — շարունակում է Ս. Վրացյանը: 1918 թ. ապրիլի 9(22)–ին գումարվեց Սեյմի 22–րդ նիստը, ուր դրվեց Անդրկովկասի անկախության հայ-

տարարության հարցը: Մեռելատան էր մմանվում այդ օրը Սեյմի դահլիճը: Մենակ հայերը չէին սզավոր. վրացիներն էլ լավ չէին զգում իրենց...

Տոնական տրամադրություն ունեին միայն վրացի ազգայնականները, բայց, մանավանդ, թուրքերը... Մուսավաթական ֆրակցիան իրեն զգում էր նորափեսայի դերում...

Իսկական սզի մեջ էին հայերը: Սիրտ չկար խոսելու: Եվ ի՞նչ խոսել. լքուր խոսքերն արդեն ասված էին: Նրանց ապրումները արտահայտեց Հ. Քաջազնունին: Հուզված, մազերը ցրիվ՝ բարձրացավ ամբիոն ու կարդաց. Պարոնայք Սեյմի անդամներ: Ղաշնակցության ֆրակցիան՝ գիտակցելով շատ պարզ այն մեծ պատասխանատվությունը, որ առնում է իր վրա այս պատմական վայրկյանին, միանում է ինքնուրույն Անդրկովկասյան պետության հայտարարությանը: Եվ ուրիշ ոչինչ» (Ա. Վ., էջ 109):

Հատկանշական է, որ մի շարք պատգամավորներ խստորեն դեմ արտահայտվեցին Անդրկովկասի անկախությանը: Օրինակ՝ էտե Լ. Թումանյանն ասաց, որ Անդրկովկասի ներկա պայմաններում հայտարարված անկախությունը ոչ այլ ինչ է, եթե ոչ կատարյալ ստրուկ դառնալ Թուրքիային: Իսկ ռուս Սեմյոնովն ասաց, որ անկախության հայտարարությունը հնարավորություն կտա թուրքերին՝ պարզապես գրավելու ամբողջ Անդրկովկասը:

Երկար վիճաբանությունից հետո, սակայն, Սեյմը ընդունեց հետևյալ բանաձևը. «Անդրկովկասյան Սեյմը որոշեց՝ հայտարարել Անդրկովկասը ռամկավար դաշնակցային հանրապետություն»: Այդպիսով՝ ստեղծվեց Անդրկովկասի Դեմոկրատական Ֆեդերատիվ Հանրապետությունը՝ ԱՂՖՀ-ն, որը գոյություն ունեցավ ընդամենը մեկ ամիս չորս օր և 1918 թ. մայիսի 26-ին լուծարվեց:

Սեյմը հավանություն տվեց Տրապիզոնի պատվիրակության գործունեությանը և հանձնարարվեց նրան՝ շարունակել բանակցություններն ու հասնել հաշտության շուտափույթ կնքման:

Ընդունվեց Ե. Գեգեչկորիի կառավարության հրաժարականը և նոր կառավարության կազմելը հանձնարարվեց Ա. Զխենկելիին: Անդրկովկասյան Սեյմի 1918 թ. ապրիլի 13(26)-ին 25-րդ նիստում հանդիսավորապես հռչակվեց անկախ ԱՂՖՀ-ի առաջին կառավարության կազմը. Ա. Զխենկելի (նախագահ), Ն. Ռամիշվիլի (ներքին գործերի նախարար), Ա. Խատիսյան (ֆինանսների նախարար), Խ. Մելիքով-Ասլանով (հաղորդակցության ճանապարհների նախարար), Ֆ. Խան-Խոյսկի

(արդարադատության նախարար), Գ. Գեորգաձե (ռազմական նախարար), Ն. Խոմերիկի (երկրագործության նախարար), Ն. Ուսուբեկով (ժողովրդական լուսավորության նախարար), Մ. Հաջինսկի (առևտրի և արդյունաբերության նախարար), Ա. Սահակյան (պարենամթերքի նախարար), Ռ. Քաջազնունի (պետական խնամատարության նախարար), Ա. Երզնկյան (աշխատանքի նախարար), Ի. Հայդարով (պետական վերահսկիչ) (տե՛ս Ա. Զ. Սահակյան, Անդրկովկասյան Սեյմի 1918 թ. կառավարության հարցի շուրջ, ՊԲՀ, 1988, հ. 3):

1918 թ. ապրիլի 28-ին թուրքական հրամանատարությունը հայտնեց Անդրկովկասյան Սեյմին, որ իր կառավարությունը ճանաչել է Անդրկովկասի անկախությունը և այդ մասին հայտնել իր դաշնակիցներին:

Անդրկովկասի անկախության հռչակումը, որը փաստորեն նշանակում էր երկրամասը կտրել Խորհրդային Ռուսաստանից, տրամագծորեն հակասում էր հայ ժողովրդի կենսական շահերին, ուստի այդ իրադարձության ճշմարիտ գնահատականի հարցը կարոտ է հետագա հանգամանակի ուսումնասիրության: Խորհրդահայ պատմագրության մեջ ընդունված էր ասել, որ Անդրկովկասի անկախության հռչակմամբ գերմանա-թուրքական իմպերիալիստների համար լիակատար հնարավորություն էր ստեղծվում ազատորեն խախտել Բրեստ-Լիտովսկի պայմանագրի՝ Անդրկովկասին վերաբերող 4-րդ հոդվածը, այն պատճառաբանությամբ, որ վերջինս անջատվել է Խորհրդային Ռուսաստանից, և, այդպիսով, Անդրկովկասը հեշտ ավար էր դառնում օտարերկրյա նվաճողների համար (Հայ ժողովրդի պատմություն, հատոր 7, ՀՍՍՀ ԳԱ հրատ., Երևան, 1967, էջ 39): Կարծում ենք, որ նման գնահատականն ընդհանուր առմամբ ճշմարտացիորեն է արտացոլում իրականությունը:

Հիմնահարցի օբյեկտիվ լուսաբանումը բանալի նշանակություն ունի նաև խորհրդա-անդրկովկասյան հետագա հարաբերություններն ու իրադարձությունները պարզաբանելու համար:

ԻՐԱԴԱՐՁՈՒԹՅՈՒՆՆԵՐԸ ԲԱԶՎՈՒՄ

Վերևում արդեն նշվել է, որ Հոկտեմբերյան հեղափոխության հաղթանակից հետո Բաքվի սովետը 1917 թ. նոյեմբերի 2-ին ընտրեց նոր

գործադիր կոմիտե՝ բուլշևիկ Ստեփան Շահումյանի նախագահությամբ, և Բաքվում հռչակեց խորհրդային իշխանություն:

1918 թ. մարտի վերջերին խորհրդային իշխանություն հաստատվեց ամբողջ Բաքվի նահանգում և Դաղստանում:

1917 թ. դեկտեմբերի 30–ին Բաքվում ստեղծվեց Հայոց ազգային խորհուրդ, որի նախագահ ընտրվեց Աբրահամ Գյուլխանդամյանը: Խորհուրդը ձեռնամուխ եղավ Բաքվում հայկական զինուժի կազմակերպման գործին:

Շամխորի և Ելիզավետպոլի հայտնի իրադարձություններից հետո, երբ Կովկասյան ռազմաճակատից տուրն վերադարձող ռուսական զինվորական էլեյոնները գնդակոծվեցին, մահմեդական կանոնավոր և անկանոն զորամասերը շրջափակեցին Բաքու–Թիֆլիս երկաթուղին: Դրա հետևանքով Արևմտյան ռազմաճակատից և Իրանից Հայկական կորպուսում ծառայելու նպատակով Անդրկովկաս վերադարձող շուրջ ութ հազար հայ զինվորներ հարկադրաբար կուտակվեցին Բաքվում: Այդ ժամանակ Հայոց ազգային խորհուրդը Բաքու ուղարկեց Համագասպ Արվանձտյանին, որը քաղաքում կազմավորեց հայկական գումարտակ: Ստեղծված կարմիրգվարդիական ջոկատների շուրջ 6 հազար զինվորների մեծ մասը նույնպես հայեր էին:

Բաքվի Հայոց ազգային խորհուրդը հայ բնակչության շրջանում 18–45 տարեկան տղամարդկանց զորակոչ հայտարարեց: 1918 թ. մարտի 5–ին ընտրվեց Բաքվի հայկական զորամասերի Գլխավոր զինվորական մարմին՝ Վարդանի, գնդապետներ Բախտամյանի և Դազարյանի գլխավորությամբ: Հայկական զորամասերում ընդգրկված հայ զինվորների թիվը հասավ 13 հազարի, որոնք Կովկասյան Կարմիր բանակի շտաբի և Բաքվի Հայոց ազգային խորհրդի միջև 1918 թ. ապրիլի 14–ին կնքված համաձայնագրով միացան Բաքվի խորհրդի կարմիր գվարդիային:

1918 թ. ապրիլի 25–ին Բաքվի բանվորների, զինվորների և նավաստիների դեպուտատների սովետը ընտրեց Բաքվի նահանգի ժողովրդական կոմիսարների սովետ: Ժողկոմսովետի նախագահ և արտաքին գործերի կոմիսար ընտրվեց Ստ. Շահումյանը, ներքին գործերի կոմիսար՝ Ա. Ջափարիձեն, ժողովրդական տնտեսության՝ Ի. Ֆիդլետովը, ռազմածովային՝ Գ. Կորզանովը, արդարադատության՝ Ա. Կարինյանը, լուսավորության՝ Ն. Կոլեսնիկովան, հաղորդակցության, փոստի և հեռագրի՝ Ի. Սուխարցևը, քաղաքային տնտեսության՝ Ն. Նարիմանովը, հո-

ղագործության՝ Մ. Վեզիրովը, աշխատանքի՝ Յա. Ջևինը: Բաքվում և Ադրբեջանի մի շարք շրջաններում հաստատված խորհրդային իշխանությունը հայտնի է նաև Բաքվի կոմունա անունով:

Ժողկոմսովետը 1918 թ. հունիսի 2–ի դեկրետով ազգայնացրեց նավթարդյունաբերությունը, ձկնարդյունաբերությունը, Կասպյան առևտրական նավատորմը, բանկերը: Հողի ազգայնացման դեկրետով այն խլվեց կալվածատերերից և տրվեց գյուղացիությանը: Իրականացվեցին նաև այլ սոցիալ–տնտեսական ու մշակութային վերափոխումներ:

Արդեն 1918 թ. հունիսին Բաքվի կոմունան իր տրամադրության տակ ուներ 20 հազար զինվորներից բաղկացած հրաձգային գնդեր, որոնցից 15–16 հազարը հայեր էին և որը լավագույն հենարան էր Ստ. Շահումյանի համար (տես Ա. Նազարյան, նշվ. աշխ., էջ 204–205):

ԹՈՒՐՔԱԿԱՆ ՉՈՐՔԵՐԻ ՆԵՐԻՆՈՒԺՈՒՄԸ ԱՐԵՎԵԼՅԱՆ ՀԱՅԱՍՏԱՆ. ՍԱՐԴԱՐԱԿԱՏԻ ՀԵՐՈՍԱՄԱՐՏԸ

Սարդարապատի հերոսամարտը հայոց նորագույն պատմության Ավարայրն է: Միանգամայն հրավացի է ակադեմիկոս Աշոտ Յովհաննիսյանը, որը Զ. Թուրշյանի «Սարդարապատի հերոսամարտը» (Երևան, 1965, 1969) գրքի առաջաբանում գրել է. «Դժվար է վանել այն միտքը, որ Սարդարապատի շիկացած ավազուտներում կատարված այդ ողբերգությունը հայ ժողովրդի նոր պատմության համար ավելի նշանակալից է և այժմեական, քան վերագրվում է նրա հին պատմության մեջ այն ողբերգությանը, որ կատարվել է Ավարայրի դաշտում՝ Տղմուտի ափին (էջ 19)»:

Սարդարապատի հաղթանակի պատմական իմաստի խոր ընկալումով է արտահայտված հայոց Մեծերից մեկի՝ մարշալ Յովհաննես Բաղդասյանի հետևյալ միտքը. «Կցանկանայի, որ յուրաքանչյուր ընթերցող լրջորեն խորհեր գլխավոր շահի մասին՝ վտանգներով լեցուն այս շրջանում պահպանել ամեն հայի համար սուրբ այս օրանը՝ Արարատյան դաշտն իր սովոր բնակչությամբ, իր քաղաքներով, հայ ժողովրդի հազարամյա մշակութի կենտրոններով ու օջախներով» (Զ. Բաղդասյան, Իմ հիշողությունները. «Սարդարապատի հերոսները» գլուխը, Երևան, 1979, էջ 91):

Սարդարապատի նշանակությունն առավել առարկայական է ներկայացրել անգլիացի պատմաբան Քրիստոֆեր Ուոքերը «Հայաստան: Ազգի վերապրումը» գրքում, որտեղ նա գրել է. «Եթե հայերը պարտություն կրեին Սարդարապատում, Հայաստան բառը կարող էր նշանակել սոսկ մի հին աշխարհագրական տերմին, ինչպես, օրինակ, Կապադովկիան»:

Խորհրդային իշխանության առաջին տասնամյակներին Սարդարապատի հերոսամարտի շուրջ լիակատար լռություն էր պահպանվում: Պատճառը պարզ էր. այն անմիջականորեն ազդեցվում էր դաշնակցու-

թյան գործունեության հետ: 1950-ական թթ. կեսերից պատմագրության մեջ սկսեցին հայտնվել ժլատ, գրեթե ոչինչ չասող տողեր: Այսպես՝ 1954-ին հրատարակված «Ուրվագծեր Սովետական Հայաստանի պատմության» առաջին պրակում (ՀՍՍՀ ԳԱ, Երևան, 1954, էջ 25) Սարդարապատի մասին գրված է ընդամենը հետևյալը. «1918 թ. մայիսին թուրքերը վերսկսեցին հարձակումը Արևելյան Հայաստանի վրա... Հայ ժողովուրդն իր համար ստեղծված այս բացառիկ ծանր օրերին, հակառակ դաշնակցների կապիտուլյանտական-դավաճանական քաղաքականության, մի շարք վայրերում համառ դիմադրություն ցույց տվեց թուրքական զավթիչներին: Երևանի շրջակա գյուղերի բնակչությունը Սարդարապատի տակ մայիսի վերջին օրերին պարտության մատնեց Երևանի վրա արշավող թուրքական դիվիզիային և ստիպեց նրան նահանջել դեպի Ալեքսանդրապոլ: Նույն օրերին Ղարաքիլիսայի տակ Ղազախ-Դիլիջանի և Փամբակի գյուղերի գյուղացիությունը երեք օր կանգնեցրեց թուրքական բանակի առաջխաղացումը»: Եվ էլ ուրիշ ոչինչ:

Սարդարապատի հերոսամարտին սուղ էջեր են նվիրված Երվանդ Սարգսյանի «Թուրքիան և նրա նվաճողական քաղաքականությունը Անդրկովկասում» (Երևան, 1964) ընդհանուր առմամբ արժեքավոր մենագրությունում: Պարզապես բերենք մի նմուշ այդ շարադրանքից՝ առանց մեկնաբանությունների. «Թուրք զավթիչների դեմ մղած պայքարում առաջին դիրքերում էին գտնվում հայ կոմունիստները և սպարտակյանները: Սարդարապատի, Բաշ-Ապարանի և Ղարաքիլիսայի հերոսամարտերը հայ ժողովրդական զանգվածների համառ կամքի և հաղթելու կարողության փայլուն դրսևորումն էին, մի բան, որին բոլորովին չէին սպասում ոչ դաշնակցական պարտիայի պարագլուխները, ոչ Ազգային խորհուրդը և ոչ էլ բանակի գլխավոր հրամանատարությունը (էջ 451)»:

Հիմնահարցին նվիրված միակ հատուկ աշխատությունը Հարություն Թուրշյանի «Սարդարապատի հերոսամարտը» մենագրությունն է, որն ունի երկու հրատարակություն՝ 1965 թ. և 1969 թ. և առաջնեկության իրավունքով գնահատելի գործ է: Սակայն հեղինակի ընդգծված հակադաշնակցական վերաբերմունքն ուղղակի ավերածություններ է առաջացրել շարադրանքում: Նշված մենագրության սուր քննադատությունն էր ուղղված Երևանի Ազգային խորհրդի նախկին անդամ Արշալույս Աստվածատրյանի «Սարդարապատի պատմաշինությունը» գրքուկը (Բեյրութ, 1966):

1967-ին հրատարակվեց ՀՍՄՀ ԳԱ «Հայ ժողովրդի պատմություն» ութհատորյակի առաջնելը՝ 7-րդ հատորը, որտեղ, ցավոք, 1918 թ. Մայիսյան հերոսամարտերին հատկացված է ընդամենը մեկուկես էջ (էջ 43-44): Բավական է, երևի, ասել, որ այստեղ չի հիշատակված որևէ անուս:

Մակիչ Արզումանյանի «Արհավիրքից վերածնունդ» (Երևան, 1973) արժեքավոր մենագրությունում, ճիշտ է, Սարգսրապատն արդեն արժանացել է երկրորդ գլխի վերնագրում հիշատակվելու պատվին՝ «Սուլթանական Թուրքիայի արշավանքը Անդրկովկասի վրա և Սարգսրապատի հերոսամարտը», սակայն 131 էջանոց այդ գլխում Մայիսյան հերոսամարտերին վերաբերում է ընդամենը 8 էջ՝ 7 կոմունիստների ու սպարտակյանների անուն-ազգանունների բարեխիղճ թվարկմամբ: Մինչդեռ Երևանի գորաբաժնի հրամանատար Մ. Սիլիկովն իբր ցուցաբերում է պասիվություն և զբաղվում հիմնականում զորքի էվակուացիայով (էջ 144): Գոնե լավ է, որ չեն անտեսված Դանիել Բեկ և Պավել Բեկ-Փիրումյանների ու մի շարք այլ հրամանատարների անունները, այն էլ հավանաբար նրա համար, որ ըստ հեղինակի 5-րդ գունդը հայտնի էր իբրև բուլշևիկյան գունդ:

1982-ին լույս տեսավ ակադեմիկոս Ծատուր Աղայանի «Հրկտեմբերը և հայ ժողովրդի ազատագրական պայքարը» արժեքավոր մենագրությունը: Այստեղ արդեն մի ամբողջ ծավալուն գլուխ է հատկացված Մայիսյան հերոսամարտերին՝ շուրջ 150 էջ, որտեղ Սարգսրապատը, Բաշ-Ապարանը և Ղարաքիլիսան տրված են առանձին ենթագլուխներով, հիմնականում օբյեկտիվորեն են ներկայացված հերոսամարտի դրվագներն ու գործող անձերը: Սակայն, ցավոք, նսենացված է Դրոն, կան վիճահարույց մի շարք այլ գնահատականներ:

Ուզմական-պատմաբանի հմուտ գրչով է շարադրված Աշոտ Հարությունյանի «Թուրքական ինտերվենցիան Անդրկովկաս 1918 թվականին և ինքնապաշտպանական կռիվները» (Երևան, 1984) մեծարժեք մենագրության համապատասխան բաժինը: Արժանվույնս գնահատված են զորավարներ Թ. Նազարբեկյանի, Մ. Սիլիկյանի և մյուս զորահրամանատարների ծառայությունները, հայկական կանոնավոր զորամասերի խաղացած դերը, անկողմնակալ քննադատության են ենթարկված Հ. Թուրշյանի մերժելի տեսակետները: Գրքում, ցավոք, տեղ չի տրված Բաշ-Ապարանի հերոսամարտին, առկա են գաղափարախոսական նկատառումներով պայմանավորված որոշ անընդունելի ձևակերպում-

ներ ու գնահատականներ: Սակայն ընդհանուր առմամբ մենագրությունը մի նշանակալի առաջընթաց քայլ է հիմնահարցի լուսաբանման ճանապարհին:

Դրոյի՝ Դրաստամատ Կանայանի դերը Բաշ-Ապարանի ճակատամարտում ըստ ամենայնի լուսաբանված է Համլետ Գևորգյանի «Դրո» (Երևան, 1991, 2000) աշխատության մեջ:

Հայ զորահրամանատարների և հայկական զորաբաժինների մարտական գործողությունների վերաբերյալ կարևոր տեղեկություններ կան Մուրադ Կարապետյանի «Հայաստանի Հանրապետության բանակը. 1918-1920, Երևան, 1991» աշխատության մեջ:

Մայիսյան հերոսամարտերի պատմության, ճիշտ է, սեղմ, բայց ամբողջական և օբյեկտիվ շարադրանք է ֆրանսահայ պատմաբան Սերժ Աֆանասյանի «Սարգսրապատի հաղթանակը. Հայաստան, Մայիս 1918» (Երևան, 1991) աշխատությունը, որտեղ հեղինակն օգտագործել է օտարալեզու կարևորագույն աղբյուրներ ու գրականություն:

Ակադեմիկոս Հր. Սիմոնյանի «Անդրանիկի ժամանակը» (Երևան, 1996) երկհատոր մենագրության 2-րդ գրքի համապատասխան ենթաբաժինը կրում է «Հայոց նոր Ավարայրը» վերնագիրը: Հեղինակը հայտնում է այն կարծիքը, որ Սարգսրապատի ճակատամարտի վճռական և առավել հերոսական օրը մայիսի 27-ն էր, որ Բաշ-Ապարանում փայլուն հաղթանակ ձեռք բերվեց Դրոյի գլխավորությամբ և որ, այնուամենայնիվ, ամենակատաղի ճակատամարտը տեղի ունեցավ Ղարաքիլիսայի մոտ, որի ղեկավար հերոսներից մեկն էլ Գարեգին Նժդեհն էր: Քննարկվում է նաև Անդրանիկի՝ Ղարաքիլիսայի ճակատամարտին չմասնակցելու խնդիրը և հայտնվում է այն կարծիքը, որ բավարար հիմքեր չկան արդարացնելու Անդրանիկի տարօրինակ վարմունքն ու անընթացելի կեցվածքը, երբ չորս կողմը կրակ ու արյուն էր (էջ 151):

Ակադեմիկոս Հրանտ Ավետիսյանը «Հայկական հարցը 1918 թվականին» (Երևան, 1997) մենագրությունում առանձին ենթագլուխ է հատկացրել Մայիսյան հերոսամարտերին: Պարզաբանելով պատմագրության մեջ գոյություն ունեցող շփոթ՝ հեղինակը ցույց է տալիս, որ թուրքերի շրջապատման ու ջախջախման պլանը մշակել էր գեներալ Մ. Սիլիկյանը՝ իր շտաբով, իսկ գնդապետ Դանիել Բեկ-Փիրումյանը Երևանյան ջոկատի հրամանատարի տեղակալն էր, որի հրամանատարության տակ մայիսի 23-ին միավորվեցին Սարգսրապատի և Իգ-

դիր ջոկատները: Գրքում հրապարակված են նաև արխիվային նորահայտ նյութեր:

ԹՈՒՐԵԱԿԱՆ ՋՈՐՔԵՐԻ ԱՌԱՋԻՆԱՐԱՑՈՒՄԸ, ԿԱՐՍԻ ԵՎ ԱԼԵՔՍԱՆԴՐԱՊՈԼԻ ԱՆԿՈՒՄԸ

Երզրումի անկումից հետո հայկական ուժերը նահանջեցին դեպի Սարիղամիշ: Տասնօրյա կատաղի մարտերից հետո, 1918 թ. ապրիլի 5-ին նրանք թողեցին նաև Սարիղամիշը, որը թուրքերը գրավեցին ապրիլի 10-ին և դիմադրական կռիվներ մղելով՝ տասնմեկ օր անց միայն հասան Կարս: Նրանք կանգ առան Բեզլի-Ահմեդում՝ Կարսից 20 կմ արևմուտք: Ապրիլի 7-ին թուրքերը գրավեցին Վանը, իսկ ապրիլի 15-ին՝ Բաթումը: Կարսի կայազորն ուներ 3.600 զինվոր, 1700 նորակոչիկ հրետանավոր, 100 գործող հրանոթ, 700 հնատիպ հրանոթ: Ջինվորականների կարծիքով այդ ուժերը կարող էին մեկ ամիս պաշտպանել Կարսը:

Սակայն Անդրկովկասի անկախության հռչակումից հետո (1918 թ. ապրիլի 22) ռազմական կոմիսար Ն. Չխենկելին գեներալ-լեյտենանտ Օդիշելիժեի միջոցով հեռագրով տեղեկացրեց Վեհիբ Փաշային, որ սկսած 1918 թ. ապրիլի 23-ի ժամը 17.00-ից, Անդրկովկասյան կառավարությունը դադարեցնում է ռազմական գործողությունները: Միաժամանակ Օդիշելիժեն հրամայեց գեներալ Թ. Նազարբեկյանին՝ թուրքերին հանձնել Կարսը: Սեյմի հայ անդամները տեղյակ էին դրան, ուստի հրամանը համարվեց դավաճանություն: Նազարբեկյանը փորձում էր կապվել Թիֆլիսի Հայոց Ազգային խորհրդի հետ, բայց գիծը չէր գործում՝ վրացիների անբարյացակամության հետևանքով: Երբ ի վերջո ստացվում է Ազգային խորհրդի հեռագիրը՝ հաշվի չառնել Չխենկելու հրամանները, արդեն ուշ էր. Նազարբեկյանը բերդի պարետ Դեսին կարգադրություն էր արել բերդը հանձնելու մասին, և ապրիլի 26-ին թուրքերն առանց դիմադրության հանդիպելու գրավեցին Կարսի անառիկ բերդը:

Կարսի գնով զինադադար կնքվեց և Տրապիզոնում ընդհատված թուրք-անդրկովկասյան բանակցությունները վերսկսվեցին Բաթումում 1918 թ. մայիսի 11-ին:

Բաթումի, Սարիղամիշի և Կարսի գրավումից հետո թուրքական զլխավոր հրամանատարությունը 1-ին և 6-րդ բանակային կորպուսներին և այլ օժանդակ զորամասերից ստեղծեց «Կարս» բանակային խմբավորումը՝ Յաղուբ Շեքի փաշայի զլխավորությամբ: Առաջին կորպուսի հրամանատարն էր Քյազիմ Կարաբեքիր փաշան: Խմբավորման հիմնական նպատակն էր՝ գրավել ամբողջ Արևելյան Հայաստանը, Թիֆլիսը, Բաթում, Դադստանը, հասնել Անդրկասսյան շրջաններ: Բացի այդ, Քյազիմ Կարաբեքիրը հրաման ուներ Ալեքսանդրապոլի գրավումից հետո ուժերի մի մասը շարժել դեպի Ջուլֆա-Թավրիզ և գրավել Հյուսիսային Պարսկաստանը, դեպի ուր Մոսուլի կողմից շարժվում էր թուրքական 6-րդ բանակը: Դրա նպատակն էր կանխել անգլիացիների մուտքը Հյուսիսային Պարսկաստան:

Կարսի անկումով Ալեքսանդրապոլի դրությունը խիստ բարդացել էր: Հայկական զորքերի հրամանատարության մեջ տիրում էր այն թյուր մտայնությունը, թե թուրքերն Արփաչայը չեն անցնի, սակայն թուրքերն իրենց հաշիվներն ունեին:

1918 թ. մայիսի 14-ի լույս 15-ի գիշերը թուրքական զորքերի հրամանատար Խալիլ բեյը վերջնագիր ներկայացրեց Չխենկելուն և Ալեքսանդրապոլի զորքերի հրամանատարին՝ պահանջելով մինչև առավոտյան ժամը 7-ը դատարկել Ալեքսանդրապոլը և զորքերը քաղաքից հեռացնել 25 վերստ: Չսպասելով գրեթե անընթեռնելի վերջնագրի պատասխանին՝ թուրքերն սկսեցին հարձակումը: Դեռևս մայիսի 13-ին Հայկական կորպուսի շտաբը տեղափոխվել էր Ղարաքիլիսա, իսկ Թ. Նազարբեկովը մնացել էր քաղաքում: Ինչևիցե, կարգին պաշտպանություն չկազմակերպվեց, և թուրքերին հաջողվեց առանց լուրջ դիմադրության հանդիպելու գրոհով տիրել քաղաքին:

Մոտակայքում գտնվող Անդրամիկի գորամասը նույնպես առանձին ակտիվություն չդրսևորեց ու Նազարբեկովի հրամանով նահանջեց դեպի Ջալալօղլի (Ստեփանավան):

Այդ օրերին Արևելյան Հայաստանում փաստորեն դեռ ոչ մի կառավարություն կամ վարչական մարմին չկար: Գեներալ Թ. Նազարբեկյանը ենթարկվում էր Կովկասյան ռազմաճակատի շտաբին, ուստի Թիֆլիսից տրվող հրամանները նրա համար պարտադիր էին: Ալեքսանդրապոլի գրավումից հետո նա նույնպես տեղափոխվեց Ղարաքիլիսա և ընդունեց հետևյալ որոշումը.

1. Հայկական 1-ին դիվիզիան և 2-րդ դիվիզիայի 7-րդ և 8-րդ գնդերը պետք է փակեին Փամբակի լեռնանցքը, որով ճանապարհ էր բացվում դեպի Համամու (Սպիտակ)–Ղարաքիլիսա: Նրանց վրա էր դրված նաև Ջաջուռի լեռնանցքի պաշտպանությունը:

2. Հեծյալ բրիգադը պետք է կատարեր վերջապահի դեր՝ Ալեքսանդրապոլից հյուսիս:

3. 1-ին և 2-րդ բրիգադները և 2-րդ հեծյալ գունդը պետք է շարժվեին Սարդարապատի ուղղությամբ՝ Երևանյան գորախումբն ու Երևանի պաշտպանությունն ուժեղացնելու նպատակով:

Թուրքերն Ալեքսանդրապոլի գրավումից հետո ձեռնամուխ եղան իրենց սովորական զբաղմունքին՝ վանդալիզմին՝ անմեղ մարդկանց գնդակահարություններ, բռնաբարություններ, թալան, կողոպուտ: Թուրքերն անխտիր գնդակահարում էին հատկապես երգրումից ու Կարսից գաղթած հայերին:

«Կարս» խմբավորման հրամանատար Յաղուբ–Շևքի փաշան գորքերը բաժանեց չորս գորախմբերի և նրանց մարտական առաջադրանք տվեց:

1. Առաջին գորախումբը, որի հրամանատարն էր Մյուրսել բեյը, հարձակվելով Վորոնցովկայի (Կալինինո) ուղղությամբ, դուրս էր գալու Բուլնիս խաչեն, Բորչալու և գրավելու էր Թիֆլիսը:

2. Երկրորդ գորախումբը, որի հրամանատարն էր Ջեմալ–Ջավիդ բեյը, հարձակվելու էր Ջաջուռ–Սպիտակ–Ղարաքիլիսա–Դիլիջան–Ղազախ–Ելիզավետպոլ ուղղությամբ: Այս ուղղությունը գլխավորն էր, որովհետև նրանց նպատակն էր հասնել Բաքու:

3. Երրորդ գորախումբը հարձակվելու էր Ալեքսանդրապոլ–Բաշ–Ապարան ուղղությամբ՝ հետագայում ըստ անհրաժեշտության Երևան կամ Ղարաքիլիսա ուղղվելու նպատակով:

4. Չորրորդ գորախումբը՝ 1-ին բանակային կորպուսի 36-րդ հետևակային դիվիզիան, որը հայտնի էր նաև Գելիբոլու (Գալիպոլյան) անունով, հարձակվելու էր Ալեքսանդրապոլ–Երևան երկաթգծի ուղղությամբ, Անի–Սարդարաբադ–Էջմիածին–Երևան գծով: Երրորդ և Չորրորդ գորախմբերը, այսինքն՝ 9-րդ և 36-րդ հետևակային դիվիզիաները խնդիր ունեին Սարդարապատի ու Աշտարակի կողմից նեխուժել Երևան և վերջ տալ արևելահայության կենտրոնին:

Միաժամանակ թուրքական հրամանատարությունը խոշոր ուժեր կենտրոնացրեց Արդահան–Ախալցխա–Բորժոմի ուղղությամբ՝ Թիֆլիսի վրա հարձակվելու նպատակով:

Ինչպես նշում է ռազմական պատմաբան Աշոտ Հարությունյանը, թուրքական պլանն ուներ մի շարք էական թերություններ: Մինչև Ալեքսանդրապոլ հասնելը թուրքերը մեծ կորուստներ էին կրել և խիստ հոգնած էին, իսկ մատակարարումն անբավարար էր: Բացի այդ, թուրքական հրամանատարությունն ուժերը հավասարապես բաժանել էր չորս ուղղությունների, մինչդեռ դրանք հավասար նշանակություն չունեին: Առավել կարևոր թերություն էր այն, որ նշված չորս ուղղություններն իրարից բաժանված էին լեռներով, հետևաբար թուրքական դիվիզիաները պետք է հարձակվեին մեկը մյուսից անկախ: Դա թուրքերի հարձակման ամենաթույլ կողմն էր:

Հայկական գորքերի հրամանատարությունը կարողացավ հմտորեն օգտվել թուրքերի թույլ տված այդ կոպիտ սխալից, վերադասավորեց իր ուժերը և ընդունեց միանգամայն ճիշտ որոշում՝ թուրքերին ջախջախել առանձին–առանձին (Ա. Հ. Հարությունյան. Թուրքական ինտերվենցիան Անդրկովկաս 1918 թ. և ինքնապաշտպանական կռիվները: Երևան, 1984, էջ 174–177):

ՍԱՐԴԱՐԱՊԱՏԻ ՀԵՐՈՍԱՄԱՐՏԸ

Ալեքսանդրապոլ–Սարդարապատ–Երևան ուղղությամբ հարձակվող թուրքական խմբավորման մեջ մտնում էին 36-րդ հետևակային «Գելիբոլու» դիվիզիան, որը կազմված էր երեք հետևակային և մեկ հրետանային գնդից՝ 40 հրանոթով, հարվածային և սակրավոր մեկական գունարտակ, հեծյալ գունդ, քրդական կանոնավոր հեծելազոր, բաշիբոզուկներ: Այդ ուժերը միասին չէին անցնում 4000–5000 հոգուց:

Թուրքական այդ գորախմբի դեմ պիտի մարտնչեր հայկական գորքերի այսպես կոչված Ալազյազի գորախումբը, որի մեջ մտնում էին երկու հետևակային բրիգադ՝ Երզնկայի, Երզրումի, Խնուսի, Ղարաքիլիսայի գնդերով և մեկ հատուկ հեծյալ գնդով:

Առաջին բրիգադի հրամանատարն էր գնդապետ Մորելը, սակայն նրան փոխարինում էր փոխգնդապետ Մխիթարյանը: Երկրորդ բրիգադի հրամանատարն էր կապիտան Շնեուրը: Յուրաքանչյուր գնդում կար

մոտ 300–400 զինվոր, որը նախատեսվածից քիչ էր: Այդ զորամասերը նահանջել էին Էրզրումից մինչև Արարատյան դաշտ և խիստ հոգնել էին ու հյուժվել, կորցրել անձնակազմի մեծ մասը, բարոյապես հուսալքված էին, ուստի չէին կարողանում կազմակերպված դիմադրել թշնամուն:

1918 թ. մայիսի 21–ին թուրքական 36–րդ դիվիզիայի առաջապահ զորամասերը մոտեցան Սարդարապատ գյուղին: Երևանում և շրջակա գյուղերում խուճապ սկսվեց:

Գեներալ Թ. Նազարբեկյանը, որն իր շտաբով գտնվում էր Ղարաքիլիսայում, հայկական 2–րդ հրաձգային դիվիզիայի հրամանատար, գեներալ Մովսես Սիլիկյանին կարգադրեց Էջմիածնի շրջանում անցնել հակահարձակման և կանխել թուրքերի առաջխաղացումը դեպի Երևան:

Գեներալ Մ. Սիլիկյանն ընդունեց միանգամայն ճիշտ ու մտածված որոշումներ: Բաշ–Ապարանի կողմից Երևանի վրա հարձակվող թուրքերի դեմ նա առանձնացրեց զնդապետ Դուլուխանյանի 6–րդ հրաձգային գունդը, զնդապետ Ջալիլյանի պարտիզանական հեծյալ գունդը և զնդապետ Սիլինի սահմանապահ գումարտակը:

Երևանին վտանգ էր սպառում նաև Կողբի և Իգդիրի կողմից, որտեղից առաջ էին շարժվում թուրքական 5–րդ և 12–րդ դիվիզիաները: Սիլիկյանը կարգադրեց Արաքսի ափին գտնվող փոքրաթիվ ստորաբաժանումներին՝ պայթեցնել Ղարղալայի և Սարգարայի կամուրջները, Արաքսի ձախ ափին խրամատներ կառուցել և թույլ չտալ թշնամուն՝ անցնել գետը:

Ռեալ վտանգ էր սպասվում նաև Նախիջևան–Շարուր ուղղությամբ, որտեղ Սիլիկյանը հակազորի կազմակերպելու առաջադրանք էր տվել 3–րդ հետևակային բրիգադի հրամանատար, զնդապետ Բաղդասարյանին:

Ռեալ 1917 թ. դեկտեմբերի սկզբին իբրև Թիֆլիսի Հայոց Ազգային խորհրդի լիազոր ներկայացուցիչ Երևան էր եկել Արամ Մանուկյանը, որի առաջադրվել էր Երևանում ստեղծվեց պաշտպանության հատուկ կոմիտե: Կոմիտեն հայտարարեց մինչև 28 տարեկան երիտասարդների զորահավաք:

Սարդարապատ գյուղն ընկած էր Երևանից արևմուտք՝ մոտ 30 կմ հեռավորության վրա, իսկ համանուն կայարանը գյուղից հեռու էր երկու կմ: Այստեղ էլ 1918 թ. մայիսի 21–24–ը տեղի ունեցավ այն ճակատամարտը, որը, ինչպես Ավարայրը 15 դար առաջ, պիտի ապահովեր հայ

ժողովրդի հարատևումը (տե՛ս Սերժ Աֆանասյան, Սարդարապատի հաղթանակը. Հայաստան, Մայիս 1918, Երևան, 1991, էջ 40):

Մայիսի 19–ին թուրքական 36–րդ Կովկասյան դիվիզիան ներխուժեց Արարատյան դաշտ և մայիսի 20–ին գրավեց Արաքս կայարանը, որն ընկած էր Ալեքսանդրապոլ–Երևան երկաթգծի վրա՝ Սարդարապատից 10 կմ հեռու:

Գեներալ Մ. Սիլիկյանը, որի հրամանատարական կետը գտնվում էր Էջմիածնի Գևորգյան ճեմարանի շենքում, այցելեց Ամենայն հայոց կաթողիկոս Գևորգ 5–րդին և առաջարկեց նրան անվտանգության համար տեղափոխվել Սևանա կղզի: Սակայն կաթողիկոսն արժանապատվորեն պատասխանեց. «Եթե հայկական ուժերն ի վիճակի չեն պաշտպանելու այս սրբազան վայրը, ապա ես ինքս կանեմ դա, հոգ չէ, թե կզոհվեմ հազարամյա Մայր տաճարի շենին» (Մ. Աֆանասյան, էջ 41):

Հիրավի, իրավիճակն այնպիսին էր, որ նահանջի մասին մտածել անգամ չէր կարելի: Պետք էր հաղթել կամ մեռնել:

Մայիսի 20–ին գեներալ Մ. Սիլիկյանը իր տեղակալի՝ փոխզնդապետ Վեբիլյանի հետ միասին մշակեց գործողության պլան, որի իրականացումը հանձնարարվեց զնդապետ Դանիել Բեկ–Փիրումյանին:

Ռազմաճակատը ձգվում էր Արաքսից մինչև Արագած լեռան փեշերը և Բաշ–Ապարան:

Ապահովվելով թևերի պաշտպանությունը՝ գեներալ Մ. Սիլիկյանն իր լավագույն ուժերը տեղափոխեց կենտրոնական ճակատ՝ Էջմիածնի տակ:

Մայիսի 21–ի ուշ երեկոյան թուրքական 36–րդ դիվիզիան գրավեց Սարդարապատ գյուղն ու կայարանը: Շարունակելով հարձակումը՝ թուրքերը գրավեցին Վերին Խերիբեկլու գյուղը և մոտեցան Ղամբշլու (Եղեգնուտ) կիսակայարանին՝ Երևանից 20 կմ հեռավորության վրա: Սակայն կապիտան Խորեն Իգիթխանյանի հրետանային մարտկոցը՝ 10 հրանոթ, որը նախօրոք տեղավորվել էր Արղալար գյուղի մոտ, անսպասելիորեն կրակ բացեց և հարկադրեց թուրքերին՝ գամված մնալ տեղում:

Մայիսի 22–ին հայկական զորամիավորումները երկու ուղղություներով թիկունքից հակահարձակման անցան Քյորիվալու (այժմ՝ Արշալույս) և Ղուրդուղուլի (այժմ՝ Արմավիր) գյուղերի բնագծերից, եռանդուն գրոհով Ղամբշլու (այժմ՝ Եղեգնուտ) գյուղի շրջանում ոչնչացրին թշնամուն: Հակահարձակման դիմած զորամիավորումների մեջ էին հայկական հետևակային 5–րդ գունդը, որը մեծ մասամբ բաղկացած էր դա

րաբաղցի զինվորներից և որի հրամանատարն էր գնդապետ Պավել (Պողոս) Բեկ—Փիրումանը՝ գնդապետ Դանիել Բեկ Փիրումյանի հորեղբորորդին: Կիլիկիայի ապագա կաթողիկոս, արքեպիսկոպոս Գարեգին Յովսեփյանը նրանց մկրտել էր «Մահապարտների գունդ» անունով: Գունդը ուժեղացված էր շրջակա գյուղերից հավաքված շուրջ 500 կամավոր աշխարհագորայիններով, որոնց հավաքագրել էին Եզնիկ և Թաղևոս եպիսկոպոսները և Գրամփա գյուղի քահանա Յովհաննես Տեր—Մկրտչյանը: Աշխարհագորայիններին առաջնորդում էին արքեպիսկոպոսներ, ճեմարանի տեսուչ, հայտնի հայագետ Գարեգին Յովսեփյանը և Էրզրումի առաջնորդ Ջավեն Բաբայանը, որոնք ծիու վրա նստած գնում էին առջևից՝ խաչը ձեռքներին:

Հարձակվողների թվում էին նաև գնդապետ Դուլխանյանի 6—րդ գունդը, փոխգնդապետ Պերեկրոստովի պարտիզանական հետևակային գունդը, Իգդիրի և Խնուսի հետևակային գնդերը: Ձեյթունի հեծյալ գունդը՝ գնդապետ Սալիբեկովի հրամանատարությամբ, կապիտան Ամիրխանյանի հատուկ հեծյալ խմբի չորս եսկադրոնները: Այդ օրը՝ մայիսի 22—ին, ամբողջությամբ ոչնչացվեց թուրքական «Գեչիբուլու» դիվիզիայի երկու վաշտ՝ շուրջ 500 ասկյար: Շատ թուրք սպաներ, ձեռքները վեր բարձրացրած, գթություն էին հայցում՝ գոչելով, որ իրենք Թրակիայից են ու մասնակից չեն եղել Հայոց եղեռնին:

Կեսօրից հետո Էստոնացի կապիտան Կլիչի մարտկոցը դիպուկ կրակով շարքից հանեց ջրիան կայանը՝ 30 աստիճան շոգի պայմաններում թուրքերին զրկելով ջրի միակ աղբյուրից:

Մայիսի 22—ին երեկոյան 5—րդ գնդի առաջապահները՝ Վարդան Ջաղինյանի և Միքայել Օհանջանյանի ղեկավարությամբ և փոխգնդապետ Պերեկրոստովի կամավորները հետ գրավեցին Սարդարապատ գյուղը ու կայարանը:

Հինգ ժամվա ընթացքում թուրքերը նահանջեցին 15—20 կմ, բայց քանի որ նրանց չէին հետապնդում, ամրացան Արաքս կայարանից 5—6 կիլոմետր հյուսիս—արևելք՝ Թուլքի թափա և Հիմնի դռ կոչվող բարձունքներում:

Հաղթանակը կատարյալ էր: Գեներալ Մ. Սիլիկյանը հաղորդում է Գլխավոր շտաբ, որ գորքերի մարտական ոգին գերազանց է, դասալիքները զենքը ձեռքներին վեհառռնում են, զինվորները պատրաստ են մարտի գնալու:

Հաղթանակի լուրը կայծակի արագությամբ հասավ Երևան: Բոլորը շտապում էին կայարան՝ ձեռքներին մի կտոր հաց, շաքար ու թեյ, ծխախոտ, կժերով ջուր՝ կռվողներին ուղարկելու համար, իսկ երիտասարդությունը հորդում էր Անգլիական այգի՝ կամավոր գրվելու համար:

Հաղթանակի առթիվ կաթողիկոս Գևորգ 5—րդը էջմիածնում հանդիսավոր պատարագ մատուցեց: Մայր տաճարի զանգերն սկսեցին ղողանջել, որին շուտով ձայնակցում են էջմիածնի բոլոր վանքերի, ապա մոտակա գյուղերի եկեղեցիների զանգերը: Նույն օրը զանգահարությունը տարածվում է ամենուրեք, և մայիսի 22—29—ը՝ ութ օր շարունակ, Արագածի լանջերից մինչև Արաքս, Սարդարապատից մինչև Սևան գիշեր—ցերեկ անդադար ղողանջում էին բոլոր եկեղեցիների զանգերը: Ինչպես պատկերավոր լեզվով գրում է Հ. Թուրշյանը, մահասարսուռ ահագանգը զարթնեցնում, զգաստացնում, սթափեցնում էր բոլորին, խանդավառում ամենքին, մղում հերոսական անձնազոհության (Հ. Թուրշյան, Սարդարապատի հերոսամարտը, Երևան, 1969, էջ 143): Նույն հեղինակը ցույց է տալիս նաև, որ Սարդարապատը իսկական ժողովրդական պատերազմ էր, որին մասնակցում էր զինվորությունը, գյուղացիությունը, բանվորները, արհեստավորները, հոգևորականությունը, մտավորականությունը: Եզնիկ վարդապետի կոչով հավաքագրված 500 աշխարհագորայինները մարտի նետվեցին պատանքներ հագած, զենք էին վերցրել ծերունի Թաղիանոս Թաղիանոսյանը, պատանի Ակսել Բակունցը, ապագա ակադեմիկոսներ Արարատ Ղարիբյանը, Գրիգոր Ղափանցյանը, մաթեմատիկայի ուսուցիչ Բահաթուր Բահաթրյանը, ապագա մանկավարժ Արշավիր Շավարշյանը, աշակերտներ:

Մեր կարծիքով, միանգամայն իրավացի է Հ. Թուրշյանը, գրելով, որ Սարդարապատը բախտորոշ գոյամարտ էր, հայ ժողովրդի կենաց ու մահու կռիվ, որտեղ ինքնապաշտպանության գերագույն մղումով ոտքի էին ելել հայ ժողովրդի բոլոր դասերն ու դասակարգերը, հոսանքներն ու կուսակցությունները, որտեղ կողք կողքի կռվում էին միապետականը, կոմունիստը, դաշնակցականը, հնչակյանն ու ռամկավարը, հոգևորականը: «Բռունցքը սեղմվելու սահման ունի,— գրում է նա,— որից հետո այն դառնում է քարի պես ամուր: Սարդարապատում թուրքերը դեմ առան հայ ժողովրդի քարի պես սեղմված բռունցքին» (Հ. Թուրշյան, էջ 147): Միանգամայն դիպուկ է նկատել ակադեմիկոս Հ. Ավետիսյանը, թե Սարդարապատի հերոսամարտը հայերի հայրենական պատերազմն էր

(Հայոց պատմություն. Հանրակրթական դպրոցի 7-րդ դասարանի դասագիրք, Երևան, 2000, էջ 155):

Մայիսի 23-ին մարտեր տեղի չունեցան. կողմերը նախապատրաստվում էին նոր ճակատամարտի:

Մայիսի 24-ին գեներալ Մ. Սիլիկյանը հայրենասիրական կոչ ուղղեց ժողովրդին՝ գեներ վերցնելու և հայրենիքը պաշտպանելու համար: Այնտեղ ասված էր. «Հայեր. բոլորը մինչև 50 տարեկան պետք է գեներ վերցնեն հայրենիքը պաշտպանելու համար: Հիշեք Ավարայրի խիզախ կանանց, որոնք քաջալերում էին տղամարդկանց՝ Վարդանի գլխավորությամբ մղվող կռվում: Հետևեցեք նրանց օրինակին, եթե ուզում եք բարձր պահել ձեր պատիվը: Արհամարիեք վախկոտներին... Ես խորապես համոզված եմ, որ իմ կոչը լսելի կլինի և 2-3 օրում մենք ոտքի կհանենք հերոսական մի ուժ, որն ընդունակ կլինի թշնամուն դուրս քշելու մեր երկրից և ապահովելու հայ ժողովրդի գոյությունը» (Ս. Աֆանասյան, էջ 46): Մայիսի 24-ին թուրքերն իջան դաշտի վրա իշխող բարձունքներից՝ երեք օր առաջ կրած խայտառակ պարտության վրեժը լուծելու վճռականությամբ: Մայիսի 24-26-ին Սիլիկյանը մի քանի անգամ փորձեց ճակատային գրոհով դուրս մղել թշնամուն իրենց դիրքերից, բայց դա նրան չհաջողվեց: Գերմանական կատարելագործված գնդացիներից տեղացող թուրքական մրրկածուփ կրակը պարզապես գետնին էր գամում հարձակվող հայ զինվորներին: Այդ ժամանակ Սիլիկյանն ընդունեց ճիշտ որոշում՝ ճակատային գրոհներից բացի ձեռնարկել նաև թևային հարձակում: Այդ նպատակով նա փոխգնդապետ Կարապետ Հասանփաշայանի հրամանատարությամբ ստեղծեց հարվածային խումբ, որին տրվեց «Խզնաուզի զորախումբ» անունը: Նրա մեջ մտնում էին երզնկայի հետևակային զունդը, Մակուի առանձին զունարտակը, հատուկ հեծյալ գնդի երկու էսկադրոն, Խնուսի գնդի մեկ վաշտ և չորս թնդանոթ՝ բոլորը միասին 600 զինվոր և 200 հեծյալ: Գեներալ Մ. Սիլիկյանը հրամայեց այդ խմբին՝ մայիսի 27-ի լուսաբացին շարժվել Խզնաուզ (այժմ՝ Արագած, Կոչի մոտ) գյուղից և Արագած լեռան փեշերով, Շամիրամի ձորով շրջանցել Թուլքի թափայի (Աղվեսաբլուր) թուրքերի դիրքերը ձախ թևից: Նույն օրվա կեսօրին Կարապետ Հասանփաշայանի զինվորները թշնամու վրա կրակ բացեցին թիկունքից: Այդ հարվածից թուրքերը հանկարծակիի եկան, սակայն դրան հետևեց 5-րդ հետևակային «Մահապարտների» գնդի զումարտակների հարձակումը ճակատից և հնչակյան Մշեցի Պանդուխտի (Միքայել Սեֆերյան) պարտիզանների հար-

վածը հյուսիսից: Չախ թևում գործող Իգդիրի գնդերն ու պարտիզանները Դանիել Բեկ-Փիրունյանի հրամանով, որը զինվորներին առաջնորդում էր կարմիր աստառի կողմը շրջված զինվորական շինելը հազին, գրոհում են հակառակորդի դիրքերը Հիմնի ղրռում: Ամբողջ ճակատով թուրքերը լքում են դիրքերը և օգտվելով մթությունից՝ փախուստի դիմում Ալեքսանդրապոլի ուղղությամբ՝ մարտի դաշտում թողնելով մեծ թվով սպանվածներ և վիրավորներ: Ալեքսանդրապոլ հասած շուրջ 1500 վիրավորների մասին նրանք լուր տարածեցին, թե իբր երկաթուղային աղետ է տեղի ունեցել:

Հաղթանակը կատարյալ էր. կռիվների արդյունքում թուրքերը հետ շարտվեցին ավելի քան 50 կիլոմետր:

Իր աշխատության մեջ Ա. Հարությունյանը նույնպես նշում է, որ հաղթանակն ապահովելու գործում հայկական զորքերին զգալի օգնություն ցույց տվեց տեղի բնակչությունը և այդ օրերին հայերի մեջ տիրում էր միասնություն՝ անկախ քաղաքական համոզմունքներից: Այդ կապակցությամբ, գնահատելով Հ. Թուրչյանի աշխատությունը՝ իբրև հիմնահարցի ուսումնասիրության առաջին փորձ, Ա. Հարությունյանը խստորեն քննադատում է նրան այն միտումը դրսևորելու համար, թե իբր ճակատամարտը շահել է ժողովուրդը և ոչ թե բանակը, որ նա անհարկի հոլովում է Թ. Նազարբեկյանի և Մ. Սիլիկյանի անունները, մեղադրում նրանց ապաշնորհության և անձեռնհասության մեջ, ուռճացնում է Դանիել Բեկ-Փիրունյանի դերը: Ռազմական պատմաբանն այն աներեր համոզմունքն է հայտնում, որ Սարդարապատի ճակատամարտի կազմակերպիչը եղել է Հայկական կորպուսի 2-րդ դիվիզիայի հրամանատար գեներալ Մովսես Սիլիկյանը, գրեթե ամեն ինչ կատարվել է նրա հրամանով (Ա. Հարությունյան, էջ 179-182): Իր եզրակացությունները Ա. Հարությունյանն ամրապնդում է Սարդարապատի ճակատամարտի մասնակից, հայ նշանավոր զորավար, մարշալ Հ. Բաղրամյանի հուշերում Մ. Սիլիկյանին տրված բարձր գնահատականներով:

Հատկանշական է, որ տեսնելով թշնամու հապճեպ փախուստը, սովորաբար զգուշ ու շրջահայաց գեներալ Մ. Սիլիկյանը ցանկանում է նրան հետապնդել և հետ վերցնել Ալեքսանդրապոլը և անգամ այդ մասին նոր կոչ է ուղղում ժողովրդին: Սակայն մայիսի 30-ին Երևան ժամանած գեներալ Թ. Նազարբեկյանը արգելեց այդ օպերացիան և հրամայեց դադարեցնել կռիվները: Դրա դեմ զայրագին բողոքեց Դանիել Բեկ Փիրունյանը, ասելով, որ ինքը չի կարող կատարել այդ կործանարար

հրամանը և հրամայել հաղթական զինվորներին՝ նահանջել արյան գնով նվաճած հողից (Ս. Աֆանասյան, էջ 55):

ԲԱՇ-ԱՊԱՐԱՆԻ ՃԱԿՍԱՍՄԱՐՏԸ

Դեռևս Սարդարապատի ճակատամարտից անմիջապես առաջ գեներալ Ս. Սիլիկյանի մշակած պլանի համաձայն Արագած լեռան փեշերի և Բաշ-Ապարանի պաշտպանությունը հանձնարարվեց Դրոյի հրամանատարության տակ դրված գորախմբին:

Եստղ փաշայի գլխավորած թուրքական 9-րդ դիվիզիայի մի մասը, որի կազմում կար հրետամային երկու մարտկոց, դեռևս մայիսի 20-ին գրավեց Համամլուն (այժմ Սպիտակ), իսկ մայիսի 22-ին՝ Բաշ-Ապարանը: Դրոյի գորախմբի ծախ թևի համար թիկունքից հարվածի տակ ընկնելու սպառնալիք ստեղծվեց: Ուստի Դրոն նահանջեց հարավ՝ սպասելով համալրումների:

Ապարանը և շրջակա գյուղերը թողած՝ զինված հայ երիտասարդների մի խումբ հավաքվում է Քուլուջա գյուղում և Դավիթ Մելիքսեթյանի գլխավորությամբ այստեղ թույլ դիմադրություն է ցույց տալիս թուրքերին: Շուտով Երևանից այստեղ են հասնում մի քանի տասնյակ ապարանցիներ՝ Արսեն աղայի (Տեր-Պողոսյան, Բաֆֆու Խենթի որդու) ղեկավարությամբ: Նրանց են միանում նաև Մատթեոս Հովհաննիսյանի և Սեդրակ աղայի (Ջալալյան) խմբերը: Փաստորեն կարելի է ասել, որ մայիսի 22-23-ին Ապարանի ճակատում թուրքերին դիմադրություն են ցույց տալիս միայն աշխարհագրային թույլ խմբերը:

Հյուսիս-արևելքից Երևանին սպառնացող վտանգը կանխելու համար գեներալ Ս. Սիլիկյանը մայիսի 24-ին Սարդարապատի ճակատից հանեց և Բաշ-Ապարանի ճակատ ուղարկեց Դուլուխանյանի հետևակային 6-րդ գունդը, Ջալիմյանի 2-րդ հեծյալ գունդը, Կորուկովի հեծյալ կամավորներին, Սիլիմի սահմանապահ վաշտը, Իզիթխանյանի և Սակիլարիի հրետամային մարտկոցները: Դա փաստորեն հանգեցրեց Սարդարապատի ճակատի մերկացմանը: Բաշ-Ապարան են մեկնում նաև գանձակեցի Ջեմյակի, զանգեզուրցի Յապոնի, բաշ-գյառնեցի Մարտիրոսի, Քաչալ Ղազարի, սասունցի Մանուկի, մակվեցի Մեսրոպի խմբերը:

Երևանի հարավում թուրքական 5-րդ դիվիզիան փորձում է Ղաճարուլի (այժմ՝ Արտաշատի շրջանում), Գայլի դրունքի միջով անցնել Արաքսը գետը, սակայն բարեբախտաբար գետը վարարած էր, և Բաղդասարյանի ջոկատին հաջողվում է խորտակել թշնամու ինքնաշեն մակներն ու նրան հետ չպրտել:

Թողնելով Բաշ-Ապարանը՝ Դրոյի գորախումբը քաշվեց հարավ՝ դեպի Ալի Քուչակ, այնուհետև դիրքեր գրավեց Ղազմաֆար և Դարաքիլիսա գյուղերում: Մայիսի 24-ին Դրոն ստացավ Սարդարապատի ճակատից հանված համալրումը: Նրանց միացան նաև Զիանգիր աղայի գլխավորած 200 եզդի հեծյալները, որոնք նույնպես եկել էին Սարդարապատի ճակատից: Հայկական ուժերի ընդհանուր թիվն այստեղ հասավ շուրջ 5 հազարի: Դրոն իր համհարզ, գնդապետ Պրիտոմանովի հետ միասին հակահարձակում նախապատրաստեց և մայիսի 25-ին թուրքերին հետ չպրտեց Բաշ-Ապարանից: Եռօրյա համառ մարտերից հետո թուրքերը հետ քաշվեցին դեպի Չինգիլդաղի և Քուլուջայի բարձունքները: Մարտերից մեկում ընկավ հայդուկ Ջեմյակը (Նանունյան), որի հեծյալները Ղոնդաղսագ գյուղի մոտ ջարդել էին 30 ասկյարների:

Բաշ-Ապարանի ճակատամարտում ևս հայ հոգևորականությունը հանդես բերեց անձնուրացություն. Փամբ գյուղի քահանա Տեր Վևորզ Հայրապետյանը հավաքեց իր և հարևան գյուղերի բնակիչներին և առաջնորդեց նրանց դեպի Բաշ-Ապարան, որոնք միացան աշխարհագրայիններին և խիզախորեն կռվեցին թշնամու դեմ:

Մայիսի 29-ին ջախջախված թուրքերը փախան Համամլուից, որով և վերջնականապես վերացավ թուրքական 9-րդ դիվիզիայի կողմից Երևանը արքանի մեջ առնելու վտանգը:

Թուրքերը Բաշ-Ապարանի ճակատում թողեցին 200 սպանված, երկու զնդացիր, հարյուրից ավելի հրացան, այլ ռազմամթերք:

Սակայն ճակատամարտի ավարտից հետո թուրքերը սպիտակ դրոշով բանազնաց ուղարկեցին և բանակցությունների մեջ մտան Դրոյի հետ: Մայրո Ռուշի բեյը Դրոյին հայտնեց, որ Բաթումում ստորագրվել է զինադադար, որի համաձայն պետք է ռազմական գործողությունները դադարեցնել: Նա պահանջեց նաև հունիսի 1-ից հայկական զորքերը հետ քաշել Արագածից հարավ: Այդ պայմանները կատարվեցին Բաթումի պայմանագրի ստորագրումից հետո, որը նույնպես չէր կարող չառաջացնել հենց նոր փայլուն հաղթանակ տարած հայոց զորքի խոր հիասթափությունը:

Բանն այն է, որ մայիսի 29-ին դեռ ոչ մի զինադադար չէր կնքվել, այլ հայ պատվիրակները տվել էին միայն թուրքական վերջնագիրն ընդունելու նախնական համաձայնությունը և թուրքերը զինադադար էին հաստատում միայն այնտեղ, որտեղ իրենց գործերը վատ էին: Ուստի անընդունելի է Գ. Թուրքյանի այն եզրակացությունը, թե Դրոն առաջինը ծախեց Սարդարապատի և Բաշ-Ապարանի փայլուն հաղթանակները (Գ. Թ., էջ 184):

ՂԱՐԱՔԻԼԻՍԱՅԻ ՃԱԿՍԱՍՄՐՏԸ

Թուրքերի կողմից Համամլուն և Բաշ-Ապարանը գրավելուց հետո (մայիսի 20 և 22) Ղարաքիլիսայի վիճակը խիստ ծանրացավ: Հայկական ուժերը նահանջեցին դեպի Ղշլաղ՝ Ղարաքիլիսայից 5 կմ արևմուտք: Դեպի Ղարաքիլիսա ձգվեցին գաղթականների անվերջանալի քարավանները:

Հայկական ուժերը նահանջում են դեպի Դիլիջան, որտեղ հաստատվել էին գեներալ Թ. Նազարբեկյանը և իր գլխավոր շտաբը:

Սակայն այստեղ հասավ Սարդարապատի հաղթանակի լուրը, և նահանջող զորքն ու ժողովուրդը որոշեցին կանգ առնել ու հակահարված տալ թշնամուն: Մայիսի 23-ին Ղարապաս գյուղի քահանա Տեր Կոմիտաս Սարգսյանը, փամփշտակալներով գոտևորված և մինչև ատամները զինված, հնչեցնել է տալիս եկեղեցու զանգերը և հավաքելով Ղարապասի, Հաջիդարայի ու Ղշլաղի գյուղացիներին և դիմադրություն կազմակերպում: Նույն օրը Ղարաքիլիսայում կայացած հանրահավաքում Մեսրոպ եպիսկոպոս Տեր-Մովսեսյանը, գեներալ Համազյանը, գնդապետ Սամարցյանն ու Գարեգին Նժդեհը, որոնք այստեղ էին եկել Դիլիջանից, որոշում են դիմադրություն ցույց տալ: Միաժամանակ գեներալ Թ. Նազարբեկյանը հրամայում է գնդապետ Ալեքսանդր Բեյ-Մամիկոնյանին՝ գնալ Ղարաքիլիսայի վրա, իսկ ինքը մի ոգևորիչ կոչ է ուղղում հայ ժողովրդին:

Բեյ-Մամիկոնյանի գլխավորած զորքը բաժանված էր երեք մասի. ռազմաճակատի աջ թևը հյուսիսում վստահված էր Անդրամիկին, որն իր 2700 կամավորներով պիտի պաշտպաներ Գյառզյառի լեռնանցքը՝ Ջալալօղլիից (այժմ Ստեփանավան) հարավ: Չախ թևում՝ Հաջիդարա գյուղի մոտ գտնվում էր գնդապետ Սամարցյանի զորաբաժինը, որի հետ էր

կապիտան Գուրգեն Տեր-Մովսեսյանի հրետանային 4-րդ մարտկոցը, որոնք պետք է պաշտպանեին Գյառզա-Մայմեխ լեռան գագաթը Ղարաքիլիսայի հարավում և թույլ չտային թուրքերին՝ հարվածելու թիկունքից: Կենտրոնում գնդապետ Նիկոլայ Կորգանովի հեծյալները և Նժդեհի կամավորները պաշտպանելու էին Ղարապասից մինչև Ղշլաղ ձգվող հատվածը: Հրետանու հրամանատարն էր գեներալ Ղամազյանը: Հայկական ուժերը բոլորը միասին կազմում էին 7 հազար զինվոր, 20 գնդացի, 12 թնդանոթ՝ 10 հազար թուրքերի դեմ, որոնք ունեին 70 թնդանոթ:

Հայկական կորպուսի հրամանատար, գեներալ Թ. Նազարբեկյանը հրամայել էր 1-ին դիվիզիայի հրամանատար, գեներալ Արեշովին՝ պաշտպանել Ջաջուռի լեռնանցքը, թույլ չտալ, որ թուրքերն անցնեն Համամլու և արգելակել նրանց առաջխաղացումը դեպի Ղարաքիլիսա: Սակայն Արեշովը, ցուցաբերելով անկարողություն և հանցյալոր անտարբերություն, ոչ մի միջոցառում չձեռնարկեց, այլ զորախմբի հրամանատարությունը հանձնեց գնդապետ Ալ. Բեյ-Մամիկոնյանին և ինքը մեկնեց Ղարաքիլիսա, որպեսզի խուսափի պատասխանատվությունից:

Մայիսի 20-ի կեսօրին թուրքերը գրավեցին Ջաջուռը և հայտնվեցին Ղաթախչիում: Մայիսի 21-ին թուրքական առաջապահները հայտնվեցին Կորոնցովկայում:

Մայիսի 24-ին Դիլիջանի կողմից Սարդարապատի հաղթանակի լուրով ոգևորված հայկական զորքը և աշխարհագորը շարժվեցին դեպի Ղարաքիլիսա: Մայիսի 25-ին սկսվեց Ղարաքիլիսայի պատմական ճակատամարտը, որը տևեց մինչև մայիսի 28-ը:

Մայիսի 25-ին Կորգանովի հեծյալները հրետանու աջակցությամբ թուրքերին դուրս շարտեցին Արջուտ գյուղից:

Մայիսի 26-ին սկսված կռիվներն ավելի ծանր էին: Այդ օրը թուրքական 11-րդ դիվիզիան հասավ Գյառզա-Մայմեխի գագաթը, անցավ լեռնանցքը և մոտեցավ Ասրալ գյուղին: Սակայն գյուղի մոտ սկսված կատաղի ճակատամարտում թուրքերը ջախջախվեցին և, ծանր կորուստներ կրելով ու կռվի դաշտում թողնելով իրենց վիրավորներին, հետ շարտվեցին:

Կռիվները վերսկսվեցին մայիսի 27-ին՝ Գյառզա-Մայմեխի ուղղությամբ, երբ թուրքերը փորձեցին շրջանցել հայերի ձախ թևը: Չորս ժամվա ընթացքում կապիտան Գուրգեն Տեր-Մովսեսյանի հրետանավորները հետ մղեցին թուրքերի երեք զրոհ: Սակայն ուշ երեկոյան կռվելով մինչև վերջին ռումբը և չստանալով գնդապետ Սամարցյանի ուղարկած

օգնությունը՝ հայերը ստիպված էին թվական կրկնակի գերակշռություն ունեցող թշնամու ճնշման տակ թողնել Գյադա—Մայմեխի լեռնանցքը: Այդ կովում հերոսի մահով ընկավ կապիտան Գ. Տեր—Մովսեսյանը, իսկ նրա հրետանավորները արկերն սպառելուց հետո սվիմամարտի նետվեցին թշնամու դեմ ու մեծ մասամբ զոհվեցին անհավասար գոտեմարտում: Իր հիշողություններում մարշալ Դ. Բաղդամյանը բարձր է գնահատել քաջարի կապիտանին, որին անձամբ ճանաչում էր, իսկ Ա. Գարությունյանը հայ քաջարի հրետանավորների սխրանքը համեմատում է 1812 թ. Բորոդինոյի ճակատամարտում Ռասսկու հրետանավորների հերոսության հետ (Ա. Գ., էջ 195):

Դիլիջանի ճանապարհի վրա իշխող այդ կարևորագույն ռազմավարական կետի կորուստը ծանր հետևանքներ ունեցավ: Մայիսի 28—ին թուրքերը գրավեցին Ղարապատը և ռմբակոծեցին Ղշլաղը:

Հյուսիսում Անդրանիկն իր կամավորներով թուրքական 5—րդ դիվիզիայի դեմ երկու օր մղած կատաղի մարտերից հետո, ապահովելով շուրջ 20 հազար գաղթականների երթը, մայիսի 25—ին նահանջեց դեպի Վարդաբլուր, իսկ այնուհետև ամրացավ Դ. Թումանյանի ծննդավայր Դսեղում: Անդրանիկն անհետևանք թողեց գնդապետ Ա. Բեյ—Մամիկոնյանի խնդրանքը՝ պաշտպանել իր զորքերի ծախս թևը: Ոմանք պնդում են, թե իբր Անդրանիկը Բեյ—Մամիկոնյանի խնդրանքի կապակցությամբ պատասխանել է. «ես չգիտեմ, թե ով է այդ Բեյ—Մամիկոնյանը: Ես գիտեմ միայն Վարդան Մամիկոնյանին և դրանից ավելի ոչինչ չեմ ուզում իմանալ»: Ուրիշներն էլ պնդում են, թե Բեյ—Մամիկոնյանի հեռագիրն Անդրանիկն ստացել է մեծ ուշացումով: Բոլոր դեպքերում աջ թևի մերկացումն Անդրանիկի՝ ճակատամարտին չմասնակցելու հետևանքով, սպառնալիքի տակ դրեց գնդապետ Նիկոլայ Կորգանովի ուժերը: Այս հարցում միանգամայն իրավացի է Ա. Գարությունյանը, գրելով, որ Անդրանիկը Դսեղից պետք է թներ ամեն և թռչեր հասներ Ղարաքիլիսա, որպեսզի փրկության ձեռք մեկներ անպաշտպան ժողովրդին:

Մայիսի 27—ին թուրքական երեք հազարանոց զորքը Գյուլագարակի կողմից գրավում է Բզովդալ գյուղը և Ղշլաղից արևելք դուրս է գալիս հայերի թիկունքը:

Մայիսի 28—ին թուրքերը մտան Վարդանլի գյուղը՝ Ղարաքիլիսայից 5 կմ հարավ—արևելք, և կտրեցին Ղարաքիլիսայից Դիլիջան տանող ճանապարհը, իսկ երեկոյան նրանք արդեն գրավեցին Ղարաքիլիսան: Զնայած թուրքերը խոստացել էին քաղաքի իշխանություններին, թե իբր

ձեռք չեն տա խաղաղ ազգաբնակչությանը, քաղաք մտնելուն պես նրանք սկսեցին կոտորել բոլոր նրանց, ովքեր չէին հասցրել ժամանակին հեռանալ և զբաղվեցին իրենց հատուկ վանդալիզմով: Երեք օր շարունակ թուրքերը թալանում էին բնակչությանը, բռնաբարում կանանց:

Ղարաքիլիսայի զորաբաժնի կորուստներն զգալի էին՝ 1500 սպանված և վիրավոր, շուրջ 1000 գերի: Թուրքերը նույնպես ունեցան զգալի կորուստներ, սակայն նրանք հասցրեցին ազատել իրենց շուրջ 2000 գերիներին:

Հայկական ուժերի մի մասը նահանջեց Դիլիջանի ճանապարհով, իսկ մյուս մասը փրկվեց Թիֆլիս տանող երկաթուղով: Հայկական ուժերի մի մասն էլ հասավ Նիկիտինո (այժմ Ֆիոլետովո) Դիլիջանից 10 կմ հեռավորության վրա և այստեղ մնաց մինչև հաշտության կնքումը, իսկ գլխավոր շտաբը տեղափոխվեց Ախտա (այժմ՝ Գրագդան):

Այսպիսով՝ Ղարաքիլիսայում տեղի ունեցավ չորսօրյա արյունալի ճակատամարտ, որտեղ հայերը կռվեցին խիզախորեն և քաղաքը թուրքերին զիջեցին թշնամու թվական ու զինական գերակշռության ճնշման տակ:

Զնայած դրան՝ Ղարաքիլիսայի ճակատամարտն ունեցավ այն կարևոր նշանակությունը, որ Թիֆլիսը փրկվեց թուրքական ներխուժումից, որտեղ մայիսի 23—ից հայտարարվել էր պաշարողական դրություն: Վրացիները հնարավորություն ստացան ստեղծել գերմանա—վրացական խառը ջոկատ, որն ուղարկվեց Սանահին կայարան՝ Թիֆլիսից 50 կմ հեռու, և Գերմանիայի դաշնակից թուրքերը իրենց շտաբից ստացված հրամանով կանգ առան:

Բաթումի պայմանագիրն ստորագրելուց առաջ թուրքական 3—րդ Կովկասյան բանակի հրամանատար Վեհիբ փաշան ասել է. «Բեզլի Ահմեդում, Կարսում, Ալեքսանդրապոլում, Ղարաքիլիսայում ու Սարդարապատում հայերը արիաբար դիմադրեցին: Բեզլի Ահմեդում հաջողվեց ճեղքել ճակատը միայն այն բանից հետո, երբ աջ թևում երկու գունդ նահանջեց: Կարսում մենք ունեինք 19 հազար կովող՝ կայազորի ու տեղական ուժերի 7 հազարի դիմաց: Այդուհանդերձ մեր հրամանատարությունը նախատեսել էր երեք շաբաթ՝ քաղաքը գրավելու համար: Սարդարապատում մենք ջախջախվեցինք: ճիշտ է, մենք թույլ տվեցինք սխալ՝ իջնելով բարձունքներից: Եվ մենք դրա գինը վճարեցինք: Սակայն ամենից տպավորիչը մեզ համար դա Ղարաքիլիսայի կռվի չորս օրերն էին: Շուտափույթ հավաքված հայկական ուժերը շատ ավելի նվազ էին թե՛ թվով,

թե՛ գեներով: Եվ միայն ծանր կորուստների գնով էր, որ կռվի ելքը մեզ համար բարենպաստ եղավ: Առաջին երկու օրը մեր բոլոր հարձակումները ետ էին մղվում հակահարձակումներով: Միայն զինամթերքի սպառումից հետո հայերը ստիպված էին դադարեցնել հերոսական մարտը և նահանջել... Դա ամենալուրջ ճակատամարտն էր, որին ես մասնակցեցի Դարդանելից հետո (1915–1916 թթ. Վեհիբ փաշան թուրքերի Դարդանելյան կամ Գալիպոլյան բանակախմբի հրամանատարն էր — Մ. Կ.): Դուք ունեք բոլոր այն հատկանիշները, որոնք ձեզ կարող են դարձնել մի երկրորդ բուլղարացիներ: Չոր գյուղացիները նույնքան ազնիվ են, խստաբարո և քաջ, քան այս վերջինները» (Ս. Աֆանասյան, էջ 65–66):

Պատմագիտական գրականության մեջ վկայակոչվում են նաև Վեհիբ փաշայի այն խոսքերը, թե Դարաքիլիսայի տակ հայերը ցույց տվեցին, որ նրանք կարող են աշխարհի լավագույն զինվորները լինել (Ա. Չարությունյան, էջ 204):

Սարդարապատի հերոսամարտի արդյունքները և պատմական նշանակությունը լավագույնս ընդհանրացրել է ակադեմիկոս Չրանտ Ավետիսյանը՝ գրելով. «Սարդարապատը, Բաշ–Ապարանը, Դարաքիլիսան հայ ժողովրդի աննկուն կամքի, իր անկախության համար մինչև վերջ միահամուռ՝ ազգովին պայքար մղելու պատրաստակամության և վճռականության վկաներ եղան: Չայ ժողովրդի Մայիսյան այդ հերոսամարտերը վիժեցրին Չայաստանի արևելյան հատվածը նվաճելու և այնտեղի հայերին ոչնչացնելու երիտթուրքական ծրագիրը: Չայերի հերոսական ոգին, համաժողովրդական սխրանքը, հայրենիքի պաշտպանության միասնական կամքը ստիպեցին թուրքերին հաշվի նստել իրենց հետ: Չաղթանակը հայոց պետականության վերականգնման, Չայաստանի Չանրապետության ստեղծման նախադրյալներ ընձեռեց» (Չրանտ Ավետիսյան. Չայկական հարցը 1918 թվականին, Երևան, 1997, էջ 236):

Ազդու է նաև Սերժ Աֆանասյանի եզրափակումը. «Սարդարապատը խորհրդանիշն է պատվի ու ազատության համար մղված պայքարի, մի պայքարի, որը պահանջում էր ինքնահրաժարում ու գերմարդկային զոհաբերություններ, մի հրաշք, պայմանավորված ամբողջ մի ժողովրդի կամքով ու վճռականությամբ՝ մեռնել գեները ձեռքին Արարատյան դաշտում, էջմիածնի պատերի տակ, բայց թույլ չտալ, որ բարբարոսությունն ամբողջացնի իր գործը: Այդ հաղթանակը անսպառ ոգևորության աղբյուր է: Նա ապացուցում է, որ այս մարտիդոսացած ժողովրդի ե-

րակներում տակավին հոսում է, ինչպես 15 դար առաջ Ավարայրում, արյունն այն հերոսների, որոնք ստեղծել են նրա պատմության աստեղային ժամերը:

Մայիսի 24–ը, ինչպես ապրիլի 24–ը, պետք է մեծարվի բոլոր հայերի կողմից, քանի որ այն ունի համազգային նշանակության իմաստ...

Սարդարապատի, Բաշ–Ապարանի, Դարաքիլիսայի կռիվներում մեր հերոսների թափված արյունը հնարավորություն տվեց ղնել պետության հիմքը և ապահովել երեքհազարամյա ազգի շարունակությունը» (Ս. Աֆանասյան, էջ 81–82):

«ԱՅԱՍՏԱՆԻ ՀԱՆՐԱՊԵՏՈՒԹՅՈՒՆԸ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀՈՉԱԿՈՒՄԸ

Անդրկովկասի անկախության հռչակումից հետո (1918 թ. ապրիլի 22) Ե. Գեգեչկորին հրաժարական տվեց և կազմվեց նոր կառավարություն՝ Ա. Չխենկելիի գլխավորությամբ: Սեյմը որոշել էր թուրքերի հետ Տրապիզոնում ընդհատված հաշտության բանակցությունները շարունակել Բաթումում: Բաթումի հաշտության կոնֆերանսին մասնակցելու համար կազմվեց Անդրկովկասյան նոր պատվիրակություն հետևյալ կազմով. Ա. Չխենկելի՝ նախագահ, Ն. Նիկողաձե, Ա. Խատիսյան, Գ. Քաջազնունի, Ս. Հաջինսկի, Խան-Խոյսկի: Գեներալ Գ. Դորդանյանը, Ա. Վրացյանը և ուրիշներ նշանակվեցին խորհրդականներ:

Բաթումի կոնֆերանսի իսկապես բացումը տեղի ունեցավ 1918 թ. մայիսի 11-ին: Թուրքերի կողմից կոնֆերանսին մասնակցում էին՝ Խալիլ բեյը, Վեհիբ փաշան և ուրիշներ, Գերմանիայի կողմից՝ գեներալ Ֆոն Լոսովը և ուրիշներ: Նախագահում էր Խալիլ բեյը:

Ա. Չխենկելին առաջարկեց իբրև բանակցությունների հիմք ընդունել Բոեստ-Լիտովսկի դաշնագիրը, սակայն Խալիլ բեյը վճռականորեն մերժեց այդ առաջարկը, պատճառաբանելով, որ Տրապիզոնի բանակցությունների խզումից հետո նոր դեպքեր են տեղի ունեցել՝ պատերազմ է եղել Թուրքիայի և Անդրկովկասի միջև, արյուն է հոսել, ուստի այլևս անկարելի է գոհանալ Տրապիզոնում ներկայացված պայմաններով: Այնուհետև Խալիլ բեյը Չխենկելիին հանձնեց մի կնքված ծրար, որի մեջ էր Թուրքիայի և ԱՊՖՀ միջև կնքվելիք հաշտության պայմանագրի նոր նախագիծը: Դրանով էլ Բաթումի խորհրդատուների առաջին ու վերջին նիստն ավարտվեց:

Ներկայացված նախագիծը բաղկացած էր 12 հոդվածներից, 3 հավելվածներից և սարսափելի ծանր պայմաններ էր պարունակում ամբողջ Անդրկովկասի, Վրաստանի և, մանավանդ, Հայաստանի համար:

Վրաստանից գրավվում էր Բաթումի շրջանը՝ նավահանգստով, Ախալցխայի գավառը: Հայաստանից խլվում էին Ալեքսանդրապոլը, Ախալքալաքը, Շիրակի, Էջմիածնի գավառների մեծ մասը, Սուրմալուն, Ալեքսանդրապոլ-Կարս և Ալեքսանդրապոլ-Ջուլֆա երկաթուղին: «Հայաստան փաստորեն չէր մնում, — գրում է Ս. Վրացյանը, — հայերին թողնվում էր հազիվ 11.000 քառակուսի վերստ լեռնոտ տարածություն Արագածի և Սևանա լճի միջև: Հողային պայմաններին զատ դրվում էին և չափազանց ծանր տնտեսական, առևտրական, ռազմագիտական և այլ պահանջներ» (Ս. Վ., էջ 119):

Հայ ժողովրդի մղած Մայիսյան հերոսամարտերից հետո պարզ դարձավ, որ Անդրկովկասը արագ քայլերով գնում էր դեպի քայքայում, որովհետև օրեցօր սաստկանում էին հակամարտությունները վրացիների, ադրբեջանցիների ու հայերի միջև: Վրացիները որոնում էին գերմանացիների հովանավորությունը և գաղտնի բանակցություններ էին վարում նրանց հետ, ադրբեջանցիները բռնել էին թուրքերի փեշից և քաշում էին դեպի Բաքու, որն ադ օրերին բուլշևիկների ձեռքին էր: Հայերը մնացել էին մեռակ և օրհասական կոիվ էին մղում առաջ շարժվող թուրքական զորքերի դեմ:

1918 թ. մայիսի 26-ին Բաթումում Խալիլ բեյը Չխենկելուն հանձնեց վերջնագիր, որով պահանջվում էր 72 ժամկա ընթացքում պատասխանել երկու շաբաթ առաջ իրենց ներկայացրած հաշտության նախագիծն ընդունել կամ չընդունելու մասին:

Նույն օրը՝ 1918 թ. մայիսի 26-ին, Թիֆլիսում գումարվեց Սեյմի վերջին, ողբերգական նիստը, որը վրացիների պնդմամբ ընդունեց հետևյալ բանաձևը. «Նկատի ունենալով, որ պատերազմի և խաղաղության խնդրում երևան եկան հիմնական տարակարծություններ Անդրկովկասի անկախ հանրապետությունը կազմող ազգերի միջև, որով անհնար է դառնում ամբողջ Անդրկովկասի համար մի հեղինակավոր իշխանության գոյությունը, Սեյմը արձանագրում է Անդրկովկասի քայքայման փաստը և հայտարարում չեղյալ իր լիազորությունները» (Ս. Վ., էջ 159):

1918 թ. մայիսի 26-ի կեսօրին Սեյմը ցրվեց, իսկ հինգ ժամ անց, նույն սրահում գումարվեց Վրաց ազգային խորհրդի նիստը՝ Նոյ ժողդանիայի նախագահությամբ, որը հանդիսավորապես հռչակեց Վրաստանի անկախությունը:

Ինչպես գրում է Ս. Վրացյանը, վրացիների վարմունքը սարսափելի կացություն ստեղծեց հայերի համար և առաջացրեց նրանց անսահման վրդովմունքը: Հայերը, ոչ առանց հիմքի, մենզ դավադրություն ու դավաճանություն էին տեսնում վրացիների վարմունքի մեջ: Նրանք զգում էին, որ մի վատ խաղ է խաղացվել իրենց գլխին: Նույնիսկ նույն օրը՝ մայիսի 26-ի երեկոյան, Հայոց Ազգային խորհուրդը բուռն վիճաբանություններից հետո ձայների ճնշող մեծամասնությամբ որոշեց բողոքել Վրաստանի անկախության դեմ, սակայն դեպքերի հետագա զարգացման հետևանքով այդ որոշումը չգործադրվեց:

Ս. Վրացյանը վկայում է, որ այդ օրերին հայ գործիչների մեջ միաձայնություն չկար: Ա. Ահարոնյանը, Ստ. Մամիկոնյանը, Տ. Բեկզադյանը, Ա. Բաբալյանը, Ռ. Տեր-Մինասյանը և տեռները վճռականորեն դեմ էին անկախությանը: Խ. Կարծիկյանը, Ս. Հարությունյանը, Ավ. Շահխաթունյանը, Ա. Վրացյանը, Ա. Երզնկյանը, մեմշևիկները կողմնակից էին շուտափույթ կերպով Հայաստանի անկախությունը հայտարարելուն:

Այդ հարցում վճռական խոսք ասաց ՀՀԴ-ն: Մայիսի 26-ի երեկոյան տեղի ունեցավ ՀՀԴ Թիֆլիսի կոմիտեի արտակարգ նիստը, որն անհրաժեշտ գտավ, որ Հայոց Ազգային խորհուրդը, ուժեղացնելով իր կազմը, ստանձնի կառավարական ֆունկցիաներ:

1918 թ. մայիսի 27-ին Ադրբեջանի ազգային խորհուրդը հայտարարեց Ադրբեջանի անկախությունը:

Անկախության հայտարարության վրա պնդում էին նաև Բաթումից վերադարձած հայ ներկայացուցիչները՝ Հ. Քաջազունին, Ա. Խատիսյանը, Մ. Պապաջանյանը, որոնք մայիսի 27-ի երեկոյան մանրամասնորեն զեկուցեցին բանակցությունների ընթացքի և ստեղծված իրավիճակի մասին: Հաջորդ օրը՝ 1918 թ. մայիսի 28-ին Հայոց Ազգային խորհուրդը որոշեց Բաթում ուղարկել հայկական պատվիրակություն (Ա. Խատիսյան, Մ. Պապաջանյան, Հ. Քաջազունի)՝ տալով նրան անկախ Հայաստանի անունից թուրքերի հետ բանակցելու և հաշտություն կնքելու բացարձակ լիազորություն: Իսկ Հայաստանի անկախության հայտարարությունը, ինչպես Ս. Վրացյանն է նշում՝ եղավ ավելի ուշ՝ մայիսի 30-ին, ավելի արտաքին ճնշումների տակ, քան Ազգային խորհրդի հոժար կամքով:

Մայիսի 29-ին գումարվեց ՀՀԴ Արևելյան և Արևմտյան բյուրոների, ՀՀԴ Թիֆլիսի Կենտրոնական կոմիտեի, Սեյմի ու Ազգային խորհրդի դաշնակցական ներկայացուցիչների միացյալ նիստը, որտեղ որոշվեց

Հայաստանը հայտարարել անկախ հանրապետություն, կազմել կառավարություն միջկուսակցական հիմունքներով՝ մինչև օրենսդրական ժողովի գումարումը: Որոշվեց նաև Ազգային խորհուրդն ու կառավարությունը տեղափոխել Երևան, որը պիտի դառնար Հայաստանի Հանրապետության մայրաքաղաքը:

Այդ ժողովից հետո 1918 թ. մայիսի 30-ին Հայոց Ազգային խորհուրդը հրապարակեց հետևյալ հայտարարությունը, որն ըստ Ս. Վրացյանի, թեև իսկական առումով անկախության հռչակում չէր, բայց դեպքերի բերումով դարձավ այդպիսին:

«Հայտարարություն: Անդրկովկասի քաղաքական ամբողջության լուծումով և Վրաստանի ու Ադրբեջանի անկախության հռչակումով ստեղծված նոր դրության հանդեպ Հայոց Ազգային խորհուրդը իրեն հայտարարում է հայկական գավառների գերագույն և միակ իշխանություն: Որոշ ծանրակշիռ պատճառներով թողնելով մոտիկ օրերը կազմել հայոց ազգային կառավարություն, Ազգային խորհուրդը ժամանակավորապես ստանձնում է կառավարական բոլոր ֆունկցիաները՝ հայկական գավառների քաղաքական և վարչական դեկը վարելու համար:

Հայոց Ազգային խորհուրդ, 1918 թ. մայիս 30, Թիֆլիս»:

Այս պիստով՝ ինչպես գտնում է Ս. Վրացյանը, Հայաստանի անկախության հայտարարության օրը իսկապես պետք է համարվի մայիսի 30-ը, սակայն, հակառակ դրան, համարվում է մայիսի 28-ը, այսինքն՝ այն օրը, երբ Ազգային խորհուրդը որոշեց հայկական պատվիրակություն ուղարկել Բաթում, իսկ հաշտության բանակցություններ վարելու թուրքերի նախապայմանը անկախության հայտարարությունն էր, ուստի այդ օրն էլ կարող է համարվել անկախության սկզբնավորության օր (Ս. Վ., էջ 161):

Այսպես թե այնպես, շարունակում է Ս. Վրացյանը, Հայաստանի Հանրապետության ծագման օրը եղավ մայիսի 28-ը:

Այդ օրը դարձավ նվիրական հայ ժողովրդի համար մտավ ազգային տոնացույցի մեջ, իբրև սրբազան օրերից մեկը:

Հայաստանի անկախության հռչակման առիթով ակադեմիկոս Հ. Ա. Ավետիսյանը գրել է. «Մեր պատմության այդ ծանրագույն ժամանակաշրջանը միաժամանակ ազգային իղծերի իրականացման ժամանակաշրջան էր: Հինգ դարից ավելի կորցրած պետականության վերականգնումը մեր հիմնավոր ժողովրդի դարավոր բաղձանքն էր, որն ի-

րականացավ համառ պայքարով, անթիվ զոհերով ու զրկանքներով: Հայկական պետականության վերականգնումը հայ ժողովրդի մեծագույն հաղթանակն էր, բեկումնային իրադարձություն նրա կյանքում, բազմադարյան պատմության մեջ» (Հրանտ Ավետիսյան, Հայկական հարցը 1918 թվականին, Երևան, 1997, էջ 256):

Արխիվային նորահայտ մի փաստաթղթի հիման վրա Հ. Ավետիսյանը գրում է, որ Հայաստանի պետականության վերականգնման և Հայաստանի Հանրապետության ստեղծման փաստը ի լուր ամբողջ աշխարհի հայտնել են Հայոց Ազգային խորհրդի նախագահ Ա. Մհարոնյանը, վարչապետ Հ. Քաջազնունին, արտաքին գործերի նախարար Ա. Խատիսյանը՝ հետևյալ հակիրճ ու հստակ ծանուցմամբ. «Անդրկովկասյան հանրապետության կազմալուծումից հետո Հայոց Ազգային խորհուրդը, այն իրավունքների հիման վրա, որով նրան լիազորել է հայ ժողովուրդը, 1918 թվականի մայիսի 28-ին որոշեց հռչակել հայկական պետության անկախությունը, հիմնեց Հայկական ժողովրդավարական Հանրապետություն» (Հրանտ Ավետիսյան, նշվ. աշխ., էջ 257):

ԲԱԹՈՒՄԻ ՀԱՇՏՈՒԹՅԱՆ ՊԱՅՄԱՆԱԳԻՐԸ

Հայոց Ազգային խորհրդի պատվիրակներ Ա. Խատիսյանը (պատվիրակության նախագահ), Հ. Քաջազնունին և Մ. Պապաջանյանը Բաթում հասան 1918 թ. մայիսի 30-ին և նույն օրն էլ, երեկոյան ժամը 5-ին, սկսվեցին բանակցություններ հայկական և օսմանյան պատվիրակությունների միջև: Մի շարք նիստերից հետո կողմերը եկան համաձայնության և 1918 թ. հունիսի 4-ին ստորագրվեց «Հաշտության և բարեկամության պայմանագիր Օսմանյան կայսերական կառավարության և Հայաստանի Հանրապետության միջև», երեք հավելվածներ, որոնք վերաբերում էին տրանզիտին, սահմանակից շրջաններում առևտրին, կրոնական ազատություններին և մեկ համաձայնագիր՝ երկաթուղային գույքի բաշխման մասին: Թուրքական կողմից այն ստորագրեցին պետական խորհրդի նախագահ Խալիլ բեյը և Կովկասյան ռազմաճակատի օսմանյան զորքերի գլխավոր հրամանատար, գեներալ-լեյտենանտ Վեհիբ Մահմեդ փաշան, հայկական կողմից՝ Ա. Խատիսյանը, Հ. Քաջազնունին և Մ. Պապաջանյանը: Դա առաջին միջազգային փաստաթուղթն էր, որ ստորագրում էին անկախ ՀՀ-ն ներկայացուցիչները:

Բաթումի հիմնական դաշնագիրը բաղկացած էր 14 հոդվածներից: Առաջին հոդվածն արձանագրում էր, որ Օսմանյան կայսերական կառավարության և ՀՀ կառավարության միջև հաստատվում է հաշտություն և մշտական բարեկամություն:

Երկրորդ հոդվածը գծում էր հայ-թուրքական սահմանը: Թուրքիային էին անցնում ոչ միայն Արևմտյան Հայաստանը, այլև Արևելյան Հայաստանի տարածքի զգալի մասը՝ Շարուր-Պարալազյազը, Նախիջևանը, Սուրմալուն, Կարսը, Կաղզվանը, Սարիղամիշը, Ախալքալաքը, Լոռին: Հայաստանը բաղկացած էր լինելու Նոր Բայազետի գավառից, Երևանի, Էջմիածնի, Ալեքսանդրապոլի և Ղարաքիլիսայի գավառների մի մասից՝ ընդամենը 9.000 քառակուսի վերստ (մոտ 11.000 քառակուսի կիլոմետր) տարածություն: Պետական սահմանն անցնում էր Երևանից 7 կիլոմետր հեռավորության վրա: Ըստ ակադեմիկոս Հ. Ավետիսյանի հաշվումների՝ Թուրքիան հայերին էր «հատկացնում ամբողջ Անդրկովկասի տարածքի 5 տոկոսը, որտեղ բնակում էր ընդամենը 310 հազար մարդ, որից էլ հայեր՝ 230 հազար: Մինչդեռ Վրաստանին տրվում էր երկրամասի տարածքի 33 տոկոսը՝ 61.000 կմ քառակուսի, Ադրբեջանին՝ 38 տոկոսը՝ 70.000 կմ քառակուսի: Հայերը պահանջում էին 54,5 հազար կմ քառակուսի, որը 29 տոկոսն էր, բայց ստացան 5 տոկոս: Կովկասահայության ճնշող մասը՝ 1 միլիոն 200 հազար մարդ, բնակվելու էին ՀՀ սահմաններից դուրս: 4. Պոլսում Գերմանիայի դեսպան Բերնսդորֆի արտահայտությամբ՝ «Թուրքերը հայերին տեղ տվեցին Սևանում լողանալու համար, բայց դուրս գալու՝ չորանալու համար, տեղ չտվեցին» (Հ. Ա., էջ 255–256):

Ստորագրված հավելվածներով թուրքական զորքերն իրավունք էին ստանում անարգել անցնել Հայաստանի տարածքով, օգտվել Ղարաքիլիսա-Ղազախ խճուղուց՝ գորամասեր և ռազմամթերք փոխադրելու համար:

Ակադեմիկոս Հ. Ավետիսյանը գտնում է, որ Թուրքիան համաձայնեց ինքնիշխան Հայաստանի գոյությանը այն հաշվով, որ տնտեսապես թույլ և չնչին տարածք ունեցող Հայաստանը չի կարող վտանգ սպառնող Թուրքիային, իսկ հեռանկարում նրանք տեսնում էին այդ Հայաստանի վերացումը (Հ. Ա., էջ 254):

Երրորդ հոդվածը նախատեսում էր, որ հայ-ադրբեջանական սահմանի վերաբերյալ համաձայնագրի մասին պիտի հաղորդվի օսմանյան կառավարությանը:

Չորրորդ հոդվածով օսմանյան կառավարությունը պարտավորում էր զեմքի ուժով օգնություն ցույց տալ ԳԳ կառավարությանը այն դեպքում, եթե վերջինս այդ օգնությունը խնդրեր՝ երկրում կարգն ու հանգստությունը ապահովելու համար:

Հատուկ ուշադրության է արժանի հինգերորդ հոդվածը, որով ԳԳ կառավարությունը պարտավորվում էր գործուն կերպով հակազդել, որպեսզի ոչ մի բանդա չկազմավորվի և չզինվի իր տարածքում, ինչպես և զինաթափել ու ցրել բոլոր բանդաները, որոնք կփորձեն թաքնվել այնտեղ: Խոսքն այստեղ վերաբերում էր Անդրանիկի զորամասին և զոյություն ունեցող ֆիդայական խմբերին: Հատկանշական է, որ այդ հոդվածի հիշատակումը Ս. Վրացյանի մոտ բացակայում է:

Վեցերորդ հոդվածում խոսվում էր ԳԳ-ում բնակվող մուսուլմանների կողմը հարգելու մասին, յոթերորդ հոդվածը վերաբերում էր հյուպատոսական կոնվենցիային, ութերորդը՝ երկաթուղային տարիֆներին, իններորդը՝ փոստային և հեռագրական կապին, տասներորդը՝ կողմերի քաղաքացիների անշարժ գույքի տնօրինմանը:

Ուշագրավ է տասներկերորդ հոդվածը, ըստ որի, ԳԳ կառավարությունը պարտավորվում էր գործադրել բոլոր ջանքերը՝ որպեսզի Բաքու քաղաքից անհապաղ էվակուացվեն այնտեղ գտնվող բոլոր հայկական զինվորական ուժերը:

Տասներկուերորդ հոդվածով կողմերը պայմանավորվում էին ուժի մեջ թողնել Բրեստ-Լիտովսկի պայմանագրի դրույթները, տասներեքերորդը վերաբերում էր զորքերի էվակուացիային, իսկ վերջին՝ տասնչորսերորդ հոդվածը նախատեսում էր պայմանագիրը փոխադարձաբար վավերացնել մեկ ամսվա ընթացքում (Բաթումի պայմանագրի լրիվ տեքստը տե՛ս Հայաստանը միջազգային դիվանագիտության և սովետական արտաքին քաղաքականության փաստաթղթերում, պրոֆ. Ջոն Կիրակոսյանի խմբագրությամբ, Երևան, 1972, էջ 531-537, էջ 771-ի ծանոթությունը):

Բաթումի պայմանագրի մասին Ս. Վրացյանն իր խոսքն ավարտում է այսպես՝ վերջնահաշվարկը, հավանաբար, թողնելով ընթերցողին. «Այսպիսով, — գրում է նա, — ըստ Բաթումի դաշմագրի, Հայաստանը դառնում էր անկախ պետություն: Ահ ու դողով մտնում էր նա ինքնիշխան ազգերի համակենցության մեջ, իբրև ազատ անձնավորություն միջազգային իրավունքի: Նրա հողի տարածությունը մոտավորապես 12.000 քառակուսի կիլոմետր էր, բնակչության թիվը գաղթականներով

միասին՝ մոտ մեկ միլիոն: Եվ... մայրաքաղաքից յոթ կիլոմետր հեռու երևում էին թուրքական թնդանոթները...» (Ս. Վ., էջ 164):

Ինչպես նկատել է ակադեմիկոս Գ. Ավետիսյանը, Բաթումի պայմանագիրը ոչ թե թուրքական «գթասրտության» արդյունք էր, նրանց «պարզև» էր հայերին, ինչպես փորձում էին ներկայացնել Կարաբեքիրը, Վեհիբը և ուրիշներ, այլ թուրքական քաղաքականության շրջադարձի պատճառը, ինչպես երևում է Խալիլ բեյի, Մույն Վեհիբ փաշայի և Շևքի փաշայի ակամա խոստովանանքներից, Սարդարապատի, Բաշ-Ապարանի և Ղարաքիլիսայի տակ հայերի հերոսամարտերն էին: Դեռևս 1920 թ. ապրիլի 20-ին, ժխտելով Հայաստանի անկախությունը թուրքական շնորհի համարելու մտայնությունը, Հանո Օհանջանյանը հայտարարել է, «Իր անկախությունը պաշտպանելու պատրաստակամությունը հայ ժողովուրդը ապացուցել է Սարիղամիշի, Սարդարապատի, Ղարաքիլիսայի և այլ մարտերում, ուր Հայաստանի հազարավոր զավակներ զոհվեցին այդ անկախության համար... Հայ ժողովուրդը իր այս զոհերով ստեղծեց անկախ և ինքնիշխան Հայաստանի Հանրապետությունը» (Գ. Ա., էջ 253-254): Ավելացնենք նաև, որ Ղարաքիլիսայի հերոսամարտում զոհվել էր Գ. Օհանջանյանի ավագ որդին՝ Մոնիկը:

Ըստ Գ. Ավետիսյանի հաշվարկների՝ Բաթումի պայմանագրով Անդրկովկասից Թուրքիային բռնակցվեց 38 հազար քառակուսի վերստ տարածք, որը պոկված էր Հայաստանից և Վրաստանի հայաբնակ վայրերից: Այդ տարածքը 12,5 հազար քառակուսի կիլոմետրով ավելին էր այն տարածքից, որ թուրքերը զավթել էին Բրեստի դաշնագրով (նշվ. աշխ., էջ 256):

Սակայն Բաթումի թալանչիական պայմանագիրը կարճատև գոյություն ունեցավ: 1918 թ. Մուղրոսի զինադարով Օսմանյան կայսրությունը ճանաչեց իր անվերապահ պարտությունը Առաջին համաշխարհային պատերազմում, և դեկտեմբերի սկզբին թուրքական զորքերը հեռացան Անդրկովկասից, իսկ Կարսի մարզը դատարկեցին 1919 թ. ապրիլին:

Խորհրդային ժամանակաշրջանի պատմագրության մեջ Բաթումի պայմանագիրը գնահատված է միանշանակորեն՝ ընդգծված է նրա հակախորհրդային ուղղվածությունը:

Անվանի պատմաբան Լեոն գրել է. «Տասը հազար քառակուսի վերստ էր այդ Հայաստանը: Մեծ մասամբ լեռ ու անապատ՝ Սևանա լճի չորս կողմը հայ ժողովրդի ոչ թե բնակության տեղ, այլ գերեզման: Պև-

տական սահմանը անցնում էր Երևանի տակով, հայերի ձեռքին մնում էր միայն վեց վերստ երկարությամբ երկաթուղի» (Լեռ, Անցյալից, Թիֆլիս, 1925, էջ 404):

Իսկ Անդրանիկը զայրույթով ասել է. «Վեց հարյուր տարվան ստրկության շղթան դարձյալ ձեր վիզն ու ոտքը կանցնեք ձեր ձեռքով: Չեմ կրնար այս պայմանները հանդուրժել, սոռանալով մեր երեսուն տարվա զոհերը և մեկ միլիոն նահատակները» (Հայ ժողովրդի պատմություն, բուհական դասագիրք, Երևան, 1979, էջ 420):

Մ. Արզումանյանը գրում է. «Անդրկովկասի հակահեղափոխական կառավարիչները, երկրամասը կտրելով Սովետական Ռուսաստանից և դուրս գալով Բրեստի հաշտության դեմ, ստացան Բաթումի ստորացուցիչ և ստրկացուցիչ պայմանագիրը, որը նրանց շղթայակապ արեց ու հանձնեց թուրքական զավթիչների ողորմածությանը» (Մ. Ա., Արհավիրքից վերածնունդ, Երևան, 1973, էջ 165):

Ինչպես գրում է ակադեմիկոս Հր. Սիմոնյանը, Անդրանիկին հատկապես հավասարակշռությունից հանել էր Բաթումի պայմանագրի այն հոդվածը, որի համաձայն ինքն ու իր զորքը համարվում էին օրենքից դուրս: Ամենաթանձր հիշոցներ հղելով պայմանագիրը ստորագրողների հասցեին՝ Անդրանիկն այն համարում էր սոսկալի տարրողությամբ դավաճանություն: Մերժելով Բաթումի պայմանագիրը՝ Անդրանիկը մերժեց նաև Հայաստանի անկախությունը, Հայաստանի Հանրապետությունը՝ այն համարելով թուրքից ստացած նվեր:

Ժողովրդական հերոսը հայության համար կործանարար էր համարում Ռուսաստանից անջատ նրա գոյությունը: Հր. Սիմոնյանը փաստերով ցույց է տալիս, որ վրդովված էր ոչ միայն Անդրանիկը, այլև ողջ Արարատյան երկիրը: Երևանի փողոցներում խմբված մարդկանց հուզված խոսակցությունների ընդհանուր եզրակացությունը մեկն էր. հայ զորքը հաղթել է կռվի դաշտում, իսկ թուրքերը, հայ զինվորներին խաբելով, դիվանագիտական խոշոր հաղթանակ են տարել: Ալեկոծվող ժողովրդի հուզմունքը գնալով աճեց-և վերաճեց զանգվածային բողոքների: Հունիսի 5–9–ը Երևանում տեղի ունեցան խոշոր ցույցեր հաշտության դեմ: Արամ Մանուկյանը ստիպված էր հանդես գալ և հանդգել ժողովրդին, որ այլ ելք չկար:

Դժգոհ էր նաև զորքը: Գեներալ Մ. Սիլիկյանը Երևանի Ազգային խորհրդից և անձանք Արամից պահանջեց չենթարկվել Բաթումի պայմանագրին, առաջ շարժվել, թուրքերից մաքրել Արարատյան և Շիրակի

դաշտերը, գրավել Կարսը՝ մի կողմ թողնելով Ալեքսանդրապոլը: Շատ զորամասերի զինվորներ ու սպաներ հեռագրերի տարափով պահանջում էին նույնը, այլապես սպառնում էին չենթարկվել հրամանատարությանը: Եվ անգլիացիների հնարավոր օգնության հետ հույսեր կապող Անդրանիկը Դիլիջանից բռնեց Բաղդադի ճանապարհը՝ Միջագետքում գտնվող անգլիական զորքերին հանդիպելու նպատակով (Հր. Սիմոնյան, Անդրանիկի ժամանակը, Գիրք Բ, Երևան, 1996, էջ 161–165):

ՀԱՅԵՐԻ ՄԱՍՆԱԿՑՈՒԹՅՈՒՆԸ ԲԱԶՎԻ ՊԱՇՏՊԱՆՈՒԹՅԱՆԸ

Բաթումի պայմանագրի ստորագրումից անմիջապես հետո թուրքական զորքերի հրամանատարությունը շտապում էր օր առաջ հասնել Բաքու, որտեղ դեռևս 1918 թ. ապրիլի 25–ին ստեղծվել էր խորհրդային իշխանություն՝ ժողկոմխորհուրդ՝ բուլշևիկ Ստեփան Շահումյանի գլխավորությամբ: Մինչև հուլիսի վերջերը՝ երեք ամսից մի քիչ ավել տևած այդ իշխանությունը հայտնի է «Բաքվի կոմունա» անունով:

Բաքվի պաշտպանությունը մեծ նշանակություն ուներ ինչպես խորհրդային Ռուսաստանի սահմանները պաշտպանելու գործում, այնպես էլ բացառիկ էր նրա նշանակությունը հայության գոյության համար: Ինչպես գրել է Բաքվի հերոսական պաշտպանության ամենակտիվ մասնակիցներից մեկը՝ գեներալ Հակոբ Բագրատունին, գրավելով Բաքուն՝ տեղի հայերի համար իրենց բոլոր հետևանքներով, թուրքերը հետևողականորեն կգրավեին Ղարաբաղն ու Երևանը, որը կնշանակեր մեր ժողովրդի համար ֆիզիկական կործանում, ուստի Բաքվի հերոսական և փառապանծ պաշտպանությունը հսկայական դեր խաղաց հայ ժողովրդի փրկության գործում (Հ. Ավետիսյան, Աշվ. աշխ., էջ 299–300):

Իսկ դաշնակցական գործիչ Սերգեյ Սելիք–Յուլյանը գրել է, թե Բաքվի նշանակությունը բուն Հայաստանի համար մեծ է նրանով, որ Սարդարապատը, Ղարաքիլիսան և Բաշ–Ապարանը իրենց հաղթությամբ մեծ չափով պարտական են Բաքվի զորքերին, որոնք քաշելով իրենց վրա թշնամու առավելագույն և լավագույն ուժերը՝ հնարավորություն տվին նրանց պատվով դուրս գալու այդ հերոսամարտերից:

Դեռևս 1917 թ. վերջերին Բաքվում ևս ստեղծվել էր Ազգային խորհուրդ, որի նախագահ էր ընտրվել դաշնակցական Աբրահամ Գյուլխանդանյանը:

Անդամներից էին Խանասորի Վարդանը (Մեհրաբյան), Էսեռ Լևոն Աթաբեկյանը, Բագրատ Եպիսկոպոսը, Ռոստոմը, Քաջազունին:

1918 թ. հունվարի կեսերին՝ Շամխորի արյունոտ դեպքերից հետո, Բաքվի և Թիֆլիսի միջև երկաթուղային կապը կտրվեց: Այդ պատճառով Բաքվում կուտակվում էին ավստրո-գերմանական ճակատից տուն վերադարձող հազարավոր հայ զինվորներ, որոնք հայտնվեցին թշվառ վիճակի մեջ: Բաքվի Չայոց Ազգային խորհուրդը իր վրա վերցրեց նրանցից կանոնավոր զորամասեր կազմելու և ռազմաճակատ ուղարկելու գործը: Այդ գործը հանձնվեց խմբապետ Չամազասպին (Սրվանձտյան): Շուտով ստեղծվեց 3000 հոգուց բաղկացած և երեք գումարտակից կազմված Չամազասպի բրիգադը: Ազգային խորհուրդը կազմակերպեց նաև 2-րդ հայկական պահեստի գունդը՝ գնդապետ Ս. Եղիազարյանի հրամանատարությամբ:

1918 թ. մարտին Բաքվում սկսվեց հայ-ադրբեջանական ընդհարում, որը զսպվեց Ազգային խորհրդի ուժերով, իսկ հայերը պատասպանեցին ադրբեջանցի մտավորականներին:

1918 թ. ապրիլի 14-ին Բաքվի բանվորների և զինվորների սովետի և Չայոց Ազգային խորհրդի միջև կնքվեց համաձայնություն, ըստ որի՝ Չամազասպի բրիգադը վերակազմավորվեց Կարմիր բանակի 16-րդ և 17-րդ գումարտակների՝ Չամազասպի հրամանատարությամբ, իսկ նրա օգնական նշանակվեց Սերգո Մանուչարյանը: Չամաձայնագիրը ստորագրեցին Ս. Շահումյանը, Մ. Ղորղանյանը, Ա. Գյուլխանդանյանը և ուրիշներ: Այդպիսով հայկական զորամասերը ապրիլի 14-ից անցան բոլշևիկների ձեռքը: Նրանց թիվը 10-12 հազար էր՝ 50 թնդանոթներով (Ս. Վ., էջ 175): Նրանց մեջ էր հաշվվում նաև դաշնակցական զորամասը՝ 700 ընտիր մարտիկներով՝ Գ. Բալայանի հրամանատարությամբ: Այն անմիջականորեն ենթարկվում էր կուսակցության ղեկավար մարմնին և նրա մարտական խումբն էր, գործողության մեջ էր դրվում միայն արտակարգ դեպքերում:

Բաքվի կոմունայի ստեղծումից հետո ռազմածովային կոմիսար և գլխավոր հրամանատար նշանակվեց բոլշևիկ Գրիգորի Կորգանովը (Ղորղանյան), շտաբի պետ՝ գնդապետ Ավետիսյանը, հայկական զորամասերի պետ՝ Չամազասպը, ճակատի հրամանատար՝ գնդապետ Ղազարյանը:

Միաժամանակ Ստ. Շահումյանի գլխավորած կառավարությունը ձեռնամուխ եղավ զինվորական ուժերի վերակազմմանն ու լրացմանը:

Վ. Ի. Լենինը Ս. Տեր-Գաբրիելյանի միջոցով կոմունարներին է ուղարկում 4 զրահամեքենա, 13 օդանավ, այլ օգնություն: Լենինի ցուցումով կազմակերպվում և Գ. Պետրովի հրամանատարությամբ դեպի Բաքու է մեկնում 6 գնդից բաղկացած մի մեծ ջոկատ, սակայն նրանց մեծ մասը թողնվում են Ցարիցինում:

Չենց այդ ժամանակ էր, որ Անդրանիկը, որն իր զորամասով գտնվում էր Նախիջևանի գավառում, 1918 թ. հուլիսի 14-ին Ջուլֆայից հեռագրում է Ստ. Շահումյանին և հայտնում, որ ինքը Նախիջևանը հայտարարում է Ռուսական հանրապետության անբաժան մասը և նմաբովում է Ռուսաստանի կենտրոնական կառավարությանը:

Ստ. Շահումյանն այդ մասին հաղորդում է Վ. Լենինին և միաժամանակ ջերմորեն ողջունում «իսկական ժողովրդական հերոս» Անդրանիկին ու նրա դրոշի տակ կռվող զինվորներին: Սակայն, դժբախտաբար, ստեղծված բարդ պայմաններում Անդրանիկը չկարողացավ միանալ Բաքվի սովետական զորքերին, որոնց ընդհանուր թիվը հայկական զորքերի հետ միասին շուրջ 17.000 էր, որոնց շուրջ 70 տոկոսը հայեր էին: Բաքվի Կարմիր բանակի 3-րդ բրիգադի հրամանատարն էր դաշնակցական Չամազասպը, շտաբի պետը՝ անկուսակցական Ս. Մուսայելյանը, բոլշևիկյան կոմիսարը՝ Ա. Միկոյանը:

Բաքվի պաշտպանների շարքերում էին Անդրանիկի մերձավոր զինակիցներ Սեպուհը (Արշակ Ներսիսյան) և Սեբաստացի Մուրադը, որոնցից վերջինը զոհվեց Բաքվում:

Այդ նույն ժամանակ Նուրի փաշան Գանձակում կազմավորում էր հռչակավոր «խլամական բանակը», որի նպատակն էր զրավել Բաքուն: Չունիսի սկզբին այստեղ հասան նաև թուրքական կանոնավոր զորամասեր: Չունիսի սկզբներին թուրք-ադրբեջանական ուժերի առաջապահները երևացին Չաջի-Կաբուլի շրջանում, իսկ մեկ այլ թևը շարժվում էր դեպի Շամախի:

Նախաձեռնությունը վերցնելու նպատակով 1918 թ. հունիսի 5-ին Բաքվի զորքերն անցան հարձակման, մինչև հունիսի 26-ը գրավեցին Կարամարզյան-Քուրդամիր և Ջուրովկա-Պետրոպավլովսկ գծերը և հարուստ ռազմավար: Թշնամին թողեց հարյուրավոր դիակներ:

Չունիսի 25-ին թուրքական մի դիվիզիա շարժվեց դեպի Գյոլջա, իսկ մի ուրիշը՝ Եվլախի ուղղությամբ: Չունիսի 27-29-ը տեղի ունեցան կատաղի կռիվներ: Մեծ զոհեր տալուց հետո հունիսի 29-ին թուրքերն անցան հակահարձակման: Եռօրյա արյունահեղ կռիվներից հոգնած՝ ա-

նոթի ու ծարավ Բաքվի զորքերը թշնամու գերազանց ուժերի ճնշման տակ սկսեցին նահանջել դեպի Կարամարգյան: Հուլիսի 6-ին Բաքվի ուժերը կանգնեցին Շամախի-Քուրդամիր գծի վրա:

Հուլիսի 5-ին Պարսկաստանից Բաքու հասավ գնդապետ Լազար Բիչերախովն իր զորամասով և նշանակվեց Բաքվի պաշտպանության պետ: Հուլիսի 8-26-ը տեղի ունեցան արյունահեղ կռիվներ, որից հետո Բաքվի ուժերը նահանջեցին նաև Շամախիից և հասան մինչև Խուրդալան ու Ալեաթ:

Հուլիսի 26-ին դավաճանաբար լքելով դիրքերը՝ Դերբենդ փախավ Բիչերախովը: Նույն օրը թուրքերի արևելյան ճակատի հրամանատար Մուրսել փաշան Հայոց Ազգային խորհրդին ուղարկեց վերջնագիր՝ քաղաքը հանձնելու մասին:

Հուլիսի 27-28-ին թուրքերն արդեն քաղաքի տակ էին՝ Բիրի-Յեյբաթում ու Բալաջարիում: Դրություները հուսահատական էր: Ռուսաստանից օգնություն ստանալու հույս չկար: Մնում էր Պարսկաստանի վրայով անգլիացիներից օգնություն ստանալու աղոտ հույսը: Հուլիսի 27-ին այդ հարցը դրվեց բանվորների, գյուղացիների, զինվորների և նավաստիների պատգամավորների խորհրդի, նավային կոմիտեների և Կովկասյան Կարմիր բանակի ռազմաօդային արտակարգ նիստում: Բոլշևիկներին հակառակ՝ խորհուրդը ձայների մեծամասնությամբ (258 կողմ, 236 դեմ) որոշեց Բաքու հրավիրել անգլիացիներին:

1918 թ. հուլիսի 31-ին Բաքվի սովետի նիստում ժողկոմսովետը ցած դրեց իր լիազորությունները, հայտարարելով, որ չի կարող ոչ հանձնվել թուրքական զավթիչներին, ոչ էլ հրավիրել անգլիացիներին: Նրանք նավերի վրա փոխադրեցին ռազմածորները, պարենը, բանկերի գումարները, բոլշևիկյան զորքերն ու հեռացան դեպի Աստրախան: Բացի Ս. Շահումյանից, հեռացողների մեջ էին Արտ. Կարինյանը, Գ. Կորգանովը, Ս. Տեր-Գաբրիելյանը, Աշ. Հովհաննիսյանը և ուրիշներ:

Ս. Շահումյանի հրաժարականից հետո՝ հուլիսի 31-ին, Բաքվում ստեղծվեց Կասպիական նավատորմի կենտրոնական կոմիտեի և բանվորների, զինվորների, նավաստիների խորհրդի դիկտատուրա, որի նախագահն էր Էսեռ Տիշկովը, փոխնախագահը՝ դաշնակցական Ալեքսանդր Առաքելյանը, ֆինանսների կոմիսարը՝ դաշնակցական Ս. Մելիք-Յուլյանը, ներքին գործերի կոմիսարը՝ Էսեռ Լև Ումանսկին, Ռոստոմը, Աբրահամ Վելունցը և ուրիշներ՝ թվով 18 մարդ: Ռազմածովային կոմիսար նշանակվեց գեներալ Հակոբ Բագրատունին: Դիկտատուրայի

զորքերի ընդհանուր հրամանատար նշանակվեց գեներալ Դոկուչանը, շտաբի պետ՝ գնդապետ Ավետիսյանը:

Հուլիսի 31-ին սկսվեց անհավասար մարտ հայերի և թուրքական բանակի ու խաժամուժի միջև, որը տևեց 6 օր: Հայերի դեմ կանգնած էր թուրքական 30-հազարանոց բանակը (ըստ Հր. Սիմոնյանի՝ 15 հազար — Ս. Կ.)՝ Նուրի և Մուրսել փաշաների հրամանատարությամբ: Օգոստոսի 4-ին և 5-ին կռիվներն ավելի սաստկացան:

Օգոստոսի 7-ին Բաքու հասավ անգլիական զորքերի առաջին ջոկատը՝ 600 մարդ, օգոստոսի 13-ին՝ երկրորդը՝ 1000 հոգի, ընդամենը՝ 1640 հոգի, որից կազմող ուժ՝ 900 զինվոր: Մինչև օգոստոսի 17-ը Բաքու հասավ անգլիական մեկ բրիգադ՝ երեք գումարտակ և մեկ դաշտային մարտկոց, երեք զրահապատ մեքենա: Ընդհանուր հրամանատարն էր գեներալ Դենստերվիլը:

Օգոստոսի 29-ին թուրքերը հարձակման անցան անգլիացիների գրաված ճակատում: Վերջիններս ուժեղ դիմադրությունից հետո թողեցին դիրքերի մի մասը: Սեպտեմբերի 1-ին թուրքերը նոր հարձակում սկսեցին, և Դենստերվիլն ու ֆրանսիական գնդապետ Շարդինյին Ցենտրոկասպիի դիկտատուրայի առջև դրեցին Բաքուն անմիջապես հանձնելու հարցը: Դիկտատուրան մերժեց այդ առաջարկը և պահանջեց, որ անգլիացիները մեկնեն ճակատ՝ հակառակ դեպքում սպառնալով հրետակոծել նրանց նավերը:

Կռիվները շարունակվեցին, սակայն թշնամին քայլ առ քայլ մոտենում էր քաղաքին: Սեպտեմբերի 14-ի լուսաբացին թուրքերը գրավեցին Փայլի դրունքի դիրքերը: Նույն օրը անգլիացիները նստեցին նավերը և հեռացան Պարսկաստանի ուղղությամբ:

Սեպտեմբերի 15-ի առավոտյան նավերով Բաքվից հեռացան Հայոց ազգային խորհրդի անդամները, ինքնապաշտպանության զինվորները, այդ թվում Ռոստոմն ու Հ. Բագրատունին:

Սեպտեմբերի 15-ին էլ թուրք-մուսավաթական ուժերը ներխուժեցին Բաքու: Այստեղ եկավ նաև Ադրբեջանի կառավարությունը: Երեք օր ու գիշեր շարունակվեց Բաքվի հայ ազգաբնակչության եղեռներ, որին զոհ գնաց շուրջ 30.000 մարդ (տե՛ս Բ. Իշխանյան, Բագուի մեծ սարսափները, Թիֆլիս, 1920 թ.):

Ինչ վերաբերում է Բաքվի կոմիսարների ճակատագրին, ապա տեղի ունեցավ հետևյալը. Ցենտրոկասպիի դիկտատուրայի առաջին գործը եղավ ռազմաճակատի ուղարկել ու հետ բերել Աստրախան հեռա-

ցող բուլշևիկյան 17 նապերը: Բաքվի 26 կոմիսարները ձերբակալվեցին և բանտ նետվեցին: Երբ սեպտեմբերի 15-ին թուրքերը մտան Բաքու, բուլշևիկ ընկերներին հաջողվեց բանտից ազատել կոմիսարներին և «Թուրքմեն» շոգենավով դուրս բերել Բաքվից: Սակայն շոգենավի դավաճան կապիտանը նավն ուղղեց ոչ թե դեպի Աստրախան, այլ տարավ Կրասնովոդսկ: Այստեղ գոյություն ունեցող էստեռական իշխանություններն ու անգլիացիները անդրկասպյան ավազուտներում 1918 թ. սեպտեմբերի 20-ին Բաքվի 26 կոմիսարներին գնդակահարեցին, որոնց թվում էին Ստ. Շահումյանը, Պ. Ջափարիժեն, Մ. Ազիզբեկովը, Ի. Ֆիոլետովը, Գ. Կորգանովը: Քսանվեց կոմիսարներից 8-ը հայեր էին՝ Ստ. Շահումյան, Գր. Կորգանով, Սուրեն Յովսեփյան, Արսեն Ամիրյան, Թադևոս Ամիրյան, Արմենակ Բորյան, Արամ Կոստանյան, Բաղդասար Ավագյան:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԴՐՈՒԹՅՈՒՆԸ: ԻՇԽԱՆՈՒԹՅԱՆ ՄԱՐՄԻՆՆԵՐԻ ԱՏԵՂԾՈՒՄԸ

Հայաստանի Հանրապետության ծննդյան մասին հետևյալ տպավորիչ, պատկերավոր ու իրական նկարագիրն է տվել այդ հանրապետության վերջին վարչապետ Սիմոն Վրացյանը. «Այսպես, ուրեմն, — գրում է նա, — ընդ հուր և ընդ սուր անցնելով՝ Հայաստանը կոչվեց անկախ կյանքի: Ցնծության աղաղակներով ու ծափերով չընդունվեց հանրապետության ծնունդը: Ընդհակառակը, շատերի համար նա նկատվում էր անժամանակ ծնունդ: Հիվանդ երեխա աշխարհ բերած մոր պես, հայ ժողովուրդը գլուխ էր ծեծում սգավոր՝ շշմջալով. «Դու իմ և ուրախությունն ես, դու՝ դժբախտությունը իմ...»:

Այո՛, արցունքի ու տառապանքի կովից ծնվեց Հայաստանի անկախությունը: Ոմանք չէին հավատում դրան. անկախությունն ու հանրապետությունն բառերը դնում էին չակերտի մեջ: Եվ այդպես վարվելու հիմքերը շատ էին գորավոր. իրոք որ, զարհուրելի էին պայմանները, և անկախությունը այդ պայմաններում թվում էր հեզմանք:

Փաստորեն հայերի ձեռքը մնացել էր մի փոքրիկ հողաշերտ՝ հազիվ 12.000 քառ. կիլոմետր աղքատ ու կիսակործան մի երկիր՝ կծկված ցամաք լեռների մեջ, աշխարհի խուլ անկյունում, ծանրաբեռնված գաղթականներով ու որբերով, շրջապատված ատամ կրճտացնող թշնամիներով, անհաց, անդեղ, անօգնական: Սով ու հիվանդություն, ավար ու ա-

վեր, լաց ու թշվառություն, կոտորած ու սարսափ: Իսկ մյուս կողմը՝ Էնվերի բանակը հաղթական՝ համաթրջական երազներով տոգորված, որ Հայաստանի մարմնի վրայով ձգտում էր դեպի Ապշերոն ու Թուրքեստան» (Ս. Վրացյան, Հայաստանի Հանրապետություն, Երևան, 1993, էջ 184):

Բաթունի հաշտության պայմանագրի ստորագրումից և հայկական պատվիրակության վերադարձից հետո Թիֆլիսի Հայոց Ազգային խորհուրդը ձեռնամուխ եղավ Հայաստանի Հանրապետության կառավարության կազմակերպմանը և վարչապետ հրավիրեց Հովհաննես Քաջազնունուն (Իզիթխանյան, 1868–1938), որը ձևավորեց կառավարություն հետևյալ կազմով. արտաքին գործերի նախարար՝ Ալեքսանդր Խատիսյան, ներքին գործերի՝ Արամ Մանուկյան, ֆինանսների՝ Խաչատուր Կարծիկյան, զինվորական՝ Հովհաննես Հախվերդյան: Վերջինս անկուսակցական էր, իսկ մյուսները դաշնակցականներ էին:

1918 թ. հուլիսի 17-ին Հայոց Ազգային խորհուրդն ու կառավարությունը վերջապես Թիֆլիսից մեկնեցին Երևան: Քանի որ Մանահին կայարանից սկսած երկաթուղին թուրքերի ձեռքում էր և ճանապարհը երկաթուղով շարունակելը վտանգավոր էր, մեկնողները Մանահինից ճանապարհը պիտի շարունակեին Աղստաֆա–Դիլիջան ճանապարհով: Մեկնողների մեջ էին կառավարության անդամներ Հ. Քաջազնունին, Խ. Կարծիկյանը, Հ. Հախվերդյանը, Ազգային խորհրդի անդամներ Ավ. Սահակյանը, Ս. Տիգրանյանը, Ստ. Մալխասյանը, Ա. Բաբայանը և ուրիշներ, ինչպես նաև պահակախումբ՝ Դալի Դազարի գլխավորությամբ: Նրանց հետ էին նաև երկու գերմանացի և մեկ թուրք սպա:

Ս. Վրացյանի նկարագրության համաձայն՝ մեկնումը կատարվեց շատ տխուր պայմաններում, որովհետև վրացիներն ամեն ինչ արել էին, որպեսզի վիրավորեն հայերի ինքնասիրությունը: Վրաց կառավարությունից ոչ ոք չէր ելել կայարան, իսկ երկաթուղային վարչությունը տրամադրել էր մի հին, կեղտոտ ու անհարմար վագոն: Նրանք մեծ դժվարությամբ էին թույլատրել տանելու նաև երկու կիսախարխուլ ավտոմոբիլ: Հայաստանի վարիչները Թիֆլիսից մեկնեցին նվաստացած ու դառն զգացումներով, կարծես թշնամի երկրից էին հեռանում: Կայարաններից մեկում վրացի սահմանապահները նույնիսկ փորձեցին խուզարկել Հայաստանի կառավարության վագոնը, բայց գերմանացի սպաները թույլ չտվեցին:

Տարօրինակ է, բայց դրան հակառակ՝ բուլղոսից այլ էր աղբեջանցիների վերաբերմունքը: Սահմանի վրա նրանք հայկական կառա-

վարությանը դիմավորեցին զինվորական պատիվներով, ընդառաջ եկան նահանգապետը և Ադրբեջանի կառավարության ներկայացուցիչները: Աղստաֆայում և Ղազախում կազմակերպվել էր պաշտոնական ընդունելություն և ճաշկերույթ: Նրանց համակրանքով էին դիմավորում նաև ադրբեջանցի գյուղացիները, որոնք մինչև Հայաստանի սահմանը բարեկամական ցույցեր էին անում (Ս. Վ., էջ 688):

Հայաստանի հողի վրա առաջին հանդիսավոր դիմավորումը տեղի ունեցավ Դիլիջանում, որտեղ կատարվեց ճոխ հյուրասիրություն: Նույնը տեղի ունեցավ նաև Սենյոնովկայում և Ելենովկայում (այժմ՝ Սևան), որտեղ դիմավորման—ճանապարհման արարողությունների մասնակցում էին հայկական զինվորական ստորաբաժանումները:

Հուլիսի 19-ի երեկոյան ճանապարհորդները հասան Ախտա (այժմ՝ Հրազդան), ուր Երևանից դիմավորելու էր եկել Արամ Մանուկյանը: Փողոցում կանգնած էր զորքն ու զինվորական նվազախումբը: Ավ. Սահակյանն ընդունեց հրամանատարի զեկույցը, որից հետո զինվորական ստորաբաժանումները հանդիսավոր երթով անցան կառավարության անդամների առջևից:

Քանաքեռում հյուրերին դիմավորեց Հայկական կորպուսի հրամանատար, գեներալ Թ. Նազարբեկյանը՝ իր սպայակույտով:

Հուլիսի 19-ի ուշ երեկոյան Ազգային խորհրդի և կառավարության անդամները հասան Երևան: Քաղաքը զարդարված էր դրոշակներով, գորգերով ու կանաչով: Աստաֆյան (ներկայիս՝ Աբովյան) փողոցը լեցուն էր բազմությամբ: Փողոցի երկու կողմում կանոնավոր շարքերով կանգնած էին զորքերը՝ Սարդարապատի ու Բաշ—Ապարանի հերոսները, որոնք ողջունեցին հյուրերին խանդավառ «կեցցե»-ներով ու զինվորական երաժշտությամբ:

Երեկոյան տեղի ունեցավ պաշտոնական ընդունելություն, որին ներկա էին ռուս, ուկրաինացի, ադրբեջանցի բազմաթիվ հյուրեր: Արտասանվեցին ողջույնի ճառեր, որոնց Հ. Քաջազունին պատասխանեց հետևյալ խոսքերով. «Մեր պետությունը կոչվում է ոչ թե հայկական, այլ Հայաստանի Հանրապետություն: Այդ ցույց է տալիս, որ մեր պետությունը հայրենիք է նրա մեջ ապրող բոլոր ժողովուրդների համար» (Ս. Վ., էջ 189):

Հաջորդ օրվանից կառավարությունն անցավ գործի և ծեռամուխ եղավ պետական ապարատի կառուցմանը:

Ինչպես իրավամբ գրում է Ս. Վրացյանը, երկիրը կատարյալ քառուսի և անիշխանության մեջ էր, ուստի պետք էր կարգ ու օրենք հաստատել, գաղթականությանը ապահովել սննդով ու կացարանով, կանխել սահմանային ընդհարումները, զսպել ներքին մահմեդական խռովությունները, մի խոսքով՝ պետք էր ոչնչից պետություն ստեղծել:

Թիֆլիսի և Երևանի Ազգային խորհուրդների մի շարք միացյալ նիստերում քննարկվեց Հայաստանի Հանրապետության օրենսդիր մարմնի ստեղծման հարցը: Որոշվեց եռապատկել 15 հոգուց կազմված Ազգային խորհրդի անդամների թիվը, հրավիրել նաև ադրբեջանցիների, եզդիների և ռուսների ներկայացուցիչներին: Այդ եղանակով կազմվեց 46 հոգուց բաղկացած Հայաստանի առաջին օրենսդիր մարմինը՝ Հայաստանի խորհուրդ անունով: Նրանցից 38-ը հայեր էին, 6-ը՝ ադրբեջանցիներ, մեկ ռուս, մեկ եզդի: Խորհրդի հայ պատգամավորները ներկայացնում էին երեք կուսակցություն. դաշնակցականներ՝ 18, Էսէներ՝ 6, սոցիալ-դեմոկրատներ՝ 6, ՀԺԿ՝ 6, չեզոք՝ 2 (Հայաստանի Հանրապետությունը 1918—1920 թթ., Քաղաքական պատմություն, Փաստաթղթերի և նյութերի ժողովածու, Երևան, 2000, էջ 53): Կառավարության նախկին կազմին ավելացավ արդարադատության նախարար, անկուսակցական Գ. Պետրոսյանը:

Հաստատվեց Հայաստանի ազգային դրոշը՝ հորիզոնական կամիր, կապույտ ու նարնջի գույներով, որտեղ կարմիրը հայ ժողովրդի թափած արյունն էր, կապույտը՝ Հայաստանի կապույտ երկինքը և նարնջի կամ ոսկեգույնը՝ խտացումն աշխատանքի (Ս. Վ., էջ 191): Պետական հիմն (օրհներգ) ճանաչվեց Մ. Նալբանդյանի «Մեր հայրենիքը»:

1918 թ. օգոստոսի 1-ին Երևանի քաղաքային ակումբի դահլիճում (Հ. Պարոնյանի անվան երաժշտական կոմեդիայի թատրոնի նախկին, այժմ՝ քանդված շենքը — Մ. Կ.) մեծ հանդիսավորությամբ բացվեց Հայաստանի խորհրդի անդրանիկ նիստը: Առաջին նիստը բացելու պատիվը վերապահվեց Հայոց ազգային խորհրդի նախագահ Ավետիք Սահակյանին: Նա իր ճառի վերջում ասաց. «Այո, մեր հանրապետությունը փոքր է ու նեղ իր սահմաններով. նա գրկվել է իր ամենագնահատելի երկրամասերից ու չի կարող իր մեջ տեղավորել ամբողջ ազգաբնակչությանը և, կարծես թե, պայմաններ չունի անկախ գոյության համար: Բայց ես կարծում եմ, որ երկրի սահմանները քարացած չեն կարող մնալ միշտ. ես հավատում եմ, որ մեր երկրի սահմանները կընդարձակվեն

կյանքի երկաթե ուժով...» (նշվ. ժողովածու, էջ 55): Այդ կանխատեսումն իրականացավ մեկ տարի էլ չանցած:

Երբ Ավ. Սահակյանը խոսքն ավարտեց՝ առաջարկելով ընտրել խորհրդի նախագահ, խորհրդարանի շենքի գլխին բարձրացավ Հանրապետության եռագույն դրոշը, դրսում հնչեցին հազարավոր «կեցցեներ», «Սեր հայրենիքը» և գործը պատվի առավ:

Հայաստանի խորհրդի նախագահ ընտրվեց դաշնակցական Ավ. Սահակյանը, փոխնախագահներ՝ ժողովրդական Գր. Տեր-Խաչատրյանը և Էտե Դ. Չուբյանը:

Խորհրդի նիստից հետո գեներալ Թ. Նազարբեկյանի հրամանատարությամբ տեղի ունեցավ զորահանդես. զորքն անցավ հանդիսատեսների առջևից և ժողովրդի ծափողջույնների ու երաժշտության ուղեկցությամբ բարձրացավ Աստաֆյան փողոցով: «Տեսարանը հուզիչ էր,— գրում է Ս. Վրացյանը: Շատերի աչքից ացունք էր հոսում: Հայաստանի խորհրդարան, հայոց կառավարություն, հայկական բանակ... Երազ չէ՞ր արդյոք» (Ս. Վ., էջ 195):

Օգոստոսի 3-ին, Հայաստանի խորհրդի երկրորդ նիստում, վարչապետ Հ. Քաջազնունին հրապարակեց իր գլխավորած կառավարության ծրագրային հայտարարությունը (տես ՀՀ 1918–1920 թթ. փաստաթղթերի և նյութերի ժողովածու, էջ 57–59):

Երկրի ընդհանուր վիճակը ներկայացնելով մեկ բառով միայն՝ կատաստրոֆային (աղետալի — Ս. Վ.), վարչապետն ընդգծեց, որ մնան պայմաններում կառավարության գլխավոր խնդիրն է կասեցնել քայքայման պրոցեսը, հանել երկիրը անիշխանության վիճակից և պայմաններ ստեղծել պետական շինարարության համար, որը հանգելու է հետևյալին.

1. Ներքին գործերի բնագավառում երկրում հաստատել տարրական կարգ ու կանոն, կյանքի և գույքի ապահովություն, բացել հաղորդակցության ճանապարհները, վերականգնել փոստ-հեռագրական կապը, հնարավորին չափ մեղմացնել պարենավորման տազնապը, տնօրինել գաղթականների վիճակը, նախապատրաստել Հայաստանի Սահմանադիր ժողովի հրավիրումը:

2. Ֆինանսների բնագավառում հող նախապատրաստել սեփական դրամական համակարգ ստեղծելու համար, վերականգնել արդյունաբերությունը և ապրանքափոխանակությունը, մշակել հարկային առողջ համակարգ:

3. Արդարադատության բնագավառում բարեկարգել դատարանը, քրեական դատավարությանը մասնակից դարձնել ժողովրդի ներկայացուցիչներին:

4. Զինվորական բնագավառում վերակազմել երկրի զինվորական ուժերը, ստեղծել թվով ոչ մեծ, բայց ոգով ու կարգապահությամբ ուժեղ բանակ:

5. Արտաքին գործերի բնագավառում ամրացնել հաշտությունը օսմանյան կառավարության հետ, լուծել Ադրբեջանի և Վրաստանի հետ սահմանային հարցերը՝ հիմք ունենալով ազգագրական սկզբունքը:

Ներկայացված ծրագիրը վարչապետն անվանեց պետության գոյությունն ապահովող ամենաանհրաժեշտ գրավականների ծրագիր, որը եղած հնարավորությունների առավելագույնն է:

Ծրագիրն արժանացավ էսէռների և սոցիալ-դեմոկրատների խիստ քննադատությանը, իսկ դաշնակցականներն ու ՀԺԿ-ն հավանության արժանացրին:

Օգոստոսի 6-ի նիստում պատասխանելով ծրագրի քննադատներին՝ Հ. Քաջազնունին դրեց վստահության քվե ստանալու պահանջ: Դեմ կառավարության քվեարկեցին դաշնակցականները, 4 ժողովրդականներ, մահմեդական և ռուս պատգամավորները, ձեռնպահ մնացին 5 սոցիալ-դեմոկրատ, 3 էսէռ, 2 ժողովրդական և 1 անկուսակցական:

«Այսպիսով,— ինչպես նշում է Ս. Վրացյանը,— իր կյանքի առաջին իսկ օրից Հայաստանի խորհուրդը դուրս եկավ ներքին շաղախից զուրկ, ամուր մեծամասնություն չունեցող, հակամարտություններով ու անակնկալներով լի մի մարմին: Նրա այս հիվանդությունը բնածին էր և մինչև վերջ էլ կարելի չեղավ դարմանել» (Ս. Վ., էջ 198):

Նորահռչակ Հայաստանի Հանրապետության ներքին ահավոր կացության մասին շատ նկարագրություններ կան, սակայն դրանցից ոչ մեկն այնպես տպավորիչ չի ներկայացնում դաժան իրականությունը, ինչպիսին Ս. Վրացյանին է: Ուստի խոսքը տանք նրան՝ համոզված, որ մեջբերման երկարաշունչ լինելը չի թուլացնի ունկնդրի կամ ընթերցողի ուշադրությունը. «Արտակարգ դժվար պարտականություն էր դնում պատմությունը Հայաստանի գործիչների վրա: Իսկապես որ, «անձն քառսի և ավերակների կույտ էր» (Հ. Քաջազնունու ծրագրային ելույթի բառերն են — Ս. Վ.) Հայաստանն այդ օրերին: Եվ սարսափելիս այն էր, որ չէր երևում ոչ մի հեռանկար... Դրսից պաշտպանություն, ապրուստի

միջոց, դրամական օժանդակություն չէր գալիս: Ինչ որ արվելու էր՝ պետք էր անել սեփական ուժերով:

Հայաստանը, ավելի շուտ, գաղթականական կայան էր. ամբողջ երկրում շուրջ 450.000 գաղթական էր թափված, որից մոտ 40.000-ը՝ Երևանում, շատերը՝ փողոցների և ավերակ շենքերի մեջ: Հաց չէր ճարվում, ժողովուրդն ապրում էր ինչպես կարող էր...

Սարսափելի էր որբերի վիճակը: Երևանի «Ձանգ» թերթը գրում էր օգոստոսի 3-ին. «Տասնյակ հազարավոր որբեր այսօր ցրված Հայաստանի Հանրապետության սահմաններում, մոռացված ամենքից՝ ենթակա են ցրտի, քաղցի և համաճարակ հիվանդությունների... Մահացողներին վերջ չկա. մեռնում են ամենքը և ամենուրեք, գյուղերում թե քաղաքներում, բացօթյա ամենքի աչքի առաջ»:

Հացի, բնակարանների, հագուստի և դեղերի պակասն ու գաղթականության խոնավածությունը առաջ բերին ու զարգացրին համաճարակ հիվանդություններ, սկզբում՝ խոլերան, ապա՝ բժավոր տիֆը, որի գերանդին առատ իռնձ էր անում ամեն կողմ: Տուն չկար, որ հիվանդ չունենար: Հիվանդները թափվում էին և փողոցներում ու հրապարակներում... Հապճեպով պատրաստված հիվանդանոցներն անզոր էին իրական դարձան հասցնելու, դեղ չկար, վառելիք չկար, սնունդ չկար, սպիտակեղեն չկար: Եվ մարդիկ մեռնում էին անմռունչ, հարյուրներով, հազարներով: Ժողովուրդը սպառվում էր վառվող մոմի պես:

Սովի ու համաճարակի հետ երկրում խախտված էր և ապահովությունը: Դասալիք գինվորներ, ապրուստի միջոց չունեցող գաղթականներ ու տեղացիներ, խմբերով և անհատ-անհատ, հարձակվում էին ճամփորդների վրա, թալանում տները, խանգարում հանրային անդորրությունը: Հասարակական չարիք էր դարձել, այսպես կոչված «մաուզերիզմը»՝ մաուզերով գինված մարդիկ շահատակություններ էին անում նույնիսկ մայրաքաղաքի փողոցներում, և խաղաղ բնակչությունը տառապում էր նրանց ձեռքին...

Վեց ամսվա ընթացքում, սովից ու հիվանդություններից Հայաստանում մեռավ 180.000 մարդ» (Ս. Վ., էջ 199-200):

Հայաստանի խորհրդի և կառավարության առաջին գործը եղավ ձևավորել պետական ապարատը: Վերակազմվեցին բանակն ու վարչական հիմնարկները, կանոնավորվեց գինվորական և պետական ծառայողների ռոճիկը, միջոցներ ձեռնարկվեցին դատարանների և դպրոցների բացման ուղղությամբ: Խոշոր գումարներ հատկացվեցին գաղթականների ու որբերի խնամատարության, պարենամթերքի հայթայթման համար:

Մինչև սեփական օրենսդրության ընդունումը Հայաստանի Հանրապետության սահմաններում գործողության մեջ դրվեցին նախկին ռուսական օրենքները:

1918 թ. օգոստոսի 29-ին հրապարակվեց օրենք մասնավոր զենքի ու զինամթերքի պետականացման մասին:

Սեպտեմբերի 11-ին բամբակի առևտուրը հայտարարվեց կառավարության մենաշնորհ՝ որոշակի գնով, և պետականացվեց ամբողջ երկրի բամբակը: Իսկ այդ օրերին բամբակի առևտուրը կառավարության եկամտի միակ աղբյուրն էր:

Նույն օրը հաստատվեց դպրոցական օրենքը, որով յուրաքանչյուր հասարակական, համայնքային կազմակերպության և առանձին անհատների իրավունք էր տրվում անարգել դպրոց բացել և այն պահել սեփական միջոցներով, իսկ պետությանը վերապահվում էր ընդհանուր վերահսկողության իրավունքը:

Սեպտեմբերի 28-ին ընդունվեց կարիքավոր գաղթականներին հողով, աշխատանքով կամ պետական նպաստով ապահովելու օրենքը: Եվ հոկտեմբերի 8-ին որոշվեց գաղթական կանանց համար բացել պետական ջուլհականոցներ՝ գործի դնելով 1500 դազգահ և 20.000 ճախարակ, բաց թողնվեց 7 միլիոն ռուբլի: Հոկտեմբերի 11-ի օրենքով գաղթականների կարիքների համար տրամադրվեց 13 միլիոն ռուբլի: Ձեռնարկվեցին նաև այլ հրատապ միջոցառումներ:

1918 թ. նոյեմբերի 4-ին Հովհ. Քաջագունու վարչապետությամբ կազմվեց նոր՝ կոալիցիոն կառավարություն, որտեղ դաշնակցականների հետ միասին նախարարական պորտֆելներ ստացան 5 ժողովրդականներ՝ Ա. Էնֆիաջյան՝ ելևժտական (Խ. Կարճիկյանը դարձավ խնամատարության նախարար — Ս. Վ.), Ս. Հարությունյան՝ արդարադատության, Ս. Աթաբեկյան՝ հանրային կրթության, Լ. Ղուլյան՝ պարենավոր-

ման, Գ. Մելիք–Ղարազյոզյան՝ արտգործնախարար դաշնակցական Ս. Տիգրանյանի տեղակալ:

Նոյեմբերի 14–ին դաշնակցական սպա, ղուրդուղուլեցի Եզոր Տեր–Մինասյանը իր աշխատասենյակում սպանեց խնամատարության նախարար Խ. Կարծիկյանին՝ անհիմն մեղադրելով նրան Կարսի անկման համար:

ՀՀ ՍԱՀՄԱՆՆԵՐԻ ԸՆԴԱՐՉԱԿՈՒՄԸ

Առաջին համաշխարհային պատերազմում Թուրքիայի պարտությունից հետո՝ 1918 թ. հոկտեմբերի 30–ին, Լեմնոս կղզու Մուդրոս նավահանգստում կանգնած անգլիական «Ազամենոն» հածանավի վրա դաշնակիցների և Թուրքիայի սուլթանական կառավարության միջև ստորագրվեց զինադադար: Դաշնակիցների անունից զինադադարն ստորագրեց բրիտանական ծովակալ Քալթորփը, Թուրքիայի կողմից՝ Ռաուֆը, Հիքմեթը և Սաադուլլան: Այն բաղկացած էր 25 հոդվածներից: Ըստ զինադադարի պայմանների՝ թուրքական զորքերն անհապաղ զորացրվում և դուրս էին բերվում իրենց գրաված վայրերից, այդ թվում և 11–րդ հոդվածով՝ Անդրկովկասից (Հայաստանը... փաստաթղթերում, էջ 537–539): Հոդված 15–ով դաշնակիցներն օկուպացնում էին Բաքուն, իսկ հոդված 24–ով հայկական վիլայեթներից որևէ մեկում անկարգություններ ծագելու դեպքում դաշնակիցներն իրենց վերապահում էին նրա մի մասը գրավելու իրավունք:

Նոյեմբերի կեսերին Երևանում թուրքական ներկայացուցիչ Մեհմեդ Ալի փաշան ՀՀ զինվորական նախարարին հայտնեց, որ ինքը գլխավոր շտաբից հրաման է ստացել տեղեկացնել, որ վեց շաբաթվա ընթացքում թուրքական զորքերը կդատարկեն գրավված տարածքները:

Սկսվեց թուրքական զորքերի նահանջը և նրանց դատարկած տարածքների գրավումը հայկական զորքերի կողմից: 1918 թ. նոյեմբերի 18–ին հայկական զորքերը մտան կողոպտված ու ավերված Ղարաքիլիսա, ուր ամենուրեք թափված էին հազարավոր դիակներ:

Նոյեմբերի 22–ին թուրքերն սկսեցին դատարկել Ալեքսանդրապոլը: Դեկտեմբերի 4–ին հայկական զումարտակը մտավ Ալեքսանդրապոլ: Պատկերը նույնն էր՝ թուրքերը կողոպտել–տարել էին ամեն ինչ, բերող պայթեցրել էին, ամեն ինչ այրել, «այստեղից թուրքն էր անցել»:

1919 թ. մարտի 26–ին ՀՀ կառավարությունը Անդրկովկասում անգլիական զորքերի հրամանատար, գեներալ Թոմսոնին ներկայացրեց մի հուշագիր, որով պահանջում էր անհապաղ լուծել Ղարաբաղի, Շարուրի և Կարսի հարցերը: Կարսը այդ ժամանակ կառավարվում էր թուրքերի ստեղծած տեղական կառավարության՝ Շուրայի միջոցով: Անգլիացիները չէին ուզում գրգռել մահմեդականներին և արգելում էին, որ հայերը գրավեն Կարսը:

Սակայն 1919 թ. ապրիլից անգլիացիների քաղաքականությունը փոխվեց հոգուտ հայերի. որոշվեց հայ–անգլիական ուժերով գրավել Կարսը: Կարսի զինվորական նահանգապետ նշանակվեց գնդապետ Թեմբրլեյը, քաղաքացիական նահանգապետ՝ Ստ. Ղորղանյանը, հայկական զորամասի պետ՝ գեներալ Հովսեփյանը: Հայ–անգլիական զորքերը երկաթուղով և խճուղով շարժվեցին առաջ և, առանց դիմադրության հանդիպելու, ապրիլի 24–ին մտան Կարս: Անգլիացիները ձերբակալեցին Շուրայի ամրամներին, 150 թուրքերի և աքսորեցին Մալթա կղզի: Ապրիլի 28–ին անգլիացիները իշխանությունը լիովին փոխանցեցին հայերին: Մայիսի 2–ին հայերի ձեռքն անցավ Կարս–Սարիղամիշ երկաթուղին:

Մայիսի 9–ին հայկական զորքերը գրավեցին Սերդենեկը, մայիսի 13–ին առանց կռվի մտան Օլթի և Կաղզվան:

Առանց միջադեպերի տեղի ունեցավ նաև Նախիջևանի գրավումը, որի նահանգապետ նշանակվեց Գևորգ Վարշամյանը, զորքերի հրամանատար՝ Դրոն:

Մայիսի 3–ին Նախիջևանը հայտարարվեց Հայաստանին կցված: Նախիջևանցիները սկզբում հրաժարվեցին ճանաչել Հայաստանի իշխանությունը, սակայն ենթարկվեցին գեներալ Դևիի կտրուկ պահանջին: Մայիսի 20–ին հայկական զորքերը մտան Նախիջևան:

Մայիսի վերջին արդեն թուրքերի ազատած բոլոր շրջանները՝ Շիրակը, Կարսը, Կաղզվանը, Կողբը, Սարդարապատը, Սուրմալուն, Վեդի–բասարը բնակեցվեցին իրենց տները վերադարձած տասնյակ հազարավոր գաղթական հայերով:

ՀԱՅ-ՎՐԱՑԱԿԱՆ ՊԱՏԵՐԱԶՍԸ

Անկախությունից առաջ վրացիները բազմիցս հայտարարել էին, որ Ախալքալաքի գավառն ու Բորչալուի գավառի մեջ մտնող Լոռին համարում են հայկական տարածքներ, սակայն անկախությունից հետո հանկարծ պահանջեցին, որ դրանք մտնեն Վրաստանի մեջ՝ հիմնավորելով այդ պահանջը ռազմաստրատեգիական ու տնտեսական անհրաժեշտությամբ: Մինչ այդ, դեռևս թուրքերի առաջխաղացման ժամանակաշրջանում՝ 1918 թ. մայիսին, վրաց-գերմանական զորամասերը գրավել էին Բորչալուն՝ վստահեցնելով հայերին, որ դա արվում է պաշտպանական նպատակներով, և թուրքերի հեռանալուց հետո գրաված վայրերից կհեռանան մաս վրացական զորքերը: Սակայն դա տեղի չունեցավ, և վրացական կառավարությունը հայտարարեց Վրաստանի սահմանները՝ նրանց մեջ ներառելով վիճելի համարվող տարածքները: Հայաստանի կառավարությունը անմիջապես բողոքեց այդ հայտարարության դեմ:

Վիճակն ավելի սրվեց, երբ 1918 թ. հոկտեմբերին թուրքերն սկսեցին դատարկել Լոռի-Փամբակի շրջանը, իսկ Դրոյի գլխավորած հայկական զորքերը զբաղեցրին այդ տարածքները: Վրացական կառավարությունը հայերի այդ քայլը համարեց ապօրինի և հոկտեմբերի 19-ին Վրաստանում Հայաստանի ներկայացուցիչ Ա. Ջամալյանին բողոք ներկայացրեց: Հաջորդ օրը Սանահինում կանգնած վրացական զրահագնացքի հրամանատար Գոգուաձեն վերջնագրով պահանջեց հայկական զորամասերից՝ հեռանալ Լոռիից և այն Շահալիով հանդերձ հանձնել վրացիներին: Նրանք իրենց պահանջը հիմնավորում էին նրանով, որ Լոռին մտնում է Թիֆլիսի նահանգի մեջ, որն անվիճելիորեն վրացական հող է: Այդ հարցում Վրաստանին բացահայտորեն հովանավորում էր Գերմանիան:

Վրացիների վերջնագիրը մեծագույն վրդովմունքով ընդունվեց Երևանում, և ՀՀ կառավարությունը որոշեց չընդունել վերջնագիրը, չհանձնել Շահալի կայարանը և հարկ եղած դեպքում ցույց տալ զինված դիմադրություն: Հայաստանի Խորհուրդը հավանություն տվեց կառավարության քաղաքականությանը տվյալ հարցում:

Հոկտեմբերի 23-ին վրացական զրահագնացքը ռմբակոծեց Շնող գյուղը և հասավ մինչև Այրում:

Բացի դրանից, ինչպես նկատում է Ս. Վրացյանը, վրացիները կարծես դիտմամբ խնդիրներ էին ստեղծում, վիրավորում էին հայերի արժանապատվությունը, խոչընդոտում հաղորդակցությանը դրսի հետ, փակում ճանապարհները հայերի առջև: Սուվի և հիվանդությունների ճիւղաններում գալարվող Հայաստանի համար նման վերաբերմունքը գնահատվում էր իբրև տմարդի ու թշնամական: Օրինակ՝ վրացիները բռնագրավեցին Բաքվում գնված և Հայաստան տեղափոխվող 40 ցիստեռն նավթն ու 9 ցիստեռն բենզինը: Վրացի զինվորները շահատակություններ էին անում հայկական Շուլավեր, Ուզունլար և այլ գյուղերում (Ս. Վ., էջ 222-224):

1918 թ. դեկտեմբերի 5-ին վրացական զորքերը, օգտվելով թուրքերի հեռանալուց, գրավեցին Ախալքալաքի գավառը և այն հայտարարեցին Վրաստանին միացված: ՀՀ բողոքներն ապարդյուն անցան:

1918 թ. դեկտեմբերի 13-ին բռնկվեց հայ-վրացական պատերազմը: ՀՀ կառավարությունը հրամայեց Դիլիջան-Լոռու զորամասի հրամանատար Դրոյին՝ մաքրել Լոռին վրացական զորքերից, և հաջորդ օրը զորամասն առաջ շարժվեց Վորոնցովկա-Պրիվոլնոյե-Այրում գծով: Ջորամասի աջ թևում փոխգնդապետ Կորոլկովի ուժերն էին, կենտրոնում փոխգնդապետ Նեստերովսկին էր, ձախ թևում՝ գնդապետ Տեր-Նիկողոսյանը, պահեստային ուժերի հրամանատարն էր գնդապետ Միրիմանյանը, ընդհանուր առմամբ 28 վաշտ, 26 գնդացիր, 7 լեռնային թնդանոթ, 4 հեծյալ հարյուրյակ:

Պատերազմի առաջին իսկ օրը գնդապետ Տեր-Նիկողոսյանի զորամասը գիշերային գրոհով գրավեց Վորոնցովկան, Պրիվոլնոյեն և Միխայլովկան: Գնդապետ Նեստերովսկու զորամասը գրավեց Սանահին կայարանը: Այրումի կողմից Կորոլկովի զորամասը կտրեց վրացական զրահագնացքների նահանգի ճանապարհը և պայթեցրեց դրանցից մեկը: Ռոտմիստր Փիրումյանի հարյուրյակը գրավեց Լավվար սարը:

Դեկտեմբերի 14-15-ին հայկական զորքերի ճնշման տակ վրացական զորքերը թողեցին Ալավերդին, իսկ դեկտեմբերի 16-ին Կորոլկովը գրավեց Այրումը: Դեկտեմբերի 17-ին Ախթալա կայարանի մոտ հայկական ուժերը գրավեցին 2 զրահագնացք և դրանք ուղղեցին վրացիների դեմ: Վրացական զորքերի հրամանատար գեներալ Շուլուկիձեն փախուստի դիմեց՝ հայերին թողնելով իր սալոն-վագոնը:

Կորուկովի ջոկատը մոտեցավ Սադախլուին, իսկ դեկտեմբերի 18-ին Տեր-Նիկողոսյանը գրավեց Բուճիս-հաչեներ: Կռիվներն ընթացան էին ձյան, ցրտի, հագուստի ու սննդի պակասի պայմաններում:

Դեկտեմբերի 19-ի երեկոյան Ֆիերկովսկու վաշտը և Տեր-Մարտիրոսյանի հեծյալ հարյուրյակը գրավեցին Սադախլուն: Վրացիները սպիտակ դրոշ բարձրացրին: Բայց այդ, պահին մոտեցավ վրացական զրահագնացքը, և հայկական ուժերը շրջապատման մեջ ընկան, իսկ Ֆիերկովսկին ու Տեր-Մարտիրոսյանը գերի ընկան:

Դեկտեմբերի 20-ին Կուռո Թարխանյանի հարյուրյակը գրավեց Շուլավերը: Շուլավեր-Սադախլուի շրջանում ծավալվեցին թե՛ մարտեր: Դեկտեմբերի 23-ին հայկական ուժերը Ասլանյանի հրամանատարությամբ վերագրավեցին Սադախլուն և ձեռք գցեցին մեծաքանակ ռազմավար, 100 վազոն պարեն: Գեներալ Շուլուկիձեի զորախումբը գլխովին ջախջախվեց, ինքն էլ փախավ: Նրան փոխարինեց գեներալ Մազմիկը: Հարձակումներն ու հակահարձակումները իրար հաջորդեցին մինչև դեկտեմբերի 28-ը:

Հակամարտությանը միջամտեցին անգլիական գեներալ Ռայկրոֆտը, ֆրանսիական գնդապետ Շարդինյին, որոնք վրացիներին ու հայերին հարկադրեցին դեկտեմբերի 28-ին ստորագրել համաձայնագիր՝ դեկտեմբերի 31-ի գիշերվա ժամը 12-ին պատերազմական գործողությունները դադարեցնելու մասին:

Դեկտեմբերի 31-ի առավոտյան Սադախլուի շրջանում սկսվեց ուժեղ ճակատամարտ, որտեղ վրացիները կենտրոնացրել էին մոտ 3,5 հազար զինվոր՝ 12 թնդանոթով: Գակատամարտը դեռ չէր ավարտվել, երբ հասավ պայմանաժամը՝ ժամը 12-ը, և կողմերը կանգ առան իրենց գրաված դիրքերում: Հայ-վրացական պատերազմն ավարտվեց, և դժվար էր ասել, թե ով հաղթեց այդ պատերազմում: Պատերազմը մեծ չարիք պատճառեց երկու կողմերին էլ (Ս. Վ., էջ 248):

1918 թ. հունվարի կեսերին Թիֆլիսում բացվեց հայ-վրացական հաշտության խորհրդաժողովը, որը տևեց երկար՝ երեք ամիս: Մշակվեց Լոռու չեզոք գոտու վարչության կանոնագիրը: Չեզոք գոտին կառավարվելու էր անգլիացի ընդհանուր նահանգապետի կողմից, որն ունենալու էր մեկ վրացի և մեկ հայ տեղակալներ: Ստորագրվեց նաև փոստ-հեռագրական համաձայնություն, վերականգնվեց երկաթուղային հաղորդակցությունը, կողմերը փոխադարձաբար ճանաչեցին մի-

մյանց ակախությունը: Այդպիսով հայ-վրացական հարաբերությունները կանոնավորվեցին:

ՄԱՐԴԱՍԻՐԱԿԱՆ ՕԳՆՈՒԹՅՈՒՆ ՀՀ-ԻՆ

1919 թ. սկզբներին ՀՀ ներքին վիճակը շարունակում էր մնալ չափազանց ծանր. սովն ու համաճարակները, մանավանդ բժավոր տիֆը շարունակում էին իրենց «հունձքը», որոնք օրական հարյուրավոր կյանքեր էին խլում: Առաջին հինգ ամիսների ընթացքում երևանում, որի բնակչությունն այդ ժամանակ մոտ 60.000 էր, մեռավ մոտ 4000 մարդ: 1919 թ. հունվարի 26-ի 40-օրյա տառապանքներից հետո բժավոր տիֆին զոհ գնաց Արամ Մանուկյանը, նաև ուրիշ պաշտոնյաներ: Հատկապես սոսկալի էր գահթականների վիճակը, որոնք տառապում էին սովի ճիրաններում: Գյուղերի մեծ մասը կանաչով էին կերակրվում: Մայիսին հացաբաժինը երևանում իջեցվեց 100 գրամի:

1919 թ. փետրվարի 4-ին Հայաստանի խորհուրդը որոշեց օգնություն խնդրել Եվրոպայից և ԱՄՆ-ից: Եվ օգնությունը չուշացավ: Այդ նպատակով Հայաստան եկավ ԱՄՆ-ի պարենավորման միսիստր Հուլվերը՝ իբրև նպաստամատույցի տնօրեն: «Ինչ էլ լինի մեր վերաբերումը դեպի Ամերիկայի քաղաքական դերը հայկական խնդրում,— գրում է Ս. Վրացյանը,— ամերիկյան մարդասիրական նպաստն ու պարենը երբեք չենք մոռանա, չպետք է մոռանանք» (Ս. Վ., էջ 254-256): 1919 թ. մայիսի 20-ին Բաթում հասավ ամերիկյան առաջին նավը՝ բեռնված 125 հազար փութ ալյուրով (1 փութը հավասար է 16 կիլոգրամի — Ս. Վ.), իսկ մեկ շաբաթ անց եկավ երկրորդ նավը՝ 600.000 փութ ալյուրով: Տարվա ընթացքում Հայաստանն Ամերիկայից ստացավ 1.295.243 փութ ալյուր, 256.758 փութ ցորեն, 125.000 փութ լոբի, 68.563 փութ բրինձ, 20.000 փութ կորեկ, 8.010 փութ եգիպտացորեն, 10.738 փութ վարսակ, 5.950.000 տոփ խտացրած կաթ, 12.000 փութ կակաո, 44.000 փութ շաքար, 5.000 փութ ճարպ, 1.500 փութ թեյ: Պայմանագրի համաձայն՝ 1920 թ. սկզբին գալու էր ևս 2.170.000 փութ ալյուր (Ս. Վ., նույն տեղում): Այդ ամենը Հայաստան հասցվեց մեծ դժվարություններով:

Արևմտահայերի երկրորդ համագումարը ՀՀ ներքին կյանքի կարևորագույն իրադարձություններից մեկն էր, որը տեղի ունեցավ Երևանում 1919 թ. փետրվարի 6–13–ին: Համագումարին մասնակցում էին 55 պատգամավորներ, որոնք ընտրվել էին տարբեր շրջանների արևմտահայ գաղթականների կողմից: Հրավիրված էին նաև Ամենայն հայոց կաթողիկոսը, Անդրանիկը և ուրիշներ: Կաթողիկոսն ուղարկեց Գևորգ եպ. Չորեքչյանին, իսկ Անդրանիկը հրաժարվեց մասնակցել: Նախագահում էր Գրիգոր Բուլղարացին: Փետրվարի 13–ի նիստում գաղտնի քվեարկությամբ ընտրվեց «Արարատյան հանրապետության մեջ ապրող արևմտահայ հատվածի Գործադիր մարմին» բաղկացած 9 հոգուց. Սմբատ Բորոյան, Կ. Սասունի, Գր. Բուլղարացի, Արսեն Կիտուր և ուրիշներ: Փաստորեն ՀՀ կառավարության կողքին ստեղծվում էր մի նոր կառավարություն:

Գործադիր մարմինը մի շարք ժողովներում քննարկեց համագումարի որոշումը՝ «Միացյալ և Անկախ Հայաստան» մեկ հայրենիք» ունենալու մասին որոշումը և եկավ այն եզրակացության, որ անհրաժեշտ է օր առաջ հայտարարել Հայաստանի երկու հատվածների միացումը և այդ մասին պաշտոնապես դիմեց ՀՀ կառավարությանը:

Փետրվարի 25–ին կառավարությունը քննության առավ Գործադիր մարմնի դիմումը և միաձայնությամբ համաձայնվելով առաջարկին՝ հանձնարարեց արտաքին գործերի նախարարին՝ պատրաստել զեկուցագիր՝ Հայաստանի խորհուրդ մտցնելու համար:

1919 թ. մայիսի 28–ին Հայաստանի խորհրդի հանդիսավոր նիստում կատարվեց Միացյալ և Անկախ Հայաստանի հռչակումը: Այդ առթիվ Երևանում տեղի ունեցավ համաժողովրդական տոնակատարություն և գորահանդես, շքերթ:

Վարչապետ Ա. Խատիսյանը հայտարարեց, որ Միացյալ Հայաստանի պետական ձևը դեմոկրատական հանրապետությունն է և ինքը հանդիսանում է Միացյալ Հայաստանի կառավարությունը: Տրվեց հրետանային 30 համազարկ:

1919 թ. մարտի 12–ին ՀՀ կառավարությունը որոշում ընդունեց խորհրդարանի ընտրություններ անցկացնելու մասին, որի հիման վրա մշակվեց «Օրենք Հայաստանի խորհրդարանի ընտրությունների մասին»: Քսան տարին լրացած յուրաքանչյուր քաղաքացի, առանց սեռի, կրոնի և ազգության խտրության, իրավունք ուներ մասնակցելու ընտրություններին: Ընտրությունը պիտի կատարվեր ընդհանուր, գաղտնի, հավասար և ուղղակի քվեարկությամբ: Խորհրդարանում պետք է ընտրվեր 80 պատգամավոր: Ստեղծվեցին կենտրոնական, գավառական, շրջանային, քաղաքային, գյուղական և թաղամասային ընտրական հանձնաժողովներ: Ընտրություններին պետք է մասնակցեին 365.780 ընտրողներ:

Ընտրություններն անցկացվեցին 1919 թ. հունիսի 21–23–ին: Ընտրությունների արդյունքը հետևյալն էր՝ դաշնակցություն՝ 72 պատգամավոր, սոցիալիստ–հեղափոխականներ (լեւոներ)՝ 4, թուրքեր՝ 3, անկուսակցական՝ 1, ընդամենը 80 պատգամավոր:

Նորընտիր խորհրդարանի բացումը տեղի ունեցավ 1919 թ. օգոստոսի 1–ին:

Բացումը կրկին կատարեց խորհրդարանի ավագագույն անդամ Ավետիք Սահակյանը, որն ընդգծեց, որ սահմանների ընդլայնման վերաբերյալ ուղիղ մեկ տարի առաջ արած իր կանխատեսումն իրականացել է:

Խորհրդարանի երրորդ նիստում 40 քվեով՝ ընդդեմ 8–ի, վարչապետ ընտրվեց Ալեքսանդր Խատիսյանը: Կազմվեցին խորհրդարանական 12 հանձնաժողովներ: Խորհրդարանը նիստեր պիտի գումարեր շաբաթը 2 անգամ՝ երկուշաբթի և ուրբաթ օրերը:

Օգոստոսի 10–ի նիստում հայտարարվեց նոր կառավարության կազմը՝ վարչապետ և արտաքին գործերի նախարար՝ Ա. Խատիսյան, ներքին գործերի և արդարադատության՝ Ա. Գյուլխանդանյան, պարենավորման և ֆինանսների՝ Ս. Արարատյան, խնամատարության և աշխատանքի՝ Ավ. Սահակյան, հանրային կրթության և արվեստի՝ Նիկոլ Աղբալյան, զինվորական՝ զեներալ Ք. Արարատյան: Կազմը հաստատվեց 37 կողմ, 2 դեմով, որից հետո Ա. Խատիսյանը հրապարակեց կառավարության ծրագիրը: Նա ներկայացրեց երկրի ներքին ու արտաքին բարդ դրությունը, թուրք–ադրբեջանական դավերը, պարենային և ֆինանսական անկայուն վիճակը, հայկական հարցի ընթացքը Հաշտության կոն-

Ֆերանսում, մանրամասնորեն կանգ առավ հետագա անելիքների վրա. սահմանել պետական վարկեր, պետական օգնություն կազմակերպել տարերային աղետներից տուժած աշխատավոր դասակարգին, ամեն կերպ խրախուսել մասնավոր կապիտալի մուտքը երկիր, կարգավորել հարկային համակարգը՝ կիրառելով եկամտային հարկի պրոգրեսիվ համակարգը, ուժեղացնել ուղղակի հարկերը ի հաշիվ անուղղակի հարկերի, ձեռք բերել արտաքին փոխառություններ, արագացնել սեփական դրամ ունենալը, հրապարակել ազատ բանվորական օրենսդրություն, հիմնել աշխատանքի բորսաներ, պայքարել գործազրկության դեմ:

ժողովրդական լուսավորության բնագավառում սկզբունքը պիտի լինի ընդհանուր, պարտադիր, ծրի տարրական կրթություն, զարկ տալ պրոֆեսիոնալ կրթությանը:

Արտաքին քաղաքականության հիմքում ընկած պիտի լինի հավատը դեպի դաշնակից պետությունները, հարևան պետությունների հետ բարեկամական փոխհարաբերությունների ստեղծումը, սահմանների կարգավորումը, բացառել զենքի ուժով սահմանային վեճերի լուծումը:

Յողային հարցում կառավարությունը պիտի իրականացնի կալվածատիրական, վանքապատկան և մասնավոր բոլոր հողերի ազգայնացումը և դրա բաժանումը սակավահող գյուղացիությանը՝ ըստ կարիքի: Արդարադատության բնագավառում՝ հասնել ընտրովի դատարանների ստեղծման:

Պաշտպանության բնագավառում՝ պարտադիր զինծառայություն, ժողովրդական միլիցիայի ստեղծում, զորքի ազգայնացում (Ա. Վ., էջ 296–298):

1920 թ. հունվարի 19–ին դաշնակից երկրների Գերագույն խորհուրդը ճանաչեց Հայաստանի Հանրապետության դե ֆակտո գոյությունը:

ՂԱՐԱՓՎՈՒ ՀԱՐՑԸ 1918–1920 ԹԹ.

Արցախը երբեք և ոչ մի դեպքում չի եղել ադրբեջանական հող:

1813 թ. Արցախը մտավ Ռուսաստանի կազմի մեջ, իսկ 1867 թ. ստեղծվեց Ելիզավետպոլի նահանգը, որի մեջ էին Արցախը և Ջանգեզուրը:

1918 թ. երեք հանրապետությունների ստեղծումից հետո Թուրքիան ստիպեց ՀՀ կառավարությանը՝ ամբողջ նախկին Ելիզավետպոլի նահանգը ճանաչել մուսավաթական Ադրբեջանի տիրապետություն և Ջանգեզուրը, Արցախը և Գանձակի հայկական գավառները՝ 300 հազար հայ բնակչությամբ, հայտարարվեցին Ադրբեջանի մաս:

1918 թ. հուլիսի 22–26–ին Շուշիում անցկացվեց Ղարաբաղի հայության Առաջին համագումարը՝ յուրաքանչյուր գյուղից մեկական պատգամավոր: Մինչև 1920 թ. մայիսի վերջը հրավիրվեց այդպիսի 9 համագումար ևս:

Առաջին համագումարը Լեռնային Ղարաբաղը հայտարարեց անկախ վարչաքաղաքական միավոր, ընտրեց Ղարաբաղի հայոց Ազգային խորհուրդ և մերժեց Ադրբեջանին ենթարկվելու պահանջը:

1918 թ. Բաքվի կոմունայի անկումից հետո (սեպտեմբերի 15) Արցախի վիճակը ծանրացավ, այն կտրվեց Բաքվից ու Ջանգեզուրից: Դեռևս 1918 թ. օգոստոսին Էնվերի եղբայր Նուրի փաշան գրավոր պահանջեց ընդունել, որ Ղարաբաղը Ադրբեջանի անջակտելի մասն է:

1918 թ. սեպտեմբերին հրավիրվեցին համաղարաբաղյան 2–րդ և 3–րդ համագումարները, որոնք մերժեցին այդ պահանջը: Թուրքերը և մուսավաթականները ամեն կողմից շրջապատեցին Ղարաբաղը:

Ղարաբաղի գավառներում ստեղծվեցին գորակայաններ և նշանակվեցին հրամանատարներ: Ջորակոչվեց 3.000 մարդ: Սեպտեմբերի 22–ին թուրքական բանակը մտավ Լեռնային Ղարաբաղ: Սկսվեց Ղարաբաղի հայ գյուղացիության փառապանծ հերոսապատումը թուրք–ադրբեջանական նվաճողների դեմ:

1918 թ. սեպտեմբերի 24–ին թուրքերը մտան Շուշի: Նրանք լուծարեցին Ղարաբաղի կառավարությունը, ձերբակալեցին 60 մտավորականներին, այդ թվում՝ Ղարաբաղի Ազգային խորհրդի նախագահ Եղիշե Իշխանյանին: Շուշին անձնատուր եղավ, բայց Արցախի գավառները մնացին անառիկ:

Թուրք–ադրբեջանական 400–անոց զորամասը հոկտեմբերի 17–ին գրավեց Վարանդայի Մսմնա գյուղը: Քյազիմ բեյի այդ ջոկատին ջարդելու գործը հանձնարարվեց Ասլանիկին՝ Ասլան Մուրադխանյանին: Ոտքի կանգնեցին Վարանդայի Ավետարանոց, Թաղավարդ, Ալմախ, ճարտար, Մաշադիշեն (Կոլխոզաշեն) և այլ գյուղերի գյուղացիները: Ասլանիկի մարտիկները փակեցին բոլոր ճանապարհները: Մսմնայի ճակատամարտն ընթացավ հոկտեմբերի 18–ի ամբողջ օրը և ավարտ-

վեց դարաբաղցիների փայլուն հաղթանակով: Թուրքերից փրկվեց 60 հոգի, մնացածը սպանվեցին: Թուրքերը 700-ամոց նոր ջոկատ ուղարկեցին Սամնա, բայց սրանք հետ չարտվեցին: Դրանից հետո թուրք-աղրբեջանական ուժերը թողեցին Ղարաբաղը: 1919 թ. Ասլանիկը զոհվեց դավադիր գնդակից:

1918 թ.՝ առաջին աշխարհամարտի ավարտից հետո, Անդրկովկասում թուրքերին փոխարինեցին անգլիացիները, Բաքու եկան Անտանտի ներկայացուցիչները: Բաքվի զեներալ-նահանգապետ նշանակվեց անգլիական զեներալ Թոմսոնը: Մուսավաթը նրան տվեց 4500 զորք՝ Ռուսաստանի դեմ: Անդրկովկասում Անգլիան ուներ 30.000 զորք: Անգլիացիները նույնպես պահանջեցին Ղարաբաղի հայությունից՝ ճանաչել Աղրբեջանի իշխանությունը:

1918 թ. նոյեմբերի 16-ին Անդրանիկը արցախցիների խնդրանքով շարժվեց դեպի Շուշի, անցավ Զաբուխը և հասավ Շուշիից 40 վերստի վրա գտնվող Ավդալլար գյուղը: Սակայն այստեղ նրան հասավ Թոմսոնի հեռագիրը՝ կանգնեցնել զորաշարժը և նրա պահանջով Անդրանիկը վերադարձավ Գորիս: Թոմսոնը սպառնում էր, որ հակառակ դեպքում Ղարաբաղի հարցը չի լուծվի Փարիզի կոնֆերանսում: Թոմսոնի երաշխավորությամբ 1919 թ. հունվարի 15-ին մուսավաթական խոսքով բեկ Սուլթանովը նշանակվեց Արցախի նահանգապետ: Երկու ամիս անց՝ ապրիլին, Թոմսոնին փոխարինեց գնդապետ Շատելվորդը, որը հայտարարեց, որ պաշտպանելու է Սուլթանովի բոլոր հրամանները:

1919 թ. փետրվարի 12-21-ին տեղի ունեցավ Արցախի հայության 4-րդ համագումարը, որը բողոքեց Սուլթանովին նշանակելու դեմ:

Աղրբեջանը ամեն կերպ ձգտում էր անգլիացիների օգնությամբ Անդրանիկին հեռացնել Զանգեզուրից, որը 1919-ի ապրիլի 2-ին Անգեղակոթից մեկնեց Էջմիածին:

1919 թ. ապրիլի 23-29-ին հրավիրվեց համաղարաբաղյան 5-րդ համագումարը: Նիստերից մեկին մասնակցեցին Շատելվորդը և Սուլթանովը: Բոլոր 48 պատգամավորները նորից անհողորդ մեթոդներով Աղրբեջանի իշխանությունը:

Հատկանշական է, որ 1919 թ. հունիսին բազմամարդ միտինգներ են տեղի ունենում Երևանում և Թիֆլիսում՝ ի պաշտպանություն արցախահայության: Հունիսի 16-ին մեծ միտինգ տեղի ունեցավ Երևանում, որտեղ ճառեր արտասանեցին Դավիթ Անանունը, Ա. Խոնդկարյանը, Դրոն: Հունիսի 22-ին Թիֆլիսում տեղի ունեցած միտինգը ղեկավարում

էր Հովհաննես Թումանյանը: Ընդունված բանաձևը պահանջում էր Ղարաբաղի միացումը Հայաստանին (Ս. Վ., էջ 335-336):

1919 թ. հունիսի 28-ին Շուշիից 4 վերստի վրա գտնվող Շոշ գյուղում Սուլթանովի հրավերով հավաքվեց Ղարաբաղի 6-րդ համագումարը: Օրակարգի հարցն էր Աղրբեջանի իշխանության ճանաչումը: Մշակվեց նախնական համաձայնության նախագիծ:

1919 թ. ամառվանից սկսվեց ժանր ժամանակաշրջան: Օգոստոսի 12-ին Շոշ գյուղում տեղի ունեցավ 7-րդ համագումարը, որը անգլիացիների ճնշմամբ որոշում ընդունեց ժամանակավոր համաձայնության գալ Աղրբեջանի կառավարության հետ, մինչև Փարիզի կոնֆերանսը կվճռեր Արցախը Հայաստանի հետ վերամիավորելու հարցը: Ստորագրված համաձայնագիրը բաղկացած էր 26 կետից (լրիվ տեքստը տե՛ս Ս. Վրացյան, էջ 339-341):

1919 թ. նոյեմբերի 23-ին Թիֆլիսում Հայաստանի և Աղրբեջանի միջև ստորագրվեց համաձայնագիր, որով ռազմական գործողությունները դադարեցվեցին:

1920 թ. փետրվարի 28-ից մարտի 5-ը Վարանդայի Շոշ գյուղում տեղի ունեցավ Ղարաբաղի 8-րդ համագումարը, որտեղ նորից մերժվեց Աղրբեջանին ենթարկվելու անարդար պահանջը և հարց դրվեց մայր Հայաստանի հետ վերամիավորվելու օգտին:

Արցախի դեմ աղրբեջանական հարձակում սկսվեց 1920 թ. մարտի 22-ի երեկոյան: Մարտի 27-ին և 28-ին Քյաթուկ գյուղի կողմից թշնամու վրա է գրոհում Դալի Ղազարի 350-ամոց ջոկատը: Ասկերանի ուղղությամբ հայկական շտաբի պետն էր Հարություն Թումանյանը, որը վկայում է, որ այդ ուղղությամբ թշնամին ուներ 30 հազար զորք: Հայերը կռվում էին 300 կմ-ի վրա՝ սահմանի ամբողջ երկայնքով: Ապրիլի 2-ին Ասկերանի ճակատում կռիվները ամենաթեժն էին: Բայց ահա ապրիլի 3-ին թշնամին ճեղքեց ճակատը և շարժվեց դեպի Շուշի: Դալի Ղազարի ջոկատը նահանջեց, իսկ ինքը կռվեց մինչև վերջին փամփուշտը և վերջ տվեց կյանքին:

Խանքենդի ուղղությամբ գնդապետ Զ. Մեսյանի 400-ամոց ջոկատը գրավում է Խանքենդը, զինաթափում մուսավաթականներին:

Դիզակի ուղղությամբ հրամանատարն էր Հովակ Ստեփանյանը՝ 450 հոգով, որոնք կարողանում են ճանապարհ բացել դեպի Զանգեզուր:

Շուշիում Սուլթանովի ուժերը մարտի 23-ին հարձակվեցին քաղաքի հայկական թաղամասի վրա և հրդեհեցին այն: Կոտորվածների թիվը հասնում էր 10 հազարի:

ՀՀ կառավարությունը վճռեց անհապաղ օգնության հասնել Արցախին, Ձանգեզուրում գտնվող զորամասերին կարգադրեց մտնել Արցախ: 1920 թ. ապրիլի 17-ին Ձանգեզուրի կողմից Վարանդա մտան Դրոյի, Ղափանի կողմից Դիզակ՝ Նժդեհի զորամասերը: Ազատարարներին ընդունեցին ցնծությամբ: Եվ այսպես՝ երկար պայքարից ու տառապանքներից հետո Արցախը վերամիավորվեց մայր հայրենիքի հետ: Կազմվեց Արցախի ժամանակավոր կառավարություն:

1920 թ. ապրիլի 25-ին Վարանդայի Թաղավարդ գյուղում կայացած 9-րդ համագումարն ընդունեց հետևյալ որոշումը. 1. Չեղյալ հայտարարել 7-րդ համագումարի կողմից Ադրբեջանի կառավարության հետ կնքված ժամանակավոր համաձայնությունը: 2. Հռչակել Լեռնային Ղարաբաղի միացումը Հայաստանի Հանրապետությանը, որպես նրա անբաժան մաս: 3. Խնդրել ՀՀ Մոսկվայում գտնվող պատվիրակությանը՝ համագումարի որոշման մասին հայտնել Խ. Ռուսաստանի կառավարությանը:

Արցախի ժամանակավոր կառավարությունը որոշում է պաշտոնապես ընդունել ՀՀ դրոշը, զինանշանը, հիմնը, դրանը, ենթարկվել Ձանգեզուրի նահանգապետությանը:

1920 թ. ապրիլի 29-ին և 30-ին, Ադրբեջանի խորհրդայնացումից հետո, հեղկոմներ ստեղծվեցին Շուշիում, Կարյազինոյում, Աղդամում և այլուր: Կարմիր բանակը մոտենում էր Արցախի սահմաններին, և Սուլթանովը որոշեց դիմակավորվել, ապրիլի 29-ին նա ստեղծեց Ղարաբաղի հեղկոմ և իրեն հռչակեց նրա նախագահ:

Արցախահայերը Սուլթանովի դեմ հեռագրեր ուղարկեցին Լենինին, Ադրբեջանի հեղկոմի նախագահ Նարիմանովին: Մայիսի 14-ին Սուլթանովի հեղկոմը լուծարվեց, ինքը ձերբակալվեց և տարվեց Բաքու, սակայն ոչ թե պատժվեց, այլ ազատվեց և ապահով անցավ Պարսկաստան:

Ադրբեջանի խորհրդայնացմամբ մարդիկ սպասում էին, որ վերջ կտրվի զավթողական քաղաքականությանը Ձանգեզուրի և Արցախի նկատմամբ, սակայն այդպես չեղավ, պայքարը թևակոխեց նոր, ավելի դժվարին փուլ:

1920 թ. ապրիլի 30-ին Խ. Ադրբեջանի արտգործող կոմ Մ. Հուսեյնովը Հայաստանի կառավարությանը հղեց հետևյալ հեռագիրը.

«Ադրբեջանի Խ. Հանրապետության բ/գ կառավարությունը, հանձինս հեղկոմի, պահանջում է նախ՝ մաքրել ձեր զորքերից Ղարաբաղի և Ձանգեզուրի տարածքը, երրորդ՝ քաշվել դեպի ձեր սահմանները, երրորդ՝ դադարեցնել ազգամիջյան կոտորածները: Հակառակ դեպքում, ԱՍԽՀ հեղկոմը իրեն կհամարի ՀՀ-ն հետպատերազմական դրության մեջ: Վերջնագրի պատասխանի համար տրվում է երեք օր»: Մայիսի 1-ին ստացվում է երկրորդ հեռագիրը, որը ստորագրել էին Օրջոնիկիձեն, Կիրովը, Մեխնոշինը և Լևանդովսկին. «ՌԽՖՍՀ անունից Հայաստանի կառավարությանը առաջարկում ենք անհապաղ դադարեցնել ամեն տեսակի ռազմական գործողությունները Խ. Ադրբեջանի տարածքում և ձեր զորքերը դուրս բերել նրա սահմաններից: Դա պետք է կատարվի այս առաջարկությունն ստանալուց հետո՝ քսանչորս ժամվա ընթացքում: Հակառակ պարագայում այն կիրագործվի Ռուսաստանի Կարմիր բանակի ուժերով, և դրա հետևանքների համար ողջ պատասխանատվությունն ընկնում է Հայաստանի կառավարության վրա»: Սա նշանակում էր, որ Արցախն առանց այլևայլության համարվում էր ուրիշի տարածք: Հայաստանի կառավարությունն իր հերթին հեռագրով հայտնեց, որ Ադրբեջանի կառավարությունը ոտնահարում է Ղարաբաղի և Ձանգեզուրի աշխատավորների իրավունքներն ու կամքը:

1920 թ. մայիսի սկզբին 11-րդ Կարմիր բանակի 32-րդ հրաձգային դիվիզիայի զորամասերը եվլախից շարժվեցին դեպի Արցախ: Կարմիր բանակի պատվիրակությունը Սահակ Տեր-Գաբրիելյանի գլխավորությամբ հանդիպում ունեցավ Դրոյի հետ և կտրականապես պահանջեց հայկական զորամասերը դուրս բերել Արցախից:

Դրոն ստիպված էր մայիսի 25-ին թողնել Արցախը և վերադառնալ Գորիս: Հաջորդ օրը Թաղավարդում կայացած 10-րդ համագումարը Լեռնային Ղարաբաղը հայտարարեց խորհրդային, ստեղծեց հեղկոմ՝ Սաքո Համբարձումյանի նախագահությամբ:

1920 թ. օգոստոսի 10-ին՝ Սևրի պայմանագրի ստորագրման օրը, համաձայնագիր կնքվեց Խ. Ռուսաստանի և Հայաստանի Հանրապետության միջև, ըստ որի՝ խորհրդային զորքերը գրավեցին վիճելի տարածքները՝ Լեռնային Ղարաբաղը, Ձանգեզուրը և Նախիջևանը՝ մինչև դրանց հետագա ճակատագրի վերջնական լուծումը (մանրամասն տե՛ս Հրանտ Աբրահամյան, Արցախյան գոյամարտ, Երևան, 1991):

ԶԱՆԳԵԶՈՒՐԸ 1918–1920 ԹԹ.

Ցարական իշխանության օրոք Ջանգեզուրը կազմում էր Ելիզավետպոլի (Գանձակ) նահանգի մի գավառը՝ 6.743 քառակուսի վերստ տարածքով և 227 հազար բնակչությամբ, որից հայեր էին շուրջ 95 հազարը:

1917 թ. փետրվարյան հեղափոխությունից հետո Գանձակից անկախ կազմվեց Ղարաբաղ–Ջանգեզուր շրջանային գործադիր կոմիտե:

Բաթումի դաշնագրից հետո Անդրանիկի ջոկատը՝ 3000 հետևակ, 700 հեծյալ և շուրջ 20 հազար գաղթականներ, Նոր Բայազետի, Ղարալազյազի ու Ջուլֆայի վրայով անցան Խոյ՝ անգլիական զորքերին հանդիպելու նպատակով: Սակայն թուրքերի հետ կռվի բռնվելով՝ Անդրանիկը նահանջեց Ջուլֆա, ապա Նախիջևան:

1918 թ. հուլիսի վերջերին Անդրանիկը մտավ Ջանգեզուր և անցավ տեղի ինքնապաշտպանության գլուխ: Կռիվները թուրքերի դեմ տևեցին մինչև դեկտեմբեր: 1919 թ. ապրիլին Անդրանիկն անցավ Էջմիածին, որտեղ զենքերն ու ռազմամթերքը հանձնեց կաթողիկոսին, անցավ Թիֆլիս, որտեղից էլ մայիսի 6–ին մեկնեց արտասահման:

Թուրքերի պարտությունից հետո 1918 թ. դեկտեմբերի սկզբին ստեղծվեց Ջանգեզուրի Ազգային խորհուրդ՝ կազմված 9 անդամներից: Խորհրդի նախագահ ընտրվեց Մ. Պարոնյանը, նշանակվեցին շրջանային կոմիսարներ: Գորիսում ստեղծվեց շրջանային դատարան, 1919 թ. հայտարարվեց զորահավաք, ստեղծվեց տեղական զորամաս:

1919 թ. մարտի 6–ին Գորիս հասավ Հայաստանի Հանրապետության կառավարության նշանակած Ջանգեզուրի ընդհանուր կոմիսարը՝ փոխգնդապետ Արսեն Շահնազյանը: Մարտի 31–ին Գորիսում հրավիրվեց համազանգեզուրյան համագումար, որտեղ Ազգային խորհուրդը ներկայացրեց իր հրաժարականը: Նրա փոխարեն ընտրվեց Ջանգեզուր–Ղարաբաղի Շրջանային խորհուրդ: Կազմվեց նաև Ջինվորական խորհուրդ, գլխավոր շտաբ: Նշանակվեցին շրջանների զինվորական հրամանատարներ:

Գավառապետ նշանակվեց Ն. Հովսեփյանը, վարչապետ և ներքին գործերի վարիչ նշանակվեց Ա. Շիրինյանը, որը կազմեց վարչություն:

Այդ բոլոր միջոցառումները կատարվում էին պատերազմական պայմաններում: Մինչև նոյեմբերի վերջը թուրքերը բազմիցս նախահարձակ եղան, բայց ամեն անգամ չարաչար պարտություն կրեցին ու նահանջեցին: Երկուստեք կռիվներին մասնակցում էին մինչև 3.000 մարդ:

Հարկ է նշել, որ անգլիացիները վարում էին շեշտված թուրքամետ քաղաքականություն: Այսպես՝ 1919 թ. մայիսի 2–ին Շուշիից Գորիս եկավ անգլիական միսիայի պետ, մայրո Մակ Սեյզը: Նա զանգեզուրցիներից պահանջեց ճանաչել Ադրբեջանի իշխանությունը, որին տրվեց գրավոր կտրուկ մերժում (Ս. Վ., էջ 352):

Դրանից հետո Ադրբեջանի կառավարությունն սկսեց ուժեղ կենտրոնացնել Ջանգեզուրի շուրջը՝ գեներալ Ալի աղա Շիխլինսկու հրամանատարությամբ: Ղարաբաղի կողմից մոտեցան 3 հետևակ և 2 հեծյալ զնդեր, 12 թնդանոթ, 400 քրդեր, իսկ Շարուր–Նախիջևանի կողմից՝ ավելի քան 3000–անոց զորք: Ռազմական գործողություններից առաջ Խ. Սուլթանովը կոչ ուղղեց զանգեզուրցիներին՝ հաղորդելով հետևել Ղարաբաղցիների օրինակին և հոժարական ճանաչել Ադրբեջանի իշխանությունը: Կոչը, իհարկե, անուշադրության մատնվեց:

1919 թ. նոյեմբերի 1–ին ադրբեջանական զորքերը Ջաբուլից, Կարյազիճույի կողմից, Նախիջևանից ու Ղարալազյազից սկսեցին ընդհանուր հարձակում:

Վեց օր շարունակ Ջանգեզուրի լեռներում որոտում էին թնդանոթները, ճարճատում գնդացիները, պայթում էին հրացանային համազարկերը: Առաջին օրերին թշնամին գրավեց Խնածախ, Խոզնավար, Բայանդուր, Կոռնիձոր գյուղերն ու սպառնում էր Գորիսին:

Սակայն, նոյեմբերի 4–ին զանգեզուրցիները փոխգնդապետ Արսեն Շահնազյանի հրամանատարությամբ կանգնեցրին թշնամու առաջխաղացումը, անցան հուժկու հակազրոհի և նոյեմբերի 6–ին հարկադրեցին ադրբեջանական զորքերին՝ դիմել փախուստի: Թշնամին թողեց բազմաթիվ դիակներ, 150 զեռի, մեկ թնդանոթ, 20 գնդացի, հարուստ ավար, իսկ ադրբեջանական 2–րդ ծիավոր գունդը ամբողջովին ոչնչացվեց:

Այդ իրադարձություններից հետո գնդապետ Հասկելի փոխանորդ գնդապետ Ռեյը և բրիտանական ներկայացուցիչ Ուորդրոպը պահանջեցին Հայաստանի և Ադրբեջանի կառավարություններից՝ վերջ տալ արյունահեղությանը և փոխադարձ համաձայնությամբ լուծել Ջանգեզուրի հարցը:

1919 թ. նոյեմբերի 20–ին գնդապետ Ռեյի առանձնասենյակում տեղի ունեցավ վարչապետներ Ա. Նատիսյանի և Ուսուպեկովի հանդիպումը: Ստորագրվեց 5 կետից բաղկացած համաձայնագիր, ըստ որի գործողությունները դադարեցվում էին:

Սակայն նոյեմբերի վերջերին Ջանգեզուր հասավ Երևանից ուղարկված Գաբեգին Նժդեհը, որի գլխավորությամբ դափանցիները ադրբեջանցիներից մաքրեցին Ողջի գետի շրջանը, ինչպես նաև Գեղվածորի 40 ադրբեջանաբնակ գյուղեր:

ՀՀ ՆԵՐՔԻՆ ԿՅԱՆՔԻ ԱՄՐԱՊՆՈՒՄԸ

ՀՀ կառավարության անհավատալի ճիգերը, չնայած աննկարագրելի ծանր պայմաններին, հանգեցրին նրան, որ 1919 թվականի ամռանն արդեն Հայաստանը կազմակերպված պետություն էր: Երկիրը բաժանված էր 10 գավառների, որոնցից յուրաքանչյուրն ուներ վարչություն և դատական իշխանություն՝ հաշտարար դատարաններ: Երևանում կար շրջանային դատարան, դատաստանական պալատ, Սենատ: Մայիսի 28-ին Ղանաբլու (ներկայիս Արտաշատ), Վաղարշապատ (ներկայիս Էջմիածին), Աշտարակ, Իգդիր, Կողբ, Ղարաքիլիսա (ներկայիս՝ Վանաձոր), Ջալալօղլի (ներկայիս՝ Ստեփանավան) և Դիլիջան գյուղերին տրվեց քաղաքի կարգավիճակ:

Երկրի կառավարումը կատարելագործելու նպատակով 1919 թ. մայիսի 25-ին Երևանում գումարվեց գավառապետերի համագումար, որին մասնակցում էին Երևանի, Էջմիածնի, Ղարաբաղյազի, Նոր Բայազետի, Դիլիջանի, Ղարաքիլիսայի, Ալեքսանդրապոլի, Կարսի, Ջանգեզուրի, Սուրմալուի գավառապետերը: Համագումարին մասնակցում էին նաև Հայաստանի խորհրդի, կառավարության անդամներ: Օրակարգի հարցերն էին՝ երկրի վարչական սահմանների ճշգրտումը, մասնագետ ուստիկանների պատրաստումը և ուստիկանական դպրոցի բացումը, պետական պաշտոնյաների և ուստիկանների տնտեսական վիճակի բարելավումը, ուստիկանների համագգեստի խնդիրը և այլն: Համագումարի աշխատանքները ղեկավարում էր ներքին գործերի նախարարի տեղակալ Ս. Մանասյանը, որը մեծ գործ կատարեց երկրի ներքին կյանքի կազմակերպման ու զարգացման բնագավառում:

Կառավարությունը միջոցառումներ ձեռնարկեց պետական հիմնարկներն աստիճանաբար հայացնելու ուղղությամբ: 1919 թ. ապրիլի 17-ին Երևանի քաղաքապետարանում տեղի ունեցավ հայկական թերթերի ներկայացուցիչների ժողովը: Ժողովը որոշեց կոչ ուղղել պետական, հասարակական և մասնավոր հիմնարկություններին՝ խոսել ու

գրել հայերեն, մերժել ոչ հայերենով նյութերի ընդունումը, պահանջել հայոց լեզվի պաշտոնականացում, ստեղծել հայացման կոմիտե:

Գրագրությունները հայերեն վարելու և հիմնարկներում հայերեն խոսելու վերաբերյալ Ս. Մանասյանը գավառներ ուղարկեց հատուկ շրջաբերական:

1919 թ. դեկտեմբերի 26-ին ընդունվեց հատուկ օրենք, որով հայերենը հայտարարվեց պետական լեզու:

Մի շարք կարևոր միջոցառումներ ձեռնարկվեցին երկրի վերաշինության և տնտեսության բարեկարգման ուղղությամբ: Այսպես՝ 1919 թ. ապրիլ-մայիս ամիսներին բանակցություններ ընթացան Անդրկովկասի ջրային գործի անվանի մասնագետ Ս. Ջավախիշինի հետ և նրան հանձնարարվեց Հայաստանի ջրային պաշարների ու ոռոգման ուսումնասիրումը, այդ նպատակով հատկացվեց 4 միլիոն ռուբլի: Ս. Ջավախիշինը աշխատանքի հրավիրեց շուրջ 70 ինժեներների, տեխնիկների, հանքաբանների, հողագետների, բուսաբանների, որոնք ավելի քան մեկ տարի հետազոտեցին Հայաստանի ջրային ռեսուրսները, որոշեցին ոռոգման վիճակը, նոր բացվելիք ջրանցքների ուղղությունները, կառուցվելիք էլեկտրակայանների տեղաբաշխումը և այլն: Այդ հետազոտությունների արդյունքներն ընդունվեցին ակադեմիկոս Ա. Թամանյանի գլխավորած հանձնաժողովի կողմից և հետագայում հիմք ծառայեցին Սևան-Հրազդան կասկադի կառուցման համար:

1919 թ. մայիսի 1-ին կառավարությունը պետականացրեց Կողբի աղահանքերը՝ աղի արտադրությունն ու վաճառքը պետականորեն կազմակերպելու նպատակով:

Մայիսի 26-ին կառավարությունը որոշում ընդունեց Կարս-Բաթում խճուղի բացելու մասին՝ պարենի փոխադրումն այդ գծով կազմակերպելու նպատակով: Սակայն Աջարիայում սկսված հակավրացական շարժումը խոչընդոտ եղավ այդ կարևոր գործին:

Օգոստոսի 25-ին որոշում ընդունվեց ժողովրդական տնտեսության նախարարություն հիմնելու մասին:

Հոկտեմբերի 17-ին խորհրդարանը 5 միլիոն ռուբլի վարկ բացեց Հայաստանի Կոոպերատիվների միությանը:

Հոկտեմբերին ավարտվեց Երևանի ուժեղ ռադիոկայանի կառուցումը, որը հաղորդումներ էր արձակում մինչև Բասրա, Տաշքենդ և Աստրախան:

Հայաստանի Հանրապետությունը 1920 թվական մտավ բավականաչափ ամրապնդված: Երկրի սահմանների վրա և ներսում տիրում էր համեմատական խաղաղություն, որը հնարավորություն տվեց շարունակել պետության կառուցման գործը:

1920 թ. հունվարի 4–ին Երևանում հանդիսավորությամբ բացվեց Հայաստանի քաղաքների համագումարը, որին մասնակցում էին Երևան, Ալեքսանդրապոլ, Կարս, Նոր Բայազետ, Աշտարակ և Ղամաղու քաղաքների ներկայացուցիչները: Ելույթ ունեցողները շեշտը դրեցին պետության վերաշինության գործում քաղաքների դերի, քաղաքների ինքնավարության և դրանց միություն ստեղծելու անհրաժեշտության վրա: Համագումարը զբաղվեց քաղաքների կյանքին վերաբերվող բազմաթիվ իրավական, տնտեսական, ֆինանսական, պարենավորման, կուլտուր–կրթական, բժշկա–առողջապահական, շինարարական խնդիրներով, քննարկման ներկայացվեցին բազմաթիվ ծրագրեր: Համագումարում հիմնադրվեց Հայաստանի Քաղաքների միությունը:

1920 թ. հունվարի 19–ին Դաշնակիցների Գերագույն խորհուրդը կայացրեց հետևյալ որոշումը 1. Հայկական պետության կառավարությունը ճանաչված է դե ֆակտո: 2. Սույն ճանաչումը չի կանխորոշում այս պետության ապագա սահմանների խնդիրը:

Ճանաչման լուրը Երևան հասավ հունվարի 23–ին. ամբողջ բնակչությունը ցնծությամբ փողոց դուրս եկավ և խանդավառ ցույց կազմակերպեց: Լուրը ավետեցին նաև հրանոթային համազարկերը, որոնք որոտացին միտինգում Ա. Խատիսյանի ճառի պահին: Ստացվեցին բազում շնորհավորական հեռագրեր:

Հունվարի 26–ին Երևանում գումարվեց Արիեստակցական միության խորհրդի անդամիկ միստը, որին մասնակցում էին 13 միությունների 38 ներկայացուցիչներ՝ կոռպերատիվների, ավտոգարաժի, դեղագործների, ուսուցիչների, փոստ–հեռագրի պաշտոնյաների, ծառայողների, բանկային աշխատողների, կաշեգործների, երկաթուղայինների, ջուլիակների, տպագրիչների, հացթուխների, որբանոցների աշխատակիցների միությունները: Ժողովը հաստատեց Միության կանոնադրությունը, ընտրեց գործադիր մարմին:

Քիչ ավելի ուշ ստացվեց նաև Դեմիկիմի ճանաչումը:

1920 թ. հունվարի 31–ին Ալեքսանդրապոլում տեղի ունեցավ Հայաստանի համալսարանի հանդիսավոր բացումը, որին մասնակցում էին Խորհրդարանի նախագահ Ավ. Սահակյանը, վարչապետ Ա. Խատիսյա-

նը, բրիտանական ներկայացուցիչ Ուորդրոպը, Հայաստանի գերագույն կոմիսար, գնդապետ Հասկելը, ֆրանսիական ներկայացուցիչ կապիտան Պուադեբարը, Դեմիկիմի ներկայացուցիչ գնդապետ Ջինկևիչը, պարսից հյուպատոս Ասադուլլա խանը, Ադրբեջանի ներկայացուցիչ Հախվերդովը, հանրային կրթության և արվեստի նախարար Ն. Աղբալյանը, Բ. Տեր–Մինասյանը, Ս. Վրացյանը, գեներալ Թ. Նազարբեկյանը, բանաստեղծ Հովհաննես Հովհաննիսյանը և շատ ուրիշներ:

Հանդեսը բացեց համալսարանի տեսուչ, պրոֆեսոր Իվ. Ղամբարյանը: Նախարար Նիկոլ Աղբալյանն իր ընդարձակ ճառում մաղթեց, որ համալսարանը մատչելի լինի ամենքի համար, մտնելը լինի հեշտ, ելնելը՝ դժվար և որ ուսումը ծրի լինի: Բրիտանական ներկայացուցիչ Ուորդրոպն ասաց, որ համալսարանի բացումը նույնքան կարևոր է, որքան անկախությունը: Պատմության մեջ եղել են դեպքեր, երբ պետականությունները կարճ են ապրել, բայց չի եղել դեպք, որ մի անգամ բացված համալսարանը կարճ կյանք ունենա և որ Հայաստանը հանձին էջմիածնի ճեմարանի, Վիեննայի և Վենետիկի հայկական վարժարանների արդեն իսկ դե ֆակտո գոյություն ունեն, չնայած այդ ճանաչումը տոմվեց մի քանի օր առաջ:

Գնդապետ Հասկելն ուրախություն հայտնեց, որ Հանրապետության ծանր հոգսերը չեն ճնշում ժողովրդի կրթության ծարավը և իր ցանկությունն է, որ հայ ժողովուրդն անկախ լինի նաև իր կրթությամբ: Տեղի ունեցավ նաև ճոխ հացկերույթ, գրական–երաժշտական երեկո և պարահանդես:

Կարևոր իրադարձություն էր Հայաստանի բժիշկների առաջին համագումարը, որը բացվեց 1920 թ. ապրիլի 20–ին Երևանում: Մասնակցում էին 72 պատգամավորներ հանրապետության բոլոր ծայրերից: Հաջորդ օրը համագումարը բաժանվեց 5 հատվածի և քննարկվեցին բժշկա–առողջապահական բոլոր սուր հարցերը:

1920 թ. հունվարի 27–ին ստեղծվեց Սերմագնման հատուկ կոմիտե, որը եռանդուն գործի անցավ և ամբարեց 375 հազար փութ սերմացու, 225 միլիոն ռուբլու վարկ բացվեց սերմացու գնելու համար, հաստատվեցին սերմացուի բաշխման պայմանները. պետական պահեստներից սերմացու պիտի տրվեր գյուղական համայնքներին, գյուղատնտեսական ընկերություններին, հասարակական ու պետական հիմնարկություններին: Բաժանված սերմացուն պիտի պետությանը վերադարձվեր կալի ժամանակ՝ բերքով կամ դրամով: Մինչև մայիսի սկիզբը կառա-

վարությունը ժողովրդին բաժանեց մոտ 330 հազար փութ սերմացու ցորեն, գարի, կորեկ, բրինձ, հաճար, կտավատ, գետնախնձոր, եգիպտացորեն: Բաժանվեց նաև 500 փութ բանջարանոցային սերմ, բամբակի ու ծխախոտի սերմ: Ծխախոտագործության, բամբակագործության և այգեգործության զարգացման համար հողագործներին տրամադրվեց հող, վարկ, գործիքներ ու սերմացու:

1920 թ. մարտի 1–ին Խորհրդարանը մեկ միլիոն ռուբլու վարկ բացեց՝ գյուղատնտեսական գործիքներ գնելու համար: Բաթումից բերվեցին տրակտորներ, հնձելու և քամելու մեքենաներ, գութաններ, սերմագտիչներ, այգեգործական և մեղվաբուծական գործիքներ, գերանդիներ, մանգաղներ և այլ գործիքներ: Այգիների համար բերվեց մեծ քանակությամբ պղնձարջասպ: Մեքենաների, գործիքների և նյութերի բաշխումը կատարում էր գյուղատնտեսության նախարարությունը:

Կարևոր իրադարձություն էր 1920 թ. մարտի 15–ին երոզվալ ատենակալների դատարանի բացումը: Ողջույնի խոսք ասացին վարչապետ Ա. Խատիսյանը, արդարադատության նախարար Ա. Զիլինգարյանը, դատարանի նախագահ Մ. Մելիք–Միրզախանյանը: Դատարանի կազմը բաղկացած էր երեք հոգուց՝ դատախազից և օգնականից, երկու քարտուղարներից: Երկա էին 19 երոզվալ ատենակալներ և մեկ տեղակալ՝ բոլորն էլ տղամարդիկ: Վիճակահանությամբ կատարվեց 12 ատենակալների ընտրություն, որոնք հայտարարեցին կրոնական երդումից հրաժարվելու մասին և ազնիվ խոսք տվեցին՝ դատելու խղճի մտոք: Նրանք հասարակական տարբեր խավերի պատկանող մարդիկ էին: Առաջին գործը կողոպուտի մեջ մեղադրվող երկու անձինք էին, որոնց երոզվալ ատենակալներն անպարտ ճանաչեցին:

Խորհրդարանը մի շարք օրենքներ մշակեց հանրային կրթության ասպարեզում: 1920 թ. մարտին հաստատվեց դպրոցական հանձնախմբի օրինագիծը եկեղեցական–ծխական դպրոցների աշխարհականացման ու պետականացման մասին: Օրինագծի կետերն էին.

1. Հոգևոր եկեղեցական–ծխական դպրոցների կայքերն ու գույքերը և նրանց շենքերը պետականացվում են:

2. Պետականացվող կայքերն ու գույքերը և նրանց շենքերը հանձնվում են հանրային կրթության և արվեստի նախարարությանը (Ս. Վ., էջ 388–389):

Ապրիլին ընդունվեց օրինագիծ տարրական կրթության մասին, ըստ որի՝ պետական դպրոցներում մտցվում էր 6–ամյա տարրական կր-

թություն՝ երկու եռամյակներով: Սահմանվում էր, որ տարրական դպրոցներում ավանդվելու են հետևյալ առարկաները. հայոց լեզու, թվալսանություն, պատմություն, աշխարհագրություն, բնագիտություն, առողջապահություն, երգեցողություն, նկարչություն, մարմնամարզություն, ձեռքի աշխատանք՝ ըստ հանրային կրթության և արվեստի նախարարության մշակած ծրագրի և դասատախտակի:

Հանրապետությունում լայնորեն ծավալվեց սկսնակական շարժումը:

1920 թ. փետրվարի 18–ին հիմնվեց Հայաստանի Կարմիր խաչը:

Մարտի 1–ի դրությամբ 1 դոլարն արժեք 580 ռուբլի, 1 թուրքական ոսկին՝ 3000 ռուբլի, 1 ֆունտ ստեռլինգը՝ 2000 ռուբլի: Վարչապետի ռոճիկը 8150 ռուբլի էր՝ 14 դոլար, նախարարներինը՝ 7.450 ռուբլի, Խորհրդարանի անդամներինը՝ 6.800 ռուբլի: Գոյություն ուներ 40 կարգի ռոճիկ, առավելագույնը 8150 ռուբլի էր, նվազագույնը՝ 2000 ռուբլի:

Ջուզահեռաբար ընթանում էին նաև ներքին կազմակերպական և շինարարական աշխատանքները: 1920 թ. ամռանը Հայաստանի Հանրապետությունը բաժանված էր չորս նահանգապետությունների. 1. Արարատյան (նահանգապետ՝ Ս. Թորոսյան), 2. Շիրակի (նահանգապետ՝ Կ. Սասունի), 3. Վանանդի (նահանգապետ՝ Ստ. Ղորղանյան), 4. Սյունիքի (նահանգապետ՝ Ս. Մելիք–Յուլյան): Նահանգներն իրենց հերթին բաժանվում էին գավառների:

ՀՀ–ում շրջանառության մեջ էր թղթադրամը, ամսական տպվում էր 600–800 միլիոն ռուբլի: Մինչև օգոստոս արդեն բաց էր թողնված երկու միլիարդ ռուբլու հայկական չեկ: Լոնդոնում պատրաստվում էին հայկական դրամանիշներ: Շրջանառության մեջ էին նաև անդրկովկասյան բոնները: Դրամական այդ հեղեղը մեծ չափով անդրադառնում էր մթերքների գների վրա, որոնք աճում էին խելահեղ արագությամբ:

Փետրվարի 8–ից երևանում սկսեց գործել Հայաստանի Առևտրաարդյունաբերական պալատը, որի նպատակն է կապ ստեղծել արտասահմանյան շուկաների հետ, կարգավորել գները:

Հարկային գործի ասպարեզում մտցվեց առաջատվական (պրոգրեսիվ) հարկատվության համակարգ. որքան շատ էր եկամուտը, այնքան պիտի բարձրանար պետության ստացած տոկոսը:

Հայաստանի արդյունաբերությունը և ելնմուտքի բարելավման ասպարեզում վճռական դեր պիտի կատարեր Անկախության փոխառությունը, որի մասին օրենքը հրատարակվեց հունիսի 10–ին: Օրենքում

ասված էր. «ՀՀ արդյունաբերական ուժերը և տնտեսությունը վերականգնելու և հանրապետության թղթադրամների ֆոնդն ապահովելու նպատակով կնքել 20 միլիոն ամերիկյան դոլարի անվանական գումարի պետական փոխառություն 6 տոկոսով: Փոխառության 75 տոկոսը հատկացնել վերոհիշյալ նպատակին, իսկ 25 տոկոսը գործադրել պետական այլ կարիքների համար» (Ս. Վ., էջ 448):

Փոխառությունն արվելու էր 10 տարով, Հայաստանում և արտասահմանում: Բաց էին թողնվելու 10, 25, 50, 100, 500 և 1000 դոլարանոց, պարտաթղթեր, որոնք ազատ էին լինելու տուրքերից: Փոխառությունն ապահովվում էր ՀՀ ամբողջ գույքով: Փոխառության գործի ղեկավար նշանակվեց Ալ. Խատիսյանը, որն ուղարկվեց արտասահման:

Օգոստոսի 1-ին փոխառության բացումը կատարվեց Երևանում, Թիֆլիսում և Բաթումում, որն անցավ մեծ հաջողությամբ: Արդեն սեպտեմբերի 5-ին Հայաստանին հատկացված փոխառությունը ավելի գումարով ծածկված էր, և կառավարությունը փակեց բաժանորդագրությունը Հայաստանի սահմաններում:

Նույն խանդավառությամբ անցավ Անկախության փոխառությունը նաև գաղութահայության մեջ՝ Պոլսում, Իզմիրում, Եգիպտոսում, Բալկանյան երկրներում, Պարսկաստանում:

Հայաստանը դարձել էր ձգողական մի ուժ, որ դեպի իրեն էր քաշում աշխարհի բոլոր ծայրերում ապրող հայերի հոգին ու նյութական ու բարոյական աջակցությունը: Սև ծովի ափերից, Գերմանիայից, Անգլիայից, Ռումինիայից, Բուլղարիայից, Պոլսից, Իզմիրից, Իտալիայից, Ֆրանսիայից, Բելգիայից, Կանադայից, ԱՄՆ-ից, Հարավային Ամերիկայից, Պարսկաստանից, Միջագետքից, Հնդկաստանից, Ճապոնիայից, Չինաստանից, Հեռավոր Արևելքից, Ճավայից և այլ կողմերից նվերներ էին հասնում Երևան կամ Փարիզի պատվիրակությանը՝ Հայաստանի համար: Ուղարկում էին զինվորական հագուստ, դեղորայք, գրենական պիտույքներ, ավտոմոբիլներ, սավառճակներ, ուտելիք, հագուստ, գրադարաններ, գրամեքենաներ, ծխախոտ, խինին, բժշկական գործիքներ, նկարներ, զարդեղեն: Սեծագումար կտակներ էին անում Հայաստանին, կազմում արդյունաբերական խոշոր ծրագրեր (Ս. Վ., էջ 450): Այսպես՝ Եգիպտոսի գործարանատեր Սելբոնյան եղբայրները ընդունեցին Հայաստանի քաղաքացիություն և իրենց ամբողջ հարստությունը՝ մոտ 6 միլիոն դոլար, կտակեցին Հայաստանին: Հայտնի կապիտալիստ Ա. Մելիք-Ազարյանը Հայաստանին նվիրեց Թիֆլիսում գտն-

վող մեկ միլիոն արժողությամբ իր փառահեղ տունը: Բաքվի հայտնի կապիտալիստ Արշակ Ղուկասյանը Հայաստանին կտակեց 8 միլիոն ռուբլի: Ստավրոպոլի հայ կապիտալիստ Պոպովը իր ամբողջ հարստությունը՝ 25 միլիոն ռուբլի, կտակեց Հայաստանի համալսարանին: Գ. Կյուլպենկյանը խոստացավ Հայաստանում կառուցել մի շարք պետական խոշոր շենքեր: Հ. Մելիքյանը պատրաստվում էր Երևանում կառուցել ժողովրդական տուն: Հայ ռամկավար կուսակցությունը Եգիպտոսում որոշեց Հայաստան ուղարկել 50 օդանավ: ՀՀ-ն Ամերիկայում Հայաստանի բանակի համար հանգանակեց 0,5 միլիոն դոլար, Երևան ուղարկեց մեծ քանակությամբ պաքսիմատ ու պահածո: Հայաստանի համալսարանին ու Հանրային գրադարանին նվիրեցին մի շարք մեծարժեք գրադարաններ: Մայիլյան եղբայրների գիտական արշավախումբը ուսումնասիրում էր Հայաստանի տնտեսական հարստությունները: Հունիսին Երևան եկավ ինժեներ Կ. Ս. Արդության-Երկայնաբազուկը և ներկայացրեց չորս տարում Բաթում-Կարս-Սարդարապատ երկաթուղի կառուցելու առաջարկություն:

Մայիսի 8-ին հաստատվեց Գլխավոր ճարտարապետի վարչություն՝ ակադեմիկոս Ալ. Թամանյանի գլխավորությամբ:

Խնամատարության նախարարության համակարգում սկսեց գործել Գլխավոր բժշկաառողջապահական վարչությունը, հիվանդանոցների թիվը 9-ից հասցվեց 30-ի, մահճակալների թիվը՝ 300-ից 1600-ի: Պայքար սկսվեց մալարիայի դեմ:

Սեպտեմբերին ստեղծվեց Հանքատեխնիկական հանձնաժողով՝ հանքերն ուսումնասիրելու համար:

Կարևոր գործ էր հողային հարցի լուծումը, որի համար ստեղծվեցին Հողային հատուկ կոմիտեներ: Կոմիտեները պիտի արձանագրեին և սահմանված չափով գյուղացիությանը պիտի բաշխեին մասնատիրական, եկեղեցական-վանական և լքյալ հողերը, պիտի լուծեին հողային վեճերը:

Սկսվեցին էքսիսիվներ և Շիրակի ջրանցքների շինարարությունը, բայց դրանք ավարտվեցին արդեն խորհրդային իշխանության օրոք:

Հուլիսի 1-ին ստեղծվեց Հայկոպալ՝ Հայաստանի կոոպերատիվների միությունը, որի մեջ մտնում էին 350 կոոպերատիվ ընկերություններ՝ 95.000 անդամներով:

Արդարադատությունը զարգանում էր անկանոն պայմաններում. հիմնականում գործում էին արտակարգ դատարանները: Օգոստոսին

բացվեց Կարսի շրջանային դատարանը, որով էլ Երևանի ու Շիրակի շրջանային դատարանների հետ դրանց թիվը հասավ 3-ի:

Լուրջ ուշադրության առարկա էր կրթական գործը: Որոշված էր 1920–1921 ուստարում բացել 1500 տարրական դպրոց: Հունիսի 21-ին կառավարությունը որոշեց համալսարանը փոխադրել Երևան և նրան հատկացնել նախկին Ուսուցչական սեմինարիայի շենքը՝ ներկայիս ԵՊՀ պատմության և աստվածաբանական ֆակուլտետների մասնաշենքը Արուսյան փողոցի վրա: Համալսարանը պիտի բացվեր 1920 թ. հոկտեմբերի 16-ին, 4 բաժիններով՝ պատմա-լեզվաբանական, իրավաբանական, բնագիտական, ֆիզիկա-մաթեմատիկական, իսկ բժշկական բաժինը նախատեսվում էր բացել հաջորդ տարի: Մինչև հոկտեմբերի 1-ը գրանցվել էին համալսարանի 632 ուսանողներ:

Երևանում բացվելու էր պետական երաժշտանոց, որտեղ աշխատելու համար հրավիրվել էին Ա. Սպենդիարյանը, Ռ. Մելիքյանը և ուրիշներ:

Քայլեր ձեռնարկվեցին պետական թատրոնի կազմակերպման ուղղությամբ: 1920 թ. ամռանը Երևանում մի շարք ներկայացումներ տվեցին հռչակավոր դերասաններ Գ. Ջարիֆյանը, Յ. Աբեյանը, Օ. Մայսուրյանը՝ իրենց ընտիր խմբով:

Սեպտեմբերին Ալեքսանդրապոլում բացվելու էր ժողովրդական գեղարվեստի ուսումնարան, իսկ սեպտեմբերի 27-ին այնտեղ բացվեց միջնակարգ տեխնիկական դպրոց:

Կարսում բացվելու էր Ռազմական գիմնազիա, Էջմիածնում վերաբացվելու էր հոգևոր ճեմարանը, Երևանում բացվելու էր բժշկական վարժարան, Ուսուցչական սեմինարիա: Երևանում և այլ քաղաքներում կային սղագրության, կար ու ձևի, գորգագործության, զինվորական, հաշվապահական, բժշկական, երկաթուղային, մանկավարժական, երկրաչափական, հայերեն և օտար լեզուների, սկաուտական և այլ մասնագիտական դպրոցներ ու դասընթացներ:

Գործում էին մի շարք ընկերություններ ու միություններ. Հայաստանի գրական ընկերությունը, մարմնամարզական ընդհանուր միությունը, տեխնիկական, իրավաբանական, բժշկական, ուսուցչական, ուսանողական միությունները, հրատարակչական ընկերությունը, Հայուհյաց միությունը, «Մանկապարտեզ» ընկերությունը, մոտ 20 հայրենակցական միություններ և այլն:

Հանրային կրթության և արվեստի նախարարության համալսարգում ստեղծվեց Հայաստանի Հնության պահպանության կոմիտե, որի կազմի մեջ մտան պրոֆեսորներ Գարեգին Եպիսկոպոս Հովսեփյանը, Աշխարհբեկ Քալանթարը, ակադեմիկոս Ա. Թամանյանը: Կոմիտեի առաջին հոգսը եղավ Անիի ավերակների ուսումնասիրությունը, և ճարտարապետ Թ. Թորամանյանը հաստատվեց այնտեղ: Կազմվեց գիտական արշավախումբ, որը պետք է կազմեր Հայաստանի հնագիտական քարտեզը: Կազմվեցին հնագիտական երկու արշավախմբեր, որոնք հավաքեցին մեծ քանակությամբ նյութեր, սակայն պատերազմը արգելք եղավ նրանց աշխատանքների:

Կառավարությունը հոգ տարավ Սևանա լճի վրա նավարկություն կազմակերպելու ուղղությամբ: Լճի վրա սկսեցին գործել շոգեմակուլյներ և «Աշոտ Երկաթ» ռազմանավը՝ մեկ թնդանոթով: Սեպտեմբերի 3-ին Շահախթից Երևան բերվեց «Սեստրիցա Նյուշա» շոգեմավը, որ ռուսները տանում էին Վան, բայց թողել էին ճանապարհի կեսին: Նավը վերանվանվեց «Գեղանուշ» և պիտի փոխադրվեր Սևան: Ենթադրվում էր Սևանի բոլոր ափերը միմյանց կապել նավային հաղորդակցությամբ: Սևանի նավազնացության կազմակերպիչն էր Խորհրդարանի անդամ Տիգրան Ծամհուրը և երիտասարդ ծովային սպա Թումանյանը:

1920 թ. հուլիսին ՀՀ կառավարությունը հաստատեց Հայաստանի Հանրապետության պետական զինանշանի՝ գերբի նախագիծը, որի հեղինակներն էին ակադեմիկոս Ա. Թամանյանը և Սկարիչ Հակոբ Կոջոյանը: Ձինանշանի կենտրոնում վահան էր՝ բաժանված չորս մասի, որոնցում տեղավորված էին Արտաշեսյան, Արշակունյաց, Բագրատունյաց և Ռուբինյանց զինանշանները: Վահանի կենտրոնում Մեծ և Փոքր Մասիսներն էին, նրանցից վերև՝ Հ. Հ. տառերը: Վահանը ձախից ու աջից բռնել էին առյուծն ու արծիվը, իսկ ներքևում սուր էր, գրիչ, հասկեր և շղթա: Նախագիծը լուրջ առարկությունների հանդիպեց, սակայն կառավարությունը ժամանակավորապես հաստատեց մինչև Սահմանադիր ժողովի հրավիրումը: Առարկողները «կատարյալ գազանանոցի» էին նմանեցնում այն:

Հուլիսի 5-ին հաստատվեց Հայաստանի քաղաքացիության մասին օրենքը՝ բաղկացած հինգ կետերից ու երկու ժանոթություններից: Ըստ այդ օրենքի՝ ՀՀ քաղաքացի էր ճանաչվում յուրաքանչյուր նախկին ռուսահպատակ կամ թուրքահպատակ, որը տվյալ պահին ապրում էր ՀՀ սահմաններում:

ԿՐԹԱԿԱՆ—ՄՇԱԿՈՒԹԱՅԻՆ ՁԵՌՆԱՐԿՈՒՄՆԵՐԸ

Հայաստանի առաջին Հանրապետության պետական գործիչները անհրաժեշտ նշանակություն էին տալիս կրթական գործի և մշակութային կյանքի զարգացմանը, ուստի այդ ուղղությամբ նույնպես, չնայած սուղ հնարավորություններին, ձեռնարկվեցին լուրջ միջոցառումներ:

1919 թ. մայիսի 30-ին կառավարությունը որոշեց 15-օրյա ժամկետում դատարկել բոլոր դպրոցական շենքերը, նորոգել դրանք և նախապատրաստել նոր ուսումնական տարվա համար: Այդ նպատակին հասկացվեց շուրջ 11 միլիոն ռուբլի: Արդեն տարվա վերջին հանրապետությունում կար 431 տարրական դպրոց, որոնցում սովորում էին ավելի քան 38 հազար աշակերտներ և աշխատում էին շուրջ 1100 ուսուցիչներ: Միջնակարգ դպրոցների թիվը քիչ էր՝ ընդամենը 20 դպրոց՝ 5162 աշակերտներով և 288 ուսուցիչներով:

1919 թ. մայիսի 16-ին կառավարությունը որոշում ընդունեց համալսարան բացելու մասին:

Հուլիսի 15-ին բացվեցին հուշարձանների պահպանման և արվեստի հովանավորության բաժինները:

Մայիսի 25-ին երևանում բացվեց Հայ արվեստագետների միության կազմակերպած անդրանիկ նկարչական ցուցահանդեսը՝ հանրային կրթության և արվեստի նախարարության հովանավորությամբ: Ցուցադրված էին Գ. Բաշինջադյանի, Ե. Թադևոսյանի, Մ. Սարյանի և այլոց նկարներ: Կառավարությունը պետական թանգարանի համար ցուցահանդեսից գնեց 100.000 ռուբլու նկարներ:

Հուլիսի 9-ին կառավարությունը Հայ գրողների միության քարտուղար Հովհաննես Թումանյանի դիմումի համաձայն հատկացրեց 100.000 ռուբլի՝ որպես նպաստ հայ գրողներին, գիտնականներին ու հրապարակախոսներին տալու համար: Միության վարչությունը այդ գումարը բաժանեց ութ ամենահեղինակավոր ու կարիքավոր գրողների:

Սեպտեմբերի 10-ին Խորհրդարանը որոշեց հիմնել Ազգագրական-Մարդաբանական թանգարան-գրադարան: Նոր հիմնադրված թանգարան-գրադարանին հանձնվեց Հայոց ազգագրական ընկերության ամբողջ շարժական և անշարժ գույքը՝ մոտ 10.000 գիրք, պարբերականներ, 120 ձեռագրեր, ազգագրական նյութեր: Ընկերության հիմ-

նադիր և վարիչ, հայ նշանավոր ազգագրագետ Երվանդ Լալայանը նույն պաշտոնով տեղափոխվեց Հայաստան:

1919 թ. վերջին երևանում արդեն գործում էին թատերական վարժարանը, երաժշտական, հայոց լեզվի, մանկավարժական դասընթացներ:

Ինչպես գրում է Ս. Վրացյանը, տարվա վերջին արդեն երկիրը գտնվում էր համեմատական բարեկարգության մեջ և ոգևորության ու գուրգուրանքի առարկա էր ոչ միայն Հայաստանում, այլև նրանից դուրս *ապրող հայերի համար*: Հայաստանը դարձել էր այն հուսատու փարոսը, որ իրեն էր քաշում աշխարհի չորս կողմը սփռված հայությանը:

1919 թ. դեկտեմբերին Թիֆլիսում կազմվեց Հայ կուլտուրական հաստատությունների միություն, որի մեջ, մտան Հայ գյուղատնտեսական ընկերությունը, Հայոց տեխնիկական ընկերությունը, Հայ կանանց միությունը, Հայ իրավաբանների միությունը, Հայ բժիշկների միությունը, Ազգագրական ընկերությունը, Կովկասի հայոց բարեգործական ընկերությունը: Միության նպատակն էր բազմակողմանի օգնություն ցույց տալ Հայաստանի կառավարությանը: Շատ հայ մասնագետներ ու հասարակական գործիչներ ցանկություն էին հայտնում տեղափոխվել Հայաստան՝ հայրենիքին ծառայելու մղումով (Ս. Վ., էջ 372-376):

ՀՀ ՁԻՆՎԱԾ ՈՒԺԵՐԻ ԿԱԶՄԱԿԵՐՊՈՒՄԸ

ՀՀ ստեղծման պահին Հայկական բանակային կորպուսը բաղկացած էր երկու հրաձգային դիվիզիաներից, որոնցից յուրաքանչյուրն ուներ չորսական հրաձգային գնդեր և մեկական հրետանային բրիգադներ՝ վեցական հրետանային մարտկոցներով: Կորպուսի մեջ էին մտնում նաև Հայկական առանձին հեծյալ բրիգադը՝ բաղկացած երկու հեծյալ գնդերից և հեծյալ լեռնային մարտկոցից, Ալեքսանդրապոլի բերդապահ հետևակային բրիգադը՝ բաղկացած հինգ հետևակային գնդերից, Հայկական համահավաք զորաջոկատը՝ բաղկացած երեք հատուկ հետևակային բրիգադներից, Հայկական պահեստային հետևակային բրիգադը, գնդացրային, հրետանային դիվիզիաներ, ավտոմոբիլային երեք վաշտեր, ավիաջոկատ և այլ մասնագիտացված զորամասեր ու ստորաբաժանումներ: (Մուրադ Կարապետյան, Հայաստանի Հանրապետության բանակը (1918-1920), Երևան, 1996, էջ 27):

Քանի որ Բաթումի պայմանագրով ԳՅ-ը կարող էր ունենալ ընդամենը մեկ հետևակային դիվիզիա, ուստի Հայկական բանակային կորպուսը պետք է վերակազմավորվեր և վերածվեր մեկ հետևակային դիվիզիայի:

Վերակազմավորումը տեղի էր ունենում Թուրքիայի անմիջական վերահսկողության պայմաններում: Կազմավորվող Հայկական Առանձին դիվիզիայի հրամանատար նշանակվեց կորուպուսի 2-րդ հրաձգային դիվիզիայի նախկին հրամանատար, գեներալ-մայոր Մովսես Սիլիկյանը (Սիլիկովը): Նրա թիվ 1 հրամանով շտաբի պետ նշանակվեց փոխգնդապետ Ալեքսանդր Վեքիլյանը (Վեքիլովը): Ավելի ուշ շտաբի պետ դարձավ գնդապետ Զինկևիչը: Դիվիզիայի կազմավորման աշխատանքներն ավարտվեցին օգոստոսի 15-ին: *

Ակզբնական շրջանում Հայկական Առանձին հետևակային դիվիզիան բաղկացած էր 6 հետևակային գնդերից՝ երեքական գումարտակով, մեկ հրետանային բրիգադից, համահավաք հեծյալ գնդից և օժանդակ այլ ստորաբաժանումներից: Այս կառուցվածքը պահպանվեց մինչև 1918 թ. վերջը:

Առաջին հետևակային բրիգադի հրամանատար նշանակվեց գնդապետ Դանիել Բեկ Փիրումյանը (Փիրումով), երկրորդ բրիգադի հրամանատար՝ գնդապետ Բաղդասարյանը (Բաղդասարով): Գնդերի հրամանատարներ նշանակվեցին գնդապետներ Դուրխանյանը, Պերեկոյստովը և ուրիշներ: Հրետանային բրիգադի հրամանատար նշանակվեց գնդապետ Ջրիստափոր Արարատյանը, որը հետո նշանակվեց զինվորական նախարար:

Դիվիզիայի հավաքական հեծելազորային գնդի հրամանատար նշանակվեց գնդապետ Նիկոլայ Կորգանովը:

Հայաստանի առաջին Հանրապետությունն ունեցավ զինվորական չորս նախարար՝ Հովհաննես Հախվերդյանը (1918 թ. հունիս-1919 թ. մարտ), Ջրիստափոր Արարատյանը (1919 թ. մարտ-1920 թ. ապրիլ), Ռուբեն Տեր-Մինասյանը (1920 թ. ապրիլ-նոյեմբեր), Դրաստամատ Կանայանը՝ Դրոն (1920 թ. նոյեմբեր-դեկտեմբեր):

1919 թ. սկզբին ՀՀ զինվորական նախարարությանն առընթեր ստեղծվեց Ռազմական խորհուրդ, որի մեջ մտան դիվիզիայի ավագ գործադրամանատարները և նախարարության վարչությունների պետերը: Մարտի 25-ին Ռազմական խորհրդի անփոփոխ նախագահ նշանակվեց Հայկական կորպուսի նախկին հրամանատար, գեներալ-լեյտենանտ

Թովմաս Նազարբեկյանը: Կառավարության ապրիլի 24-ի հրամանագրով նրա վրա դրվեց նաև ՀՀ զորքերի գլխավոր հրամանատարի՝ սպարապետի պարտականությունը:

Առաջին համաշխարհային պատերազմում Թուրքիայի պարտությունից հետո (1918 թ. նոյեմբերի 30) Բաթումի պայմանագիրը ուժը կորցրած համարվեց, և ՀՀ կառավարությունը կտրուկ ընդլայնեց իր զինված ուժերը:

1919 թ. հունվարին զինվորական նախարար, գեներալ Հ. Հախվերդյանի հրամանով Հայկական Առանձին դիվիզիան վերակազմավորվեց: Կազմավորվեցին երեք առանձին հետևակային բրիգադներ՝ յուրաքանչյուրը բաղկացած հետևակային երկու գնդից: Առաջին բրիգադի հրամանատար նշանակվեց գեներալ-մայոր Դանիել Բեկ Փիրումյանը, երկրորդինը՝ գեներալ-մայոր Արտեմ Հովսեփյանցը, երրորդինը՝ գեներալ-մայոր Բոզդան Բաղդասարյանը:

Հայկական բանակն ուներ նաև միլիցիոներական և պարտիզանական զորքեր, հեծելազոր, ինժեներական զորամասեր, սահմանապահ ուժեր: Տեխնիկական զորքերի մեջ էր մտնում ավիացիոն զորաջոկատը, ինժեներական գումարտակը, ռադիոհեռագրային դիվիզիոնը, Սևանի նավատորմիկը, 4 զրահագնացք, 1 զրահապատ մեքենա: Գործում էին գլխավոր շտաբի սպայական դասընթացը, սպայական նախապատրաստական դպրոցը:

1920 թ. հոկտեմբերի 25-ի դրությամբ ՀՀ բանակը բաղկացած էր հետևակային, հեծելազորային և հրետանային կանոնավոր և կամավորական զորամասերից: Հետևակային կանոնավոր զորքերը բաղկացած էին հինգ առանձին հետևակային բրիգադներից, որոնց մեջ մտնում էին 1-10-րդ հետևակային գնդերը: Յուրաքանչյուր գունդ բաղկացած էր 2 գումարտակից, գումարտակը՝ 4 վաշտից: Յուրաքանչյուր հետևակային գնդում կար 1500 սվին: Հրետազորը բաղկացած էր 11 լեռնային-հեծյալ մարտկոցներից, որոնցից յուրաքանչյուրում կար 4 հրանոթ, երեք հաուրիցային մարտկոցներից, Կարսի և Ալեքսանդրապոլի ամրոցային հրետանուց:

Զինված ուժերի այս կառուցվածքը մասնակի փոփոխություններով պահպանվեց մինչև ՀՀ անկումը և հայկական բանակի վերակազմավորումը:

1919 թ. վերջին հայկական բանակի թվաքանակը կազմում էր 30.000 մարդ: Համեմատության մեջ դնելով տարաբնույթ թվական

տվյալներ՝ հայոց բանակի պատմության հետազոտող Մուրադ Կարապետյանը հանգում է այն եզրակացության, որ եթե 1918 թ. վերջին հայկական դիվիզիայի շարքերում ծառայում էին մոտ 16.000, 1919 թ. աշնան վերջին՝ 30 հազար մարդ, ապա 1920 թ. նոյեմբերի սկզբին 37 բանակի թվաքանակը, ներառյալ նաև կամավորական-պարտիզանական, միլիցիոներական և թիկունքային ծառայողները, հասնում էր 40 հազարի (Ս. Կ., նշվ. աշխ., էջ 45-48):

1920 Թ. ՄԱՅԻՍՅԱՆ ԱՊՍՏԱՄԲՈՒԹՅՈՒՆԸ

1919 թ. ամռանը Հայաստանի բոլշևիկյան կազմակերպությունների գործունեությունը բավական աշխուժացավ՝ կապված գյուղացիական և բանվորական հուզումների ու ելույթների ուժեղացման հետ: Բանվորական շարժման կենտրոնը Ալեքսանդրապոլն էր, որտեղ գործում էր բոլշևիկյան ընդհատակյա կոմիտե: Բոլշևիկների ղեկավարությամբ ստեղծվեց նաև Հայաստանի «Սպարտակ» կոմունիստական երիտասարդական միությունը:

1919 թ. սեպտեմբերին Երևանում տեղի ունեցավ Հայաստանի կոմունիստական կազմակերպությունների առաջին խորհրդակցությունը, որին մասնակցում էին Ս. Կասյանը, Ա. Մռավյանը, Ա. Խանոյանը, Դ. Դուկասյանը և ուրիշներ: Խորհրդակցությունն ընտրեց Հայաստանի կոմունիստական կազմակերպությունները միավորող ղեկավար օրգան՝ ՌԿ(բ)Կ Հայաստանի կոմիտե՝ Արմենկոմ, որի կազմում մտան Ս. Կասյանը, Ա. Մռավյանը, Դ. Շահվերդյանը, Ա. Ալավերդյանը, Դ. Դուկասյանը, Ա. Խանոյանը:

Երկրում ստեղծված ծանր վիճակը ներկայացնելու և դրանից դուրս գալու ուղիները ցույց տալու նպատակով Արմենկոմը հանձնարարում է Սարգիս Կասյանին (1876-1937) գրել հատուկ աշխատություն: 1919 թ. վերջերին լույս տեսավ Ս. Կասյանի «Ո՛ւր է ելքը» գրքույկը՝ Ա. Ատենյան կեղծանվամբ: Հեղինակը մանրամասն վերլուծության էր ենթարկում երկրում ստեղծված դրությունը և գտնում, որ հայ ժողովրդի փրկության միակ ուղին երկրում խորհրդային իշխանության հաստատումը կարող է լինել: «Երկրագնդի վրա,— գրում է Ս. Կասյանը,— թերևս ոչ մի ժողովուրդ այնպիսի ողբալի, այնպիսի օրհասական և սոսկալի օրեր չի ապրում, ինչպիսին ապրում է ժողովուրդը Հայաստանի տերիտորիայի վրա:

Կյանքի բոլոր ասպարեզներն էլ արտաշնչում են դառն ու լեղոտ օդը և թունավորում ամբողջ երկիրը՝ սպանելով կենսունակ ուժերը, խեղդելով նրա ձգտումներն ու կամքը...

Հայաստանում դրությունը դարձել է անեծք, կյանքը՝ դժոխք...

Երկաթի և արյան միջոցով պահվող, ժողովրդական տառապանքի և հառաչանքի վրա կառուցված այս աշխարհը չէ, որ պիտի փրկե հայ ժողովրդին տանջանքից և հառաչանքից, այլ այն աշխարհը, որի արշալույսը բացվել է ռուսական հյուսիսում:

Միակ ելքը դա է, ուրիշը չկա» (ԳԱ ԶԺՊ, Երևան, 1967, հ. 7, էջ 78):

1920 թ. հունվարի կեսերին Երևանում անլեգալ տեղի ունեցավ Հայաստանի կոմունիստական կազմակերպությունների առաջին կոնֆերանսը, որին մասնակցում էին տեղական կազմակերպությունների 22 ներկայացուցիչներ: Կոնֆերանսն ընդգծեց, որ Հայաստանի կոմունիստական կազմակերպությունների առաջնահերթ խնդիրը գոյություն ունեցող իշխանության բռնի տապալումն ու խորհրդային իշխանության հաստատումն է: Կոնֆերանսն ընտրեց ՌԿ(բ)Կ Արմենկոմի 10 հոգուց բաղկացած նոր կազմ, որի մեջ մտան Ս. Ալավերդյանը, Ս. Կասյանը, Ա. Մռավյանը, Դ. Շահվերդյանը Զ. Կոստանյանը, Դ. Դուկասյանը, Ա. Նուրիջանյանը, Դ. Տեր-Սիմոնյանը, Ա. Գոգունցը, Ս. Մարտիկյանը:

Անդրկովկասի կոմունիստական կազմակերպությունների գործունեությունը ամմիջականորեն ղեկավարում էր ՌԿ(բ)Կ Կովկասյան երկրային կոմիտեն, որտեղ աշխատում էին Վ. Ի. Լեմինի գինակիցներ Ս. Օրջոնիկիձեն, Ս. Կիրովը, Ա. Միկոյանը և ուրիշներ:

Ներկայացնելով երկրում տիրող վատթարագույն վիճակը՝ ԳԱ ԶԺՊ 7-րդ հատորում ընդգծվում է, որ «ժողովուրդը տեսնում և հասկանում էր, որ դաշնակցականներն իրենց տիրապետության ընթացքում իրեն չտվեցին ո՛չ ազատություն, ո՛չ հող և ո՛չ էլ խաղաղություն: Պատերազմները, սովն ու համաճարակը ֆիզիկական բնաջնջման էին ենթարկում ժողովրդին... Դաշնակցական պետական սիստեմը այլասերված էր: Ձեղձարարությունը, կաշառակերությունն ու չարաշահումները չտեսնված չափերի էին հասել: Հափշտակումներն ու կեղեքումները բացահայտ սանձարձակության էին վերածվել: Հայաստանում բուրժուական դեմոկրատիայի ամենատարրական նորմերն իսկ չէին պահպանվում: Տիրող կարգերի դեմ ամենափոքր բողոքի արտահայտությունն անգամ դիտվում էր որպես «ազգի դավաճանություն» և պատժվում ամենաբիրտ միջոցներով:

Երկրի դրությունը բարդացել էր նաև նրանով, որ հարյուր հազարավոր գաղթականներ փախչելով թուրքական յաթաղանից, ապաստանել էին Հայաստանում, չունենալով ո՛չ օթևան և ո՛չ էլ հաց: Սովն ու համաճարակը գերեզման էին տանում հազարավոր մարդկանց: Միայն 1918–1919 թվականների ծնռանը սովից ու համաճարակից մեռել են ավելի քան 150 հազար մարդ:

Ղաշնակցականների կառավարական կուսակցությունը դառնալը արագացրեց նրանցից հուսախաբ եղած աշխատավոր մասսաների հիասթափության պրոցեսը, նրանց զրկեց ժողովրդի վրա ունեցած երբեմնի «ազդեցությունից» (ԳԱ ԳԺՊ, Երևան, 1967, հ. 7, էջ 82):

Ինչպես նշում է Ա. Վրացյանը, հայ կոմունիստների հակապետական շարժման (այսինքն՝ Մայիսյան ապստամբության — Մ. Կ.) դրդիչ և ազդանշան հանդիսացավ Ադրբեջանի խորհրդայնացումը: «Ադրբեջանի հեղաշրջումը,— գրում է նա,— զուգահիշյալեց մայիսի մեկի տոնին: Երևանում և Հայաստանի մյուս վայրերում հայ աշխատավորությունը պատրաստվում էր առանձին հանդիսավորությամբ տոնելու աշխատավորների միջազգային համերաշխության օրը: Բուլշևիկները օգտվեցին դրանից և աշխատեցին մայիսյան տոնը վերածել ընդհանուր հակապետական ապստամբության: Երևանում այդ չիաջողվեց, բայց գավառական մի շարք քաղաքներում նրանք ունեցան կարճատև հաջողություն» (Մ. Վ., էջ 411):

Հիրավի, 1920 թ. սկզբներին խորհրդային Ռուսաստանի Կարմիր բանակը, ջախջախելով օտարերկրյա ինտերվենտներին և ռուսական սպիտակգվարդիական ուժերին՝ մոտեցել էր Անդրկովկասի սահմաններին: 1920 թ. ապրիլի 28–ին 11–րդ Կարմիր բանակը մտավ Ադրբեջան և այնտեղ հաստատվեց խորհրդային իշխանություն: Մայիսմեկյան ցույցերը Երևանում, Ալեքսանդրապոլում, Կարսում, Սարիղամիշում, Ղարաքիլիսայում, Ջանգեզուրում և այլ վայրերում անցան Հայաստանում ևս խորհրդային իշխանություն հաստատելու բուռն պահանջներով:

Երևանում 1920 թ. մայիսի 1–ի վաղ առավոտյան սկսված ցույցից հետո միտինգի ժամանակ կրակոտ ճառով հանդես եկավ Արմենկոմի անդամ Ստեփան Ալավերդյանը:

Մայիսմեկյան հուժկու ցույց տեղի ունեցավ նաև Ալեքսանդրապոլում: Մի շարք վայրերում քաղաքական ցույցերը շուտով վերածվեցին զինված ապստամբության:

Մայիսի 2–ին Ալեքսանդրապոլի կայարանում գտնվող «Վարդան զորավար» զրահագնացքը, որի հրամանատարն էր կապիտան Սարգիս

Մուսայելյանը, դադարում է ենթարկվել՝ հրամանատարությանը և վերածվում է ապստամբության մախապատրաստման շտաբի: Ալեքսանդրապոլի կոմունիստական կազմակերպության մայիսի 3–ին և 5–ին ուղարկված նամակներով առաջարկում է Արմենկոմի՝ սկսել ապստամբություն:

Ապստամբությունը կանխելու նպատակով Ղաշնակցության բյուրոյի որոշմամբ մայիսի 4–ին Ա. Խատիսյանի կառավարությունը հրաժարական տվեց: Մայիսի 5–ին գումարվեց խորհրդարանի արտակարգ նիստը, որն ընդունեց Ա. Խատիսյանի հրաժարականը և նշանակեց նոր կառավարություն. ԶԳԴ բյուրոն իր ամբողջ կազմով անցավ իշխանության գլուխ: Փաստորեն հայտարարվեց Ղաշնակցության դիկտատուրա, իսկ խորհրդարանը մեկ ամսով դադարեցրեց իր գործունեությունը: Բյուրո–կառավարության կազմն էր. վարչապետ և արտգործնախարար՝ Հանո Օհանջանյան, ներքին գործերի և զինվորական մախարար՝ Ռուբեն Տեր–Մինասյան, ֆինանսների՝ Աբրահամ Գյուլխանդանյան, հաղորդակցության՝ Արշակ Ջամալյան, գյուղատնտեսության, պետական գույքերի և աշխատանքի՝ Սիմոն Վրացյան, խնամատարության՝ Ս. Արարատյան, հանրային կրթության և արվեստի՝ Գ. Ղազարյան:

Նոր կառավարությունն անմիջապես հայրենիքը հայտարարեց վտանգի մեջ և կոչ ուղղեց ժողովրդին՝ համախմբվել կառավարության շուրջը և հասնել հաղթանակի (կոչի լրիվ տեքստը տես՝ Ս. Վրացյան, էջ 415–416): Բյուրո–կառավարությունը դիմեց արտակարգ միջոցների:

Երկրում հայտարարվեց արտակարգ դրություն: Հայաստանը բաժանվեց չորս նահանգի՝ Կարսի, Շիրակի, Երևանի և Ղարաբաղի, որտեղ նշանակվեցին գեներալ–կոմիսարներ: Գավառներ գործուղվեցին արտակարգ լիազորներ՝ տեղերում զինված ելույթները ճնշելու նպատակով: Ձորքը դրվեց մարտական վիճակի մեջ: Սկսվեցին մասսայական ձերբակալություններ: Գործադուլները հայտարարվեցին պետական հանցագործություն, իսկ կոմունիստական կուսակցությունը՝ օրենքից դուրս: Ստեղծվեցին չորս արտակարգ դատարաններ: Օրենք ընդունվեց մահապատիժ սահմանելու մասին (ԳԱ ԳԺՊ, հ. 7, էջ 86):

Սակայն ձեռնարկված այդ միջոցառումները չկասեցրին ապստամբության ընթացքը: Արմենկոմը ապստամբության մախապատրաստման հարցում դանդաղեց, որը և ճակատագրական նշանակություն ունեցավ: Միայն մայիսի 6–ին Արմենկոմը Ալեքսանդրապոլ ուղար-

կեց իր ներկայացուցիչներին՝ Արտաշես Մելքոնյանին և Դրաստամատ Տեր-Սիմոնյանին:

Մայիսի 7-ին «Վարդան զորավար» զրահագնացքում տեղի ունեցավ Հայաստանի կոմունիստական կազմակերպությունների ներկայացուցիչների խորհրդակցություն, որին մասնակցում էին 14 մարդ: Խորհրդակցությունն ընտրեց Հայաստանի ռազմահեղափոխական կոմիտե, որի կազմում մտան Ս. Մուսայելյանը, Ա. Նուրիջանյանը, Ա. Մելքոնյանը, Դ. Տեր-Սիմոնյանը, Ա. Գոգունցը, Պ. Պետրոսյանը, Գ. Սարգսյանը, Ա. Տեր-Սահակյանը, Լ. Ուլիբեկյանը: Կարմիր զորքերի հրամանատար նշանակվեց Ս. Մուսայելյանը:

Խորհրդակցությունը որոշեց ապստամբությունը սկսել մայիսի 10-ին: Հաստատվում է ապստամբության հետևյալ ռազմական պլանը. Ղազախից կապվել Աղստաֆայում կանգնած Կարմիր բանակի զորանասերի հետ, սկսել ապստամբությունը, որից ամենիջապես հետո ապստամբում են Ալեքսանդրապոլը, Կարսը և Սարիղամիշը, Ղարաքիլիսան և Դիլիջանը: Ալեքսանդրապոլից և Դիլիջանից միաժամանակ ապստամբական զորքերը շարժվում են Երևանի վրա և ստիպում դաշնակցականներին կա՛մ նահանջել, կա՛մ կռիվն ընդունել: Երևանում ապստամբություն չէր նախատեսվում:

1920 թ. մայիսի 10-ին ՌԳԿ-ն հրապարակեց կոչ, որով Հայաստանի բանվորների, գյուղացիների և կարմիր զորքերի կամքով դաշնակցական կառավարությունը հայտարարեց տապալված և երկրում հռչակեց խորհրդային իշխանություն:

Մայիսի 8-ին ՌԳԿ ստեղծվեց Կարսում, որի մեջ մտան Ղ. Ղուկասյանը, Ա. Նազարյանը, Դ. Մելիքյանը, Գ. Բայթունին, Վ. Ղազանչյանը, Ա. Թովմասյանը: Մայիսի 10-ին ապստամբություն բռնկվեց նաև Կարսում:

Ապստամբեցին նաև Ալեքսանդրապոլի գավառի գյուղացիները: Քյավթառու գյուղի բժիշկ, բոլշևիկ Ա. Փանյանի գլխավորությամբ ստեղծված հանձնաժողովը բռնագրավեց պահեստները և սերմացուն բաժանեց գյուղացիներին: Ստեղծվեց ՌԳԿ, որի կազմում էին Ա. Փանյանը, Ն. Կուրդինյանը և Ա. Մովսիսյանը: Մայիսի 10-ին հեղկոնը ձերբակալեց դաշնակցական ղեկավարներին և զինեց գյուղացիներին: Ապստամբեցին նաև Պարնիի, Նորաշենի, Ղուլիջանի և Արթիկի գյուղացիները՝ Ս. Գալոյանի և Ե. Գալոյանի ղեկավարությամբ:

Գեներալ Ղամազյանին հանձնարարվում է համոզել Ս. Մուսայելյանին՝ հետ կանգնել ապստամբությունից, սակայն վերջինս անհող-

որող պատասխանում է. «Չջանան շուռ տալ պատմության անիվը, թող չփորձեն կանգնեցնել իրադարձությունների բնական ընթացքը, դաշնակցական կառավարության երզը արդեն երզված է... պրոլետարական հեղափոխության կարմիր դրոշը մի քանի օր հետո կծածանվի դաշնակցականների մեջալ պառլամենտի վրա» (Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում, Փաստաթղթերի և նյութերի ժողովածու, Երևան, 1960, էջ 318):

Կարսի ապստամբության ղեկավարները թույլ են տալիս սխալ՝ հաջորդ օրը կալանքից ազատելով ձերբակալված դաշնակցական ղեկավարներին: Կարսի կայազորի պետ, գեներալ Փիրունովի գլխավորությամբ ստեղծվում է «Հայրենիքի փրկության կոմիտե», որը մայիսի 12-ին անցնում է հարձակման:

Օգնություն չստանալով Ալեքսանդրապոլից՝ Կարսի ՌԳԿ-ն թողնում է քաղաքը և փոխադրվում բերդ, որը շրջապատվում է կառավարական ուժերի կողմից: Ապստամբները, մարտեր մղելով, նահանջում են և հասնում Ալեքսանդրապոլից 18 կմ հեռավորության վրա գտնվող Արզինա գյուղ: Այստեղ նրանք կռիվ են բռնվում վրա հասած կառավարական ուժերի հետ: Ջոհվում են Ղ. Ղուկասյանը, Ծ. Ծառուկյանը և ուրիշներ:

Ալեքսանդրապոլի ապստամբների կողմն են անցնում բանակի զինվորների զգալի մասը և գեներալ Խաչատուրովը, որը, սակայն, շուտով զոհվում է:

Սակայն գրավելով իշխանությունը՝ Ալեքսանդրապոլի ՌԳԿ-ն դանդաղկոտություն հանդես բերեց և հարձակման անցնելու փոխարեն անցավ պաշտպանության:

Ինչպես նշում է Ս. Վրացյանը, Ալեքսանդրապոլը վերագրավելու համար կազմվեց առանձին մի զորամաս՝ խմբապետ Սեպուհի (Արշակ Ներսիսյան, 1872-1940) գլխավորությամբ: Սեպուհը պահանջեց իր մոտ բանակցությունների եկած ՌԳԿ-ի պատվիրակներից՝ մինչև մայիսի 14-ի առավոտյան ժամը 6-ը անձնատուր լինել և հանձնել զրահագնացքը: Մայիսի 13-ին գիշերը ապստամբները թողին զրահագնացքը և ցրվելով տարբեր ուղղություններով՝ թաքնվեցին: Մայիսի 14-ի առավոտյան հանրապետական զորքերը առանց կռիվ մտան քաղաք և զրահագնացքի վրա բարձրացավ հանրապետության դրոշը: Նույն օրը ձերբակալվեցին Ս. Մուսայելյանը, Ա. Մելքոնյանը և ուրիշներ, իսկ Ավիս Նուրիջանյանին հաջողվեց փախչել: Ձերբակալ

վածներին հանձնեցին արտակարգ դատարանին (Ս. Վ., էջ 422–423): Ալեքսանդրապոլի անկումը ճակատագրական եղավ ամբողջ ապստամբության համար:

Ալեքսանդրապոլից և Կարսից անմիջապես հետո ապստամբություն բռնկվեց Սարիղամիշում: Այստեղ ստեղծված ՌԳ–ն, որի մեջ մտնում էին Ա. ճուղուրյանը, Լ. Մխչյանը, Ս. Ոսկանյանը, Պ. Կուխմալայկինը և ուրիշներ, իշխանությունն իր ձեռքում պահեց մինչև մայիսի 17–ը:

Ալեքսանդրապոլի և Կարսի անկումից հետո կառավարական գործերը շարժվեցին դեպի Սարիղամիշ: Քաղաքը գրավվեց, իսկ Կուխմալայկինը, Ս. Ոսկանյանը և Պ. Մատիչևոն գնդակահարվեցին:

Մայիսի 13–14–ին ապստամբություն բռնկվեց Նոր Բայազետում: Ալեքսանդրապոլից այստեղ վերադարձած Դովի. Սարուխանյանը դեռևս մայիսի 8–ին ստեղծում է ՌԳ, որի մեջ մտնում են Բ. Բատիկյանը, Ս. Մակարյանը, Ս. Պետրոսյանը և ուրիշներ: Մայիսի 17–ին ապստամբները գրավում են Նոր Բայազետը:

Նոր Բայազետի դեմ ուղարկվում են խոշոր ուժեր, որոնք մայիսի 19–ին վերագրավում են քաղաքը: Գնդակահարվում են Զ. Մարուխանյանը և ուրիշներ:

Մայիսի 14–ին ապստամբություն բարձրացավ Ղազախ–Շամշադինի շրջանում: Ապստամբությունը ղեկավարում էր Շավարշ Ամիրխանյանի գլխավորած ՌԳ–ն, որի մեջ մտնում էին Ե. Մկրտումյանը, Ան. Բերբերյանը, Գ. Գարությունյանը, Կ. Այվազյանը: Այստեղ ապստամբությունը տևեց մեկուկես ամիս:

Մայիսի 19–ին ապստամբությունը հասավ Իջևան: Այստեղ ապստամբության ղեկավարներից էին Ս. Գակոբջանյանը, Ե. Շամախյանը, Ժ. Իշխանյանը, Ե. Մկրտումյանը, Զ. Յաղուբյանը և ուրիշներ: Տեղի ՌԳ–ն դիմում է 11–րդ Կարմիր բանակին և օգնություն խնդրում, և մայիսի 21–ին ռուսական կարմիր ջոկատը մտավ Իջևան:

Զանգեզուրում ապստամբությունը բռնկվեց մայիսի վերջերին: Առաջին ապստամբության դրոշ բարձրացրեց Խնձորեսկը: Ապստամբությունը ղեկավարում էր Գակոբ Կամարու գլխավորած Զանգեզուրի կոմունիստների ժամանակավոր Կենտկոմը: Ապստամբության ղեկավարներից էին նաև Բ. Գարությունյանը, Զ. Մկրտչյանը, Մ. Մաշուրյանը:

Սակայն Զանգեզուրում գտնվող Դրոյի զորամասը կարողացավ արագորեն ճնշել ապստամբությունը և այն լայն տարածում չստացավ:

Այսպիսով՝ երկու շաբաթվա ընթացքում կառավարական գործերը ամբողջ երկրում վերջ դրեցին Մայիսյան ապստամբությանը:

Ապստամբության պարտությունից հետո՝ հուլիսի 8–ին, վարչապետի գլխավորությամբ ստեղծվեց հատուկ քննչական հանձնաժողով՝ ապստամբության պատճառները քննելու և դրանք վերացնելու նպատակով: Բանտարկվեցին հարյուրավոր մարդիկ, հազարավոր մարդիկ էլ փախան և ապաստանեցին Խորհրդային Ադրբեջանում:

Ապստամբության ղեկավարներից Ստ. Ալավերդյանը, Ա. Փանյանը, Ե. Սևյանը, Ս. Մուսայեյանը, Բ. Ղարիբջանյանը և ուրիշներ գնդակահարվեցին:

Ապստամբության պարտության պատճառներից մեկն այն էր, որ ապստամբությունը միաժամանակ չսկսվեց Զայաստանի տարբեր վայրերում: Անվճռականություն դրսևորեց ապստամբության ղեկավարությունը:

Իսկ ի՞նչ տեղի ունեցավ Մայիսյան ապստամբության պարտությունից հետո: Ավելի լավ է ձայնը տանք Ս. Վրացյանին. «Բուլշևիկյան ապստամբության հաշվեհարդարը գուգադիպեց Մայիսի 28–ին՝ անկախության տարեդարձին, որը տոնվեց արտակարգ հանդիսավորությամբ, ամբողջ Զայաստանում, բայց, մանավանդ, Երևանում,— գրում է նա: Քաղաքը զարդարված էր առանձին շքեղությամբ... Տները թաղված էին ծառերի ոստերի ու ծաղիկների, գորգերի ու դրոշակների մեջ: Արովյանի վրա կանգնած էր հաղթական շքեղ կամար... Հանդեսին մասնակցում էր Աննայն Զայոց կաթողիկոսը... Անհաշիվ բազմություն գյուղերից ու քաղաքից՝ վաղ առավոտվանից լցվել էին փողոցները... Ջորահանդեսից հետո տեղի ունեցավ զորամասի շքերթը... Մինչև ուշ գիշեր քաղաքը հրճվանքի մեջ էր: Երեկոյան հրավառություն:

Փռնաձեռն հանդեսներ կատարվեցին և գավառներում... Երբեք, մինչև այդ, Զայաստանի ժողովուրդը նման ուրախություն չէր հայտնաբերել, երբեք «Մեր Զայրենիքը» չէր հնչել այնպես անկեղծ, լիաթոք ու խրոխտ...» (Ս. Վ., էջ 426–427):

Մայիսյան ապստամբությանը տված գնահատականը Ս. Վրացյանն ամփոփում է այսպես. «Զայաստանի քաղաքական կյանքի ամենածանրակշիռ վայրկյանին, հայ բուլշևիկները չքաշվեցին խռովություններ հանել երկրի ներսը, եղբայրական քաղաքացիական պատերազմ առաջ բերելու, զինված ապստամբության միջոցով Զայաստանի անկախությունը խորտակելու և պետական իշխանությունը

նը հափշտակելու փորձ անելով: Հայ ժողովրդի այդ դավը վիժեց, բայց անհաշիվ վնասներ հասցրեց թե՛ ներքին և թե՛ արտաքին կյանքուն» (Ս. Վ., էջ 441):

Սակայն տասնամյակներ անց նույն Ս. Վրացյանը Բեյրութում խորհրդահայ նշանավոր արվեստագետ Ռուբեն Ջարյանի հետ գրույցի ժամանակ պիտի անհուն ափսոսանքով խոստովաներ, որ եթե իրենք խորաթափանց լինեին և իշխանությունը բուշնիկներին հանձնեին դեռևս 1920 թ. մայիսին, ապա հորհրդային Հայաստանի ներկայիս տարածքը կրկնակի ավելին կլիներ: «Է՛, ինչ ըսեմ, ինչպես արդարանամ»,— հոգոց է հանել նախկին վարչապետը («Հայաստանի Հանրապետություն» օրաթերթ, Ռ. Ջարյանի հուշերը, 24.11.1993): Ի դեպ, փաստերի համակողմանի վերլուծությամբ ճիշտ նույն տեսակետին է հանգել սփյուռքահայ մեծահոջակ պատմաբան, ՀԳԱԱ արտասահմանյան անդամ, պրոֆեսոր Ռիչարդ Հովհաննիսյանը (տե՛ս Լևոն Հախվերդյան, Թումանյանը և իր ժամանակը, Երևան, 1995, էջ 84, տե՛ս նաև Գ. Գալոյան, էջ 153):

Սեր համոզմամբ՝ 1920 թ. Մայիսյան ապստամբությունը Անդրկովկասի խորհրդայնացման պլանի երկրորդ քայլն էր, որը պետք է հաջորդեր Ադրբեջանի խորհրդայնացմանը (1920 թ. ապրիլ), սակայն ինչ—ինչ պատճառներով՝ Ադրբեջանում մուսավաթական խռովության բռնկում, տեխնիկապես վատ նախապատրաստություն և այլն, չհաջողվեց: Բնականաբար հետաձգվեց նաև Վրաստանի խորհրդայնացումը: Իրադարձությունների հետագա զարգացումը անխուսափելիորեն տանում էր դեպի ամբողջ Անդրկովկասի խորհրդայնացում, և այն, ինչը չհաջողվեց 1920 թ. մայիսին, հաջողվելու էր նույն թվականի նոյեմբերին և հաջորդ տարվա փետրվարին:

Կարծում ենք նաև, որ Մայիսյան ապստամբության իրական պատմությունը շարադրելու և օբյեկտիվ գնահատական տալու ուղղությամբ անհրաժեշտ են պատմաբանների՝ կուսակցական կրթերից զերծ հետազա ջանքերը:

ԹՈՒՐԵ—ԱՂՐԵՋԱՆԱԿԱՆ ԽՈՈՎՈՒԹՅՈՒՆՆԵՐԻ ԾՆՇՈՒՄԸ

1919 թվականին Հայաստանի Հանրապետության ներքին կյանքի ամենասուր հիմնահարցերից մեկը մահմեդական հակապետական շար-

ժումներն էին, որոնք կազմակերպում էին Թուրքիան և Ադրբեջանը՝ երկրի անկախությունը վերացնելու նպատակով:

ՀՀ գոյության առաջին իսկ օրերից երկրի ներսում ապրող մահմեդական տարրը թշնամական դիրք բռնեց հայոց պետականության նկատմամբ՝ ձգտելով միանալ Ադրբեջանին կամ Թուրքիային: Վերջիններս էլ ձգտում էին Հայաստանի վրայով՝ Կարս—Սուրմալու—Ղարաբաղ—Չանգեզուր—Նախիջևան շերտով միանալ իրար:

Թուրքերի պարտությունից և Անդրկովկասից հեռանալուց հետո թուրքական իրամանատարությունը Հայաստանում և Վրաստանում՝ Աջարիայում, Ախալցխայում, Կարսում, Սուրմալուում, Շարուր—Նախիջևանում և այլուր կազմակերպեց տեղական «անկախ հանրապետություններ»՝ իրենց կառավարություններով՝ «շուրաներով»: Հայաստանի տարածքի վրա կազմակերպվեցին Արևմտյան Կովկասի հանրապետությունը՝ Կարսի շուրայով և Արևելյան Կովկասի կամ Արաքսյան հանրապետությունը, որի մեջ մտնում էին Սուրմալուն, Չանգիբասարը, Վեդիբասարը, Շարուր Նախիջևանը՝ Նախիջևան կենտրոնով: Այդ հանրապետություններում կազմված մահմեդական ջոկատները զինված էին թուրքական զենքով, նրանց ղեկավարում էին թուրք սպաներ:

Հայաստանի ներսում մահմեդական խռովությունների գլխավոր կազմակերպիչը 1919 թ. մարտին իբրև դիվանագիտական ներկայացուցիչ Ադրբեջանից երևան ուղարկված մուլի պանթուրքիստ Խան Թեքինսկին էր:

Թուրք—ադրբեջանցիների գործը հեշտանում է նրանով, որ 1919 թ. մայիսի երկրորդ կեսին անգլիական զորքերը հեռացան Կարսից և Նախիջևանից, և հայերը միայնակ մնացին իրենց փոքրաքանակ ուժերով: Այդ օրերին ՀՀ—ն ուներ 3 հետևակային բրիգադ՝ յուրաքանչյուրը երկու զնդից և գունդը՝ երեք գումարտակից, երկու հեծյալ գունդ՝ յուրաքանչյուրը վեց հարյուրյակով, 12 մարտկոց՝ 4—ական թնդանոթով, 3 գրահապատ, մի քանի տեղական զորամասեր:

Մահմեդականների խռովությունն սկսվեց Բոյուք—Վեդի գյուղից, որտեղ հարևան գյուղերի հետ միասին կային մոտ 4000 կռվողներ: Հուլիսի 1—ին Դավալուի մոտերքում մահմեդականներն սպանեցին 9 հայ զինվորների և 12 գյուղացիների: Այդ առիթով անգլիական ներկայացուցչի համաձայնությամբ և զնդապետ Ապրեսյանի իրամանատարությամբ հուլիսի 4—ին Բոյուք—Վեդին գրավելու համար ուղարկվեց հայկական մի զորամաս: Գնդապետը բանակցություններ սկսեց գյուղի ներ-

կայացուցիչների հետ, բայց մահմեդականները հանկարծակի կրակ բացեցին՝ սպանվեց 5 սպա, 30 զինվոր, 7 սպա և 120 զինվոր վիրավորվեցին: Հուլիսի 8-ին Ապրեսյանը փորձեց ուժով գրավել գյուղը, բայց հաջողություն չունեցավ:

Միաժամանակ գլուխ բարձրացրին Շարուրի և Նախիջևանի մահմեդականները: Հուլիսի կեսերին մոտ 300 ասկարներով Շահթախթ հասավ թուրքական բանակի գնդապետ խալիլ բեյը և անցավ մահմեդական շարժման գլուխ: Հուլիսի 20-21-ին ապստամբություն սկսվեց Շարուր-Նախիջևանի բոլոր կողմերում: Հայկական փոքրաթիվ զորամասերը Ջուլֆայում, Նախիջևանում, Շահթախթում և Բաշ-Նորաշենում ընկան շրջապատման մեջ: Մի քանի օրվա արյունահեղ կռիվներից հետո՝ հուլիսի 25-ին, Նախիջևանի հայկական զորքերը հայ ազգաբնակչության մի մասի հետ նահանջեցին՝ գնդապետ Կարաբեշիշյանի գլխավորությամբ:

ՀՀ կառավարությունն արտակարգ միջոցառումներ ձեռնարկեց. հայտարարվեց զորահավաք, պետական դավաճանության և դասալքության համար մտցվեց մահապատիժ:

Սկսվեց բնակչությունից զենքի հավաքագրում, Ա. Ջամալյանը նշանակվեց այդ գծով կոմիսար: Ջորակոչվեցին մինչև 40 տարեկան բոլոր սպաները: Ստեղծվեց 3 հոգուց կազմված Ապահովության կոմիտե՝ վարչապետի գլխավորությամբ:

Կառավարությունը ռազմական օգնության խնդրանքով դիմեց դաշնակիցներին, և հուլիսի 26-ին Երևան եկան անգլիական և ֆրանսիական զինվորական ներկայացուցիչներ՝ մի քանի հարյուր հնդիկ զինվորներով:

Օգոստոսի 10-ին հայկական զորքերը նոր հարձակման դիմեցին Բեյութ-Վեդիի վրա և երեկոյան գրավեցին շրջակա մի քանի գյուղեր: Սկսվեցին կատաղի մարտեր, որոնք տևեցին մի քանի օր: Հայկական զորքերին հաջողվեց ամրանալ Բեյութ-Վեդիի առջև փորված դիրքերում:

Հայաստանի խորհրդարանը օգոստոսի 15-ին հայտարարեց, որ Հայրենիքը վտանգի մեջ է և կոչ արեց ժողովրդին լարել բոլոր ուժերը՝ հաղթանակի հասնելու համար:

Օգոստոսի 7-ին մահմեդական հարձակումները սկսվեցին Կողբի շրջանում, և հայկական զորքը նահանջեց Արաքսի ափը:

Օգոստոսի 23-ին թուրքերը սկսեցին աշխուժանալ Էջմիածնի շրջանում: Ամբողջ Ձանգիբասարը հրաժարվեց ճանաչել ՀՀ իշխանությունը:

Կռիվների թատերաբեմ դարձավ նաև Կարսի նահանգը: Օգոստոսի 18-ին 18.000 թուրք-քրդական ուժեր հարձակվեցին Կաղզվանի վրա, բայց հետ մղվեցին: Օգոստոսի 22-ին 400 թուրքեր փորձեցին կտրել Սարիղամիշի երկաթուղին, սակայն օգոստոսի 30-ին հայկական ուժերը հարձակման անցան և նրանց հետ շարտեցին: Կարսի շրջանում հայկական զորամասերի հաջող գործողությունների շնորհիվ մահմեդական շարժումը ճնշվեց:

Մահմեդական շարժումների ամենաթեժ պահին Հայաստան եկավ Հաշտության կոմիտեի նախագահի Հնգի խորհրդի կողմից Հայաստանի կոմիտեի նշանակված ամերիկյան գնդապետ Ուիլիամ Հասկելը: Օգոստոսի 21-ին նա գնացքով հասավ Երևան, որին ցույց տրվեց արտակարգ հանդիսավոր ընդունելություն:

Նա մեծամեծ շատ խոստումներ տվեց, բայց դրանից վիճակն առանձնապես չթեթևացավ: Դրա փոխարեն նա շտապ մեկնեց Բաքու և օգոստոսի 29-ին համաձայնագիր ստորագրեց Ադրբեջանի կառավարության հետ, որով Շարուր-Ղարալազյազ-Նախիջևանի շրջանները ճանաչվում էին վիճելի տարածքներ, իսկ Ղարաբաղ-Ձանգեզուրը տրվում էր Ադրբեջանին: Եվ միայն Ա. խատիսյանի ու Ռ. Տեր-Մինասյանի բացատրությունները լսելուց հետո էր, որ Հասկելը չեղյալ հայտարարեց համաձայնագրի՝ Ղարաբաղ-Ձանգեզուրին վերաբերող մասը (Ս. Վ., էջ 323-325):

ՀՀ ներքին կյանքի ամենասուր հարցերից մեկը թրջաբնակ վայրերի գրավումն էր: Ձանգիբասարի, Վեդի-Բասարի, Կողբի, Շարուր-Նախիջևանի մի շարք շրջաններ շարունակում էին մնալ ապստամբ վիճակում: Այդ շրջանները ոչ միայն չէին ճանաչում ՀՀ իշխանությունը, այլև անվերջ ավազակային հարձակումներով խոչընդոտում էին երկրի վերաշինությանը:

Շարուր-Նախիջևանում իշխանությունը փաստորեն գտնվում էր Անկարայի գործակալ խալիլ բեյի ձեռքում: Նրա ազդեցության տակ էին նաև Վեդիբասարն ու Ձանգիբասարը, որտեղ կային նաև թուրք ասկյարներ, կառուցված էին ամուր դիրքեր, տեղադրված էին հրանոթներ ու գնդացիներ, կար հեռախոսակապ: Ձենքն ու զինամթերքը մատակարարում էր Թուրքիան: Առավել ուժեղ ամրացված էր Բեյութ-Վեդին:

Այդ բուրբ շրջաններից կազմվել էր այսպես կոչված Հարավարևմտյան Ադրբեջանը:

Մայիսյան ապստամբության ճնշումից հետո՝ 1920 թ. հունիսի 18-ին, Ջանգիրասարին ներկայացվեց վերջնագիր՝ Հայաստանի իշխանությունը ճանաչելու, զինաթափելու և թուրք-ադրբեջանական գործակալներին իրենց բնակավայրերից հեռանալու մասին:

Պատասխան չստանալով՝ Վաղարշապատի զորախմբին (իրամանատար՝ գնդապետ Ա. Շահմազյան) հրամայվեց գեներլ ուժով գրավել Ջանգիրասարը, որը մի քանի օրում կատարվեց: Հայկական զորամասերի դեմ կռվում էին շուրջ 400 զինված տեղական ադրբեջանցիներ և մոտ 800 թուրք ասկյարներ, որոնք ունեն 3 թնդանոթ, 8 գնդացի և առատ փամփուշտ: Հունիսի 19-ին հայկական ուժերի Նորագավիթի գորսայունը ճեղքեց հակառակորդի դիրքերը և գրավեց Հաջի-Էլլազ գյուղը: Փարաքարի և Ղարխունի զորասյուները գրավեցին մի քանի գյուղեր և հարձակում ձեռնարկեց Չոբան-Քյարա և Շուշու-Մեհմանդար գյուղերի վրա: Հակառակորդը փախավ երկաթուղագծից հարավ:

Հունիսի 21-ի լուսաբացին հայկական զորքերը կարճ կռվից հետո գրավեցին Սարաջալար և Ռամազանքենդ գյուղերը, որով և ավարտեցին Ջանգիրասարի մաքրումը թշնամի ազգաբնակչությունից:

Ջանգիրասարին զուգահեռ՝ հունիսի 18-ին հայկական զորքերը գեներալ Հովսեփյանի ընդհանուր ղեկավարությամբ և գնդապետ Միրիմանյանի անմիջական հրամանատարությամբ ռազմական գործողություններ սկսեցին Կարսի նահանգում՝ ածխահանքերը գրավելու նպատակով: Հայկական զորքերը շարժվեցին երեք ուղղություններով և երկօրյա հաջող կռիվներից հետո իրար միացան ածխահանքերի արևմտյան մասում: Հակառակորդը, խալիլ բեյի գլխավորությամբ, խայտառակ պարտություն կրեց և դիմեց փախուստի՝ հայերին թողելով երկու թնդանոթ, մեծ քանակությամբ ռազմամթերք ու պարեն: Թշնամին տվեց հարյուրավոր սպանվածներ, իսկ հայերը՝ 5 սպանված, 22 վիրավոր: Մինչև Օլթի ամբողջ տարածքն անցավ հայերի ձեռքը:

Ջանգիրասարից հետո իրականացվեց Բեյուք-Վեդիի գրավումը, որտեղ թշնամին ուներ 3000 կռվող, 3 թնդանոթ, 9 գնդացի: Ընդհանուր հրամանատարն էր թուրք սպա Մուստաֆա բեյը:

Այդ ուժերի դեմ հայկական կողմը դուրս բերեց 26 վաշտ հետևակ, 7 հարյուր հեծելազոր, 16 թնդանոթ, 1 զրահագնացք, կամավորական խմբեր: Ընդհանուր հրամանատարն էր գեներալ Շելկովնիկյանը:

Հուլիսի 10-ի երեկոյան հայկական զորամասերը Ղամարլուից և Նոր Բայազետից հարձակման անցան՝ Բեյուք-Վեդի գյուղը գրավելու նպատակով: Հուլիսի 11-ին Ղամարլուի ուղղությամբ համառ կռիվներից հետո հայկական զորքերը գրավեցին Կարայազ, Ճաթղան, Ենգիջա, Բեզլու, Ներքին Կարաբաղլար գյուղերը: Բեյուք-Վեդիից մեկ վերստ հյուսիս գտնվող Գյավուր Ղալասի լեռան մոտ թուրքերը հուսահատ դիմադրություն ցույց տվեցին:

Նոր Բայազետի ուղղությամբ հուլիսի 11-ի երեկոյան հայկական զորքերը գրավեցին Աղքիլիսա, Մաղուկ, Գյուլ և այլ գյուղեր: Նույն օրը ուշ երեկոյան հայկական 2-րդ գումարտիկը գրավեց Գյավուր Ղալասի սարը և հուլիսի 12-ի վաղ առավոտյան մտավ Բեյուք-Վեդի, իսկ թուրքերը փախան դեպի Դավալու:

Նույն օրը երեկոյան հայկական ուժերը գրավեցին Ղավալուն և Գայլի Դրունքը: Վերականգնվեց երկաթուղային հաղորդակցությունը Ղամարլուի հետ:

Ղարալագյազի ուղղությամբ հուլիսի 16-ին հայկական զորքերը գրավեցին Արաքս-Ղուշչի-Բաշ-Նորաշեն-Ախուր գիծը: Հուլիսի 16-ին հայկական զորքերի առաջխաղացումը կանգնեցվեց, որովհետև Նախիջևանի Մահմեդական ազգային խորհուրդը հաշտության խնդրանքով պատգամավորություն էր ուղարկել Երևան: Կառավարությունը ներկայացրեց կտրուկ պահանջներ՝ անվերապահ հնազանդություն, երկաթուղագծի կատարյալ ապահովություն, գեներլ ու զինամթերքի հանձնում: Պատվիրակությունը գնաց և այլևս չվերադարձավ:

Հուլիսի 22-ին ռազմական գործողությունները վերսկսվեցին, որի արդյունքում հուլիսի 25-ին հայկական զորքերը գրավեցին Շահթախքը: Թուրքերը փախան դեպի Մակու՝ Պարսկաստան, և մինչև Նախիջևան դատարկեցին ամբողջ տարածքը: Այդ ընթացքում մահմեդականներից մաքրվեց նաև Սևանա լճի արևելյան ափը:

Այսպիսով՝ 1920 թ. ամռանը ՀՀ սահմանները տարածվեցին Ղարաբաղից սկսած մինչև Օլթիի ածխահանքերը:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐՏԱՔԻՆ ԶԱՂԱՔԱԿԱՆՈՒԹՅՈՒՆԸ

Անկախության հռչակումից հետո Հայաստանի Հանրապետությունը դիվանագիտական կապեր հաստատեց մի շարք երկրների հետ:

Առաջինը Հայաստանի Հանրապետությունը ճանաչեց Թուրքիան, որը նրա հետ 1918 թ. հունիսի 4-ին ստորագրեց Բաթումի ստրկացուցիչ պայմանագիրը:

Դիվանագիտական նորմալ հարաբերություններ հաստատվեցին Վրաստանի դեմոկրատական հանրապետության հետ, իսկ Ադրբեջանի հետ հարաբերությունները խիստ լարված էին՝ սահմանային վեճերի հետևանքով:

Հայաստանի Հանրապետությունը լիազոր-ներկայացուցիչներ կամ հյուպատոսներ ուներ ԱՄՆ-ում, Բուլղարիայում, Ֆինլանդիայում, Շվեյցարիայում, Հարբշտանում և այլ երկրներում:

Դիվանագիտական կապեր էին ստեղծվել Ուկրաինայի, Դեմիկի-նի, ապա՝ Վրանգելի կառավարությունների, Կուբանի, Սիբիրի կառավարությունների հետ:

Կապեր էին հաստատվել նաև խորհրդային Ռուսաստանի հետ:

Իրենց հերթին Երևանում դիվանագիտական ներկայացուցիչներ ունեին Պարսկաստանը, Վրաստանը, Ադրբեջանը:

ՀՀ առաջին միջպետական կապերը հաստատվեցին Քառյակ միության երկրների՝ Գերմանիայի, Թուրքիայի, Ավստրո-Հունգարիայի, Բուլղարիայի հետ:

Բաթումի պայմանագրով Թուրքիան Հայաստանից զավթել էր շատ ավելի տարածք, քան նախատեսված էր Բրեստ-Լիտովսկի պայմանագրով: Այդ հողի վրա որոշ հակասություններ էին ծագել երկու դաշնակիցների՝ Թուրքիայի և Գերմանիայի միջև: Վերջինս չէր ցանկանում Թուրքիայի չափից ավելի ուժեղացումը և պաշտպանում էր Բրեստ-Լիտովսկի պայմանագիրը: Ենթադրվում էր Կոստանդնուպոլսում հրավի-

րել կոնֆերանս՝ Բաթումի պայմանագիրը վերանայելու նպատակով: Այդ կապակցությամբ 1918 թ. հունիսին Թուրքիա և Գերմանիա մեկնեցին Անդրկովկասի երեք հանրապետությունների պատվիրակները: Հայաստանից Կոստանդնուպոլիս մեկնեց Թիֆլիսի Հայոց ազգային խորհրդի նախագահ Ավետիս Ահարոնյանը, Բեռլին՝ Համո Օհանջանյանը: Նրանք մի քանի ամիս մնացին այնտեղ, սակայն պարզվեց, որ ոչ մի կոնֆերանս էլ չի գումարվելու: Այնուհետև Քառյակ միությունը առաջին համաշխարհային պատարագմից դուրս եկավ իբրև պարտված կողմ, և, բնականաբար, ուժը կորցրին ինչպես Բրեստ-Լիտովսկի, այնպես էլ Բաթումի պայմանագրերը:

ՀԱՅԱՍՏԱՆԻ ՀԱՐՑԸ ՓԱՐԻԶԻ ԿՈՆՖԵՐԱՆՍԻՄ

1918 թ. նոյեմբերի 11-ին Ֆրանսիայի Ռետոնո կայարանի մոտ գտնվող Կոմպիենի անտառում՝ սալոն-վագոնում կնքվեց զինադադար մի կողմից պարտված Գերմանիայի, մյուս կողմից՝ Ֆրանսիայի, Մեծ Բրիտանիայի և ԱՄՆ-ի միջև, որով ռազմական գործողությունները դադարեցվում էին: Պատերազմը վերջացավ Անտանտի հաղթանակով: Պատերազմի ընթացքում սպանվեց 10 միլիոն մարդ, որից Ռուսաստանին բաժին էր ընկնում 2 միլիոն 300 հազար զինվոր, Գերմանիային՝ 2 միլիոն, Ավստրո-Հունգարիային՝ 1 միլիոն 440 հազար, Ֆրանսիային՝ 1 միլիոն 383 հազար, Անգլիային՝ 744 հազար, Իտալիային՝ 700 հազար, ԱՄՆ-ին՝ 53 հազար, Թուրքիային՝ 325 հազար զինվոր: Մինչդեռ հայ ժողովուրդը կորցրեց 1,5 միլիոն մարդ:

Դեռևս 1918 թ. հոկտեմբերի 7-ին կանգնած լինելով պարտության փաստի առաջ՝ Թալեաթ փաշայի կառավարությունը հրաժարական տվեց, և երիտթուրքերի պարագլուխները փախան արտասահման՝ հիմնականում Բեռլին և Հռոմ:

1918 թ. Հոկտեմբերի 30-ին՝ Կոմպիենի զինադադարից էլ առաջ, հունական Լեմնոս կղզու Մուդրոս նավահանգստում կանգնած անգլիական «Ազամենոն» հաժանավի վրա ստորագրվեց զինադադար դաշնակիցների անունից՝ Մեծ Բրիտանիայի և պարտված Թուրքիայի միջև: Ձի-նադադարի 24-րդ հոդվածում ասված էր, որ հայկական վիլայեթներից որևէ մեկում անկարգություններ լինելու դեպքում դաշնակիցներին իրավունք է վերապահվում զրավելու նրա մի մասը:

Մուղդրոսի համաձայնագրով՝ Թուրքիայի տարածքի մեծ մասը չէր օկուպացվում դաշնակիցների կողմից, իսկ թուրքական բանակն էլ փաստորեն չզինաթափվեց, և հենց այդ հանգամանքն էլ բարենպաստ պայմաններ ստեղծեց քեմալական շարժման համար:

Մուղդրոսի գինադադարից հետո Թուրքիայում տիրապետող դիրք գրավեց դաշնակիցներից հատկապես Անգլիան, որի գործերը գրավեցին Մոսուլը, Ալեքսանդրետը և մտան Ստամբուլ, ուր հետո եկան նաև ֆրանսիական և իտալական զորքեր:

Չինադադարից հետո հաղթողների և պարտվողների միջև պետք է կնքվեր հաշտության պայմանագրերի մի ամբողջ համակարգ:

Դեռևս 1918 թ. հունվարի 8-ին ԱՄՆ-ի պրեզիդենտ Վուդրո Վիլսոնը հանդես եկավ իր հանրահայտ «14 կետերով», որոնք պարունակում էին հաշտության պայմանագրեր կնքելու համընդհանուր պահանջներ, «բաց դռների» և «ազատ ծովերի» քաղաքականություն: Այդ փաստաթղթում Հայկական հարցը առանձին չի ձևակերպվել, այլ դրվել է ընդհանուր ձևով և բավականաչափ մանվածապատ: 12-րդ հոդվածում ասված է. «Այժմյան Օտտոմանյան կայսրության թուրքական մասերի համար պետք է ապահովել կայուն սուվերենություն, բայց մյուս ժողովուրդներին, որոնք ներկայումս գտնվում են թուրքական տիրապետության տակ, պետք է ապահովել կյանքի աներկմիտ անվտանգություն և անխախտ պայմաններ՝ ավտոնոմ զարգացման համար» (Մ. Արզումանյան, Արհավիրքից վերածնունդ, Երևան, 1973, էջ 208): Ի՞նչ ավտոնոմիա, ո՞ւմ հովանավորությամբ, ո՞ւմ համար՝ պարզ չէր: Ինչպես նկատել է Մ. Արզումանյանը, ամերիկյան իմպերիալիստների համար հայկական հարցը մտցվում էր թուրքական պրոբլեմի մեջ, իսկ վերջինս դիտվում էր «ռուսական հարցի» լուծման տեսանկյունով, այսինքն հակախորհրդային ինտերվենցիայի կազմակերպման նկատառումներով (Մ. Ա., էջ 210): Մինչդեռ պատերազմի ժամանակ Վիլսոնը ի լուր աշխարհի հայտարարում էր. «Սենք ցած չենք դնի նաև զենքը, քանի դեռ Թուրքիայի ճնշված ժողովուրդները չեն ստանա իրենց ազատությունը: Թուրքիան իր դաժանություններով գերազանցեց իր ուսուցիչներին և դրանով ապացուցեց Եվրոպայում գոյություն ունենալու իր կասկածելի իրավունքը: Նա դարձել է կայզերի հավատարիմ ու արժանավոր ծառան: Հայերի ընդհանուր կոտորածը ստիպում է մեզ Եվրոպայի սահմաններից վերացնել այդ տգետ բանդան: Հայաստանը պետք է ստանա այն, ինչի համար նա պատմական իրավունք ունի: Նա կյանքի ավելի շատ իրավունք ունի,

քան Թուրքիան, քանի որ նա կարող է ավելի լավ կառավարել իրեն: Վաղ թե ուշ Թուրքիան կկանգնի տրիբունալի առջև ու պետք է հաշվետու լինի, և այն ժամանակ նրանից կպահանջեն կողոպտածը վերադարձնել իր իսկական տիրոջը» (Մ. Ա., էջ 211):

Հայերին մեծամեծ խոստումներ էին տալիս նաև Անգլիայի, Ֆրանսիայի, Իտալիայի զանազան պետական գործիչներ, բարձրաստիճան պաշտոնյաներ. Անգլիայի պրեմիեր Ասկվիթը, նրա հաջորդ Լլոյդ Ջորջը, արտգործնախարարի տեղակալ Ռոբերտ Սեսիլը, Ֆրանսիայի պառլամենտի նախագահ Պոլ Դեշանելը, արտգործնախարար Պիշոնը, վարչապետ ժորժ Կլեմանսոն, Իտալիայի վարչապետ Օռլանդոն, սենատոր Լուցաթին և ուրիշներ:

Հայերը որոշակի սպասելիքներ ունեին և նախապատրաստվում էին հաշտության կոնֆերանսին:

Դեռևս պատերազմի ժամանակ Եվրոպայում էր արևմտահայերից կազմված Ազգային պատվիրակությունը՝ եզրպտահայ մեծահարուստ Պողոս Նուբար փառայի գլխավորությամբ: Նա 1918 թ. հոկտեմբերի 29-ին և նոյեմբերի 30-ին դիմեց դաշնակիցներին, որպեսզի նրանք Հայաստանը պաշտոնապես ճանաչեն պատերազմող կողմ և հրավիրեն հաշտության կոնֆերանսին, սակայն մերժում ստացավ, քանի որ ՀՀ-ը դեռ չէր ճանաչվել իբրև պետություն:

1919 թ. հունվարի 18-ին Փարիզում բացվեց հաշտության կոնֆերանսը, որին մասնակցում էին 27 երկրների 1000 պատվիրակներ: Մասնակից պետությունները բաժանվում էին 4 կատեգորիաների, սակայն դրանցից և ոչ մեկի մեջ Հայաստանը չէր մտնում: Հայաստանի և ոչ մի ներկայացուցիչ Փարիզի հաշտության կոնֆերանսի չկանչվեց, մինչդեռ այնտեղ էին հրավիրվել Նիկարագուայի, Հոնդուրասի և այլ երկրների ներկայացուցիչներ, որոնք ոչ պատերազմ էին մղել, ոչ էլ զոհեր էին տվել:

Հաշտության կոնֆերանսին չէր հրավիրվել նաև Խորհրդային Ռուսաստանը:

Դոկտոր Դիլոնի արտահայտությամբ՝ կոնֆերանսի օրերին Փարիզը վերածվել էր «կոսմոպոլիտական քարվանսարայի», որտեղ հավաքվել էին տարբեր ժողովուրդների ներկայացուցիչներ՝ իրենց ազգային տարազներով: Իսկ Հերբերտ Ուելսի արտահայտությամբ՝ այդ «էկզոտիկ» համայնապատկերը արաբական հեքիաթի տպավորություն էր թողնում:

Կոնֆերանսի աշխատանքները ղեկավարելու համար ստեղծվեց Տասի խորհուրդը՝ կազմված ԱՄՆ-ի, Անգլիայի, Ֆրանսիայի, Իտալիայի ու Ճապոնիայի կառավարությունների ղեկավարներից ու արտգործնախարարներից, որին, սակայն, շուտով փոխարինեց Մեծ քառյակը կամ Չորսի խորհուրդը՝ ԱՄՆ-ի պրեզիդենտ Վիլսոնը, Ֆրանսիայի պրեմիեր Կլեմանսոն, Անգլիայի պրեմիեր Լլոյդ Ջորջը, Իտալիայի պրեմիեր Օռլանդոն:

Կոնֆերանսում հաստատվեց ազգային լիզայի կարգավիճակը և ընդունվեց մանդատային համակարգը: Մանդատները պետք է տար Ազգային լիգան, այն երկրներին, որոնք չէին կարող տվյալ ծանր ժամանակաշրջանում ինքնուրույնաբար կառավարվել և այս կամ այն զարգացած պետության հովանավորության կարիքն ունեին: Ենթամանդատային երկրները բաժանվեցին երեք կատեգորիաների, և Հայաստանը մտավ առաջինի մեջ, որոնք օսմանյան տիրապետության տակ եղած նախկին մարզերն էին:

Փարիզի կոնֆերանսին մասնակցելու համար 1918 թ. դեկտեմբերի 3-ին ՀՀ կառավարությունը կազմեց պատվիրակություն, որի նախագահն էր Ավետիս Ահարոնյանը, անդամներն էին Համո Օհանջանյանը և Միքայել Պապաջանյանը: Պատվիրակությունը Փարիզ հասավ փետրվարի 4-ին:

Ինչպես նշում է Մ. Արզումանյանը, հայկական երկու պատվիրակությունները գործում էին բավականաչափ անմիաբան, մինչև իսկ միմյանց դավաճան և մատնիչ էին անվանում: Եթե ազգային պատվիրակությունը Պողոս Նուբարի գլխավորությամբ ներկայացնում էր արևմտահայությանը ու հավակնում էր Միացյալ և անկախ Հայաստանի ստեղծողը լինելու, որի բաղկացուցիչ մասը պիտի լիներ «Արարատյան հանրապետությունը» (այդպես էին անվանում ՀՀ-ը արևմտահայերը — Մ. Կ.), ապա ՀՀ պատվիրակությունը Ա. Ահարոնյանի գլխավորությամբ պահանջում էր հաշվի նստել կատարված փաստի հետ ու հայոց ընդարձակ պետություն ստեղծելու համար հենակետ դարձնել գոյություն ունեցող Հայաստանի Հանրապետությունը:

Ի վերջո Ա. Ահարոնյանի պատվիրակությունն ընդունեց Պ. Նուբարի մշակած պահանջները, և 1919 թ. փետրվարի 10-ին նրանք երկուսով միասին ներկայացան Ֆրանսիայի արտգործնախարար Պիշոնին: Վերջինս խորհուրդ տվեց համատեղ հուշագիր ներկայացնել կոնգրեսին:

1919 թ. փետրվարի 12-ին հայկական երկու պատվիրակությունների նախագահները Փարիզի կոնֆերանս ներկայացրին «Հայկական պահանջների հուշագիրը»:

Այնտեղ խնդիր է դրվում դատապարտել արևմտահայության նկատմամբ երիտթուրքերի կատարած ոճրագործությունը, պատժել հանցավորներին, հատուցել վնասը և հայերին հանձնել իրենց երկիրը: Հուշագրում պահանջվում էր ստեղծել հայկական միասնական պետություն, որի մեջ պիտի մտնեին Արևմտյան Հայաստանը (Վանի, Բիթլիսի, Դիարբեքի, Խարբերդի, Սվասի, Էրզրումի, Տրապիզոնի վիլայեթները), Կիլիկիան՝ Մարաշի, Սսի, Ջեբել-Բեշլիքերթի և Ադանայի սանջակներով ու Ալեքսանդրետով, Արևելյան Հայաստանը՝ Երևանի նահանգը, Թիֆլիսի նահանգի հարավային մասը, Գանձակի նահանգի հարավարևմտյան մասը, Կարսի մարզը՝ բացի Արդահանից հյուսիս ընկած շրջաններից: Դա կազմում էր մոտ 300.000 քառակուսի կիլոմետր տարածություն (Մ. Ա. էջ 227): Նախատեսվում էր, որ հայկական նորաստեղծ պետությունը դրվի դաշնակից պետությունների կամ Ազգերի լիգայի հովանավորության տակ և պետություններից որևէ մեկին 20 տարով տրվի Հայաստանի մանդատը:

1919 թ. փետրվարի 24-ից մինչև ապրիլի 22-ը Փարիզում տեղի ունեցավ ազգային համագումար, որին մասնակցում էին հայկական գաղթօջախների 38 ներկայացուցիչներ: Ա. Ահարոնյանը և Հ. Օհանջանյանը մասնակցում էին խորհրդակցական ծայրի իրավունքով, իսկ Մ. Պապաջանյանը դեռ տեղ չէր հասել:

Համագումարը հաստատեց կոնֆերանսին ներկայացված հուշագիրը և ավելացրեց վնասների հատուցման չափը՝ մոտ 15 միլիարդ ֆրանկ արևմտահայությանը և մոտ 5 միլիարդ արևելահայությանը:

Ընտրվեց Ազգային պատվիրակության նոր կազմ. Պողոս Նուբար՝ նախագահ, պրոֆեսոր Աբրահամ Տեր-Հակոբյան՝ փոխնախագահ, անդամներ՝ Արշակ Չոպանյան, Կարապետ Փաստրմաճյան, Վահան Թեքեյան, դոկտոր Հակոբ Նևրուզ, որը պետք է ՀՀ պատվիրակության հետ միասին կազմեր Ամբողջական Հայաստանի պատվիրակություն:

1919 թ. փետրվարի 26-ին Պողոս Նուբարն ու Ավետիս Ահարոնյանը ընդունվեցին Տասի խորհրդի կողմից և ներկայացրին Հայաստանը օր առօր դաշնակից գործերով գրավելու և Հայաստանի մանդատը ԱՄՆ-ին տրամադրելու խնդրանքը: Համանման խնդրանքով դեռևս

փետրվարի 27–ին ԱՄՆ–ի պրեզիդենտ Վ. Վիլսոնի մոտ էին եղել արքեպիսկոպոս Դուրյանը և պրոֆեսոր Հակոբյանը:

1919 թ. ապրիլի 17–ին Փարիզում Վ. Վիլսոնը 20 րոպեով ընդունեց Պողոս Նուբարին և Ա. Ահարոնյանին ու նրանց հավաստիացրեց, որ ինքն աշխատում է Հայաստանին պահանջված տարածքը տրամադրելու և երկրի մանդատը վերցնելու ուղղությամբ:

Այդ կապակցությամբ, մեր կարծիքով, ընդունելի չէ Մ. Արզումանյանի անսքող թշնամական վերաբերմունքը հայ ազգային գործիչների հասցեին, որոնք, իբր, ծրագրում էին հայկական պետության ստեղծումը ԱՄՆ–ի կամ որևէ այլ իմպերիալիստական պետության գործերի օկուպացիայի միջոցով, կամ նրա այն եզրակացությունը, թե իմպերիալիստական պետությունների գավթողական ձգտումներն ու ագրեսիվ գործողությունները միայն աղետ էին բերում հայ ժողովրդին (Մ. Ա. էջ 229, 230):

1919 թ. փետրվարի 26–ին Վիլսոնը Սպիտակ տանը հայտարարեց, որ եթե ԱՄՆ–ը որևէ մանդատ ընդունի Ազգերի լիգայից, ապա առաջին հերթին նա պիտի ընդունի Հայաստանի մանդատը: Եվ, մեր կարծիքով, այս դեպքում էլ մերժելի է Մ. Արզումանյանի եզրահանգումը, թե իբր մանդատի միջոցով ամերիկյան իմպերիալիզմը ձգտում էր դաշնակցական Հայաստանը դարձնել հակախորհրդային ինտերվենցիայի պլանցդարմ: Ճիշտ է, այդ օրերին ԱՄՆ–ում հրատարակված «Ամերիկան՝ Հայաստանի մանդատատեր» գրքուկում նույնպես նշվում էր Հայաստանի տնտեսական և ստրատեգիական նշանակությունը ԱՄՆ–ի համար և այն դիտվում էր իբրև թուրքերին բուլշևիկներից բաժանող արգելք (Մ. Ա., էջ 232), սակայն չենք կարծում, թե ամեն ինչ հանգում էր միայն ու միայն դրան:

1919 թ. հունիսի 28–ին Վերսալում ստորագրվեց հաշտության պայմանագիր Գերմանիայի հետ: Փարիզի կոնֆերանսի աշխատանքի հիմնական մասը համարվեց ավարտված և մեծ պետությունների ղեկավարները մեկնեցին: Սակայն շատ հարցեր, այդ թվում նաև թուրքականը, որի հետ կապված էր նաև Հայաստանի հարցը, դեռևս չէին լուծված: Ուստի պետությունների արտաքին գործերի նախարարները մնացին և շարունակեցին հաշտության պայմանագրերի նախապատրաստումը Ավստրիայի, Հունգարիայի, Բուլղարիայի և Թուրքիայի հետ:

ՀԱՐԲՈՐԴԻ ԱՌԱՔԵԼՈՒԹՅՈՒՆ ԵՎ ՀԱՅԱՍՏԱՆՈՒՄ

Փարիզի կոնֆերանսը անդրադարձավ նաև ապագա Հայաստանի մանդատի հարցին և այն առաջարկեց ԱՄՆ–ին: Կոնֆերանսի ամերիկյան պատվիրակությունը մեծ աշխատանք տարավ Հայաստանի սոցիալ–տնտեսական և քաղաքական վիճակի մասին անհրաժեշտ տեղեկություններ հավաքելու ուղղությամբ:

Կոնֆերանսի Չորսի խորհրդի գիտությամբ ԱՄՆ–ը Թուրքիա և Անդրկովկաս գործուղեց գեներալ–մայոր Ջեյմս Հարբորդի գլխավորական առաքելությամբ, որի գլխավոր նպատակն էր պարզել Հայաստանի շահավետությունը ամերիկյան կապիտալի համար (Արիստակես Սողոմոնյան. Ջ. Հարբորդի գլխավորական առաքելությունը և Հայաստանի մանդատը: ԳԱ Լրաբեր հասարակական գիտությունների, Երևան, 1985, թիվ 9, էջ 13–23):

1919 թ. օգոստոսի 14–ին Ջ. Հարբորդը Փարիզի ամերիկյան պատվիրակության նախագահ Ֆրենկ Փոլքից ստացավ կոնկրետ հրահանգներ՝ ուսումնասիրել Հայաստանի քաղաքական, զինվորական, աշխարհագրական, վարչական, տնտեսական և այլ հարցեր: Փարիզից մեկնելուց առաջ Հարբորդը շվեդական հյուպատոսարանի միջոցով Մուստաֆա Քեմալից խնդրեց չարգելել իր առաքելության հետագա շրջագայությունը արևելյան Անատոլիայում և ստացավ վերջինիս համաձայնությունը:

1919 թ. օգոստոսի 15–ին Հարբորդի 40 հոգուց բաղկացած առաքելությունը Փարիզից մեկնեց Կ. Պոլիս: Նրա կազմում ընդգրկված էին բարձրաստիճան սպաներ, քաղաքագետներ, տնտեսագետներ, ինժեներներ և այլ մասնագետներ: Հայկական շրջանների կարծիքով՝ եթե ԱՄՆ–ը ընդուներ Հայաստանի մանդատը, ապա Ջ. Հարբորդը լինելու էր նրա առաջին կառավարիչը:

1919 թ. սեպտեմբերի 6–ին Հարբորդի առաքելությունը Կ. Պոլիսից մեկնեց Անատոլիա, եղավ Արևմտյան Հայաստանի մի շարք բնակավայրերում՝ Դիարբեքիում, Խարբերդում, Մալաթիայում, Սվասում, Երզնկայում, Էրզրումում, Կարսում: Սեպտեմբերի 29–ին Հարբորդի առաքելությունը ժամանեց Երևան: ՀՀ կառավարության երեք օր տևած նիստերում քննարկվում է Հայաստանի մանդատի հարցը, որտեղ ամերիկյան գեներալը գալիս է այն եզրակացության, որ ամերիկյան մանդատը պիտի հաստատվի ոչ միայն Հայաստանի, այլև ամբողջ Փոքր Ասիայի և Ան-

դրկովկասի վրա՝ Ալեքսանդրեաից մինչև Բաքու, այսինքն Միջերկրականից մինչև Կասպից ծով (նշվ. հողվածը, էջ 17): Գր կառավարությունը բավարարեց Զարբորդի բոլոր պահանջները և նրան տրամադրեց անհրաժեշտ փաստաթղթեր և նյութեր: Զարբորդին հանձնվեցին հանրապետության սոցիալ-քաղաքական, տնտեսական վիճակի մասին տվյալներ, հարևան պետությունների ու դաշնակիցների հետ ունեցած գաղտնի բանակցությունների ու դաշնագրերի պատճենները, կառավարության անդամների մանրամասն կենսագրությունները, Թիֆլիսի, Բաքվի, Կ. Պոլիսի հայ բուրժուազիայի ժողովների որոշումները՝ մանդատն ընդունվելու դեպքում Զայաստան գնալու իրենց պատրաստակամության մասին (նշված հողվածը, էջ 18):

Հոկտեմբերի 2-ին Զարբորդի առաքելությունը Երևանից մեկնեց Թիֆլիս, ապա՝ Բաքու: Հոկտեմբերի 6-ին առաքելությունը ժամանեց Բաթում, որտեղից էլ մեկնեց Փարիզ: Փարիզում ամերիկյան պատվիրակության նախագահին բանավոր զեկույց տալուց հետո Զարբորդը մեկնեց Վաշինգտոն, զեկուցագիր հանձնեց պրեզիդենտ Վ. Վիլսոնին և հաշվետվություն տվեց սենատին: Զարբորդի զեկուցագիրն անուղղակիորեն հաստատում էր ցեղասպանության փաստը: Ձեկուցագիրը բաղկացած էր չորս բաժնից՝ քարտեզներով և լուսանկարներով: Ընդհանուր զեկուցագրի համար հինք էին ծառայել այն 11 զեկուցագրերը, որոնք շրջագայության ընթացքում Զարբորդի հանձնարարությամբ կազմել էին առաքելության անդամները:

Ձեկուցագրում Ջ. Զարբորդը եզրակացնում է, որ անդրկովկասյան հանրապետություններից ոչ մեկն էլ ի վիճակի չէ ոտքի կանգնել, եթե նրանց վրա չհաստատվի միասնական մանդատ ոչ միայն Անդրկովկասի, այլև ամբողջ Անատոլիայի և Կ. Պոլսի վրա: Ամենամահուսալին նա համարում էր Զայաստանի դրությունը, որը ոչինչ չուներ ուժերը լարելու համար, մինչդեռ Վրաստանը գոնե ելք ուներ դեպի ծով, իսկ Ադրբեյջանը նավթ ուներ:

Միացյալ մանդատի անհրաժեշտությունը Ջ. Զարբորդը փորձում էր հիմնավորել նաև նրանով, որ Թուրքիան չմասնատելով՝ առիթ չեն տա հայերի նոր կոտորածների, իսկ առանձնացնելով Զայաստանը՝ տեղի մահմեդականներին կզրգռեն հայերի դեմ:

Ըստ Ջ. Զարբորդի հաշվարկների՝ ենթամանդատային տարածքներում կարգուկանոն պահպանելու համար անհրաժեշտ կլինեին 59 հազար զինվոր, իսկ չնախատեսված իրադարձությունների ժամանակ այդ

թիվը կարելի էր հասցնել 200.000-ի: Այդ բանակի ռազմական ծախսերը 5 տարում կկազմեին 757 միլիոն դոլար: Ջ. Զարբորդի գինվորական առաքելությունը Զայաստանի հարցի լուծման գործում փաստորեն ոչ մի էական դեր չկատարեց:

ՍԱՆ ՌԵՄՈՅԻ ԿՈՆՖԵՐԱՆՍ

Դեռևս 1919 թ. հոկտեմբերին, երբ Ազգային պատվիրակության ղեկավար Պողոս Նուբարն այցելեց Լոնդոն, Անգլիայի արտաքին գործերի նախարար լորդ Քերզոնը նրան որոշակիորեն ասաց, որ անհնար է ստեղծել Զայաստան՝ համաձայն փետրվարի 12-ի հուշագրի: Դրա փոխարեն դաշնակիցները նախատեսում են ստեղծել Զայաստան՝ Կովկասյան Զայաստանին ավելացնելով Թուրքահայաստանի մի մասը՝ ելքով դեպի Սև ծով, իսկ Կիլիկիան տրվելու է Ֆրանսիային:

1920 թ. սկզբին դաշնակից տերությունների դեսպանների՝ Լոնդոնում կայացած կոնֆերանսը մշակեց Թուրքիայի հետ կնքվելիք հաշտության պայմանագրի նախագիծը: 1920 թ. ապրիլի 19-26-ը Իտալիայի Սան Ռեմո քաղաքի Դևաշան վիլայում հրավիրվեց Անտանտի Գերագույն խորհրդի նիստը: Կոնֆերանսին մասնակցում էին Մեծ Բրիտանիայի, Ֆրանսիայի և Իտալիայի պրեմիեր-մինիստրներ Դ. Լյուդ Ջորջը, Ա. Միլերանը, Ֆ. Նիտտին, արտգործնախարարներ Քերզոնը, Բերտելոն, Սցիալոյան, Փարիզում ճապոնիայի դեսպան Մացուին: ԱՄՆ-ի ներկայացուցիչը մասնակցում էր դիտորդի կազավիճակով: Հունաստանի և Բելգիայի ներկայացուցիչները մասնակցում էին միայն իրենց երկրներին վերաբերող հարցերի քննարկմանը:

Սան Ռեմոյի կոնֆերանսը քննարկեց Թուրքիայի հետ հաշտության պայմանագրի, Ազգերի լիգայի կողմից արաբական երկրներին տրվելիք մանդատների, Գերմանիայի կողմից 1919 թ. Վերսալի հաշտության պայմանագրի ռազմական հողվածների կատարման, Խորհրդային Ռուսաստանի նկատմամբ դաշնակիցների դիրքորոշման հարցերը:

Կոնֆերանսի որոշմամբ՝ Անգլիան ստացավ Պաղեստինի և Իրաքի, Ֆրանսիան՝ Սիրիայի և Լիբանանի մանդատները:

Կոնֆերանսը որոշում ընդունեց նաև Խորհրդային Ռուսաստանի հետ առևտրական հարաբերությունները վերականգնելու մասին:

Կոնֆերանսում հաստատված Թուրքիայի հետ հաշտության պայմանագրի նախնական նախագիծը դրվեց Սևրի պայմանագրի հիմքում:

Հայաստանին վերաբերող հարցերի քննարկման ժամանակ կոնֆերանսին մասնակցելու թույլատրեցին ՀՀ պատվիրակության նախագահ Ա. Ահարոնյանին և Ազգային պատվիրակության նախագահ Պ. Նուբարին: Հետաքրքրական է, որ Վիլսոնը հեռագրեց Սան Ռեմո և հիշեցրեց Անտանտի պետություններին՝ հայկական պետություն ստեղծելու նրանց պարտքի մասին (Մ. Ա., էջ 256):

Սան Ռեմոյի կոնֆերանսում Հայաստանի հարցի արծարծումը մանրամասնորեն ներկայացված է բրիտանական պատվիրակության քարտուղարի նոթագրություններում, որ ամփոփված են անգլիական արտաքին քաղաքականության փաստաթղթերի բազմահատոր հրատարակության 8-րդ հատորում: Այդ նոթագրությունները պրոֆ. Վ. Ղիլոյանի հայերեն թարգմանությամբ հրատարակել են Ջ. Կիրակոսյանը և Ռ. Սահակյանը՝ «Բանբեր Հայաստանի արխիվների» ամսագրում (ԲՀԱ, 1972, թիվ 3, էջ 19–66), որը հետագայում ամբողջությամբ զետեղվել է հիշյալ հեղինակների կազմած «Հայաստանը միջազգային դիվանագիտության և սովետական արտաքին քաղաքականության փաստաթղթերում» (1828–1923) ժողովածուում (Երևան, 1972, էջ 612–672):

Տվյալ պահին Հայաստանի հարցի արծարծման բարդությունն ընդգծելու նպատակով Ջ. Կիրակոսյանը և Ռ. Սահակյանը նշում են, որ դեռևս 1920 թ. հունվարի 28-ին Կ. Պոլսում թուրքական պառլամենտն ընդունեց Թուրքիայի անկախության հռչակագիրը՝ «Ազգային ուխտը», որը բանաձևեց 1919 թ. հուլիս–սեպտեմբերին Էրզրումի և Սվասի համագումարների ծրագրային հարցադրումները, քեմալական ազգայնական պայքարի նպատակներն ու ծրագրային դրույթները, որտեղ առաջին պլան էր մղվում թուրքական կայսրության ամբողջականությունը փրկելու ձգտումը: Էրզրումի համագումարի ընդունած որոշման հենց առաջին կետում ընդգծվում էր Անատոլիայի վեց վիլայեթներում, այսինքն՝ Արևմտյան Հայաստանում, հայկական իշխանության ստեղծումը կանխելու անհրաժեշտությունը, որը հռչակվում էր թուրքերի սրբազան գործը: Ինքը՝ Մ. Քեմալը անհմարին էր համարում գեթ մի թիզ հող հանձնել Հայաստանին կամ որևէ այլ պետության և ասում էր. «Մենք կապրենք կամ կկործանվենք Ազգային ուխտի հետ միասին» (Ջ. Կիրակոսյան, Ռ. Սահակյան, Սան Ռեմոյի կոնֆերանսը և Հայաստանը, ԲՀԱ, Երևան, 1972 թ., թիվ 3, էջ 20):

Դրանից հետո էր, որ 1920 թ. մարտի 16-ին դաշնակից տերությունների անունից անգլիական զորքերը օկուպացրին Կոստանդնուպոլիսը (Ստամբուլ) և ցրեցին թուրքական պառլամենտը (Գ. Գալոյան, Հայաստանը և մեծ տերությունները 1917–1923 թթ., Երևան, 1999, էջ 135):

Ինչպես նշում են Ջ. Կիրակոսյանը և Ռ. Սահակյանը, արդեն 1919 թ. կեսերից Անատոլիայի վրա իր հսկողությունը հաստատած Մուստաֆա Քեմալից զինված ուժի միջոցով որևէ բան ստանալ՝ Հայաստանի Հանրապետությունն ի վիճակի չէր: Միակ ուղին հայ պետական և ազգային գործիչները շարունակում էին որոնել տասնամյակների ընթացքում հայ ժողովրդին ոչինչ չտված Անգլիայի ու Ֆրանսիայի, ԱՄՆ-ի և Իտալիայի կառավարությունների կայացնելիք որոշումներում՝ վերսալյան դիվանագիտության ֆորումներում:

Ինչպես իրավամբ նշում են հեղինակները, Անտանտի տերությունները Սան Ռեմոյում ընդունած իրենց որոշումները անկարող էին պարտադրել Թուրքիային, որովհետև այնտեղ, բացի Կ. Պոլսից ու առափնյա մի շարք շրջաններից, դրոյան տերը սուլթանը չէր, այլ հենց այդ նույն Անտանտի դեմ պայքարի դրոշ պարզած Քեմալը:

Սան Ռեմոյում գլխավոր կռիվը նավթի համար էր, ուստի շուտով ֆրանսիական զորքերի թիվը Մերձավոր Արևելքում հասավ 80 հազարի: Այս դեպքում ֆրանսիական դիվանագետները չէին տրտնջում ուժերի պակասությունից, ինչը նրանք անդամ էին Հայաստանին զինված ուժով օգնելու հարցում: Հիրավի, տարիներ շարունակ մարդասիրական կեղծ ճառեր արտասանած արևմտյան գործիչների առաջին ելակետը շահն էր, հաշիվն ու հաշվեկատությունը, այլ ոչ թե հայ ժողովրդի կենսական շահերի բավարարումը (ԲՀԱ, էջ 22):

Ապրիլի 20-ի նիստում Անգլիայի պրեմիեր-մինիստր Լլոյդ Ջորջը ուղղակի հայտարարեց, որ «եթե հայերն ի վիճակի չեն պաշտպանել իրենց սեփական սահմանները, ապա ինքը կարծում է, որ աշխարհում նման ժողովրդից ոչ մի օգուտ չկա և դաշնակից կառավարություններից ոչ մեկը պատրաստ չի լինի օգնելու նրանց թեկուզ մեկ գումարտակով»:

Ֆրանսիացիներն ասում էին, թե Ֆրանսիան չի կարող դրան ծախսել Հայաստանում, և իրենք ոչ մի հնարավորություն չեն տեսնում, թե դաշնակիցները օգնություն ուղարկեն Հայաստանին:

Սան Ռեմոյում դրվեց այն հարցը, որ տվյալ պահին Էրզրումը թուրք ազգայնականների կենտրոնն է, ուստի որևէ մեկը պետք է նրանց դուրս

հանի այնտեղից: Լլոյդ Ջորջը պարբերաբար կրկնում էր, որ դաշնակից տերություններն ի վիճակի չեն ուժեր ուղարկելու հայերին օգնության, իսկ եթե երզրունը զիջվի հայերին, ապա միակ պատասխանը, որ կտան թուրքերը, կլինի հայերին կոտորելը: Այդ դեպքում ի՞նչ են անելու իրենք. շարունակելու՞ են ջուր ծծել հայերի «մեծ հույսերի» մասին: Միակ «մեծ հույսը», որ ինքը տեսնում է, հայկական կոտորածներն են:

Ֆրանսիացի պարոն Բերտելոն ասաց, որ եթե իրենք երզրունը հռչակեն հայկական, դա կտա՞ երզրունը Հայաստանին: Երզրունը պետք է վերցվի գենքի ուժով և վերցնելիս էլ արյուն պետք է հեղվի, իսկ ինքը չի հավատում, որ հայերը, որոնք չկարողացան պաշտպանվել կոտորվելուց, դեռ մի բան էլ կշարժվեն թշնամական երկիր և կգրավեն մի ամբողջ, որ ռուսական բանակներին է դիմադրել:

Պատասխանելով այն պնդումներին, թե առանց երզրունի հայերը չեն կարող գոյություն ունենալ, Լլոյդ Ջորջն ասաց. «Եթե Հայաստանը չի կարող գոյություն ունենալ առանց երզրունի, հայերը չեն կարող գոյություն ունենալ առհասարակ: Տերությունները չեն կարող վերցնել այն և հանձնել նրանց, իսկ նրանք էլ իրենք չեն կարող վերցնել (էջ 23)»:

Առավել լկտի էր Բերտելոն, որը Հայաստանին ֆինանսական օգնություն տրամադրելու կապակցությամբ անթաքույց ասաց, որ կան հարուստ հայեր, ովքեր կարող են դրամ գտնել, և որ Հայաստանում կա արժեքավոր ունեցվածք, որը կարող է գրավ վերցվել (էջ 29):

Իսկ Պողոս Նուբարն ու Ա. Ահարոնյանը շարունակում էին ակնկալիքներ ունենալ Լոնդոնից ու Փարիզից: Այդ առումով հետաքրքրական է նրանց պահվածքը կոնֆերանսի նիստերի ժամանակ:

Ապրիլի 22-ին նիստի ժամանակ կոնֆերանսի դահլիճ հրավիրվեց Ազգային պատվիրակության ղեկավար Պողոս Նուբար փաշան: Նրան առաջադրվեց երեք հարց՝ 1. Պատրա՞ստ է Հայաստանը պաշտպանելու իր նոր սահմանները և ցանկանո՞ւմ է, նա, որպեսզի երզրունը ընդգրկվի այդ սահմաններում, 2. Հայաստանն ի վիճակի կլինի՞ վերակառուցել իր բանակը և միջոցառումներ ձեռնարկել նոր պետության ապահովության համար, 3. Հայերն ի վիճակի կլինե՞ն գրավել երզրունը, որն այժմ թուրքերի տիրապետության տակ է, և հաստատվել այդ ամբողջում:

Պողոս Նուբար փաշան ասաց, որ ինքը կասկած չունի, որ հայերը կարող են հաստատվել երզրումում և ամրապնդել իրենց դիրքերն այնտեղ: Նրանք արդեն իսկ երևանում ունեն գործասեր, որոնք կռվել են ողջ պատերազմի ընթացքում և դրսևորել իրենց իբրև գերազանց զին-

վորներ: Նրանք լիովին պատրաստ են կրկին մարտնչել և գրավել երզրունը, որի ներառումը խիստ էական է Հայաստանի նոր հանրապետության համար: Հայերն արդեն ունեն 15 հազարից ոչ պակաս բանակ և կարող են առանց դժվարության ոտքի հանել ևս 40 հազար, եթե դաշնակիցները պատրաստ են ապահովել նրանց զինամթերքով և հանդերձանքով: Ներկայումս հայ զինվորները զուրկ են ռումաճաններից և ամենևին զինամթերք չունեն: Սակայն ոչ ոք չի կարող հարցականի տակ դնել նրանց ռազմական արժեքը: Նրանք մեկ գումարտակ են տվել Ֆրանսիական արտասահմանյան լեգեոնին, որը կռվել է Ֆրանսիայում, Պաղեստինում և այլուր: Նրանք ամենաբարձր գովասանքի են արժանացել Ֆրանսիական արտագործնախարարի, ինչպես նաև Ֆելդմարշալ լորդ Ալենքիսի կողմից: Հայկական զորքերը մարտնչել են նաև ռուսական բանակի հետ և վերջում, ռուսների հեռանալու հետևանքով, նրանց ուսանելիս են մնացել պատերազմի ողջ բեռը: Ինքը և իր կոլեգաները համոզված են, որ եթե նրանց տրվի գենք, զինամթերք, հանդերձանք և սպաներ, նրանք մեծ օգուտներ կբերեն: Օրերս ինքը գրություն է ստացել Ամերիկայից, որ շուրջ 10 հազար կամավորներ պատրաստ են կիլիկիա մեկնելու: Ինչ վերաբերում է երզրումին, ապա այդտեղ տիրապետությունը բացարձակապես էական նշանակություն ունի հայկական նոր պետության ապահովության համար և այդ ամբողջը իսկապես նրա ապագայի բանալին է:

Լլոյդ Ջորջի այն հարցին, թե երզրունի գրավման համար Հայաստանն սպասո՞ւմ է դաշնակից զորքերի օգնությանը, Պողոս Նուբարը պատասխանեց, թե որքան էլ Հայաստանն ուզենար ռազմական աջակցություն ստանալ դաշնակիցներից, նրանք արդեն օգնությունը պարտադիր չեն համարում: Մ. Քեմալը, անկասկած, նշանակալից թվով մարտիկ ունի իր տրամադրության տակ, բայց ինքը չի կարծում, որ դրանք իրենց մարտական արժեքով կամ թվաքանակով հավասար լինեն այն զինվորներին, որոնց Հայաստանը կարող է մարտադաշտ հանել:

Պ. Նուբարը մեկ անգամ ևս ընդգծեց, որ չի կարելի պատկերացնել Հայաստանն առանց երզրունի: Լ. Ջորջի այն հարցին, թե արդյոք վերջին 50 կամ 100 տարվա ընթացքում երզրունի նահանգում երբևէ եղե՞լ է հայկական մեծամասնություն, Պ. Նուբարը դրական պատասխան տվեց և ավելացրեց, որ պահանջվելու դեպքում ինքը սատրաստ է ներկայացնել անհրաժեշտ վիճակագրական տվյալներ (ԲՎ, էջ 51-53):

Ապրիլի 23-ին առավոտյան նիստում սինյոր Նիտտին կոֆերանսը բացված հայտարարելուց հետո ասաց, որ հայկական պատվիրակության ղեկավար պարոն Ահարոնյանը դրսում սպասում է և շատ է անկանոն, որպեսզի Գերագույն Խորհուրդը լսի իրեն, և վերջինս իրախրվում է դահլիճ:

Սինյոր Նիտտին Գերագույն Խորհրդի անունից հարցրեց Լ. Ահարոնյանին. ենթադրենք, թե դաշնակից տերությունները պատրաստ են սպաներ, զինամթերք և հանդերձանք մատակարարել հայկական բանակներին, այդ բանակները ի վիճակի կլինե՞ն թուրքերին երգումից վտարել և իրենք հաստատվել այդ ամրոցում, ինչպես նաև ապստիվել իրենց նոր սահմանները: Երկրորդ հարցն էր՝ Հայաստանի համար ո՞րն է ամենահարմար սահմանագիծը, որ կարելի է անցկացնել:

Ա. Ահարոնյանը իրադրությունը բաժանեց երկու մասի. առաջինը՝ թուրքերի դրությունը, նրանց ուժերի տեղակայումը և երկրորդ՝ իսկական բանակի չափը և պատրաստվածությունը: Նա ասաց, որ հայկական շտաբային սպաների զեկույցների համաձայն՝ Մ. Քենալի հրամայատարության ներքո գտնվող զորքերը իրականում շատ ավելի վատույակ են, քան պատկերացվում էր: Դրանք, փոքր բացառությամբ, կանոնավոր զորքեր չեն: Թերևս նրանք կարող են կազմված լինել շուրջ 1000 կամ 2000 հեծելազորից, բայց մյուս դեպքերում կազմված են քրդարից և գյուղացիներից, որոնք վատ են զինված ու հանդերձավորված: Եթե երգումի նահանգի բնակիչները լսեցին այն Հայաստանին հանձնելու հավանականության մասին, մեծ թվաքանակներով սկսեցին լքել ու հեռանալ այնտեղից:

Շարունակելով խոսքը՝ Ա. Ահարոնյանն ասաց, որ հայերը մինչև 25 հազարանոց բանակ ունեն, և իրենց գլխավոր դժվարությունը զինամթերքի և հանդերձանքի պակասն է: Սեփական ռազմական փորձագետների կարծիքով հնարավոր է հաջորդ երկու կամ երեք ամսվա ընթացքում ոտքի հանել 40 հազարից ոչ պակաս մի բանակ, որի համար էական է զինամթերք և հանդերձանք ստանալ դաշնակիցներից, ինչպես նաև կռվել նրանց դրոշի ներքո: Եթե դաշնակիցները տրամադրեն նաև սպաներ, ապա կարճ ժամանակամիջոցում հայկական բանակն ի վիճակի կլինի առաջ շարժվել և գրավել ոչ միայն Երզրումը, այլև մյուս նահանգները: Ինքը կամենում է ոչնչել, որ Երևանը Հայաստանի իսկական մայրաքաղաքը չէ, այլ միայն նահանգային քաղաք: Ով իր ձեռքին ունենա Երզրումը, նա էլ ի վիճակի կլինի տիրապետել ողջ Հայաստան-

նին: Առանց Երզրումի անհնար է պատկերացնել ապահով հայկական պետություն:

Բնակչության վերաբերյալ Լյոյ Ջորջի հարցին Ա. Ահարոնյանը պատասխանեց, որ Հայաստանի Հանրապետությունում կա 1.292.000 բնակչություն, իսկ Երզրումի վիլայեթում բնակվում են 240 հազար թուրքեր և 230 հազար քրիստոնյաներ, իսկ 800 հազար թիվը չափազանցություն է:

Հավաստիացնելով, որ ՀՀ կառավարության մտադրությունն է շրջապատող պետությունների հետ լավ հարևան լինել՝ Ա. Ահարոնյանը հեռացավ դահլիճից (ԲՀԱ, էջ 53-56):

Լյոյ Ջորջն առաջարկեց խնդրել ԱՄՆ-ին՝ ընդունել Հայաստանի մանդատը:

Ամփոփելով իրենց խոսքը՝ Ջ. Կիրակոսյանը և Ռ. Սահակյանը չեն տարակուսում, որ ՀՀ այն ժամանակվա կառավարության քիչ թե շատ բնական դիրքորոշումը, Անտանտի ձեռքի խաղալիք դերից ռեալիստական քաղաքականության անցնելու, Խորհրդային Ռուսաստանի վրա հենվելու դեպքում անհնար չէր թուրք նացիոնալիստների սանձարձակության չափավորումը (ԲՀԱ, 1972, թիվ 3, էջ 24):

1920 թ. ապրիլի 25-ին Սան Ռեմոյի կոնֆերանսը ԱՄՆ-ի պրեզիդենտ Վ. Վիլսոնին ուղարկեց մի հռչակագիր՝ խնդրելով վերցնել Հայաստանի մանդատը, իսկ վերջնական մերժման դեպքում լինել արբիտր թուրքիայի և Հայաստանի սահմանների հաստատման հարցում՝ չորս վիլայեթներում: Խոսքը Վանի, Երզրումի, Բիթլիսի ու Տրապիզոնի վիլայեթների մասին է, որոնք պետք է մտնեին Հայաստանի մեջ՝ ելք ունենալով դեպի Սև ծով (Մ. Արզումանյան, էջ 258):

1920 թ. մայիսի 17-ին ԱՄՆ-ի պրեզիդենտ Վուդրո Վիլսոնը տվեց իր համաձայնությունը՝ ապագա Հայաստանի սահմանների որոշման արբիտր լինելու մասին, իսկ մայիսի 24-ին ուղերձով դիմեց ամերիկյան կոնգրեսին՝ Հայաստանի մանդատն ընդունելու համար: Սակայն 1920 թ. մայիսի 29-ին սենատի արտաքին գործերի հանձնաժողովը 11 ձայնով ընդդեմ 4-ի, իսկ հունիսի 1-ին սենատը 52 դեմով և 23 կողմով մերժեցին Վիլսոնի առաջարկը՝ Հայաստանի մանդատն ընդունելու վերաբերյալ: Սերժումն ուներ թե՛ տնտեսական, թե՛ քաղաքական պատճառներ. նախ Հայաստանի տնտեսական գայթակղությունը անբավարար էր թվում ամերիկացիներին և, երկրորդ, նրանց զսպում էր ամրապնդվող Խորհրդային Ռուսաստանի դեմ դուրս գալու հեռանկարը: Այդ պահին

արդեն Ադրբեջանում հաստատվել էր խորհրդային իշխանություն, և ամերիկացիները համոզված էին, որ առաջիկայում անխուսափելիորեն նույնն է տեղի ունենալու նաև Հայաստանում և Վրաստանում (Մ. Ա., էջ 261–262):

ՄԵՎՐԻ ՊԱՅՄԱՆԱԳԻՐԸ ԵՎ ՀԱՅԱՍՏԱՆԸ

Մերի պայմանագիրը վերսալյան համակարգի վերջին պայմանագիրն էր: Թուրքիայի հետ հաշվետվության պայմանագրի Սան Ռեմոյի կոֆերանսում մշակված նախագիծը քննարկվեց և հաստատվեց Փարիզից ոչ հեռու Սևր փոքրիկ քաղաքում՝ հախճապակու գործարանի դահլիճում, 1920 թ. օգոստոսի 10–ին: Պայմանագիրը կնքվեց մի կողմից՝ Թուրքիայի սուլթանական կառավարության, մյուս կողմից՝ գլխավոր դաշնակիցներ Անգլիայի, Ֆրանսիայի, Իտալիայի, Ճապոնիայի և Թուրքիայի դեմ պատերազմած մի շարք երկրների՝ Հայաստանի, Բելգիայի, Հունաստանի, Լեհաստանի, Պորտուգալիայի, Ռումինիայի, Սերբա–խորվաթա–սլովենական պետության (Հարավսլավիայի), Չեխոսլովակիայի, Չեքոսլովակիայի, Հնչագի միջև: Հայաստանի Հանրապետության ներկայացուցիչն էր Ավետիս Ահարոնյանը:

Մերի պայմանագիրը քաղկացած էր 13 մասերից, որոնք բոլորը միասին պարունակում էին 433 հոդվածներ: Այն Թուրքիային զրկում էր իր նախկին տարածքի 3/4 մասից, թուրքական տիրապետությունից ազատվում էին հայերը, արաբները, քրդերը և այլ ժողովուրդներ:

Մերի պայմանագրի 3–րդ մասի 6–րդ բաժինը՝ 88–93–րդ հոդվածները, ամբողջովին վերաբերում էին Հայաստանին: Մասամբ կամ անուղղակիորեն Հայաստանին ու հայերին էին վերաբերում նաև 125–րդ, 142–րդ, 144–րդ, 277–րդ, 349–րդ, 351–րդ, 352–րդ հոդվածները (Հայաստանը միջազգային դիվանագիտության և սովետական արտաքին քաղաքականության փաստաթղթերում (1828–1923), պրոֆ. Ջ. Կիրակոսյանի խմբագրությամբ, Երևան, 1972, էջ 672–633):

Հոդված 88–ով Թուրքիան հայտարարում էր, որ ճանաչում է Հայաստանը իբրև ազատ և անկախ պետություն:

Հոդված 89–ով Թուրքիան և Հայաստանը, ինչպես և Բարձր պայմանավորվող կողմերը, համաձայնվում էին Էրզրումի, Տրապիզոնի, Վանի և Բիթլիսի վիլայեթներում Թուրքիայի և Հայաստանի միջև սահմա-

նագատումը, ինչպես նաև Հայաստանին դեպի ծով ելք տալու մասին առաջարկը թողնել ԱՄՆ–ի որոշմանը:

Հոդված 92–ով Ադրբեջանի և Վրաստանի հետ Հայաստանի սահմանները պիտի որոշվեին շահագրգռված պետությունների ընդհանուր համաձայնությամբ, իսկ եթե նրանք չկարողանան, սահմանագիծը կորոշեն Գլխավոր դաշնակից պետությունները:

Հոդված 352–ով Հայաստանին Տրապիզոնի նավահանգստի վրայով տրվում էր ազատ մուտք դեպի Սև ծովը՝ այնտեղ Հայաստանին առհավետ վարձակալության հանձնելով մի տեղամաս:

Յետագայում ԱՄՆ–ի պրեզիդենտ Վուդրո Վիլսոնը նշեց հայ–թուրքական սահմանագիծը՝ Կիրասուն–Երզնկա–Մուշ–Բիթլիս–Վանա լիճ, որով Արևմտյան Հայաստանից շուրջ 90 հազար քառակուսի կիլոմետր տարածք միացվում էր Հայաստանի Հանրապետությանը, որի տարածքը տվյալ պահին կազմում էր մոտ 60 հազար քառակուսի կիլոմետր, և այդպիսով Միացյալ և անկախ Հայաստանն ունենում էր մոտ 150 հազար քառակուսի կիլոմետր տարածք (Հայոց պատմություն, Պասագիրը միջնակարգ դպրոցի 7–8 դասարանների համար, Երևան, 1994, էջ 276):

Վանա լիճ–Մալաթիա–Մարաշ գծից հարավ ստեղծվում էր Քրդական ինքնավարություն՝ Անգլիայի հովանավորությամբ:

144 հոդվածով չեղյալ էին հայտարարվում Օսմանյան կայսրության օրենքները՝ ոչ թուրք ժողովուրդների բռնագաղթի մասին, և նրանց իրավունք էր վերապահվում վերադառնալ իրենց բնակավայրերը, վերստանալ կորցրած կարողությունը: Հատկանշական է, որ այս հոդվածում հայկական տեղահանության և ջարդերի մասին կոնկրետ հիշատակություն չկա:

Պայմանագրի 7–րդ բաժինը կրում է «Սանկցիաներ» վերնագիրը և նվիրված է պատերազմի հանցագործների հարցին: Բաժնի 226–րդ հոդվածը նախատեսում է ռազմական դատարանին ենթարկելու այն անձանց, որոնք մեղավոր են պատերազմի օրենքներն ու սովորույթները խախտող գործողությունների մեջ և մեղավոր ճանաչվածների նկատմամբ կիրառվեն նախատեսվող պատիժներ: Եվ էլի ոչ մի կոնկրետ խոսք հայոց ցեղասպանության հանցագործների մասին:

Մերի պայմանագիրը Օսմանյան կայսրության անդամահատման պայմանագիր էր, և այդ առթիվ Լլոյդ Ջորջն ասել է. «Թուրքիան վերջնականապես բաժանված է, և մենք ոչ մի հիմք չունենք ավստսալու դրա համար. մեր առաջ հարց է ծագում, ունով փոխարինել Թուրքիան: Եվրո-

պական միակ պետությունները, որոնք ընդունակ են կատարելու այդ միսիան, մեր կարծիքով հանդիսանում են Մեծ Բրիտանիան, Իտալիան ու Ֆրանսիան»: Իսկ անգլիացի Ասկվիտը նույնիսկ էպիտաֆիա՝ տապանագիր էր կազմել, որ պետք է զարդարեր Թուրքիայի պատմական գերեզմանը (Մ. Արզումանյան, Արիավիդքից վերածնունդ, էջ 265–266):

Նույն օրը չորս Գլխավոր դաշնակիցները Սերում առանձին հատուկ պայմանագիր կնքեցին Չայաստանի հետ, որը ստորագրեցին Ա. Ահարոնյանը և Պ. Նուբարը և որով կանոնարկվում էին իրենց պահանջները Չայաստանի նկատմամբ, ընդհուպ ընտրական համակարգի մշակումը: Չի կարելի համաձայնել, սակայն, Մ. Արզումանյանի հետ, որը դրանից բխեցնում էր, թե Սերի պայմանագիրն ըստ էության Չայաստանի համար կռում էր գաղութային նոր լուծ (էջ 266): Կամ՝ «ընդհանրապես Սերի պայմանագիրը հայկական հարցի «լուծման» մի դիվային ծրագիր էր, որի նպատակն էր մեծադրորդ, բայց դատարկ խոստումների գնով դառնալ շանթարգել սոցիալիստական հեղափոխության հաղթարշավի դեմ... (էջ 267)»:

Ինչպես գրում է Մ. Արզումանյանը, Ա. Ահարոնյանը ոչ մի կասկած չունեի իմպերիալիստական դիվանագետների մութ գործերի նկատմամբ, ուստի իր օրագրում գրել է. «Կյանքիս ամենաերջանիկ օրն է այս: Երեսուն տարվա պայքարս, բողոքս, տառապանքս ու հույսերս պակսվեցին փառավոր հաջողությամբ: Թուրքական դաշնագիրն ստորագրվեց և բոլոր դաշնակից պետությունների համաժողովն այդպիսով հռչակեց Միացյալ, անկախ, ազատ Չայաստանը Սերի սրահում (Մ. Ա., էջ 267)»: Իսկ օգոստոսի 20–ին ՅՅ արտգործնախարարին նա գրել է. «Այն ոսկե գրիչը, որ նվեր ստացա Մանչեստրի գաղութի հայ ներկայացուցիչ պ. Յ. Դամբերյանից և որով ստորագրվեց Միացյալ Չայաստանի անկախությունը նվիրագործող դաշնագիրը և իմ անվանս սկզբնատառը կրող կնիքը, որը դրվեցավ դաշնագրի վրա իմ ստորագրության առջև — այդ գրիչն ու կնիքը իմ խորին համոզմունքով ինձ չեն պատկանում այլևս, այլ պատկանում է հայ ազգին: 1920 թվականին օգոստոսի 10–ի պատմական մեծ ակտի վերաբերյալ այդ հիշատակները ես որոշել եմ նվիրել մեր պետությանը՝ ապագայում հայոց ազգային թանգարանի մեջ պահելու համար (Մ. Ա., էջ 268)»:

Խոսելով այդ ժամանակաշրջանի մասին՝ վաստակաշատ պատմաբան Լեոն (Առաքել Բարախանյան) նկատել է, որ հայ ժողովրդի դժ-

բախտություններից մեկն էլ այն էր, որ նա ուներ լավ կամբայետներ, բայց վատ քաղաքագետներ (Լեո, Անցյալից, Թիֆլիս, 1925, էջ 356):

Մ. Արզումանյանը գտնում է, որ Սերի պայմանագիրը կատարյալ ֆիկցիա էր, որը չճնված մեռավ: Դեռևս պայմանագրի նախագիծը կտրականապես մերժեցին քեմալականները, այն հանդիպեց նաև դաշնակիցների խիստ առարկություններին: Սան Ռեմոյում Օռլանդոյին փոխարինած Իտալիայի պրեմիեր–մինիստր Լիտտին հայտարարեց, որ այդպիսի պայմանագիրն իրագործելու համար Իտալիան չի տրամադրի և ոչ մի զինվոր: Ֆրանսիայի ղեկավարները գտնում էին, որ իրենց երկրի շահերը ամբողջովին զոհաբերվել են անգլիական շահերին: ԱՄՆ–ը դժգոհ էր, որ դաշնակիցները թուրքական հարցը լուծել են հակառակ վիստոյան 14 կետերի, իրենց թողել են առանց նավթի, ուստի հրաժարվեցին ստորագրել այն:

Պուանկարեն ասաց, որ այդ պայմանագիրը, որն ստորագրվել է ազգային մանուֆակտուրայի կենտրոնում, նա ինքը մի փխրուն առարկա է, գուցեև քարոզված ծաղկաման, որին չի կարելի դիպչել:

Անգլիացիներն էլ հետագայում պիտի խոստովանեին, որ Սերի պայմանագիրը, որ նախապատրաստվում էր 13 ամիս շարունակ, հնացավ ավելի շուտ, քան պատրաստ էր (Մ. Արզումանյան, էջ 270):

Մ. Արզումանյանի կարծիքով՝ այդ ամենի գաղտնիքը նրանում էր, որ դաշնակիցների «հոգատարությունը» Չայաստանի նկատմամբ թելադրվում էր միայն և միայն գաղութատիրական և հպկախորհրդային ինտերվենցիայի կազմակերպման նկատառումներով (էջ 271): «Սերի պայմանագիրը հենց սկզբից դատապարտված էր ծախսողման,— գրում է Մ. Արզումանյանը,— և դա ոչ միայն այն պատճառով, որ դաշնակիցները նահանջեցին իրենց դիրքերից, այլև այն, որ այդ պայմանագիրը կնքված էր սուլթանական կառավարության հետ, իսկ Թուրքիայում դրության փաստական տերը դարձան քեմալականները: Այդ յուրահատուկ երկիշխանության պայմաններում սուլթանական կառավարությունը ենթարկվում է Անտանտին, որը 1920 թ. մարտի 16–ին օկուպացրեց Ստամբուլը, իսկ Անկարայում ձևավորվեց ազգայնական քեմալական կառավարությունը, որը վարում էր անկախ քաղաքականություն և շուտով դարձավ Անատոլիայի և ողջ Թուրքիայի փաստական իշխանությունը... Սուլթանական կառավարությունը հարկադրված էր ստորագրել Սերի պայմանագիրը, բայց դա կատարվեց Անտանտի պետությունների ճնշման տակ... Ստացվեց այնպես, որ անգամ սուլթանը չվավերացրեց

Սևրի պայմանագիրը: Ի դեպ, այն չվավերացրին ոչ պարտվողները և ոչ էլ հաղթողները (273)»:

Սևրի պայմանագիրը ավելի անկողմնակալ է գնահատել ակադեմիկոս Գալուստ Գալոյանը: Նա գտնում է, որ Սևրի պայմանագրի մշակման խնդրում վճռական նշանակություն ունեցավ այն հանգամանքը, որ թուրքիայում փաստական իշխանությունն իրենց ձեռքը վերցրած քեմալականները դաշինքի մեջ էին մտել Խորհրդային Ռուսաստանի հետ, ուստի Սևրի պայմանագրի հետապնդած նպատակներից մեկը քեմալականների վրա ճնշում գործադրելն ու նրան Խորհրդային Ռուսաստանին հակադրելն էր (Գալուստ Գալոյան, Հայաստանը և մեծ տերությունները 1917–1923 թթ., Երևան, 1999, էջ 275–276): Նա նաև այն միտքն է հայտնում, որ դաշնակիցների հաշվարկներով՝ Անկախ Հայաստանի ստեղծումը մի կողմից՝ կթուլացներ քեմալական թուրքիայի դիրքերը, իսկ մյուս կողմից՝ հուսալի պատմեչ կլիներ Խորհրդային Ռուսաստանի և նոր թուրքիայի միջև:

Գ. Գալոյանը հանգում է այն հետևության, որ եվրոպական դիվանագիտությունը սկսեց մոռանալ Հայկական հարցը, երբ համոզվեց, որ անկախ խորհրդա-թուրքական մերձեցումից՝ ռուս-թուրքական ավանդական հակասությունները պահպանել էին իրենց ուժը: Նա գտնում է նաև, որ հաշտության պայմանագրի ստորագրման ձգձգումը բացասական հետևանքներ ունեցավ, քանի որ թուրքերին հնարավորություն տվեց ոտքի կանգնելու և դաշնակիցների հետ ուժի դիրքերից խոսելու: Եվ այն հանգամանքը, որ այդ ընթացքում թուրքիայի իրական իշխանությունն իրենց ձեռքն էին վերցրել քեմալականները, Սևրի պայմանագիրը դարձնում էր մեռելածին (էջ 277–278):

Մեկնաբանելով Սևրի պայմանագրի՝ Հայաստանին վերաբերող հոդվածները՝ Գ. Գալոյանը գրում է, որ կարծես թե իրականանում էր հայ ժողովրդի դարավոր երազանքը, Արևմտյան Հայաստանն ազատավում էր և Արևելյան Հայաստանի հետ միասին ստեղծվում էր Միացյալ և Անկախ Հայաստանը: «Սևրի պայմանագիրը Արևմտյան Հայաստանի նկատմամբ հայ ժողովրդի իրավունքների միջազգային ճանաչում էր, — ընդգծում է Գ. Գալոյանը, — անկախ այն հանգամանքից, որ պայմանագիրը կյանքի չկոչվեց (Գ. Գ., էջ 279)»:

«Սևրի պայմանագրի ստորագրումը չէր վկայում, թե հարթվել էին դաշնակից տերությունների միջև Փոքր Ասիայում գոյություն ունեցող տարածայնությունները, — գրում է նա: Ընդհակառակը, դրանք ավելի

հստակեցվել էին և դարձել անհաղթահարելի... Թերևս այդ փաստի գիտակցումն էր, որ պայմանագիրը ստորագրած Կ. Պոլիսի թուրքական կառավարությունը հանդիսավորությամբ նշեց հաշտության այդ պայմանագրի ստորագրումը, մահուդի տակ դնելով նրա վավերացումը... Կասկած չկար, որ տերությունների միջև հակասություններն այնքան ակնհայտ էին, որ անհնար էր այդ կոլեկտիվ պարահանդեսի կայացումը: Չէ՞ որ թուրքերն արդեն տեսել էին, թե ինչպես էին այդ նույն դաշնակից տերություններն իրականացնում իրենց կոլեկտիվ վերահսկողությունը 1878 թ. Բեռլինի դաշնագրի կիրարկման նկատմամբ» (Գ. Գ., էջ 279):

Գ. Գալոյանն այն համոզումն էր, որ Սևրի պայմանագիրը ստորագրած խոշոր տերություններից և ոչ մեկը չի հավատացել, որ նրա հողվածները կարող էին իրագործվել, քանի որ նրանց բոլորին հայտնի էր, որ Մուստաֆա Քեմալն արդեն զենքի տակ ուներ 150 հազարանոց լավ զինված ու կարգապահ բանակ, որի դեմ եվրոպական դաշնակիցներից և ոչ մեկը զենք գործադրելու մտադրություն չուներ: «Ուրեմն, եզրակացնում է հեղինակը, — Սևրի պայմանագիրը մի մարտահրավեր էր քեմալական թուրքիային և անխուսափելի էր դարձնում հայ-թուրքական պատերազմը (էջ 280)»:

Գ. Գալոյանը մեջբերում է կատարում թուրք պատմաբան Սալահիի մի աշխատությունից, ըստ որի՝ Սևրի պայմանագրի ստորագրման լուրը ամբողջ թուրքիայում ընդունվեց դառնությամբ ու զայրույթով, և օգոստոսի 10-ը դարձավ ազգային սգի օր: Թուրքական բոլոր թերթերը սև շրջանակով էին արգելվեցին զվարճությունները, փակվեցին խանութները, ամենուրեք հնչում էին պայթարի կոչեր:

Պատմաբանի կարծիքով, եթե իրագործվեր Սևրի պայմանագիրը, այն սրելու էր նաև հայ-ադրբեջանական և հայ-վրացական հարաբերությունները, քանի որ նրանց միջև տարածքային հարցերում գոյություն ունեին անհաղթահարելի վեճեր: «Ինչ վերաբերում է Խորհրդային Ռուսաստանին, — շարունակում է նա, — որը դեռևս 1917 թ. դեկտեմբերին առաջինն էր ճանաչել արևմտահայերի ազատ ինքնորոշման իրավունքը, ընդհուպ անկախ պետություն ստեղծելը, չէր ցանկանում, որ հայերն իրենց անկախությունն ստանային Անտանտի տերությունների օգնությամբ և դրանով իսկ ընդմիշտ կախված լինեին նրանցից: Այդ Հայաստանը կխանգարեր «համաշխարհային հեղափոխության» ալիքների տարածմանը Արևելքում և Խորհրդային Ռուսաստանին ու «հեղափոխական» թուրքիային կրածաներ միմյանցից:

9. Գալոյանն իրավամբ պայթյունավտանգ է որակում նաև Սևրի պայմանագրով Քրդստանին շնորհված ինքնավարությունը, որովհետև անորոշ էր մնում Հայաստանի և Քրդստանի միջև անցնող սահմանը: Եվ եզրակացնում է. «Այսպիսով, դեռ չստեղծված «Մեծ Հայաստանը» ներքաշվում էր սուր հակասությունների մեջ ոչ միայն թուրքերի, այլև քրդերի և Անդրկովկասի մյուս ժողովուրդների հետ» (էջ 283): Պաշնակիցներն իրենց վրա էին վերցնում նաև Հայաստանում բնակվող այլազգիների շահերի պաշտպանությունը, ասել է թե՛ նրանք կարող էին ցանկացած պահին միջամտել Հայաստանի ներքին գործերին:

Յույց տալով, որ խորհրդային Ռուսաստանը զրկվում էր Սևծովյան նեղուցների վրա վերահսկողությունից, Գ. Գալոյանը գտնում է, որ Սևրի պայմանագիրը տապալելու Ռուսաստանի ձգտումը նախ և առաջ պայմանավորված էր հենց այդ հանգամանքով: Այնուհետև նա գրում է. «Միայն այն փաստը, որ դաշնակից տերությունները չկարողացան ստիպել քեմալական թուրքիային՝ ճանաչելու այդ պայմանագիրը, այն կորցնում էր իր արժեքը» (էջ 285):

Սակայն, ինչպես նկատում է վաստակաշատ պատմաբանը, Հայաստանի կառավարության ոգևորությունը դեռևս չէր մարել: «Սևրի պայմանագրի նկատմամբ ունեցած «խանդավառ ոգևորությունը» Հայաստանի կառավարողներին մղել էր Ռուսաստանի դերի թերազնահատմանը Հայ դատի լուծման խնդրում»,— գրում է նա (էջ 286): Վկայակոչելով Հ. Տերտերյանի հուշերը՝ Գ. Գալոյանը ցույց է տալիս, որ անգլիական զենքի, ռազմամթերքի ու հանդերձանքի ստացումից հետո ՀՀ պետական շրջանակներում այն սխալ մտայնություն էր տիրում, թե հայկական զորամասերը հեշտությամբ կարող են գրավել Երզրումը և Երզրումի բարձրավանդակը (էջ 287): Ընդգծվում է նաև, որ խորհրդային Ռուսաստանը վճռականորեն հանդես էր գալիս Սևրի պայմանագրի դեմ ոչ թե այն պատճառով, որ պայմանագիրն ուղղված էր թուրքիայի շահերի դեմ, այլ այն, որ արմատապես հակասում էր իր սեփական շահերին: Չհամաձայնելով խորհրդային պատմաբան Վ. Գուրկո-Կրյաժինի հետ՝ Գ. Գալոյանը մատնանշում է, որ դաշնակից տերությունները հրաժարվում էին ոչ թե Հայաստանի անպտուղ սարահարթերից, այլ իրենց որդեգրած հակաթուրքական քաղաքականությունից, որի պատճառով էլ Սևրի պայմանագիրն անիրագործելի էր (էջ 288):

Եեշտելով, որ Սևրի պայմանագիրն ստորագրվեց Փարիզի կոնֆերանսի հրավիրումից (1918 թ. հունվարի 18) ավելի քան մեկուկես տա-

րի անց, Գ. Գալոյանը նկատում է, որ այդ ընթացքում քաղաքական ուժերի վերադասավորումն ընթացավ թուրքիայի օգտին, և վերջինս սկսեց ուժի դիրքերից խոսել դաշնակիցների հետ: Այդ ընթացքում Անտանտի տերությունների հակաթուրքական դիրքորոշումը փոխարինվեց Մուստաֆա Քեմալի հետ լեզու գտնելու և նրան խորհրդային Ռուսաստանի դեմ ուղղելու քաղաքականությամբ: Դրանով Եվրոպան հրաժարվում էր թուրքիան բաժանելու պլաններից և խաչ էր քաշում արդեն ստորագրված Սևրի պայմանագրի վրա:

Սևրի պայմանագրին հակիրճ անդրադարձել է Ս. Վրացյանը, որն իր գրքում ամբողջությամբ զետեղել է պայմանագրի ամբողջ 6-րդ բաժինը՝ Հայաստանին վերաբերող 88-93 հոդվածները: Նա վկայում է, որ օգոստոսի 15-ին, դաշնագիրն ստորագրելու առթիվ, Փարիզի եկեղեցում հանդիսավոր մաղթանք կատարվեց և ճաշից հետո ՀՀ պատվիրակության շենքում պաշտոնական ընդունելություն տեղի ունեցավ: Համազգային մեծ օրը տոնելու համար շատ մեծ բազմություն հավաքվեց, ճառեր ու բանաստեղծություններ արտասանվեցին, հայրենասիրական երգեր երգվեցին՝ ի պատիվ Ազատ ու Անկախ Միացյալ Հայաստանի:

Ժողովներ ու հանդեսներ տեղի ունեցան նաև Հայաստանում, ուր նույնպես ճառեր ու բանաստեղծություններ արտասանվեցին, հայրենասիրական երգեր երգվեցին... Բայց այնտեղ շուտով պիտի երգվեին ուրիշ տեսակ երգեր (Ս. Վ., 469-470):

ՀՀ ՀԱՐԱԲԵՐՈՒԹՅՈՒՆՆԵՐԸ ԽՈՐՀՐԴԱՅԻՆ ՌՈՒՄԱՍՏԱՆԻ ՀԵՏ

Հյուսիսային Կովկասի խորհրդայնացումից հետո խորհրդային Ռուսաստանն առաջարկեց Հայաստանի Հանրապետությանը՝ պաշտոնական բանակցություններ սկսել բարեկամության պայմանագիր կնքելու նպատակով: Քանի որ Կարմիր բանակը մոտեցել էր Ադրբեջանի սահմաններին, ՀՀ կառավարությունն էլ զգում էր նման քայլի անհրաժեշտությունը:

1920 թ. ապրիլի վերջին երևանում կազմվեց պատվիրակություն՝ խորհրդարանի անդամ, դաշնակցական, բանաստեղծ Լևոն Շամթի (Սեդրոսյան, 1869-1951) նախագահությամբ, անդամներն էին Համբարձում Տերտերյանը և Լևոն Զարաֆյանը, որին հանձնարարվեց անմիջա-

պես մեկնել Մոսկվա՝ Հայաստանի անունից խորհրդային իշխանության հետ բանակցություններ վարելու և բարեկամական դաշինք կնքելու նպատակով: Պատվիրակությանը տրվեցին հետևյալ հրահանգները. 1. խորհրդային Ռուսաստանը պետք է ճանաչի Հայաստանի անկախությունը՝ Ղարաբաղով և Գյուլիստանով, 2. խորհրդային Ռուսաստանը, գոնե սկզբունքորեն, պետք է ընդունի արևմտահայ տարածքների կցումը Հայաստանին, 3. խորհրդային Ռուսաստանը չպետք է միջամտի Հայաստանի ներքին գործերին և այնտեղ կոմունիստական գործունեությունը չպիտի ծավալի, 4. խորհրդային Ռուսաստանը պիտի թույլ տա, որ Հյուսիսային Կովկասում և Ռուսաստանում գտնվող հայ գաղթականները վերադառնան Հայաստան: Տրվեցին նաև մի շարք այլ հրահանգներ:

Ս. Վրացյանի վկայությամբ՝ պատվիրակությունն անհապաղ մեկնեց Մոսկվա և այդ կապակցությամբ 1920 թ. մայիսի 4–ին հեռագիր ուղարկեց Ռուսաստանի արտգործօղկոմ Գ. Վ. Զիչերինին (1872–1936): Մայիսի 17–ին Զիչերինը հեռագրով պատասխանեց, որ խորհրդային կառավարությունը համաձայն է Հայաստանի հետ բարեկամական պայմանագիր կնքելուն և հայտնեց, որ իրենք սպասում են հայ պատվիրակներին: Նա տեղեկացրեց նաև, որ Երևանի հետ կապի դժվարություններից խուսափելու համար հայկական պատվիրակությանը տրամադրված է իրենց ուղիղ հեռագրաթելը՝ Ռոստովի և Թիֆլիսի վրայով:

Պատվիրակությունը Մոսկվա հասավ բավականին մեծ ուշացումով, հանդիպեց Գ. Զիչերինին և բանակցություններն անմիջապես սկսվեցին: Մայիսի 31–ին Շանթը ուղիղ հեռագրաթելով հաղորդեց Երևան, որ բանակցություններն արդեն սկսված են և ընթանում են հաջող: Խորհրդային կողմից բանակցությունները վարում էր Գ. Զիչերինի տեղակալ, ականավոր դիվանագետ Լևոն Կարախանը (Կարախանյան, 1889–1937):

Խորհրդային պատվիրակությունն ընդունեց Հայաստանի բոլոր պայմանները, և հունիսի 10–ին Շանթը հաղորդեց Երևան, որ ռուս–հայկական պայմանագիրն արդեն կազմված է և մի երկու օրից կստորագրվի: Սակայն 20 օր անց՝ հուլիսի 1–ին, Շանթն արդեն հեռագրում էր Երևան. «Հենց առաջին տեսակցությունից պարզվեց, որ միակ դժվարությունը Ադրբեջանի սահմանն է, որովհետև Բաքվից ամեն կերպ աշխատում են խանգարել դաշնագրի կնքումը... խորհրդային կառավարությունն ընդունում է մեր պահանջների արդար լինելը... Դաշնագրի կնքումը դանդաղում է: Խորհրդային Ադրբեջանի կառավարիչները ցան-

կանում են օգտվել ռուսական հեղինակությունից և ռուս զորքերի ներկայությունից՝ գրավել Ղարաբաղն ու Ջանգեզուրը և անվիճելի հայկական հողերը... Ռուսաստանը ցանկանում է ստանձնել իրավարարի դեր հայ–թաթարական վեճը լուծելու համար: Մոսկվայի կառավարությունը պատրաստակամություն է հայտնում Թուրքահայաստանի խնդրում հանդես գալ միջնորդի դերում Հայաստանի և Մուստաֆա Քեմալի միջև (Ս. Վ., էջ 483)»:

Ս. Վրացյանը եզրակացնում է, որ Ադրբեջանի կոմունիստները Բաքվում գտնվող հայ կոմունիստների աջակցությամբ կարողացան ազդել Մոսկվայի վրա և հետաձգել Հայաստանի հետ պայմանագրի ստորագրումը: Նրանք պատվիրակություն ուղարկեցին Մոսկվա՝ պահանջելու, որ խորհրդային իշխանությունը պայմանագիր չկնքի «դաշնակցական» Հայաստանի հետ:

1920 թ. հուլիսի 1–ին Զիչերինը հեռագրեց Հայաստանի կառավարությանը և առաջարկեց բանակցությունները տեղափոխել Երևան, որը կվարի լիազոր ներկայացուցիչ նշանակված Բորիս Լեգրանը: Վարչապետ Դ. Օհանջանյանը պատասխանեց, որ ինքը դրան դեմ չէ, պայմանով, որ բանակցությունները Երևանում սկսվեն Մոսկվայից Շանթի պատվիրակության վերադարձից հետո:

Հուլիսի 20–ին Լեգրանը հասավ Բաքու, որտեղից էլ անցավ Թիֆլիս: Այսպես է ներկայացնում հայ–ռուսական բանակցությունները դաշնակցական հեղինակ Միսոն Վրացյանը:

Խորհրդա–հայկական բանակցությունների առնչությամբ Մ. Արզումանյանը գրում է, որ Շանթի պատվիրակությունը Մոսկվա հասավ միայն մայիսի վերջին՝ մոտ մեկուկես ամիս դանդաղելով ճանապարհին ու շարաթներով կանգ առնելով Վլադիկավկազում ու Նոր Նախիջևանում: Այդ ուշացումը նա բացատրում է ոչ թե այն ժամանակվա երկաթուղային հաղորդակցության բարդությամբ, որովհետև խորհրդային կառավարությունը հայերին տրամադրել էր ճեպընթաց գնացք, որով կարելի էր մի քանի օրում հասնել Մոսկվա, այլ հայկական կողմի չկամությամբ: «Նրանք իրենց հույսերը կապել էին արևմտյան տերությունների հետ,— գրում է Ս. Արզումանյանը,— և սովետական կառավարության առաջարկը ձևականորեն չմերժելով հանդերձ, չէին ուզում նրա հետ լուրջ բանակցությունների մեջ մտնել, ամեն կերպ ձգձգում էին դրանք և վերջում էլ ձախողեցին» (Ս. Ա., Արևմտաօրից վերածնունդ, էջ 315): Այնուհետև խորհրդահայ պատմաբանը մեջ է բերում նախկին դաշնակցական

մինիստր Ա. Ղազարյանի խոսքերը, որը գրում է, թե Մոսկվա հայ պատվիրակներ ուղարկելն ավելի շատ ձևական ու նախագգուշական միջոց էր, քան թե բխում էր հայ կառավարության ոգուց: Մեջ են բերվում նաև Հանրաբժու Տերտերյանի վկայությամբ Չիչերինի հետևյալ խոսքերը. «Ղուք ձեռք բուրդը հույսերը դրել եք եվրոպական դրամատիրական պետությունների վրա: Հիշեցեք ձեր դատի անցյալը: Քանի-քանի անգամ ձեզ խաբել են այսպես կոչված մեծ պետությունները: Կստահ ենք, որ այս անգամ նա ձեր դատը պիտի զոհեն իրենց ազգային մեղ շահերի համար: Խորհրդային իշխանությունը, որպես բանվորագյուղացիական իշխանություն, միակ անկեղծ ուժն է, որ անշահախնդիր կերպով կարող է լուծել ձեր դատը: Հրաժարվեցեք դաշնակիցներից, ձեր հարցի քննությունը դուրս բերեք Սևրի խորհրդաժողովի օրակարգից և հանձնեցեք այն Խորհրդային կառավարության իրավարարության (Մ. Ա., էջ 316): Ասկայն, ըստ Մ. Արզումանյանի, արևմտյան օրիենտացիային հավատարիմ դաշնակցական կառավարությունը չուզեց նոր ուղի բռնել և դրանով թույլ տվեց ճակատագրական սխալ, որը մեծ վնաս հասցրեց հայ ժողովրդին:

Այնուհետև Մ. Արզումանյանը ցույց է տալիս, որ երբ Բ. Լեգրանի միսիան հասավ Թիֆլիս, որի կազմում էին, ի դեպ, Մ. Տեր-Գաբրիելյանը, Ա. Հովհաննիսյանը և ուրիշներ, ՀՀ կառավարությունը միաժամանակ արգելակում է նրա մուտքը Երևան, պատճառաբանելով, թե իբր Շանթի պատվիրակությունը դեռ չի վերադարձել Մոսկվայից: Այդ առթիվ Բ. Լեգրանը Թիֆլիսից հեռագրում է վարչապետ Հ. Օհանջանյանին և շեշտում, որ խորհրդային Ռուսաստանի բարեկամական մտադրությունները չեն հանդիպում Հայաստանի կառավարության համարժեք արձագանքին (Մ. Ա., էջ 318):

Այս առթիվ հետաքրքիր է նաև Թիֆլիսում ՀՀ ներկայացուցիչ Տիգրան Բեկզադյանի վկայությունը, ըստ որի՝ Կրաստանում ՌԽՖՍՀ լիազոր-ներկայացուցիչ Մ. Մ. Կիրովն իրեն ասել է, թե Խորհրդային Ռուսաստանը ոչ միայն ընդունում է Հայաստանի անկախությունը և այն տարածում նաև Տաճկահայաստանի վրա, ոչ միայն կարծում է, որ կարող է լուծել Հայկական հարցը, որը չի հաջողվել բուրդ եվրոպական պետություններին, այլև պատրաստ է նույնիսկ զինված ուժով պաշտպանել անկախ Հայաստանի սահմանները: Սակայն, ցավոք, այդ հավաստիացումներն էլ ոչ մի ազդեցություն չգործեցին և գործն առաջ չգնաց (Մ. Ա., էջ 319):

Այնուհետև Մ. Արզումանյանը եզրակացնում է, որ հայ-ռուսական բանակցությունների ծախսողման հանցավորները դաշնակներն էին: Ավելին՝ Հայկական հարցի լուծման խորհրդային կողմի առաջարկության մերժումը նա համարում է հրեշավոր ոճրագործություն, որը նոր աղետներ բերեց հայ ժողովրդին (Մ. Ա., էջ 319): Կարծում ենք, սակայն, որ նման կտրուկ և չափազանց խիստ գնահատականը օբյեկտիվ և անկողմնակալ չէ, որովհետև անտեսված է բանակցությունների ծախսողման խնդրում թուրք-ադրբեջանական գործոնի բասացական դերը:

Հայ-ռուսական բանակցությունների հարցին անդրադարձել է պրոֆեսոր Մ. Տ. Ալիխանյանը՝ «Սովետական Ռուսաստանի դերը հայ ժողովրդի ազատագրման գործում (Երևան, 1964)» մենագրության մեջ: Նա այն կարծիքն է հայտնում, որ խորհրդային կառավարությունն ամեն ինչ անում էր՝ դաշնակցականների հետ ազնիվ բանակցություններ սկսելու համար, սակայն հայ-թուրքական հարաբերությունների կարգավորման վերաբերյալ ՀՀ կառավարությունը իր պատվիրակությանը ոչ մի հրահանգ չէր տվել, որովհետև այդ հարցի որոշումը թողել էր Վիլսոնի ողորմածությանը (էջ 107): «Տեսնելով, որ ՌՍՖՍՀ կառավարությունը հաստատականորեն ձգտում է պայմանագիր կնքել դաշնակցական կառավարության հետ,— գրում է նա,— վերջինս որոշում է դադարեցնել բանակցությունները և Մոսկվայից հետ կանչել իր պատվիրակությանը (էջ 109): Այդ կապակցությամբ Տիգրան Բեկզադյանը խորհուրդ է տալիս իր կառավարությանը՝ չհամաձայնել Չիչերինի առաջարկներից և ոչ մեկին, այսպիսով ժամանակ շահել, մինչև կստացվի Անգլիայից եկած ռազմամթերքը և այն ժամանակ կարելի կլինի դիմադրել նույնիսկ ռուս զորքերին (նույն տեղում):

Վիճակն այլ կերպ է ներկայացնում ակադեմիկոս Ծ. Աղայանը՝ «Հոկտեմբերը և հայ ժողովրդի ազատագրական պայքարը, Երևան, 1982» գրքում: Նա գրում է, որ երկար բանակցություններից հետո հունիսի կեսերին վերջապես դաշնակցական պատվիրակությունը համաձայնում է, որ խորհրդային կառավարությունը միջնորդի դեր կատարի Հայաստանի և Թուրքիայի միջև, իսկ Չիչերինը խոստացավ Արևմտյան Հայաստանի որոշ տարածքներ միացնել Հայաստանին, ապահովել գաղթականների անարգել վերադարձը, Հայաստանին ձրիաբար տրամադրել մի քանի տասնյակ շոգեքարշեր ու վագոններ, նավթ, երկու մանածագործական գործարան, 2,5 միլիոն ոսկի ռուբլի, երկրագործական գործիքներ, հացահատիկ և այլն: Չիչերինը խոստացավ նաև ռուս-հայ-

կական դաշնագիրը մի երկու օրից ներկայացնել ստորագրման: Սակայն... «Պատվիրակությունը խորհրդակցելով իր կառավարության հետ, հրաժարվում է բանակցությունները շարունակելուց... Աղբբեջանի հետ ունեցած սահմանային վեճերի պատճառով հայկական պատվիրակությունը ծախողեց բանակցությունները: Նման պայմաններում էլ խորհրդային կառավարությունը 1920 թ. հուլիսի սկզբներին առաջարկեց Բ. Լեզրանի գլխավորությամբ պատվիրակություն ուղարկել Հայաստան և տեղում քննարկել սահմանային վեճերի հարցը...

Անշուշտ, եթե սովետական կառավարության հետ Չիչերինի առաջարկությունների համաձայն պայմանագիր կնքվեր, ապա հայկական տերիտորիայի խնդրի լուծումը միանգամայն այլ ընթացք կունենար: Մինչդեռ դաշնակցական կառավարությունը, հրաժարվելով դրանից, հույսը կապում էր իմպերիալիստական տերությունների ստահող խոստումների, Սևրի պայմանագրի հետ» (նշվ. աշխ., էջ 287–288):

Հիմնահարցի առնչությամբ պրոֆեսոր Ա. Եսայանը «Հայաստանի միջազգային-իրավական դրությունը 1920–1922 թթ. Երևան, 1967» գրքում գրում է, թե դաշնակցական կառավարությունը պատվիրակություն ուղարկեց Մոսկվա հասարակական կարծիքի ճնշման տակ, ստիպված: Հայաստանի կառավարությունը ցուցում էր տվել պատվիրակությանը՝ չչտապել Մոսկվա հասնելու, դրա համար էլ հայկական պատվիրակությունը Երևանից մեկնելով ապրիլի 29–ին, տարբեր առիթներով ութ օր մնաց Վլադիկավկազում, յոթ օր՝ Նոր Նախիջևանում և միայն մայիսի երկրորդ կեսին հասավ Մոսկվա: Պատճառն այն էր, որ այդ ժամանակ Լոնդոնում գաղտնի բանակցություններ էին ընթանում Անգլիայի և Թուրքիայի միջև, և Հայաստանը հույս ուներ այդ բանակցություններից ավելի շատ բան ստանալ, քան խորհրդային Ռուսաստանի հետ նորմալ հարաբերություններ հաստատելու դեպքում (Ա. Եսայան, էջ 103):

Հետաքրքիր է, որ Ա. Եսայանը բանակցությունների ծախողումը միակողմանիորեն չի բարդում հայկական կողմի վրա, այլ գրում է, որ Հայաստանում ստեղծված անորոշ դրությունը և գոյություն ունեցող կառավարության իրական իշխանության մասին տեղեկությունների բացակայությունը անհնարին դարձրին հայ-ռուսական պայմանագրի ստորագրումը Մոսկվայում, և կողմերը նպատակահարմար գտան բանակցությունները փոխադրել Երևան (Ա. Եսայան, էջ 107):

Լևոն Շանթի պատվիրակության Մոսկովյան առաքելությանը ամենայն մանրամասնությամբ անդրադարձել է պրոֆեսոր Էդ. Ջոհրաբյանը,

որն այդ կապակցությամբ շրջանառության մեջ է դրել նորահայտ արխիվային և այլ բնույթի նյութեր (Է. Ա. Ջոհրաբյան, 1920 թ. թուրք-հայկական պատերազմը և տերությունները, Երևան, 1997, էջ 47–77): Մերժելով խորհրդային պատմաբանների և ափյուռքահայ որոշ ուսումնասիրողների անվերապահ, չփաստարկված պնդումները, թե հայ-ռուսական բանակցությունների ծախողման ու պայմանագիրը չստորագրելու համար մեղավոր են միայն Հայաստանի կառավարությունը և Շանթի պատվիրակությունը, նա գտնում է, որ պատճառը պետք է փնտրել Հայաստանի հարցում Ռուսաստանի դաշնակիցների՝ խորհրդային Աղբբեջանի և քեմալական Թուրքիայի դիրքորոշման մեջ: Այդ առնչությամբ ուսումնասիրողը վկայակոչում է Բաքվից Մոսկվա՝ Լենինին, Չիչերինին և Վլադիկավկազ՝ Օրջանիկիժեին հասցեագրած հեռագրերը, որ ստորագրել էին Նարիմանովը, Մոլոտովին, Միկոյանը: Հեռագրի հեղինակները Հայաստանի դաշնակցական կառավարության հետ ամեն մի բանակցություն համարում էին ավելորդ և պահանջում էին նրա հետ ոչ մի պայմանագիր չկնքել (Է. Ջոհրաբյան, նշվ. աշխ., էջ 62, 65):

Էդ. Ջոհրաբյանը վկայակոչում է նաև հուլիսի 4–ին Մոսկվա հասած Անկարայի կառավարության արտգործնախարար Բեքիր Սամի Բեյի նամակը, որով տեղեկացվում էր, որ Հայաստանի հետ սահմանագաղտնյա հարցում իրենք կանգնած են Բրեստ-Լիտովսկի և Բաթումի պայմանագրերի սկզբունքի վրա (Է. Ջ., էջ 74): Հեղինակի կարծիքով, թուրք-աղբբեջանական այդ ճնշումն էլ Մոսկվային հարկադրեց ձեռնպահ մնալ պայմանագրի կնքումից, Շանթի պատվիրակության առաքելությունը Մոսկվայում ավարտվեց անարդյունք և առաջարկվեց հայկական կողմին՝ բանակցությունները փոխադրել Երևան (Է. Ջ., էջ 74–75):

Հիմնահարցին անդրադարձել է ակադեմիկոս Գալուստ Գալոյանը (Հայաստանը և Մեծ տերությունները 1917–1923 թթ., Երևան, 1999, էջ 238–243): Նա գտնում է, որ ՀՀ ներքին և արտաքին քաղաքական իրավիճակի ծանրացումը ստիպեցին կառավարությանը գործնական քայլերի դիմել՝ խորհրդային Ռուսաստանի հետ հարաբերությունները կազավորելու ուղղությամբ: Վերջինս էլ ձգտում էր բանակցությունների միջոցով հասնել նրան, որպեսզի Հայաստանը «չխանգարեր» իր արևելյան քաղաքականության իրագործմանը և քեմալական Թուրքիայի հետ անմիջական կապ հաստատելուն: «Այդ բանակցություններում,— գրում է Գ. Գալոյանը,— խորհրդային Ռուսաստանը խնդիր էր դրել ձեռք բերել Հայաստանի կառավարության համաձայնությունը, որպեսզի նա կտրեր

իր կապերը Ռուսաստանին թշնամի Անտանտի տերությունների հետ, հրաժարվել Սևրի պայմանագիրը ստորագրելուց և ընդունել Ռուսաստանի կառավարության միջնորդությունը հայ-թուրքական հարաբերություններում (Գ. Գ., էջ 240)»:

Գ. Գալոյանը նշում է, որ Հայաստանի պատվիրակության հետ բանակցությունները վարում էին Գ. Չիչերինը և Լ. Կարախանը, որոնք միաժամանակ շարունակում էին բանակցությունները թուրքերի հետ: Հ. Տերտերյանի վկայությամբ՝ հայ պատվիրակները փորձել են համոզել Չիչերինին, որ քննալականները անկեղծ չեն Ռուսաստանի նկատմամբ, որին Չիչերինը պատասխանել է, թե իրենք այնքան էլ միամիտ չեն:

Գ. Գալոյանի մեկնաբանությամբ՝ Լ. Շանթը մերժեց Չիչերինի, ինչպես նաև Հ. Տերտերյանի և Լ. Ջարաֆյանի առաջարկը՝ Մոսկվայում գտնվող թուրքական պատվիրակության հետ հանդիպելու և երկուստեք հետաքրքրող հարցեր քննարկելու մասին, քանի որ չունեի կառավարության լիազորությունը:

Գ. Գալոյանը գալիս է այն հետևության, որ խորհրդային Ռուսաստանի կառավարությունը ոչ պաշտոնական քայլերով փորձել է համոզել Հայաստանի պատվիրակությանը, որ եթե Հայաստանն ընդունել Ռուսաստանի պահանջները, կստանար նրա աջակցությունը տարածքային հարցերի լուծման ժամանակ: Այդ միտքը հաստատելու համար նա վկայակոչում է Հ. Տերտերյանի հուշերում խոսվող Անդրկովկասի քարտեզի մասին, որը վերջինս տեսել էր Լ. Կարախանի գրասեղանի վրա: Այդ քարտեզի մասին հանգամանորեն գրել է նաև Է. Ջոհրաբյանը: Խորանուխ լինելով փաստերի մեջ՝ Գ. Գալոյանը եզրակացնում է, որ Չիչերինն իրոք դեմ է եղել խորհրդային Ադրբեջանի կողմից վիճելի համարվող տարածքները նրան տալուն (Գ. Գալոյան, էջ 293):

Հայ-խորհրդային բանակցությունների հարցը քննարկել է սփյուռքահայ հեղինակ Ռուբինա Փիրումյանը՝ «Հայաստանը Հ.Յ.Դ.—բուլշևիկ հարաբերությունների ոլորտում 1917–1921. Երևան, 1997» գրքում: Որպեսզի պարզ լինի հեղինակի մեկնակետը, բերենք համապատասխան 7-րդ բաժնի խորագիրը՝ «Բանակցություններ ռուս-թուրքական դավադրության ստվերի տակ»:

Ռ. Փիրումյանը գտնում է, որ Մոսկվայի հետ բանակցություններ սկսելու անմիջական ազդակ հանդիսացավ Ադրբեջանի խորհրդայնացումը, և 1920 թ. ապրիլի 30-ին ՀՀ կառավարությունը Մոսկվա ուղարկեց Լ. Շանթի գլխավորած պատվիրակությունը: Նրա կարծիքով, ճան-

փորդության ավելի քան երեք շաբաթ տևելը փոխադրական միջոցների չգոյության հետևանք էր (Ռ. Փ., էջ 212): Նրա կարծիքով, պատվիրակության առաջին հանդիպումը Չիչերինի և Կարախանի հետ տեղի է ունեցել մայիսի 28-ին: Ըստ Ռ. Փիրումյանի՝ Մոսկվայի մտահոգությունն այն էր, որ Հայաստանը, իբրև դաշնակիցների կողմնակից, կարող էր թուրքերին թիկունքից հարվածել: Բուլշևիկ ղեկավարներն առաջարկում էին նաև Հայկական հարցի լուծումը թողնել Ռուսաստանի հայեցողությանը:

Ռ. Փիրումյանը գտնում է, որ եթե Լ. Շանթը, արվեստագետի զգայուն հոգի ունենալու փոխարեն ունենար ճկուն դիվանագետի ձիրք և համաձայներ հանդիպել Մոսկվայում գտնվող թուրքական պատվիրակության հետ, ապա Հայաստանը կշահեր: «Եթե հայ և թուրք պատվիրակությունները,— անթաքույց գրում է Ռ. Փիրումյանը,— առանց ռուսների միջնորդության, փորձեին իրենց հարցերը լուծել, մանավանդ՝ այն ժամանակ, երբ հայ-թուրքական հակադրությունները դեռ սաղմնային էին, զուցե կարելի կլիներ հետագա արյունահեղության առաջն առնել. զուցե հայերը կարողանային ի շահ Հայաստանի օգտագործել բուլշևիկների հանդեպ ունեցած քննալական թուրքերի անվստահությունը (Ռ. Փ., էջ 215)»:

Հետագա էջերում Ռ. Փիրումյանը փորձում է բանակցությունների ձախողումը բացատրել միայն և միայն թուրք-ադրբեջանական գործոնով և հայ բուլշևիկների գործողություններով, որն, անշուշտ, միակողմանի մոտեցում է:

ԻՐԱՂԱՐԶՈՒԹՅՈՒՆՆԵՐԸ ԶԱՆԳԵԶՈՒՐՈՒՄ, ՆԱԽԻԶԵՎԱՆՈՒՄ ԵՎ ՂԱՐԱԲԱՂՈՒՄ ԱՂՐԲԵԶԱՆԻ ԽՈՐՀՐԴԱՅՆԱՑՈՒՄԻՑ ՀԵՏՈ

Դեռևս 1919 թ. նոյեմբերի վերջերին Ջանգեզուրում Արսեն Շահ-նազյանին փոխարինել էին Սերգեյ Մելիք-Յուլյանը՝ որպես քաղաքացիական մասի կոմիսար և մայոր Ն. Ղազարյանը՝ իբրև զինվորական հրամանատար:

Ամբողջ Ջանգեզուրը բաժանվեց երկու գավառի՝ 1. Ջանգեզուրի գավառ, որի մեջ մտնում էին բուն Ջանգեզուրը՝ Գորիսը, Տաթևը և Սիսիանը, 2. Կապարգողթ, որի մեջ մտնում էին Ղափանը, Գեղվածորը, Մեղրին (Արևիք) և Գողթան:

Ձինվորական առումով շրջանը բաժանվեց 3 մասի

1. Սիսիան. հրամանատար՝ Պողոս Տեր-Ղավթյան

2. Կապարգողթ. հրամանատար՝ Գարեգին Նժդեհ

3. Բուն Ձանգեզուր (Գորիս). հրամանատար՝ գեներալ Ն. Ղազարյան: Առաջին երկուսի հրամանատարները ենթակա էին գեներալ Ն. Ղազարյանին:

Չնայած Գարեգին Նժդեհը ի պաշտոնե միայն Կապարգողթի հրամանատարն էր, սակայն իրադարձությունների բերումով 1919 թ. նոյեմբերից սկսած նա էր փաստորեն կանգնել Ձանգեզուրի ինքնապաշտպանության գլուխ:

Գարեգին Նժդեհը (Գարեգին Եղիշեի Տեր-Հարությունյան, 1886–1955) ծնվել է 1886 թ. հունվարի 1–ին Նախիջևանի գավառի Կզուռ գյուղում՝ քահանայի ընտանիքում: Նժդեհ՝ նշանակում է պանդուխտ, օտարության մեջ ապրող:

Նախնական կրթությունն ստացել է հայրենի գյուղում, ապա ուսումը շարունակել Նախիջևանի ռուսական դպրոցում, այնուհետև՝ Թիֆլիսի ռուսական դպրոցներից մեկում: Դպրոցը չավարտած՝ մտել է ԳՂԴ շարքերը:

1902 թ. ընդունվում է Պետերբուրգի համալսարանի իրավաբանական ֆակուլտետը: 1904–ին, համալսարանը չավարտած, ԳՂԴ մարմնի հանձնարարությամբ մեկնում է Պարսկաստան՝ Սալմաստ, կուսակցական քարոզչության:

1906 թ. անցնում է Բուլղարիա և ընդունվում Սոֆիայի սպայական դպրոցը, որը գերազանցությամբ ավարտելուց հետո վերադառնում է Կովկաս, որտեղից Սեբաստացի Մուրադի հայդուկային խմբի հետ մտնում է Արևմտյան Հայաստան:

Այնուհետև Գ. Նժդեհը կրկին անցնում է Պարսկաստան, ակտիվորեն մասնակցում այստեղ ծավալված հեղափոխական պայքարին:

1909–ին վերադառնում է Կովկաս՝ գեներ և զինամթերք թավրիզ տեղափոխելու նպատակով, սակայն Արաքսն անցնելիս Ջուլֆայի մոտ ձերբակալվում է, երեք տարի անցկացնում Նախիջևանի և Երևանի բանտերում:

1911–ին ազատվում է, մեկնում Բուլղարիա և իբրև սպա ծառայության անցնում բուլղարական բանակում:

1912 թ. սկսվեց Բալկանյան առաջին պատերազմը: Բալկանյան քրիստոնյա չորս պետություններ՝ Բուլղարիան, Սերբիան, Հունաստանը և Չեռնոգորիան պատերազմ սկսեցին Թուրքիայի դեմ՝ նրան Բալկանյաներից դուրս մղելու համար: Այդ պատերազմին ակտիվորեն մասնակցեց նաև հայ կամավորներից կազմված վաշտը՝ Նժդեհի և Անդրանիկի հրամանատարությամբ:

Առաջին համաշխարհային պատերազմն սկսվելուց հետո Նժդեհը վերադառնում է Կովկաս և ստանձնում Դրոյի գլխավորած հայկական կամավորական 2–րդ գնդի հրամանատարի տեղակալի պարտականությունը:

1918 թ. մայիսին Նժդեհն իր գործնաստվ ակտիվորեն մասնակցում է Ղարաքիլիսայի հերոսամարտին և վիրավորվում:

1919 թ. նոյեմբերին Նժդեհը նշանակվում է Կապարգողթի՝ Կապանի, Արևիքի (Մեղրի) և Նախիջևանի Գողթան գավառակի հայկական զինված ուժերի հրամանատար, որտեղ կար շուրջ 60 հազար հայություն: Նա կազմակերպեց Ղավթթեկյան վաշտեր, որոնք ամենաքաջ ու կարգապահ վաշտերն էին և գայլավաշտեր, որոնք բաղկացած էին 20–50 հոգուց, զինված էին ձեռնառումքերով և ուժանակներով:

1920 թ. սկզբի ամիսներին Ադրբեջանի դեմ զանգեզուրցիների մղած հաղթական կռիվները ստիպեցին մուսավաթականներին՝ հրաժարվել Ձանգեզուրի դեմ ակտիվ գործողություններից և ուժեղացնել զավթողական կռիվը Ղարաբաղի դեմ:

1920 թ. մարտին Խոսրով բեկ Սուլթանովը վերջնագիր ներկայացրեց արցախահայերին՝ պահանջելով զինաթափվել: Մերժում ստանալով՝ արդրբեջանական զորքերը կրակի մատնեցին Արցախի շուրջ 20 հայկական գյուղեր: Հրդեհվեցին Շուշիի հայկական թաղերը, սրի մատնվեցին հազարավոր հայեր:

Այդ դեպքերը լցրեցին ՀՀ կառավարության համբերության բաժակը: Գորիս–Ավրալար–Շուշի գծով Ղարաբաղ մտավ Դրոյի գլխավորած Ձանգեզուր–Ղարաբաղյան էքսպեդիցիոն ջոկատը, իսկ Ղափանի ուժերից կազմված մեկ այլ ջոկատով Նժդեհը մտավ Դիզակ:

Մտնելով Շուշի՝ Դրոն 1920 թ. ապրիլի 26–ին հայրենասիրական կոչով դիմեց արցախահայերին՝ կռվել մինչև հաղթանակ:

Սակայն այդ պահից սկսած իրադարձությունների ընթացքը կտրուկ փոխվեց: 1920 թ. սկզբներին խորհրդային Ռուսաստանի կառավարությունը եկավ այն համոզման, որ հասել է Ադրբեջանի, Հայաստանի և Վրաստանի հանրապետությունների ազգային կառավարությունների տապալման և երկրամասում ռուսական նախկին կայսրության մինչպատերազմյան սահմանները վերականգնելու պահը (Արամ Սիմոնյան, Ջանգեզուրի գոյամարտը 1920–1921 թթ., Երևան, 2000, էջ 44):

Աշխատանքները մոտիկից ղեկավարելու համար 1920 թ. ապրիլի 8–ին ստեղծվեց ՌԿ(Բ)Կ Կենտկոմի Հյուսիս–Կովկասյան բյուրո, որի մեջ մտան Գ. Օրջոնիկիձեն և Ս. Կիրովը, որոնք միաժամանակ կովկասյան ճակատի ռազմիկխորհրդի անդամներ էին:

Անդրկովկասի շուրջ ստեղծված իրադրության մասին ահա թե ինչ է գրում նորագույն հետազոտող, պատմագիտության դոկտոր Արամ Սիմոնյանը, որի հիմնարար մենագրությունը բանալի նշանակություն ունի շատ ու շատ հիմնահարցերի նորոպի պարզաբանման ու մեկնաբանման տեսակետից: «Դեռևս 1920 թ. ապրիլի 15–ին, այսինքն՝ Ադրբեջանի խորհրդայնացումից երկու շաբաթ առաջ, Կովկասյան ճակատի ռազմա-հեղափոխական խորհրդի անդամ Օրջոնիկիձեի հետ ունեցած հեռախոսային զրույցի ժամանակ 11–րդ բանակի հրամանատար Մ. Կ. Լևանդովսկին նրան հաղորդել էր, որ քեմալական կառավարությունը Դադստանում գտնվող երիտթուրք պարագլուխներ Նուրի և Խալիլ փաշաներին հրահանգել է՝ իրենց զինված ուժերի հետ միասին թողնել այդ մարզի սահմանները: Իր հերթին Խալիլ փաշան Անկարայի կառավարությունից թույլտվություն էր խնդրել՝ վերակազմել իրեն ենթակա զորամասերը, այդ զորամասերի հետ Դադստանից անցնել Բաքու, ապա այնտեղից շարժվել դեպի Ղարաբաղ, Ջանգեզուր և Նախիջևան, տարածքներ, որոնք խորհրդային Ռուսաստանի կառավարությունը մտադիր է «վիճելի» հայտարարել: Ընդ որում, թուրք փաշաներն ուզում էին ավելի շուտ մտնել Բաքու, քան այդ կիսսցներ անել 11–րդ Կարմիր բանակը...

Սակայն քեմալականների՝ Ադրբեջանում հիմնավորվելու ծրագիրը ձախողվեց... Ռուսական բոլշևիկյան կառավարությունը արագացրեց Ադրբեջանի և Անդրկովկասի մյուս տարածքները խորհրդայնացնելու ուղղությամբ տարվող աշխատանքները:

Նախատեսվեց Անդրկովկաս մտնել Ադրբեջանի սահմաններից (Արամ Սիմոնյան, Ջանգեզուրի գոյամարտը 1920–1921 թթ., Երևան,

2000, էջ 45): Դժվար չէ կռահել, թե ինչ տեղի կունենար, եթե քեմալականների պլանը չձախողվեր:

Անդրկովկասի խորհրդայնացման նախօրյակին Կարմիր բանակի համար ստեղծվել էին նպաստավոր պայմաններ: Կովկասյան ռազմա-ճակատի հրամանատար Մ. Տուխաչևսկին և ռազմխորհրդի անդամ Ս. Օրջոնիկիձեն 1920 թ. ապրիլի 21–ին Պետրոպոլսկից հրաման արձակեցին Բաքվի վրա հարձակում սկսելու և Ադրբեջանը գրավելու մասին:

1920 թ. ապրիլի 27–ի վաղ առավոտյան 11–րդ Կարմիր բանակի զորամասերը բանակի հրամանատար Մ. Լևանդովսկու հրամանով անցան Ադրբեջանի մուսավաթական հանրապետության սահմանը և շարժվեցին դեպի Բաքու: Ապրիլի 28–ին մուսավաթական կառավարությանը վերջնագիր ներկայացվեց՝ իշխանությունը հանձնելու մասին: Բաքում և Ադրբեջանի մնացած տարածքները գրավվեցին գրեթե առանց կրակոցի: Այդ առթիվ Արամ Սիմոնյանը գրում է. «Ադրբեջանի քաղաքագետները՝ մուսավաթական թե բոլշևիկ, լավ ըմբռնելով իրենց ազգային ընդհանուր շահերը, ներքին պայմանավորվածությամբ փոխեցին հանրապետության ցուցանակը» (Ա. Սիմոնյան, էջ 47):

Ադրբեջանի խորհրդայնացումը և 11–րդ բանակի զորամասերի՝ Վրաստանի և Հայաստանի սահմաններին մոտենալը կտրուկ փոխեցին իրադրությունն Անդրկովկասում:

1920 թ. ապրիլի 30–ին Ադրբեջանի հեղկոմը ՀՀ կառավարությանը ներկայացրեց հետևյալ վերջնագիրը. «Ադրբեջանի ՍԽՀ բանվորագյուղացիական կառավարությունը, ի դեմս հեղափոխական կոմիտեի, պահանջում է, նախ՝ ձեր զորքերից մաքրել Ղարաբաղի և Ջանգեզուրի տարածքը, երկրորդ՝ ետ քաշվել դեպի ձեր սահմանները, երրորդ՝ դադարեցնել ազգամիջյան ջարդը: Հակառակ դեպքում ԱՍԽՀ հեղկոմը իրեն կհամարի ՀՀ հետ պատերազմական վիճակում: Նուտայի պատասխանը պետք է ստացվի եռօրյա ժամկետում»: Վերջնագիրը ստորագրել էր արտաքին գործերի կոմիսարի տեղակալ Հուսեյնովը:

Այդ լկտի վերջնագրին ՀՀ արտգործնախարար Հ. Օհանջանյանը մայիսի 1–ին պատասխանեց, որ Ադրբեջանի տարածքում ոչ մի տեղ հայկական զորամասեր չեն եղել ու չկան: Իր հերթին ՀՀ կառավարությունն Ադրբեջանի նոր կառավարությունից խնդրում էր զորքերը դուրս բերել հայկական Լեռնային Ղարաբաղի սահմաններից, որպեսզի այնտեղ անցկացվի հանրաքվե:

Նույն օրը՝ մայիսի 1-ին, ՀՀ կառավարությունը սպառնալից վերջնագիր ստացավ 11-րդ Կարմիր բանակի հրամանատարությունից, որով պահանջվում էր 24 ժամվա ընթացքում Ադրբեջանին հանձնել Ղարաբաղը և Ջանգեզուրը: Վերջնագիրը ստորագրել էին Կովկասյան ռազմաճակատի ռազմհեղխորհրդի անդամ Օրջոնիկիձեն, 11-րդ բանակի ռազմհեղխորհրդի անդամներ Կիրովը, Մեխանոշինը, Լևանդովսկին (Ա. Սիմոնյան, էջ 50-53):

Հայաստանի պառլամենտը 1920 թ. մայիսի 3-ի արտակարգ նիստում քննարկեց ստացված վերջնագրերը: Ընդհանուր տրամադրությունն այն էր, որ ՀՀ կառավարությունը պետք է բանակցի խորհրդային Ռուսաստանի հետ՝ պահպանելով Հայաստանի անկախությունը:

Վիճակն ավելի բարդացավ Հայաստանում Մայիսյան ապստամբության բռնկմամբ, որը, սակայն, արագորեն ճնշվեց:

ՀՀ կառավարությանը վերջնագիր ներկայացնելուց հետո խորհրդային Ռուսաստանի կառավարությունը Կովկասյան ճակատի հրամանատարությանը ցուցում տվեց անհապաղ զորքեր մտցնել Լեռնային Ղարաբաղ, Ջանգեզուր և Նախիջևան և հսկողության տակ առնել հիշյալ վիճելի տարածքները: 1920 թ. հուլիսի սկզբին ՌԿ(Բ)Կ Կենտկոմի ընդունած հատուկ որոշման մեջ հանձնարարվում էր բնակչությանը բացատրել, որ այդ տարածքները գրավվում են ժամանակավորապես՝ ազգամիջյան կոտորածներ թույլ չտալու համար, իսկ դրանց պատկանելության հարցը կլուծվի խառը հանձնաժողովի միջոցով, Ռուսաստանի ներկայացուցչի նախագահությամբ՝ ղեկավարվելով բնակչության կամքով:

Մուսավաթական բանակն արագորեն վերակազմվեց խորհրդային Ադրբեջանի Կարմիր բանակի, իսկ մուսավաթական բանակի նախկին սպաները դարձան «կարմիր» հրամանատարներ:

1920 թ. մայիսի 5-ին 11-րդ Կարմիր բանակի 32-րդ դիվիզիայի զորամասերը գրավեցին Աղստաֆան և դուրս եկան Ղազախ: Մեկ այլ ուղղությամբ կարմիր զորքերը գրավեցին Եվլախը և մայիսի 9-ին մտան Աղդամ: Այդ ընթացքում մուսավաթական բանդաները վերակազմավորվում և իրենց հայտարարում են Կարմիր բանակի զորամասեր:

1920 թ. մայիսի երկրորդ կեսին ստեղծվեց ՌԿ(Բ)Կ Կենտկոմի Կովկասյան բյուրոն հետևյալ կազմով. Բելորոբորով, Օրջոնիկիձե, Մոխլանի, Ֆրունկին, Կիրով, Յան Պոլույան, Օրախելաշվիլի, Նազարեթյան: Նրա գլխավոր խնդիրն էր ողջ Կովկասում և Անդրկովկասում խորհրդային իշխանության հաստատումը:

1920 թ. մայիսի կեսերին 11-րդ բանակը՝ Ադրբեջանի Կարմիր բանակի զորամասերի հետ միասին, մոտեցավ Լեռնային Ղարաբաղի սահմաններին: Մայիսի 19-ին Կարմիր բանակի պատվիրակությանը Շուշիում ընդունեց Դրոն (Դրաստամատ Կանայան), որը ՀՀ կառավարության կարգադրությամբ իր զորամասով Ջանգեզուրից անցել էր Ղարաբաղ և Շուշիում ստեղծել իր ժամանակավոր կառավարությունը:

Ընակցություններն արդյունք չտվեցին, և 11-րդ Կարմիր բանակի հրամանատարությունը հրամայեց 32-րդ դիվիզիայի հրամանատար Շտեյգերին՝ գրավել Լեռնային Ղարաբաղը և շարժվել դեպի Ջանգեզուր:

Շուտով 32-րդ հրաձգային դիվիզիան մտավ Շուշի: 11-րդ բանակի հրամանատար Մ. Լևանդովսկու և ռազմհեղխորհրդի լիազոր Ս. Տեր-Գաբրիելյանի հետ այստեղ եկավ մաս Ս. Օրջոնիկիձեն: Շուշին հայտարարվեց խորհրդային, և Դրոյին առաջարկվեց հեռանալ Ղարաբաղից:

Մայիսի 24-ին Ավետարանոց գյուղում Դրոն խորհրդակցություն հրավիրեց և հայտնեց, որ ՀՀ կառավարությունը համաձայն է զորքերը հանել Ղարաբաղից: Դրան խստորեն հակառակվում է Լեժեիզ, անգամ մենամարտի կանչում Դրոյին և արժանանում վերջինիս «Դերասան շան որդի» որակավորմանը: Հետագայում, ինչպես գրում է Ա. Սիմոնյանը, նրանց անձնական հարաբերություններն ավելի բարդացան (Ա. Ս., էջ 79):

Մայիսի 25-ին Դրոն իր զորամասով հեռացավ Ղարաբաղից, և ամբողջ երկրամասը դարձավ խորհրդային:

Ղարաբաղի գրավումը ազդակ դարձավ Ջանգեզուրի բուլշևիկների համար, դիմելու ապստամբության: Դեռևս 1920 թ. մայիսի 5-ին Գորիսում կազմակերպվել էր ՌԿ(Բ)Կ Ջանգեզուրի ժամանակավոր Կենտրոնական կոմիտե, որի նախագահն էր Հակոբ Կամարին, անդամներն էին Երեմիա Բակունցը, Քրիստափոր Մկրտչյանը, Մակիչ Մաշուրյանը, Բազրատ Հարությունյանը և ուրիշներ:

Մայիսի 18-ին գինված ելույթներ եղան Սիսիանի շրջանի Բռնակոթ, Բնունիս, Ախաթյան, Ղարաքիլիսա և այլ գյուղերում:

Սակայն ապստամբությունը չայն ծավալ ընդունեց հատկապես բուն Ջանգեզուրի՝ Գորիսի շրջանի Խնձորեսկ գյուղում, որն ամենամեծ գյուղն էր և ուներ 8.000 բնակիչ, իսկ բուլշևիկյան կազմակերպությունն ուներ 75 անդամ: Նրանց հետևից գնում էր գյուղացիության մեծ մասը: Ընտրվեց Խնձորեսկի հեղկոմ՝ Հայկ Սիլանյանի նախագահությամբ:

Հեղկոմը զինեց գյուղի կոմունիստներին և մայիսի 27-ի առավոտյան ապստամբություն բարձրացրեց, որին մասնակցում էին հարյուրավոր գյուղացիներ: Ապստամբները գրավեցին զինապահեստը, ձերբակալեցին կառավարության պաշտոնյաներին: Գյուղում հայտարարվեց խորհրդային իշխանություն:

Դրոն Կոռնիժորից իր զորամասով շարժվեց Խնձորեսկի վրա և գրավեց գյուղը:

Հեղկոմներ ստեղծվեցին նաև Սիսիանի շրջանի Բռնակոթ, Անգեղակոթ և այլ գյուղերում:

Սակայն Մայիսյան ապստամբությունը զանգեզուրում ճնշվեց:

Վիճակը չափազանց բարդ էր Ձանգեզուրին հարող Նախիջևանի գավառում: Դեռևս 1919 թ. ամռանը այստեղ մուսավաթականները թուրքական զորքերի օժանդակությամբ ապստամբություն էին բարձրացրել և գավառն անջատել Հայաստանի Հանրապետությունից: ՀՀ բանակը շարունակում էր կռիվը՝ Նախիջևանը վերագրավելու համար, մանվանդ որ դաշնակիցները և առաջին հերթին Անգլիան այն պաշտոնապես ճանաչել էին իբրև Հայաստանին պատկանող տարածք: Հայկական զորքերը ստիպված էին կռվել ոչ միայն Նախիջևանում բուն դրած մուսավաթական ուժերի, այլև քեմալական Թուրքիայի՝ այստեղ մտած զորքերի դեմ: Նախքան կարմիր զորքերի Նախիջևան մտնելը գավառ էր ներխուժել 15-րդ կորպուսի հրամանատար Քյազիմ Կարաբեքիրին ենթակա բայազետյան 9000-անոց դիվիզիան: Նախիջևանը կորցնելու վտանգը խորհրդային իշխանություններին ստիպում էր ժամ առաջ մուտք գործել այնտեղ, իսկ դա հնարավոր էր միայն Ձանգեզուրը գրավելուց հետո:

1920 թ. մայիսի վերջերին Կարմիր բանակի ստորաբաժանումները երևացին Ղազախի և Քարվանսարայի շրջաններում: Սակայն 1920 թ. մայիսի 26-ին Գյանջայում (Ելիզավետպոլ) սկսվեց մուսավաթական հակախորհրդային ապստամբություն, որը գլխավորում էր թուրք գեներալ Նուրի փաշան: Խռովությունն ընդգրկեց նաև Լենքորանի շրջանը: 1920 թ. հունիսի 3-ին մուսավաթականները գրավեցին Շուշին, որտեղ խորհրդային իշխանությունը տապալվեց:

Թուրք-մուսավաթական հակախորհրդային խռովությունը ճնշելու համար Կարմիր բանակի զորամասերը դիմեցին վճռական գործողությունների: Ղարաբաղ ուղարկվեց Շտեյգերի 32-րդ հրաձգային դիվիզիան և Կուրիշկոյի 18-րդ հեծյալ դիվիզիան, Լուսինիչի ավիացիոն ջոկատը: Հունիսի 15-ին կարմիր զորքերը վերագրավեցին Շուշին:

Շուրջ 20 օր տևած կռիվների ընթացքում Կարմիր բանակը դաժանորեն ճնշեց մուսավաթական խռովությունը նաև մյուս վայրերում: Խռովարարները հունիսի 13-ին Նուրի փաշայի գլխավորությամբ փախուստի դիմեցին:

Գյանջայում և հարակից շրջաններում մուսավաթական խռովությունը ճնշելուց և խորհրդային իշխանությունը Ղարաբաղում ամրապնդելուց հետո 11-րդ Կարմիր բանակի 20-րդ և 32-րդ դիվիզիաները շարժվեցին դեպի Ձանգեզուր և Նախիջևան: Առաջինը Ղարաբաղից Ձանգեզուր պիտի մտներ 32-րդ դիվիզիան: Ձանգեզուրի սահմաններին կենտրոնացվեց 6-7 հազար սկին, շուրջ 1000 թուր, 12 թնդանոթ (Ա. Ս., էջ 100):

Սկսվեց 11-րդ Կարմիր բանակի հրամանատարության օպերատիվ պլանի՝ «վիճելի» Ձանգեզուրի և Նախիջևանի գրավման իրականացումը: Կարմիր բանակի հրամանատարությունը փորձեց Ձանգեզուրը գրավել առանց կռվի, ուստի Տեղ գյուղում բանակցություններ սկսեց Գորիսի պատվիրակության հետ: Սակայն վերջինս կտրականապես մերժեց խաղաղ ճանապարհով իշխանությունը խորհուրդներին հանձնելու առաջարկը, և բանակցություններն ավարտվեցին անարդյունք:

1920 թ. հունիսի 4-ին 11-րդ Կարմիր բանակի 32-րդ դիվիզիայի հեծյալ բրիգադը Ադրբեջանի Կարմիր բանակի զորամասերի հետ Ձաբուղ գյուղի հովտից սկսեց հարձակումը և նույն օրը գրավեց Տեղ և Կոռնիժոր գյուղերը: Ձանգեզուրյան զորամասերը կարճատև ընդհարումից հետո նահանջեցին դեպի Գորիս: Հուլիսի 4-ի երեկոյան Գորիսում տեղի ունեցավ Ազգային խորհրդի նիստ, որը որոշեց չդիմադրել խորհրդային զորքերին: Նիստին մասնակցում էր նաև Դրոն:

Հուլիսի 5-ի վաղ առավոտյան 32-րդ դիվիզիայի հեծյալ բրիգադի զորամասերը մտան Գորիս, և Ձանգեզուրը հայտարարվեց խորհրդային: Հուլիսի 8-ին Բաքվից Գորիս եկավ Ղարաբաղ-Ձանգեզուրի արտակարգ կոմիսար Արմենակ Ղարաբյոզյանը, որի հորը գնդակահարել էր Դրոն՝ Մայիսյան ապստամբության ճնշման ժամանակ: Գորիս քաղաքի բնակչության մի մասը համակրանքով ընդունեց կարմիր զորքերի մուտքը Ձանգեզուր, քաղաքի կենտրոնում տեղի ունեցավ միտինգ: Նույն օրը՝ հուլիսի 5-ին, Գորիսում ստեղծվեց Ձանգեզուրի գավառի հեղկոմ՝ Հակոբ Կամարու նախագահությամբ: Գավիեղկոմն ստեղծեց իր բաժինները, միլպետ նշանակվեց Մակիչ Մաշուրյանը: Գավիեղկոմը

հաստատեց նաև Սիսիանի շրջանային հեղկոմի կազմը՝ Պատվական Ղազարյանի գլխավորությամբ:

Հուլիսի 5-ին Տեղ գյուղի տարածքով Ջանգեզուր մտան նաև 11-րդ բանակի 28-րդ դիվիզիայի զորամասերը, որոնք Գորիս հասան մի քանի ժամ անց:

Թողնելով Գորիսը՝ հայկական ուժերը բաժանվեցին երկու խմբի. Դրոն նահանջեց Սիսիանի ուղղությամբ՝ Երևան անցնելու համար, իսկ մյուս մասը շարժվեց դեպի Ղափան:

Հուլիսի 6-ին Կարմիր բանակի 252-րդ գունդը սկսեց հետապնդել Դրոյին, որը շարժվում էր դեպի Սիսիանի շրջանի կենտրոն՝ Ղարաքիլիսա գյուղը: Դրոյի ճանապարհը փորձեցին փակել մի քանի ապստամբած գյուղերի ուժեր, ուստի Դրոն, առանց Ղարաքիլիսա մտնելու, հեռացավ դեպի Դարալագյազ: Դրոյի զինվորներից ոմանք նետում էին հրացանները, մի մասն էլ անցնում էր կարմիրների կողմը (Ա. Ս., էջ 118):

Դեպի Ղափան շարժվող ուժերը չհետապնդվեցին:

Տեղեկանալով Կարմիր բանակի կողմից Ջանգեզուրի կենտրոն Գորիսը գրավելու մասին, Ղափանի հանքերում գտնվող Գարեգին Նժդեհը շտապ հրավիրեց շրջանի 37 գյուղերի ներկայացուցիչների ժողով: Նրա մասնակիցները միաձայն որոշեցին կարմիր զորքերին դիմադրել և կռվել մինչև վերջ:

Հուլիսի 10-ին Կարմիր բանակի մի հեծյալ գունդ գրավեց Ղափանի սահմանագլխին գտնվող խոտանան գյուղը: Շուտով կարմիր հեծելազորը հայտնվեց Կավարտ և Առաջածոր գյուղերի միջև ընկած ձորում: Սակայն Նժդեհի վաշտերը բռնում են ճանապարհի երկու կողմերի բարձունքները:

Ռուսական զորամասի հրամանատարությունը (զորամասի պետ՝ Իվանով, կոմիսար՝ Ա. Կոչետկով) հուլիսի 10-ին նամակ ուղարկեց Նժդեհին, որով պահանջվում էր դադարեցնել ամեն տեսակ դիմադրություն և ներկայանալ իրենց՝ երաշխավորելով կյանքի անձեռնմխելիություն: Նժդեհը գրավոր մերժում ուղարկեց, որին հետևեց նրա բանագնացի ձերբակալումն ու նոր վերջնագիրը: Դրան Նժդեհը պատասխանեց, որ Ղափանի ճակատագիրը կարող է որոշել միայն նրա գյուղացիության խորհուրդը, որի որոշմանն սպասելուն կարմիր հրամանատարությունը համաձայնեց:

Հուլիսի 12-ին Ղափանի Ազգային խորհուրդը Առաջածոր գյուղում հրավիրեց երկրորդ արտակարգ ժողովը, որին մասնակցում էին

յուրաքանչյուր գյուղից երկուական ներկայացուցիչ: Երկար քննարկումներից ու Նժդեհի զգայացուցնց ելույթից հետո ժողովը միաձայնությամբ որոշեց կարմիրներին թույլ չտալ մտնել Ղափան: Դրանից հետո Նժդեհը կարմիր հրամանատարությանն ուղարկեց հակավերջնագիր՝ 24 ժամվա ընթացքում, մինչև հուլիսի 13-ի ժամը 7-ը, թողնելով Ղափանի սահմանները, հակառակ դեպքում դա կարվի գեներալ ուժով (Ա. Ս., էջ 124): Ստանալով Նժդեհի վերջնագիրը՝ հուլիսի 13-ին առավոտյան կարմիր զորամասը թողեց խոտանանը և նահանջեց դեպի Գորիս:

Նժդեհը կոնկրետ միջոցառումներ ձեռնարկեց՝ խորհրդային զորքերի առաջխաղացումը դեպի Հանքեր կասեցնելու համար:

Հուլիսի 20-ին ՌուսՖՍՀ արտգործոժողկոմ Գ. Չիչերինը Հայաստանի արտգործնախարարի հասցեով հայտագիր ուղարկեց, որով տեղեկացնում էր, որ խորհրդային զորքերի կողմից վիճելի տարածքների գրավումը նպատակ ունի դադարեցնելու արյունալի բախումները Հայաստանի և Ադրբեջանի միջև և տարածքային հարցերը խաղաղ կերպով լուծելու պայմաններ ստեղծել, որը և կհանգեցնի բարեկամության պայմանագրի կնքմանը, ինչի համար էլ Երևան է ուղարկվել խորհրդային Ռուսաստանի լիազոր ներկայացուցիչ Բորիս Լեգրանը:

Հուլիսի 27-ին Հայաստանի արտգործնախարար Բ. Օհանջանյանը, պատասխանելով Չիչերինի հայտագրին, նշում էր, որ խորհրդային զորքերի ներկայությունը Ղազախի և Ջանգեզուրի շրջաններում կարող է միայն բացասական ազդեցություն ունենալ և խանգարել գումարվելիք հայ-ադրբեջանական խաղաղության կոնֆերանսին, ուստի առաջարկում էր դուրս հանել զորքերը վերոհիշյալ վայրերից (Ա. Ս., էջ 130):

Ջուզահեռաբար սրընթաց իրադարձություններ էին զարգանում նաև Նախիջևանի շրջանում: 1920 թ. հուլիսի սկզբներին Ջևադ բեյի գլխավորած թուրքական 9000-անոց Բայազետյան դիվիզիան սկսել էր Նախիջևանի, Ջուլֆայի և Օրդուբադի շրջանների գրավումը: Ախրատյան դաշտից դեպի Նախիջևան շարժվեց հայկական զորքը, որին համառ կռիվներից հետո հաջողվեց կտրել թուրքերի դիմադրությունը և գրավել Շարուրի շրջանը: Հուլիսի 26-ին նրանք գրավեցին նաև Շահ-թախթի երկաթուղային կայարանը և գրահագնացքով մոտեցան Նախիջևան քաղաքին:

Օգտագործելով հարմար պահը՝ Կարմիր բանակի՝ Ջանգեզուր մտնելուց երկու օր հետո՝ հուլիսի 7-ին, Նախիջևանից Գորիս եկան Ջևադ բեյի պատվիրակները և խնդրեցին, որ ռուսական զորամասերը

Ձանգեզուրից անցնեն Նախիջևանի գավառ և թուրքական զորամասերի հետ համատեղ գործողություններ սկսեն հայկական զորքերի դեմ:

Միաժամանակ 1920 թ. հուլիսին Մոսկվայում Բեքիր Սամի բեյի վարած բանակցություններից հետո Մոսկվայից Բաքու եկավ Խալիլ փաշան, որը ձեռնամուխ եղավ «իսլամական բանակի» ստեղծմանը, որի ողջ ծախսը հոգում էր խորհրդային կառավարությունը: Խալիլ փաշայի տրամադրության տակ դրվեցին նաև Սիբիրից վերադարձող թուրք զերիները: Այդ արագ կազմավորվող բանակով Խալիլ փաշան Ղարաբաղի և Ձանգեզուրի վրայով պետք է անցներ Թուրքիա:

Նշված իրադարձությունների առնչությամբ Ա. Սիմոնյանը գրում է. «Ինչ վերաբերում է Հայաստանի Հանրապետության նկատմամբ խորհրդային կառավարության քաղաքականությանը, ապա դա գերազանցապես թելադրված էր հեղափոխության հեռահար շահերով: Քանի որ Հայաստանի կառավարությունն ամեն ինչ անում էր չկորցնելու համար հանրապետության անկախությունը և իր արտաքին քաղաքականության մեջ հենվում էր Արևմուտքի վրա, ուստի, բոլշևիկյան Ռուսաստանը, որը մահու և կենաց կռվի մեջ էր Անտանտի հետ, բնականաբար դառնում էր անկախ Հայաստանի հակառակորդ, Անտանտի և Հայաստանի դեմ պայքարող Թուրքիայի բարեկամ և դաշնակից (Ա. Սիմոնյան, էջ 133)»: Միաժամանակ էլ Ա. Սիմոնյանը նշում է, որ խորհրդային կառավարությունը փորձում էր համոզել Հայաստանի կառավարությանը, որ ինքն ամեն կերպ կնպաստի, որպեսզի Թուրքիայի նկատմամբ Հայաստանի տարածքային պահանջները լուծվեն Հայաստանի օգտին: Տեղեկանալով Գորիսից Նախիջևան մեկնող ռուսական զորաբաժնի մասին, որն իր հետ տանում էր նաև գույք ու ոսկի, Վայոց ձորում գտնվող Դրոյի ուժերը 400 հեծյալ, նույնքան հետևակ և 8 թնդանոթ, հուլիսի 31-ին հարձակվեցին Բազարչայ մոլոկանաբնակ գյուղի վրա: Բազարչայի և Բորիսովկայի մոլոկան ռուս բնակիչները միացան խորհրդային զորքերին, որոնք նահանջեցին Անգեղակոթ, այնտեղից էլ՝ Նախիջևան: Դրոյի ձեռքն անցավ 200,6 կգ ծուլածո ոսկի:

Հուլիսի 28-ին չորսօրյա երթից հետո Նախիջևան մտան 11-րդ Կարմիր բանակի 28-րդ դիվիզիայի 1-ին հեծյալ գունդը՝ Տերեխովի հրամանատարությամբ: Նրանք վերացրին թուրքերի ստեղծած կեղծ «հեղկոմը» և ստեղծեցին իսկական բոլշևիկյան հեղկոմ:

Այսպիսով՝ 1920 թ. հուլիսի վերջերին վիճելի համարված հայկական տարածքներում՝ Լեռնային Ղարաբաղում, Ձանգեզուրում և Նախիջևանում հաստատվեցին խորհրդային կարգեր:

Հատկանշական էր, որ հենց այդ օրերին՝ 1920 թ. հուլիսի 21-ին, Կրաստանում ՌԽՖՍՀ լիազոր ներկայացուցիչ Ս. Մ. Կիրովը հանդիպում է Վրաստանում Հայաստանի կառավարության ներկայացուցիչ Տիգրան Բեկզադյանին և պաշտոնապես հայտարարում. «Մենք ոչ միայն ճանաչում ենք Հայաստանի անկախությունը, ոչ միայն այդ տեսակետը տաքածում ենք Թուրքահայաստանի վրա, այլև... մեր պարտքն ենք համարում օգնել հայերին, նույնիսկ զինված ուժերով պահպանել անկախ Հայաստանի սահմանները (Ա. Սիմոնյան, էջ 142)»:

Այնուհետև Ա. Սիմոնյանը մատնանշում է ՀՀ արտգործնախարարության մի տեղեկագիրը, որտեղ ընդգծված է, որ խորհրդային Ռուսաստանի կառավարությունը մի քանի անգամ պաշտոնական դեկրետներով հայտարարել է, որ ճանաչում է Հայաստանի անկախությունը, որ խորհրդային Ռուսաստանը եղել և մնում է հայ ժողովրդի բարեկամը, որ նրա բոլոր միջամտությունները միայն մի նպատակ ունեն՝ խաղաղորեն վերջացնել Հայաստանի և Ռուսաստանի դաշնակից Ադրբեջանի միջև եղած վեճերը, վերջ տալ ավելորդ արյունահեղությանը: Սակայն նշվում է նաև, որ խոսքով բարյացակամ Մոսկվայի կոմունիստները զործնականում ջլատում են Հայաստանը՝ խլելով Ձանգեզուրն ու Ղարաբաղը և այնտեղ վարելով ահաբեկման քաղաքականություն (Ա. Ս., էջ 142-143):

Այդ օրերին Նժդեհը ՀՀ կառավարությունից օգնություն էր խնդրում: ՀՀ կառավարությունն իր հերթին չէր հաշտվում Ձանգեզուրի կորստի հետ, ուստի Դրոյին հրամայվեց շարժվել բուն Ձանգեզուրի վրա և հաջողության դեպքում վերագրավել նաև Ղարաբաղը:

1920 թ. օգոստոսի 1-ին Դրոն Վայոց ձորից Բազարչայի լեռնանցքով հանկարծակի հարձակվեց Սիսիանի վրա: Խորհրդային փոքրաթիվ ուժերը հարկադրված էին Բազարչայի շրջանից նահանջել դեպի Անգեղակոթ: Սակայն 11-րդ բանակի 32-րդ դիվիզիայի հրամանատարությունը նահանջողներին օգնության ուղարկեց մեկական հեծյալ և հետևակ գնդեր, մեկ հեծելավաշտ, որոնց հաջողվեց կասեցնել հայկական զորամասի առաջխաղացումը: Խորհրդային ուժերին միացան նաև 50 սիսիանցի երիտասարդներ:

Կարմիր բանակի հրամանատարությունը Գորիսից վերջնագիր հղեց Դրոյին՝ պահանջելով 24 ժամվա ընթացքում հետ վերադառնալ, սակայն պատասխան չստացավ:

Հենց այդ ժամանակ էլ Դրոյին հայտնեցին, որ բոլշևիկները Շի-նուհայր գյուղում մատուռայամբ ձերբակալել են Հայաստանի խորհրդարանի անդամներ, դաշնակցության նշանավոր գործիչներ Արշակ Շիրինյանին ու Վահան Խորենուն ու նրանց տեղափոխել Գորիսի բանտը: Դրոն անմիջապես շարժվեց Գորիսի վրա: Օգոստոսի 1-ին նրա զորամասը մտավ Սիսիանի կենտրոն Ղարաքիլիսա գյուղը, իսկ օգոստոսի 2-ի գիշերը մոտեցավ Գորիսին: Այդ նույն գիշերն էլ Գորիսի բանտում Ա. Շիրինյանն ու Վ. Խորենին դաժանաբար սպանվեցին: Գնդակահարվեցին նաև Զանգեզուրի ինքնապաշտպանության մի շարք այլ ղեկավար գործիչներ: Գորիս-Շուշի ճանապարհի վրա, Զաբուղի ձորում գնդացրային կրակով ոչնչացվեցին 81 հոգի:

Օգոստոսի 3-ին Դրոն գրավեց Գորիսը: Կարմիր զորամասերը նահանջեցին և անցան Ադրբեջան:

Կատարված սպանությունների ու գնդակահարությունների մասին ստանալով ՀՀ վարչապետ Հ. Օհանջանյանի բողոքի հեռագիրը, Գ. Չիչերինը հեռագրով բացատրություն պահանջեց Կովկասի բոլշևիկյան ղեկավարությունից, գտնելով, որ նման փաստերը առաջացնում են ժողովրդի ատելությունը և կարող են բացասական ազդեցություն ունենալ Հայաստանում խորհրդային կարգեր մտցնելու առումով (Ա. Ս., էջ 152):

Դրոյի զորամասի կողմից Սիսիանի և Գորիսի վերագրավումը կարևոր նշանակություն ունեցավ Կապարգողթի պաշտպանների համար, ինչպես նաև բուռն ոգևորություն առաջացրեց Ղարաբաղում: Այստեղ խորհրդային իշխանության դեմ բռնկեց ապստամբություն, որի գլուխ կանգնեց *Թևան Ստեփանյանը*: *Նա ծննդյամբ Դիզակի Տունի գյուղից էր, եղել էր ցարական բանակի հեծյալ ստորաբաժանման ավագ: Թևանի շարժումը սկիզբ առավ Դիզակում, այնուհետև տարածվեց Վարանդայում և Խաչենում: Բոլշևիկներին հաջողվեց ձերբակալել Թևանին, բայց նա փախավ և շարունակեց պայքարը*:

Սիսիանում և Գորիսում Դրոյի հաղթանակը երկար չտևեց: Կարմիր բանակի 28-րդ, 32-րդ հրաձգային դիվիզիաներից և 18-րդ հեծյալ դիվիզիայի զորամասերից կազմվեց հատուկ հարվածող խմբավորում՝ բրիգադի հրամանատար Գ. Սենյոնովի գլխավորությամբ:

1920 թ. օգոստոսի 7-ին Գորիսի շրջանի Տեղ գյուղի շրջակայքում Կարմիր բանակի զորամասերը կռվի բռնվեցին հայկական զորամասերի հետ, որոնք չդիմացան և նահանջեցին Գորիս, այնտեղից էլ՝ Սիսիան:

Նահանջի ապահովումն իր վրա վերցրեց Ղափանից օգնության եկած զորամասը՝ Գ. Նժդեհի գլխավորությամբ: Այստեղ Նժդեհը վիրավորվեց, սակայն մերժեց բուժվելու համար Երևան գնալու առաջարկն և կրկին վերադարձավ Ղափան: Հանքերից Ղափանի գյուղացիական խորհրդի նախագահությունը բողոքի նամակ ուղարկեց ՀՀ զինվորական նախարարին՝ Դրոյի նահանջի և թնդանոթներն իրենց չտրամադրելու մասին:

Օգոստոսի 8-ին խորհրդային զորամասերը վերագրավեցին Գորիսը, իսկ 9-ին՝ Սիսիանը (Ղարաքիլիսա) գյուղը, և Դրոն նորից նահանջեց Դարալագյազ: Այսպիսով՝ 3-4 օրվա ընթացքում Գորիսի և Սիսիանի շրջաններում խորհրդային իշխանությունը վերահաստատվեց:

1920 Թ. ՕԳՈՍՏՈՍԻ 10-Ի ՀԱՄԱԶԱՅՆԱԳԻՐԸ

Լևոն Շանթի պատվիրակության Մոսկովյան առաքելության ծախողումից հետո խորհրդային կառավարությունը որոշեց Հայաստանում ստեղծել ՌԽՖՍՀ լիազոր ներկայացուցչություն՝ Բորիս Լեգրանի գլխավորությամբ, որը և պետք է Երևանում շարունակեր Մոսկվայում ընդհատված հայ-ռուսական բանակցությունները:

1920 թ. հուլիսին Բ. Լեգրանի 14 հոգուց կազմված պատվիրակությունը մեկնեց Անդրկովկաս, որի առաջնահերթ խնդիրն էր Զանգեզուրում Կարմիր բանակի և հայկական բանակի միջև զինված ընդհարման դադարեցումը և ՀՀ կառավարության հետ հաշտության պայմանագրի կնքումը:

Հասնելով Աղստաֆա՝ Բ. Լեգրանն այնտեղից դիմեց ՀՀ կառավարությանը՝ Երևան գալու համաձայնություն ստանալու համար, սակայն մերժում ստացավ: Մերժման պատճառաբանությունն այն էր, որ Լևոն Շանթի պատվիրակությունը, որը պետք է շարունակի բանակցությունները, դեռ չի վերադարձել Մոսկվայից:

Աղստաֆայից հասնելով Թիֆլիս՝ Բ. Լեգրանը նոր հեռագիր ուղարկեց Հայաստանի արտգործնախարար և վարչապետ Հանո Օհանջանյանին: Այս անգամ ՀՀ կառավարությունը տվեց իր համաձայնու-

թյունը՝ պայմանով, որ բանակցությունները պետք է վարվեն ոչ թե երևանում, այլ Թիֆլիսում:

Երեք օր տևած լարված բանակցություններից հետո 1920 թ. օգոստոսի 10-ին՝ Թիֆլիսում ՌևսՅԱԳ-ի Հայաստանի Հանրապետության միջև կնքվեց առաջին միջպետական համաձայնագիրը, որը մի կողմից ստորագրել էին Արշավիր Բաբայանը և Արշակ Ջամայանը, մյուս կողմից՝ Բ. Լեզրանը (Համաձայնագրի լրիվ տեքստը տե՛ս Հայաստանի Հանրապետությունը 1918–1920 թթ. փաստաթղթերի և նյութերի ժողովածու, Երևան, 2000, էջ 248–249): Համաձայնագիրը բաղկացած էր 6 կետից: Համաձայնագրի սկզբում, մինչև կետերի թվարկումը, նշվում էր, որ այն կնքվում է՝ ելնելով Հայաստանի Հանրապետության անկախության և լիակատար ինքնուրույնության ճանաչումից: Առաջին կետի համաձայն՝ 1920 թ. օգոստոսի 10-ի ժամը 12-ից ՌևսՅԱԳ և ՀՀ զորքերի միջև ռազմական գործողությունները համարվում էին դադարեցված:

Երկրորդ կետով ՀՀ զորքերն զբաղեցնելու էին Շահթախթ-հոկ-Ազմարերդ-Սուլթանբեկ-Բազարչայ գիծը, իսկ Ղազախի գավառում՝ մինչև հուլիսի 30-ը նրանց զբաղեցրած գիծը:

ՌևսՅԱԳ զորքերն զբաղեցնում էին Ղարաբաղ, Ջանգեզուր և Նախիջևան վիճելի շրջանները, բացառությամբ այն գոտուց, որտեղ տեղակայվելու էին ՀՀ զորքերը:

Երրորդ կետում նշվում էր, որ խորհրդային զորքերի կողմից վիճելի տարածքների ռազմակալումը չի կանխորոշում այդ տարածքների նկատմամբ ՀՀ կամ ԱՄԽՀ իրավունքների հարցը: Այդ ժամանակավոր ռազմակալմամբ ՌևսՅԱԳ-ը նկատի ունի բարենպաստ պայմաններ ստեղծել այդ երկու հանրապետությունների միջև տարածքային վեճերի լուծման համար այն հիմունքներով, որոնք կսահմանվեն ՌևսՅԱԳ և ՀՀ միջև ամենամոտ ապագայում կնքվելիք հաշտության պայմանագրով:

Չորրորդ կետով՝ կողմերը պայմանավորվում էին ռազմական գործողությունները դադարեցնելուն զուգընթաց դադարեցնել նաև ռազմական ուժերի կենտրոնացումը ինչպես վիճելի, այնպես էլ սահմանային տարածքներում:

Հինգերորդ կետով՝ երկաթուղու Շահթախթ-Ջուլֆա ուղեմասի շահագործումը հանձնվում էր Հայաստանի երկաթուղիների վարչությանը՝ պայմանով, որ այն չպետք է օգտագործվի ռազմական նպատակով:

Վեցերորդ կետով՝ ՌևսՅԱԳ-ն երաշխավորում էր հայկական կառավարական այն բոլոր գործասերի զենքով ու հանդերձանքով ան-

ցումը Հայաստան, որոնք հայտնվել են խորհրդային զորքերի զբաղեցրած գծից այն կողմ:

Ինչպես նշում է ակադեմիկոս Գ. Գալոյանը, այդ նույն օրը՝ 1920 թ. օգոստոսի 10-ին, Սևրում դաշնակից տերությունները պայմանագիր էին ստորագրում Թուրքիայի հետ: Պատահական զուգահեռություն չէր դա, այլ դրանով խորհրդային Ռուսաստանի կառավարությունը ցույց էր տալիս, որ չի ցանկանում վերջնականապես կորցնել Հայաստանը (Գ. Գալոյան, նշվ. աշխ., էջ 256):

Համաձայնագրի կնքումից հետո հայկական զորքերը դուրս բերվեցին Ջանգեզուրից, սակայն զանգեզուրցիների պայքարը Գ. Նժդեհի գլխավորությամբ շարունակվեց:

Այնուհետև Գ. Գալոյանը նշում է, որ դաշնակից պետությունների կառավարությունները մեծ դժգոհությամբ ընդունեցին օգոստոսի 10-ի համաձայնագրի կնքումը: Նա վկայակոչում է Թիֆլիսում բրիտանական ներկայացուցիչ Հարրի Լուկի՝ իր կառավարությանն ուղարկած հեռագրերը, որոնցում հայերի կողմից նման համաձայնագրի ստորագրումը դիտվում է իբրև դավաճանություն Սեծ Բրիտանիայի հանդեպ, որից հայերը հենց նոր են մեծ քանակությամբ ռազմամթերք ստացել: Հեռագրերում խոսվում է նաև Հայաստանի կառավարության ներկայացուցիչների հավաստիացումների մասին, թե համաձայնագրի կնքումը հետապնդում է սոսկ ժամանակ շահելու նպատակ, իսկ իրականում Հայաստանի կառավարությունը չի փոխել իր հակաբոլշևիկյան դիրքորոշումը (Գ. Գ., էջ 257):

Արխիվային մի փաստաթղթի հիման վրա Գ. Գալոյանը գրում է, որ օգոստոսի 24-ին Երևան ժամանած ֆրանսիական գնդապետ Կորբեյը ՀՀ վարչապետին բառացիորեն հայտարարել է, որ նշված համաձայնագիրը չափազանց վատ տպավորություն է գործել դաշնակիցների ներկայացուցիչների վրա, կարծես թե Հայաստանի կառավարությունը փոխել է իր կողմնորոշումը և այլևս չի ցանկանում պայքարել բոլշևիկների դեմ: Այդ տպավորությունը ցրելու համար Ալ. Խատիսյանը Լուկի հետ ունեցած հանդիպման ժամանակ հայտարարում է, որ իր կառավարությունը ոչինչ ընդհանուր չունի բոլշևիկների հետ, իսկ վերջերս կնքած համաձայնագիրը նպատակ ունի ժամանակ շահել, կազմակերպել ռազմական ուժերը և հետ խել բոլշևիկների կողմից գրաված տարածքները (Գ. Գ., էջ 258):

1920 թ. օգոստոսի 10-ի համաձայնագրին հանգամանորեն անդրադարձել է պրոֆեսոր Արամ Սիմոնյանը: Նա գտնում է, որ համաձայնագիրը խորհրդային կողմի դիվանագիտության հաջողություններից էր, քանի որ դրանով «վիճելի» տարածքների հարցը վերցվեց արևմտյան տերությունների դիվանագիտության ուղորտից և մտցվեց բոլշևիկյան Ռուսաստանի դիվանագիտության ուղորտը (Ա. Սիմոնյան, Ջանգեզուրի գոյամարտը, էջ 159):

Ա. Սիմոնյանը գրում է, որ համաձայնագիրն ուժի մեջ մտնելուց անմիջապես հետո, նույն օրը՝ օգոստոսի 10-ին, Չայաստանի զինվորական նախարարը հեռագրեց Դարալազյազում գտնվող Դրոյին և՛ հանձնարարեց նրան հայտնել Ղափանի գործերի հրամանատար Նժդեհին՝ թողնել Ջանգեզուրը և առանց դիմադրության անցնել հանրապետության տարածքը՝ իր հետ բերելով ամբողջ զորքը: Սակայն Նժդեհը կտրականապես հայտարարեց, թե չի ենթարկվելու կառավարության հրամանին, մնալու է Կապարգողթում և շարունակելու է կռիվը: Ա. Սիմոնյանը գտնում է, որ վճռելով շարունակել կռիվը Կարմիր բանակի և ադրբեջանական ուժերի դեմ, Նժդեհը ելնում էր միայն ու միայն Չայաստանի և հայ ժողովրդի շահերից և ուրիշ կերպ վարվել չէր կարող: Ճակատագրական այդ որոշումը բխում էր նրա իսկ էությունից, ըմբոստ ու անկոտրում ոգուց, ավեր չճանաչող հայրենապաշտությունից, մայր ժողովրդի նկատմամբ անհուն սիրուց:

Հետագայում Գ. Նժդեհն այդ մասին գրել է. «Իմացականությամբ ու սրտով փոքրիկ էակներին է միայն հատուկ՝ կուրորեն կատարել վերեն տրված ամեն հրաման... Մարդկային իմացականության դեմ խորապես մեղանշում է նա, ով իրեն տրված հրամանը չի գործադրում ստեղծագործաբար»:

Վտանգի ժամանակ, մասնավորապես, երբ մի երկրի և ժողովրդի լինել-չլինելու խնդիր կա, դավաճանություն է գինվորական կանոնագրի այս կամ այն հոդվածի տակ վատորեն թաքցվելը կամ անձնական պատասխանատվությունից փախչելը:

Նման պատմական պայմաններում ղեկավարի չափանիշը, նրա հարցումը պետք է լինի — ինչ կթելադրե երկրիս ու ցեղիս հավիտենական շահը, և ոչ միայն՝ օրվա իշխանությունը (Ա. Ս., էջ 161–162):»:

Այդ ամենից զատ, կարծում ենք, որ կառավարության հրամանին չենթարկվելու պարագան հեշտացնում էր նաև այն, որ Նժդեհի գլխավորած ուժերը ոչ թե կանոնավոր, կառավարական զորքեր էին, այլ հիմնա-

կանում ժողովրդական վաշտեր, որոնք կարող էին և իրենց դուրս համարել համաձայնագրի շրջանակներից:

Ա. Սիմոնյանը օբյեկտիվորեն է գնահատում դաշնակից պետությունների վերաբերմունքը, որոնք օգոստոսի 10-ի համաձայնագրի ստորագրումը դիտեցին իբրև Անտանտի ուխտին «փոքր դաշնակցի» բացահայտ դավաճանություն: Նա գրում է, որ Անդրկովկասում անգլիական գերագույն կոմիսար Լուկկը և ֆրանսիական բարձրագույն կոմիսար Դը Մարտելը, որոնց նստավայրը Թիֆլիսն էր, համաձայնագրի կնքման հաջորդ օրն իսկ իրենց մոտ հրավիրեցին Թիֆլիսում Չայաստանի դիվանագիտական ներկայացուցիչ Տիգրան Բեկզադյանին, իրենց զայրույթը հայտնեցին ու նրանից հանգամանալի բացատրություն պահանջեցին: Անգլիական և Ֆրանսիական կոմիսարներն ուղղակի հայտարարեցին, որ իրենք կասկածի տակ են դնում Անտանտի նկատմամբ բարեկամաբար տրամադրված լինելու Չայաստանի հավաստիացումները: Տ. Բեկզադյանը և նրա պաշտոնակիցները փորձեցին համոզել իրենցից պատասխան պահանջողներին, որ բոլշևիկների հետ կնքած համաձայնագիրը լոկ զինադադար է, որ Չայաստանի կառավարությունը հավատարիմ է Անտանտի տերություններին ու շարունակում է մնալ հակախորհրդային դիրքերում (Ա. Ս., 162–163):

Ա. Սիմոնյանը հանգում է այն կարևոր հետևությանը, որ Սևրի պայմանագրի շրջանակներում Չայաստանին ռեալ օգնության ձեռք չմեկնելով և քեմալական զավթիչներից նրան պաշտպանելու միջոցներ չձեռնարկելով, «դաշնակից» տերությունները միաժամանակ ամեն կերպ խոչընդոտում էին Ռուսաստանի հետ նրա մերձեցմանը և այդ ընդհանուր քաղաքականությունից ելնելով էլ կտրականապես հանդես եկան համաձայնագրի դեմ: «Ճշում գործադրելով Չայաստանի Հանրապետության կառավարության վրա,— գրում է Ա. Սիմոնյանը,— «դաշնակիցները» դրանով իսկ խաղաքարտի վրա էին դնում Չայաստանի և հայ ժողովրդի անվտանգությունը: Մի կողմից նրանք հրաժարվում էին թուրքական վտանգի դեմ ռազմական ռեալ օգնություն ցույց տալուց, մյուս կողմից՝ արգելում էին, որպեսզի Չայաստանը հաշտության եզրեր գտնի Ռուսաստանի հետ (Ա. Ս., էջ 164–165):

Այնուհետև Ա. Սիմոնյանը նշում է, որ Թիֆլիսում և Երևանում տեղի ունեցած հանգամանալի բացատրություններից հետո Անգլիայի և Ֆրանսիայի ներկայացուցիչները հանձնվեցին, որ, այնուամենայնիվ,

Հայաստանի կառավարությունը հավատարիմ է Անտանտի ուխտին և շարունակում է մնալ հակաբոլշևիկյան դիրքերում:

Իր հերթին խորհրդային կառավարությունը քեմալականների ճնշման տակ Հայաստանի իշխանություններից պահանջում էր հրաժարվել Սևրի դաշնագրից, որը Հայաստանի համար նշանակելու էր հարաբերությունների խզում արևմտյան տերությունների հետ: Եվ Հայաստանի կառավարությունը գերադասեց չհրաժարվել Սևրից ու հավատարիմ մնալ Անտանտի տերություններին (Ա. Ա., էջ 170):

Օգոստոսի 10-ի համաձայնագրին անդրադարձել է սփյուռքահայ հեղինակ Ռ. Փիրումյանը: «Ճակատագրի խաղով,— գրում է նա,— այս համաձայնագիրը առաջին պաշտոնական փաստաթուղթն էր երկու պետությունների միջև ստորագրված: Մի յուրահատուկ հակասություն: Մի կողմից՝ դա նշանակում էր պարտություն և հողերի կորուստ Հայաստանի համար, մյուս կողմից՝ փաստում էր Ռուսաստանի ճանաչումը Հայաստանի Հանրապետության:

Թիֆլիսում ստորագրված այս առժամյա համաձայնագիրը մեծ դժգոհություն առաջ բերեց դաշնակիցների մոտ: Թե՛ Անգլիո և թե՛ Ֆրանսիայի ներկայացուցիչները, որոնք զլացել էին ն. Ռուսաստանի դեմ Հայաստանի կառավարության տարած պայքարի մեջ որևէ օգնություն ցույց տալ, այժմ մեղադրում էին նրան՝ Դաշնակիցների թշնամիների հետ համաձայնագիր ստորագրելու համար (Ռուբինա Փիրումյան. Հայաստանը ԳԳԴ-բոլշևիկ հարաբերությունների ոլորտում (1917–1921). Երևան, 1997, էջ 233–234):

1920 Թ. ՕԳՈՍՏՈՍԻ 24-Ի ՌՈՒՄ-ԹՈՒՐԵԱՎԿԱՆ ՊԱՅՄԱՆԱԳՐԻ ՆԱԽԱԳԻԾԸ ԵՎ ՀԱՅԱՍՏԱՆԸ

1920 թ. ամռանը՝ ռուս-թուրքական մերձեցումն առավել ակնհայտ դարձավ, որը և ոգևորում էր թուրք-ադրբեջանական ազգայնամուլներին: Այդ ոգևորությունն աճեց հատկապես 1920 թ. հունիսի 1-ին ԱՄՆ-ի կոնգրեսում Հայաստանի մանդատը մերժվելուց հետո: Մուստաֆա Զեմալը ձգտում էր ռուս-թուրքական մերձեցումն օգտագործել Հայաստանի նկատմամբ իր նվաճողական պլաններն իրականացնելուն:

Խորհրդային Ռուսաստանի հետ բանակցություններ վարելու և բարեկամության դաշնագիր կնքելու նպատակով 1920 թ. հուլիսի 19-ին

Մոսկվա հասավ Քեմալական Թուրքիայի պատվիրակությունը՝ արտգործմինիստր Բեքիր Սամի բեյի գլխավորությամբ: Պատվիրակության կազմում էին Յուսուֆ Զեմալ բեյը, Իբրահիմ Թալի բեյը, Օսման բեյը, գլխավոր շտաբի սպա Սեյֆին:

Ռուս-թուրքական բանակցություններն սկսվեցին 1920 թ. հուլիսի 24-ին և տևեցին շուրջ մեկ ամիս, երբ արդեն հայ-ռուսական բանակցությունները դադարեցվել էին:

Գ. Զիչերինի հետ հանդիպելուց հետո նախնական բանակցությունները թուրքական պատվիրակության հետ վարում էր արտգործօղկոմի տեղակալ, հայազգի Լևոն Կարախանը:

Ակադեմիկոս Գ. Գալոյանը, որը լավագույնս վերլուծել է ռուս-թուրքական բանակցությունների շուրջ եղած հավաստի փաստաթղթերը, հայտնաբերել նորերը և կատարել միանգամայն օբյեկտիվ գնահատումներ, նշում է, որ բանակցությունների առաջին փուլում թուրքական պատվիրակության նպատակն էր հասնել Անդրկովկասի վրայով դեպի Ռուսաստան ճանապարհի բացելուն: Իսկ դա հնարավոր էր նախ և առաջ Հայաստանի վրայով, որին կտրականապես դեմ էր ԳԳ կառավարությունը: Այդ առնչությամբ բանակցությունները մի քանի օր դադարեցվեցին, և դրանք վերսկսվելուց հետո Լ. Կարախանն առաջարկեց թուրքերին՝ դադարեցնել Հայաստանի վրա նախապատրաստվող հարձակումը և հնարավորություն տալ, որպեսզի իրենք հայկական կողմի հետ կարողանան լուծել Հայաստանի վրայով տարանցիկ ճանապարհի հարցը:

Այդ առաջարկը թուրքերը պայմանավորեցին Լ. Կարախանի՝ ազգությամբ հայ լինելու հանգամանքով և հարց բարձրացրին, որ բանակցությունները վարի ինքը՝ Զիչերինը: Թուրքերի այդ պահանջը բավարարվեց:

Ինչպես գրում է Գ. Գալոյանը, թուրքական պատվիրակությունը պնդում էր, որ Ռուսաստանն անհապաղ օգնություն հատկացներ Թուրքիային՝ իբր Անտանտի իմպերիալիստների դեմ պայքարելու, սակայն իրականում Հայաստանի վրա հարձակվելու նպատակով: Նման պնդումներին Զիչերինը պատասխանում է, որ Ռուսաստանն ինքը ծանր դրության մեջ է և չի կարող անհապաղ օգնել Թուրքիային:

Երբ փոքր ընդմիջումից հետո օգոստոսի 17-ին բանակցությունները վերսկսվեցին, թուրքերն առաջարկեցին կնքել պաշտպանողական և հարձակողական դաշինք, որը մերժվեց: Այնուհետև նրանք հանդես ե-

կան բարեկամության և եղբայրության պայմանագիր կնքելու առաջարկությամբ, որն արդեն ընդունելի էր ռուսական կողմի համար: Սակայն նման պայմանագիր կնքելու համար ռուսական կողմը թուրքերի համար անսպասելի պայմաններ առաջադրեց: Ինչպես նկատում է Գ. Գալոյանը, այդ պահանջներից մեկը վերաբերում էր Հայաստանին, որի հետ Ռուսաստանը օգոստոսի 10-ին համաձայնագիր էր կնքել ու Շահ-թախթ-Ջուլֆա երկաթուղին թողել նրան: Տեղեկանալով այդ մասին՝ թուրքական պատվիրակությունը բողոք ներկայացրեց Չիչերինին և նույնիսկ սպառնաց հեռանալ Մոսկվայից:

Չիչերինը թուրքերին բացատրեց, որ Ռուսաստանը չի կարող թույլ տալ, որ թուրքերն իրենց ուժերով բացեն ճանապարհը, որը կնշանակի պատերազմ Հայաստանի և Թուրքիայի միջև: Թուրքերին նման պատասխանը չբավարարեց և նրանք պահանջեցին հանդիպել Վ. Ի. Լենինին: Վերջինս տատանվում էր և միայն Չիչերինի պնդմամբ հանդիպումը կայացավ: «Առ այսօր մեր ձեռքի տակ չկա հավաստի փաստաթուղթ,— այդ առթիվ գրում է Գ. Գալոյանը,— որը վկայեր, թե իրոք ինչ բնույթ է կրել թուրք պատվիրակների խոսակցությունը Լենինի հետ, և թե ինչ է «խոստացել» Լենինը նրանց (Գ. Գալոյան, Հայաստանը և մեծ տերությունները 1917–1923 թթ., Երևան, 1999, էջ 264)»: Այդ տեսակցությունից հետո էլ թուրքերի հետ բանակցությունները շարունակել է Չիչերինը: Բանակցությունների ընթացքը լուսաբանելու նպատակով Գ. Գալոյանը վկայակոչում է թուրք պատմաբան Ռ. Սալահիի «Թուրքական դիվանագիտությունը 1918–1923 թթ.: Մուստաֆա Բեմալը և թուրքական ազգային շարժումը, Լոնդոն, 1975» գիրքը, որի համապատասխան հատվածը շարադրված է Բեքիր Սամի բեյի վկայությունների հիման վրա: Ըստ այդ շարադրանքի՝ բանակցությունների ժամանակ Չիչերինը պնդել է, թե Թուրքիան Հայաստանին պետք է տա Վանի և Բիթլիսի արևելյան մարզերից որոշ տարածքներ, որին ի պատասխան՝ Բեքիր Սամին հայտարարել է, որ Թուրքիայում հայկական վիլայեթներ չկան, և հայերը ոչ մի տեղ մեծամասնություն չեն կազմում: Չիչերինը զգուշացրել է, որ Ռուսաստանը կօգնի Թուրքիային, եթե նա Հայաստանին զիջի նշված տարածքները: Թուրքական պատվիրակության ղեկավարն այդ պահանջը համարել է Թուրքիան մասնատելու Անտանտի վարած քաղաքականությանը համազոր: Չիչերինն առարկել է, ասելով, որ Անտանտը ձգտում է ստեղծել Սեծ Հայաստան, իսկ Ռուսաստանն ընդամենը խնդրում է Արևմտյան Հայաստանից մի փոքր տարածք միացնել Հայաս-

տանին: Մ. Բեմալը նման խնդրանքը համարել է «իմպերիալիստական պահանջ» (Գ. Գալոյան, նշվ. աշխ., էջ 264):

Ռուս-թուրքական բանակցություններն ավարտվեցին 1920 թ. օգոստոսի 24-ին: Կազմվեց «Ռուսաստանի և Թուրքիայի միջև պայմանագրի նախագիծ», որը նախաստորագրվեց կողմերի պատվիրակությունների ղեկավարների կողմից: Բեքիր Սամին հայտարարեց, որ ինքը չի կարող ստորագրել պայմանագիրը՝ առանց նրա նախագիծն իր կառավարության հետ համաձայնեցնելու: Բանակցություններն ընդհատվեցին, և թուրքական պատվիրակությունը վերադարձավ Անկարա՝ իր հետ տանելով թուրքերին չբավարարող պայմանագրի նախագիծը, ինչպես նաև մեկ և կես միլիոն ռուբլի ոսկով, որը Թուրքիային էր տրամադրել խորհրդային Ռուսաստանի կառավարությունը:

Նկատի ունենալով, որ տարբեր աշխատություններում օգտագործված են այդ փաստաթղթի աղավաղված տեքստերը, ակադեմիկոս Գալուստ Գալոյանը հարկ է համարել ութ հոդվածներից բաղկացած պայմանագիրն ամբողջությամբ, առանց թարգմանելու՝ ռուսերեն զետեղել իր նշված մեծագրությունում (էջ 267–268): Այն տեղ է գտել նաև «Հայաստանի Հանրապետությունը 1918–1920 թթ. Քաղաքական պատմություն, Երևան, 2000, էջ 258–259» փաստաթղթերի և նյութերի ժողովածուում, որի պատասխանատու խմբագիրներն են ակադեմիկոս Գ. Գալոյանը և պրոֆեսոր Վ. Ղազախեցյանը:

Մինչ այդ, նախագծի տեքստը պաշտոնապես ոչ մի տեղ չի հրատարակվել: Այն շրջանառության մեջ է դրվել Մոսկվայում 1920 թ. Թուրքիայի դեսպան Ալի Ֆուադ Ջեբեսոյի՝ տարիներ անց հրատարակած հուշերում, որից էլ օգտվել են տարբեր հեղինակներ: Ինքը՝ ակադեմիկոս Գ. Գալոյանը, օգտվել է Ռուսաստանի արտաքին քաղաքականության արխիվում պահպանված պայմանագրի նախագծի տեքստից:

Պայմանագրի նախագծի առաջին հոդվածում կողմերը պայմանավորվում էին չճանաչել այս կամ այն կողմին ուժով պարտադրված որևէ պայմանագիր կամ միջազգային ակտ: ՌԽՖՍՀ-ը պարտավորվում էր ոչ մի դեպքում չճանաչել Թուրքիային վերաբերող և Թուրքիայի ազգային կառավարության կողմից չճանաչված միջազգային ակտերը:

Թուրքիա հասկացության տակ ենթադրվում էին այն տարածքները, որոնք մտցված էին Թուրքիայի Ազգային ուխտի մեջ:

Փաստորեն խորհրդային Ռուսաստանը պարտավորվում էր չճանաչել Սևրի պայմանագիրը, որը օգոստոսի 14-ի հայտարարությամբ

չէր ճանաչել Ս. Քեմալը: Իսկ հողվածի վերջին պարբերությամբ պաշտոնապես չեղյալ էր համարվում ՌԽՖՍՀ ժողկոմսովետի 1917 թ. դեկտեմբերի 31-ի դեկրետը «Թուրքահայաստանի մասին»:

Երկրորդ հողվածով Թուրքիան ընդունում էր Բրեստ-Լիտովսկի պայմանագրի ուժը կորցրած լինելը, որը չեղյալ էր հայտարարել հորհրդային Ռուսաստանի կառավարությունը՝ 1918 թ. նոյեմբերին:

Երրորդ հողվածով խորհրդային Ռուսաստանը փաստորեն իր վրա էր վերցնում Հայաստանի վրայով դեպի Թուրքիայի տարանցիկ ճանապարհի բացումը:

Հաջորդ հողվածները վերաբերում էին կողմերի քաղաքացիների իրավունքներին, Սև ծովի և նեղուցների միջազգային կարգավիճակի կարգավորմանը, տնտեսական, ֆինանսական, հյուպատոսական և այլ համաձայնագրեր կնքելուն:

Գ. Գալոյանն ընդգծում է, որ քեմալականները, վախենալով, որ Ռուսաստանը կարող է առաջիկայում պնդել Արևմտյան Հայաստանի վիլայեթներից որոշ տարածքներ Հայաստանին տալու իր պահանջի վրա, ձգտում էին օր առաջ իրենց հաշիվները մաքրել Հայաստանի Հանրապետության հետ՝ նրան ոչնչացնելու միջոցով: Նա կրկին վկայակոչում է Ռ. Սալահիի գիրքը, որտեղ թուրք պատմաբանը անսքող գրում է, թե Հայաստանը ոչ միայն պահանջներ ուներ Թուրքիայի արևելյան մարզերի նկատմամբ, այլևս ստեղծել էր մի գործուն արգելապատ Թուրքիայի և Ռուսաստանի միջև՝ խոչընդոտելով բոլշևիկներից արդյունավետ օգնություն ստանալուն: Թուրք պատմաբանը չի մոռանում նաև այն վախը, որ ունեին քեմալականները Սևրի պայմանագրով Մեծ Հայաստան ստեղծելու նկատմամբ: Ըստ Սալահիի՝ այդ ամենը դրոջեցին քեմալականներին որոշում ընդունել Երևանի կառավարությանը ոչնչացնելու մասին և Հայաստանի տարածքը կրճատել այնպես, որպեսզի նա չեղյալ հայտարարեր Սևրի պայմանագիրը և բացեր ճանապարհը Ռուսաստանի և Թուրքիայի միջև: «Ահա այն իրական նպատակները, — այդ առթիվ ամենայն իրավամբ շեշտում է Գ. Գալոյանը, — որոնք, անկախ օգոստոսի 24-ի պայմանագրի չստորագրված և չվավերացված նախագծից, դրոջելու էին Թուրքիային 1920 թ. աշնանը ձեռնամուխ լինելու իրենց նպատակների իրագործմանը (Գ. Գալոյան, նշվ. աշխ., էջ 269)»:

Գիտնականը ցավ ու զարմանք է հայտնում, որ թուրք պատմաբաններն այդքան հստակորեն ու անսքող նշում են Հայաստանի վրա քեմալականների ձեռնարկած ագրեսիայի իրական դրդապատճառներ-

ըր, սակայն դրանից հետո էլ որոշ հայ և, մասնավորապես, սփյուռքահայ պատմաբաններ շարունակում են այդ ագրեսիայի գլխավոր պատճառ համարել խնդրո առարկա պայմանագրի նախագիծը՝ համարելով այն խորհրդային Ռուսաստանի և քեմալական Թուրքիայի համագործակցության դաշինք: Ափսոսանք հայտնելով, որ ցավոք մեծան անհիմն պնդումներով աշխատություններ են հրատարակվում նաև Հայաստանում, մեծարգո գիտնականը նկատում է, որ մեղմ ասած, այդպիսիք չեն ծառայում հայ ժողովրդի շահերին: Մասնավորապես, նա նկատի ունի սփյուռքահայ հեղինակներ Ռուբինա Փիրունյանի «Հայաստանը 3.3.Գ.-բուլշևիկ հարաբերությունների ոլորտում 1917-1921, Երևան, 1997» և Գաբրիել Լազյանի «Հայաստան և Հայ դատը հայ և ռուս հարաբերություններու լույսին տակ, Երևան, 1991» աշխատությունները:

1925 թ. հունիսի 18-ին Մարսելից Ս. Վրացյանին հասցեագրված Լևոն Շանթի նամակով Գ. Գալոյանը ժխտում է պատմագրության մեջ Լևոն Կարախանին ուղղված մեղադրանքը, թե իբր վերջինս մեղսակից է եղել Հայաստանի դեմ ուղղված թուրքական դավերին: Իսկ նամակում ասված է, որ Լեմինը կողմնակից էր նույնիսկ ոչ բոլշևիկյան Հայաստանի մնալուն, և Լ. Կարախանը նույնպես այդ ուղղությամբ էր աշխատում: Նա դեմ էր նաև Չիչերինին միանշանակորեն հակահայկական տրամադրությունների մեջ մեղադրելուն, որովհետև վերջինս լավ էր հասկանում Հայաստանի ռազմավարական նշանակությունը Ռուսաստանի համար (Գ. Գ., էջ 271):

Վկայակոչելով «Հայրորդի. Սովետական Հայաստան և պատմական ճշմարտություններ՝ փաստերու լույսին տակ. Բեյրութ, 1949, էջ 57» և Ջավեն Մսրոյանի «Երեք դաշնագիրեր (Ալեքսանդրապոլի, Մոսկվայի և Կարսի) դաշնագիրերը. Բեյրութ, 1979, էջ 43» աշխատությունները, Գ. Գալոյանը ցույց է տալիս, որ ինչպես Մոսկվայում քեմալական Թուրքիայի դեսպան Ալի Ֆուադը, այնպես էլ թուրք պատմաբան մեմֆիկ Բյուխիզյուն հավաստում են, որ 1920 թ. օգոստոսի 24-ի ռուս-թուրքական պայմանագրի նախագծի չհաստատման հիմնական պատճառն այն էր, որ ռուսները Կարինը, Վանը, և Բիթլիսը հայերին գիջելու հարց էին դնում (Գ. Գ., էջ 272):

Այնուամենայնիվ, Գ. Գալոյանը խորհրդային Ռուսաստանի կառավարության վրայից չի վերցնում մեղքի այն բաժինը, որ նա ունեցել է Հայաստանի դեմ 1920 թ. սեպտեմբերին Թուրքիայի սանձազերծած ագրեսիայի հարցում: Այդ մեղքի բաժինն այն էր, որ՝ բանակցությունների

ժամանակ ռուսական կողմը վճռականորեն չպնդեց, որպեսզի թուրքերն ընդհանրապես հրաժարվեն Հայաստանի նկատմամբ իրենց ազդեցիկ նկրտումներից, ինչպես հունիսին, երբ թուրքերն ստիպված եղան հետ կանգնել Հայաստանի վրա արդեն իսկ նախապատրաստված հարձակումից: «Հայ-ռուսական բանակցությունների ժամանակ հայկական կողմի անզիջում դիրքը, քեմալականների դեմարշը, Անտանտի տերությունների փորձերը՝ օգտվելու Խորհրդային Ռուսաստանի և քեմալական թուրքիայի միջև առաջացող ճեղքվածքից, փոխեցին ռուսական կառավարության դիրքորոշումը: Այդ անհեռատես շրջադարձը հետագայում ողբալի հետևանքներ ունեցավ և՛ Հայաստանի, և՛ Ռուսաստանի համար», — ամփոփում է իր միտքը Գ. Գալոյանը (Գ. Գ., էջ 273):

1920 թ. ՀԱՅ-ԹՈՒՐԶԱԿԱՆ ՊԱՏԵՐԱԶՍԸ: ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԽՈՐՀՐԴԱՅՆԱՅՈՒՄԸ

ՊԱՏԵՐԱԶՍԻ ԴԻՎԱՆԱԳԻՏԱԿԱՆ ՆԱԽԱՊԱՏՐԱՍՏՈՒԹՅՈՒՆԸ

1920 թ. հայ-թուրքական պատերազմին իրենց աշխատություններում տարբեր ժամանակներում անդրադարձել են շատ հեղինակներ՝ Ծ. Աղայան, Ս. Ալիխանյան, Ա. Եսայան, Ս. Կարապետյան, Գ. Ղարիբջանյան, Բ. Լալաբեկյան, Գ. Գալոյան, Մ. Արզումանյան, Ռ. Ղազանյան, սփյուռքի հեղինակներից՝ Ս. Վրացյան, Գ. Լազյան, Ռ. Փիրումյան և ուրիշներ: Սակայն հիմնահարցի ըստ ամենայնի հետազոտությանը հատուկ ծավալուն մեծագրություն է նվիրել պատմ. գիտ. դոկտոր, պրոֆեսոր Էդիկ Ջոհրաբյանը՝ «1920 թ. թուրք-հայկական պատերազմը և տերությունները, Երևան, 1997» խորագրով:

Իր մեծարժեք աշխատության առաջին մասի երկրորդ գլուխը է. Ջոհրաբյանը նվիրել է պատերազմի դիվանագիտական նախապատրաստության լուսաբանմանը և այդ առնչությամբ անդրադարձել է Լևոն Շանթի մոսկովյան առաքելությանը, 1920 թ. օգոստոսի 10-ի հայ-ռուսական համաձայնագրին, իսկ առավել հանգամանորեն՝ 1920 թ. օգոստոսի 24-ի ռուս-թուրքական պայմանագրի նախագծին:

Նշելով, որ թուրքիայի ազգային մեծ ժողովը հավանություն չտվեց պայմանագրի նախագծին, է. Ջոհրաբյանը եզրակացնում է, որ պայմանագրի չստորագրման միակ պատճառը տարածքային հարցերում կողմերի մոտեցումների տարբերությունն էր: Այդ առթիվ նա վկայակոչում է թուրք պատմաբան Թնֆիկ Բյուլքօղլու և Մոսկվայում քեմալական դեսպան Ալի ֆուադի խստովանությունները (է. Ջոհրաբյան, նշվ. աշխ., էջ 144):

Ռուս-թուրքական պայմանագրի կապակցությամբ խիստ կարևորում ենք է. Ջոհրաբյանի հետևյալ նտահոգությունը. «Մեր օրերում, երբ

հետաքրքրությունը Հայաստանի առաջին հանրապետության նկատմամբ անչափ մեծացել է, մամուլի էջերում հաճախ կարելի է հանդիպել հոդվածների (դրանց հեղինակները երբեմն նույնիսկ պատմաբան չեն, կամ էլ հարցի նեղ մասնագետներ չեն), որոնցում ոչ միայն մեծ տեղ են բռնում կոպիտ սխալներն ու իրականության խեղաթյուրումները, այլև չփաստարկված, անհիմն հայտարարությունները այս կամ այն հարցի կապակցությամբ: Դրանց շարքին է պատկանում և այն պնդումը, թե 1920 թ. ամռանը քեմալականների ու խորհրդային Ռուսաստանի միջև գաղտնի պայմանագիր է կնքվել Հայաստանի բաժանման մասին, և որ այն պետք է գտնել ու հրապարակել: Մինչդեռ ոչ արխիվներում և ոչ էլ օտար կամ խորհրդային հեղինակների ու պետական գործիչների մոտ մենք մտան բանի գոյության մասին ամենաանուղղակի ու հեռավոր ակնարկի անգամ չենք հանդիպել: Մեր կարծիքով նման պայմանագիր չի եղել և բացի այդ նրա կարիքը նույնիսկ չկար էլ, քանի որ, ինչպես տեսանք, օգոստոսի 24-ի պայմանագրի նախագծով խորհրդային կառավարությունը ճանաչում էր թուրքական «Ազգային ուխտը», հետևապես և Թուրքիայի իրավունքը Բաթումի և Կարսի մարզերի նկատմամբ... Ուրեմն պետք է խոսել ոչ թե ինչ որ գաղտնի պայմանագրի, այլ օգոստոսի 24-ի հայտնի պայմանագրի նախագծի մասին, որի պատճենը պահվում է մեր պետական արխիվում (Է. Ձ., էջ 145)»:

Խորամուխ լինելով փաստերի մեջ՝ Է. Ջոհրաբյանը եզրակացնում է, որ խորհրդային կառավարությունը, ընդառաջելով Անտանտի դեմ պայքարողի թողի տակ հանդես եկող թուրք ազգայնականներին, այնուամենայնիվ, Հայաստանն ամբողջությամբ չէր հանձնում նրանց հոշոտմանը: Ասվածը համոզիչ դարձնելու համար նա վկայակոչում է Կարաբեքիրի դժգոհությունը խորհրդային Ռուսաստանի քաղաքականությունից, ինչպես նաև թուրք գործիչ Հիքմեթ բեյի խոստովանությունը, թե իրենք հանգամանքների բերումով ստիպված եղան հարձակվել Հայաստանի վրա՝ հնարավորություն չունենալով այդ հարցը քննարկել խորհրդային Ռուսաստանի հետ, որի հետ պայմանավորվածություն կար հարձակման դեպքում Սարիզամիչից այն կողմ չանցնել (Է. Ձ., էջ 148):

Է. Ջոհրաբյանը վեր է հանում նաև թուրքերի ծավալած դիվանագիտական այն աշխատանքը, որի շնորհիվ ապահովվեց հայ-թուրքական պատերազմի դեպքում Վրաստանի բացարձակ չեզոքության պահպանումը, և որի դիմաց Վրաստանը պետք է ստանար Բորչալուի և Ախալքալաքի գավառները և Արդահանի շրջանը:

Հայաստանի վրա քեմալականների հարձակման նախապատրաստման ուղղությամբ որոշակի աշխատանք կատարվեց նաև Կոմիտեի գործկոմի նախաձեռնությամբ 1920 թ. սեպտեմբերի 1–7-ին Բաքվում անցկացված Արևելքի ժողովուրդների առաջին համագումարի օրերին (համագումարի աշխատանքների մասին մանրամասն տես Ա. Բ. Հարությունյան (Հարենց). Արևելքի ժողովուրդների առաջին համագումարը: Երևան, 1960): Համագումարին մասնակցում էին 26 երկրների 1891 պատվիրակներ, որոնցից 150-ը հայ բոլշևիկներ էին: Համագումարի ամբիոնից կոչեր էին հնչում ոչնչացնել «իմպերիալիստական» Հայաստանը, որն իբր թե պատրաստվում է Վրաստանի և Պարսկաստանի հետ դաշնակցած հարձակվել «հեղափոխական» Թուրքիայի և խորհրդային Ադրբեջանի վրա:

1920 թ. սեպտեմբերի 17-ին՝ համագումարի ավարտից 10 օր անց, Արևելքի ժողովուրդների պրոպագանդայի և գործողության խորհրդի նախագահությունը, որի մեջ էին Ս. Օրջոնիկիձեն, Ն. Նարիմանովը, Ե. Ստասովան և ուրիշներ, ընդունեցին որոշում, որտեղ ասված էր, որ, իրոք, Անգլիայի օգնությամբ Հայաստանը՝ Վրաստանի և Պարսկաստանի հետ դաշնակցած, պատրաստվում է շուտով հարձակվել խորհրդային Ադրբեջանի վրա: Եվ եթե հենց սեպտեմբեր ամսվա ընթացքում չհաջողվի կապ հաստատել Թուրքիայի հետ և Ռուսաստանը նրան ռեալ օգնություն ցույց չտա, թուրքական ազգային շարժումը կճնշվի, որը կհանգեցնի ընդհանրապես Արևելքում հեղափոխական շարժումների ճնշմանը: Դա հնարավորություն կտա Անգլիային՝ իր դեմ ուղղված մուսուլմանական աշխարհի շարժումն ուղղել խորհրդային Ռուսաստանի դեմ: Հետևությունը մեկն էր՝ խորհրդային Ռուսաստանի և համաշխարհային հեղափոխության համար կործանարար այդ հետևանքներից խուսափել կարելի է միմիայն թուրքական հեղափոխական գործերի հետ միասին Հայաստանի վրա հարձակվելու միջոցով՝ սեփական ժողովրդին շահագործող դաշնակների լուծել տալով իր շրջի տակ:

Երեք կետերից բաղկացած այս ընդարձակ որոշումն անմիջապես ուղարկվեց Երկրորդ ինտերնացիոնալի գործադիր կոմիտե, ՌԿ(Բ)Կ Կենտկոմ և ՌԽՖՍՀ արտգործօղկոմատ:

Մինչդեռ խորհրդային պատմագրությունը ժամանակին կամ լռության էր մատնում մշակված փաստերը, կամ Հայաստանն էր ներկայացվում իբրև ագրեսոր:

Հարկ է նշել նաև, որ խորհրդահայ պատմագրության մեջ Հայաստանի նախահարձակ լինելու վարկածը 1960–ականների կեսերից սկսած մերժվեց (տե՛ս Սարիբեկ Կարապետյան, 1920 թ. հայ–թուրքական պատերազմը և Սովետական Ռուսաստանը, Երևան, 1965):

ՊԱՏԵՐԱԶՄԻ ՍԿԻԶԲԸ և ԸՆԹԱՑԲԸ

Հայաստանի և Թուրքիայի միջև փաստական պատերազմական դրություն գոյություն ուներ դեռևս 1920 թ. հունիսից, երբ սահմանային լուրջ ընդհարումներ սկսվեցին Օլթիի շրջանում: Բանն այն է, որ Մուդրոսի զինադադարի համաձայն՝ թուրքերը պետք է հետ քաշվեին ռուս–թուրքական 1914 թ. սահմանից այն կողմ, սակայն նրանք հրաժարվում էին մաքրել Օլթին՝ մեջտեղ բերելով Բրեստ–Լիտովսկի և Բաթումի պայմանագրերը: Այդ հողի վրա սահմանային ընդհարումները չդադարեցին ընդհուպ մինչև թուրքական ընդհանուր արշավանքը:

Սեպտեմբերի 9–ին թուրքերը թնդանոթային կրակ բացեցին Վասկուտ սարի ուղղությամբ և հարձակում սկսվեց, բայց հայկական ուժերը նրանց հետ մղեցին:

Սեպտեմբերի 10–ին թուրքական հարձակումը վերսկսվեց, սակայն հայկական զորքը պատասխան հարված տվեց և երկօրյա մարտերից հետո գրավեց Կողբ գյուղը և աղահանքերը:

Համադրելով հայ–թուրքական պատերազմի սկսման վերաբերյալ պատմագիտական գրականության մեջ գոյություն ունեցող ամենատարբեր ամսաթվերը, հարցի խորագիտակ հետազոտող Էդ. Ջոհրաբյանը հանգում է այն հետևության, որ Հայաստանի վրա թուրքական ընդհանուր արշավանքի սկիզբ պետք է համարել 1920 թ. սեպտեմբերի 23–ի լույս 24–ի գիշերը:

Ի մի բերելով զանազան տեղեկություններ՝ Էդ. Ջոհրաբյանը եզրակացնում է, որ Հայաստանի վրա արշավող թուրքական զորքերի ընդհանուր թիվն անցնում էր 50 հազարից, որը շատ լավ էր զինված և ուներ ինքնաթիռներ, մինչդեռ հայերն ունեին ընդամենը երեք ինքնաթիռ, որոնցից երկուսը չէին գործում: Մինչդեռ հայկական հրամանատարությունը, մինչև Կարսի անկումը, թուրքական ուժերի թիվը հաշվում էր 4–5 հազար սվին:

Ինչպես նշում է Էդ. Ջոհրաբյանը, հայկական հրամանատարությունը ռեալ պատկերացում չուներ թուրքական ուժերի մասին և նույնիսկ տեղյակ չէր, թե ինչ է կատարվում սահմանից այն կողմ: ՀՀ արտգործնախարարության քարտուղար Հակոբ Տեր–Հակոբյանի վկայությամբ՝ ՀՀ զինված ուժերի գլխավոր շտաբի տվյալներով՝ 1920 թ. Քեմալի տրանսդրոյան տակ կար ընդամենը 7–8 հազար զորք, որոնց պարտականությունն էր պահպանել Թուրքիայի սահմանները և արևելյան նահանգները: Իսկ Համբարձում Տերտերյանը վկայում է, որ հայկական պետական շրջաններում այն կարծիքն էր տիրում, թե քեմալականների հետ բախման պարագայում հայկական զորամասերը հեշտությամբ կարող են գրավել Երզրումը և Երզրումի բարձրավանդակը:

Հավանաբար նման թյուր պատկերացման հետևանքով էր, որ Ս. Վրացյանի վկայությամբ, պատերազմն սկսելու պահին ամբողջ ճակատում՝ Սուրմալուից մինչև Օլթի, հայկական ուժերի թիվը 6000–ից չէր անցնում, որից շուրջ 2500–ը՝ Սուրմալուում, մնացածը՝ Կարսի ճակատում (Ս. Վ., էջ 427):

Էդ. Ջոհրաբյանի հաշվարկներով՝ թուրքական հարձակման հիմնական ուղղությունների վրա՝ Սուրմալուի և Կարս–Ալեքսանդրապոլ ճակատներում, հայերն ունեցել են ընդամենը մոտ 12.000 սվին, որը չափազանց քիչ էր ամեն տեսակետից հայկական բանակին գերազանցող թուրքական զորքերի առաջխաղացումը կանգնեցնելու համար (Է. Ջ., էջ 173–174): Նշվում է նաև հայ նորակոչիկների անպատրաստ լինելը և ադետալի չափերի հասնող դասալքությունը:

Քեմալական բանակի անվիճելի գերազանցության հետևանքով սեպտեմբերի վերջին օրերին տեղի ունեցած մի շարք համառ կռիվներից հետո հայկական բանակն սկսեց նահանջել: Սեպտեմբերի 29–ին թուրքերը գրավեցին Սարիդամիշը, իսկ 30–ին՝ Մերդենեկը: Դրանով պատերազմի առաջին շրջանն ավարտվեց: Այդ շրջանում հաջողությունն ամբողջովին թուրքերի կողմն էր, սակայն Իզդիթի և Շահախաթի շրջաններում նրանք առաջխաղացում գրեթե չունեցան:

Պատերազմի առաջին իսկ օրերից ՀՀ կառավարությունը կոնկրետ քայլերի դիմեց՝ ուժերը մորիլիզացնելու ուղղությամբ: Այդ արթիվ Ս. Վրացյանը գրում է. «Հայաստանը լարեց իր բոլոր ուժերը: Սեպտեմբերի 30–ին կառավարությունը արտակարգ նիստում երկիրը հայտարարեց պատերազմական դրության մեջ: Մինչև 35 տարեկանները զենքի տակ առավ: Խիստ օրենքներ սահմանեց դասալիքների դեմ: Ձինվո-

րական նախարարությանը տվեց արտակարգ լիազորություններ, նրան ենթարկեց երկաթուղիները, ռադիոկայանները և փոխադրության միջոցները: Որոշեց արագացնելու համար կառավարության գործունեությունը և շրջաններում հեղինակավոր ներկայացուցիչներ ունենալու նպատակով, նախարարների մի մասին և մի շարք գործիչներ ռազմաճակատ և գավառներ ուղարկել: Ալեքսանդրապոլ ուղարկվեցին Ա. Ջամայանը և Գ. Ղազարյանը, Կարս՝ Ս. Վրացյանը և Ա. Բաբայանը, Սուրմալու՝ Ս. Արարատյանը, Իջևան՝ Ա. Գյուլխանդանյանը, Նոր-Բայազետ՝ Ս. Մելիք-Յուլյանը, Աշտարակ՝ Խորհրդարանի անդամներ Դ. Տեր-Չակոբյանը և Դ. Տերտերյանը: Կենտրոնում մնացին Դ. Օհանջանյանը և Ռ. Տեր-Մինասյանը: Կառավարությունը մի սրտառուչ կոչ ուղղեց ժողովրդին: Ձինվորական նախարարի հրամանով երևանի և Կարսի հրապարակներում կանգնեցվեցին կախաղաններ: Կառավարության հետ միասին ամբողջ երկիրը ևս լարում էր իր ուժերը դիմադրելու համար իր թշնամուն (Ս. Վ., էջ 428)»: Ամենուրեք հայտարարվեց կամավորների ցուցակագրություն: «Չայաստանի քաղաքացիներին» կոչի մեջ ասվում էր, որ մի ելք կա միայն՝ հաղթել կամ մեռնել: Թիֆլիսից եկան շուրջ 800 հայ կամավորներ՝ մեծ մասամբ Ջավախքի հայերից: Ոչ մեծ թվով կամավորներ եկան նաև սփյուռքից:

Էտեները, սոցիալ-դեմոկրատները, ռամկավարները ևս կոչ արեցին մի կողմ դնել կուսակցական տարածայնությունները և ուժերը միավորել ընդհանուր թշնամուն հակահարված տալու, հայ ժողովրդի գլխին կախված վտանգը կանխելու համար: Կարծես թե վերադարձել էին Սարդարապատի ժամանակները: Ժողովուրդը չի սպասում միավորման կոչերի, նա ինքն է իր ներքին իմաստնությամբ որոշում միաբանվելու ճշգրիտ պահը. այդպես է եղել ողջ պատմության ընթացքում: Դրան հակառակ՝ հայ բուլշևիկները հայ բանվորներին ու գյուղացիներին ուղղված կոչ ընդունեցին, որտեղ ասված էր. «Մենք դիմում ենք Չայաստանի բանվորագյուղացիական մասսաներին, նրանց հեղափոխական կորույթին ու դասակարգային զիտակցությանը՝ կազմակերպվելու կոմունիստական կուսակցության դրոշի շուրջը, հավաքելու ցրված հեղափոխական ուժերին, որպեսզի ձեռք ձեռքի տված Խորհրդային Ռուսաստանի պրոլետարիատի հետ, միահանուռ ուժերով խորտակենք միջազգային իմպերիալիզմի հայկական-դաշնակցական հատվածի լուծը, նորից բարձրացնենք կոմունիզմի դրոշը Չայաստանում (Չոկտեմբերյան սոցիալիստական մեծ ռևոլյուցիան և սովետական իշխանության հաղթա-

նակը Չայաստանում. փաստաթղթերի և նյութերի ժողովածու, Երևան, 1960, էջ 394–395)»:

Պատերազմի հենց սկզբին ԶԳ կառավարությունը դիմեց եվրոպական երկրներին՝ օգնություն ստանալու խնդրանքով, սակայն ոչ մի տեղից այդպիսին չստացավ: Սեպտեմբերի 28–ին ԶԳ վարչապետ և արտգործնախարար Դ. Օհանջանյանը հեռագրով հանձնարարեց Վրաստանում Չայաստանի ներկայացուցիչ Տիգրան Բեկզադյանին՝ օգնության խնդրանքով դիմել Թիֆլիսում Ֆրանսիայի, Անգլիայի, Ռուսաստանի, Վրաստանի և Վրանգելի ներկայացուցիչներին: Սեպտեմբերի 30–ին Դ. Օհանջանյանը շտապ հեռագիր ուղարկեց Գ. Զիչերինին՝ խնդրելով բոլոր ջանքերը գործադրել թուրքերի հետագա հարձակումը Չայաստանի վրա դադարեցնելու համար:

Տ. Բեկզադյանը առաջինը հանդիպեց Բ. Լեգրանին: Վերջինս հայտնեց, որ օգոստոսի 10–ի Սևրի պայմանագրի կնքումից հետո Չայաստանի Չանրապետությունը պարզորոշ հայտնեց իր վերաբերմունքը Թուրքիայի նկատմամբ և ցուցադրեց իր քաղաքական կողմնորոշումը դեպի Անտանտը: Չայաստանի կառավարությունը որոշեց, որ սեփական ուժերով պիտի գրավի Վիլսոնի գծած Չայաստանը և պատերազմ սկսեց այն Թուրքիայի դեմ, որը չի կարող համաձայնել Սևրի պայմանագրի այդ որոշմանը: Այնուհետև Լեգրանը եզրակացնում է, որ թուրքական հարձակումը հետևանք է քեմալականների նկատմամբ Չայաստանի Չանրապետության ագրեսիվ քաղաքականության: Եթե ԶԳ կառավարությունը տրամադրված լիներ որևէ համաձայնությամբ վերացնելու սահմանային վեճերը Թուրքիայի հետ, ապա նա կարձագանքեր այն կոչին, որով Զիչերինը միաժամանակ դիմեց Քեմալին և Չայաստանին՝ առաջարկելով իր խաղաղարար միջնորդությունը, որին Թուրքիան հայտնեց իր համաձայնությունը, մինչդեռ Չայաստանը ոչ մի պատասխան չտվեց: Լեգրանն ավելացրեց նաև, որ եթե Չայաստանը նման հայտարարություն անի թեկուզ հիմա, իրենք Չայաստանի կառավարության՝ խաղաղության ձգտման ապացույց կունենան և կկարողանան ազդել Քեմալի վրա՝ կանգնեցնելու իր սխալ հարձակումը (Էդ. Ջոհրաբյան, Աշխ., էջ 185):

Տ. Բեկզադյանը Լեգրանին պատասխանում է, թե իրեն թվում է, թե թուրքերի հետ վեճերը խաղաղորեն լուծելու վերաբերյալ դեկլարացիան բոլորովին անտեղի է այն բանից հետո, երբ թուրքերը այդ վեճը լուծելու համար դիմել են զենքի: Այդ առնչությամբ պրոֆեսոր Էդ. Ջոհ-

րաբյանն ընդգծում է Լեզրանի հետ զրույցի ժամանակ Ս. Բեկզադյանի արտահայտած հետևյալ միտքը. «Այդ դեկլարացիան կթուլացնե՞ր մեր ժողովրդի դիմադրական ուժը՝ չտալով ոչ մի իրական արդյունք, քանի որ, դժբախտաբար, ձեր միջնորդությանը դիմելու մեր փորձը չափազանց դառը եղավ մեր ժողովրդի համար և նա հայտնի չափով հիասթափված է ձեզնից, իսկ ինչ վերաբերում է թուրքերին, ապա նրանց հավատալ մենք ընդհանրապես չենք կարող»։ Միանգամայն անհասկանալի և անընդունելի համարելով Հայաստանի ներկայացուցչի՝ հարցի խաղաղ լուծման համար հայտարարությունից հրաժարվելը, ինչպես նաև Ս. Բեկզադյանի արած դատողությունները ժողովրդի դիմադրական ուժի թուլացման, դառը փորձի և այլնի մասին, էդ. Ջոհրաբյանը միանգամայն ակնհայտ է համարում Ս. Բեկզադյանի հակառուսական, հակաբուլչիկյան տրամադրվածությունը։

Մանրամասնորեն վերլուծելով Լեզրանի հետ զրույցի վերաբերյալ Ս. Բեկզադյանի՝ Գ. Օհանջանյանին հասցեագրված նամակը, պրոֆեսոր էդ. Ջոհրաբյանը հանգում է այն հետևության, որ Ս. Բեկզադյանը անհրաժեշտ չի համարել հարցնել իր կառավարության կարծիքը և իրեն իրավունք վերապահելով գործել ու վճռել նրա փոխարեն, Ռուսաստանի միջնորդությանը դիմելը համարել է թակարդ ու մերժել Լեզրանի առաջարկությունը։ Նա նույնիսկ չի հավատացել Լեզրանի այն հայտարարությանը, եթե ինքը կհեռագրի Մոսկվա՝ Քենսլի վրա ազդելու և թուրքական հարձակումը կանգնեցնելու մասին, որովհետև ենթադրել է, որ այդ խաղը սկսվել է ոչ առանց խորհրդային Ռուսաստանի բարենադրության։

«Այդ շարժումը, ըստ երևույթին,— գրում է Ս. Բեկզադյանը,— լուրջ է ու բավականին ուժեղ կազմակերպված, և եթե մենք չկարողանանք հնարավորին չափ շուտ կանգնեցնել այն, մեր դրությունը՝ խորհրդային իշխանության մեր երկիր գալու տեսանկյունից, պետք է համարել միանգամայն վտանգված»։

Ընդգծելով վերը բերված քաղվածքի վերջին նախադասությունը, պրոֆեսոր էդ. Ջոհրաբյանը օրինական վրդովմունքով եզրակացնում է, որ Ս. Բեկզադյանի ամբողջ նամակում մի բառ անգամ չկա թուրքական հարձակման հետևանքով ժողովրդի ֆիզիկական գոյությանը սպառնացող վտանգի մասին, Բեկզադյանի համար միակ վտանգը խորհրդային իշխանության գալն է։

Հոկտեմբերի 1-ին Գ. Օհանջանյանը նորից է հեռագրում Ս. Բեկզադյանին և պահանջում դաշնակիցներից խնդրել շտապ և իրական օգնություն, ահազանգում, որ Հայրենիքը վտանգի մեջ է։

Հոկտեմբերի 8-ին Գ. Օհանջանյանը կառավարությունը հայ ժողովրդի անունից դիմեց ամբողջ քաղաքակիրթ մարդկությանը՝ «Բոլորին, բոլորին» կոչով, որտեղ վճռական բողոք էր հայտնվում թուրք ազգայնականների՝ Հայաստանի Հանրապետությանը վերջնականապես ոչնչացնելու մտադրությունների դեմ և խնդրվում էր օգնել Հայաստանին՝ իր հայրենիքի պատվի, ազատության ու անկախության համար հայ ժողովրդի մղած սրբազան կռիվում։

Կառավարության այս դիմումն ստանալուն պես Փարիզում Գ. Օհանջանյանի կառավարության նախագահ Ավետիս Ահարոնյանը տեսակցություն ունեցավ ԱՄՆ-ի, Անգլիայի, Ֆրանսիայի, Իտալիայի, Հունաստանի ներկայացուցիչների հետ և նրանցից խնդրեց գործնական օգնություն։ Սակայն, ինչպես գրում է էդ. Ջոհրաբյանը, քաղաքակիրթ Եվրոպան այս անգամ էլ խուլ գտնվեց հայ ժողովրդի հառաչանքների հանդեպ։ Ո՛չ Անգլիան, ո՛չ էլ Ֆրանսիան ոչ մի միջոց չձեռնարկեցին և բավարարվեցին միայն Ազգերի լիգայում անպտուղ ճառեր արտասանելով, հավաստիացնելով, որ քանի որ քենսլական թուրքիան կազմակերպված պետություն է, նրա վրա տնտեսական կամ որևէ այլ միջոց գործադրել հնարավոր չէ, որ Ազգերի լիգան իր տրամադրության տակ զինված ուժեր չունի և այլն։

Ինչպես նշում է էդ. Ջոհրաբյանը, փաստերը ցույց են տալիս, որ Անգլիան, Ֆրանսիան և մյուսները ոչ թե չէին կարող, այլ չէին ցանկանում օգնելու նավաբեկության ենթարկված Հայաստանին։ Այսպես՝ բրիտանական ծովակալ Ռոբերտի առաջարկին՝ թե Անտանտի կողմից Հայաստանին օգնելու ամենաարդյունավետ միջոցը կլինի Տրապիզոնի գրավումը, Քերզոնը պատասխանում է, թե դաշնակիցների կողմից Տրապիզոնի օպերացիան անիրագործելի է, իսկ հունական օկուպացիան՝ անցանկալի։

ԱՄՆ-ի պրեզիդենտ Վիլսոնը հայտնեց, որ ինքը չի կարող աներկյան զորքեր հատկացնել Հայաստանին օգնելու նպատակով և չի կարող առանց կոնգրեսի, որն այդ ժամանակ միտեր չէր գումարում, ֆինանսական օգնություն ցույց տալ։

Անդրկովկասում ֆրանսիական զերագույն կոմիսարի պաշտոնակատար Նեթեմանը հայտարարեց, ներկայումս ստեղծվել է այնպիսի

դրություն, որը թույլ չի տալիս դաշնակիցներին իրենց ուժերն ուղարկել Անատոլիա՝ հայերին ռազմական օգնություն ցույց տալու համար:

Իտալիայի ներկայացուցիչ Ֆրանգոնին հայտարարում էր, թե իրենք միջոցներ կգտնեն, որպեսզի հարկադրեն քեմալականներին՝ հարգելու Հայաստանի անկախությունը, բայց այդ նույն ժամանակ իտալական տրանսպորտային նավերը անխափան կերպով Սամսուոնի վրայով գննք ու զինամթերք էին մատակարարում թուրքերին:

Հունաստանը պատրաստ էր հայերին օգնելու նպատակով 25.000-ամոց դեսամտ ափ հանել Տրապիզոնում, բայց դա չիրագործվեց, որովհետև, ինչպես նշվեց, Անգլիան դա չէր ցանկանում:

Վրանգելը, եթե ցանկանար էլ, չէր կարող օգնել, որովհետև այդ օրերին ինքը ծանր դրության մեջ էր:

Վրաստանը, չնայած Հայաստանին սպառնացող վտանգի մասին աղմկարարությամբ, օգնելու փոխարեն գերադասեց օգտվել հարմար պահից և տարածքային զավթումներ կատարել ի հաշիվ Հայաստանի՝ փաստորեն դառնալով թուրք զավթիչների գործակիցներ:

Կատարված բազմաթիվ դիմումների միակ արձագանքը եղավ այն, որ անգլիական բարձրագույն կոմիսար, գնդապետ Ստոքսը հոկտեմբերի 5-ին Թիֆլիսից ժամանեց Երևան, մոտ երկու ժամ զրուցեց վարչապետ Հ. Օհանջանյանի հետ, որից հետո մեկնեց Կարս, որի կայարանում նրան ցույց տրվեց հանդիսավոր դիմավորում: Այնուհետև Ստոքսը շրջագայեց ռազմաճակատում, գտավ, որ այն բավականաչափ ամուր է ու... մեկնեց: Եվ էլ ուրիշ ոչինչ:

Զնոռանանք, իհարկե, որ դեռևս պատերազմից առաջ ՀՀ-ն Անգլիայից գնել էր մեկ միլիոն ոսկու արժողությամբ գննք, զինամթերք և ռազմական հանդերձանք, սակայն տվյալ աղետալի իրավիճակում նրա օգնության ակնկալիքը բոլորովին այլ բնույթի էր՝ տերությունների ռազմական և դիվանագիտական կտրուկ միջամտությունը, որը և նրան մերժվեց:

ՊԱՏԵՐԱԶՄԻ ԵՐԿՐՈՂ ՇՐՋԱՆԸ

Պրոֆեսոր Էդ. Զոհրաբյանը, ելնելով ռազմական գործողությունների բնույթից, պայմանականորեն պատերազմը բաժանում է երեք շրջանների: Առաջին շրջանն ավարտվում է սեպտեմբերի 30-ին, երկրոր-

դը տևում է հոկտեմբերի 1-28-ը, երրորդը՝ հոկտեմբերի 28-ից մինչև նոյեմբերի 18-ը:

Սեպտեմբերի 30-ին թուրքերի կողմից Սարիղամիշի և Մերդենեկի գրավումից հետո թուրքական զորքերի առաջխաղացումը կանգնեցվեց: Սկսվեց պատերազմի երկրորդ շրջանը, երբ մինչև հոկտեմբերի վերջը ռազմական գործողություններն ընթանում էին մոտավորապես նույն գծում:

Ինչպես ժամանակին ինքը՝ Մ. Քեմալը, այնպես էլ հետագայի թուրք պատմաբանները, հոկտեմբերին թուրքերի առաջխաղացման դադարեցումը պայմանավորել են բացառապես երգրումում Արիֆ բեյի բարձրացրած հակակառավարական ելույթի ճնշման անհրաժեշտությամբ՝ ոչ մի խոսք չասելով Սուրմալուի ճակատում հայկական բանակի դիմադրության, Կարսի ճակատում հոկտեմբերի 14-ի հակահարձակման մասին:

Ռազմական գործողություններն ընթանում էին երկու՝ Կարսի և Սուրմալուի ճակատներում, որոնցից առաջինի իրամանատարն էր գեներալ Մովսես Սիլիկյանը, երկրորդինը՝ Դրոն (Դրաստամատ Կանայանը):

Ըստ Ս. Վրացյանի տվյալների՝ Սուրմալուի ճակատի ընդհանուր իրամանատար Դրոյի իրամանատարության տակ էին 9-րդ գունդը (իրամանատար՝ գնդապետ Խուրաբաշյան), 8-րդ գունդը (իրամանատար՝ Տ. Բաղդասարյան), հինգ վաշտից բաղկացած էքսպեդիցիոն մի գորամաս, Կուռո Թարխանյանի 260 հեծյալները, բոլորը միասին՝ մոտ 2000 զինվոր, 36 գնդացիր (Ս. Վ., էջ 506):

Ս. Վրացյանի վկայությամբ՝ հոկտեմբերի 20-ին թուրքերը Սուրմալուի ճակատում հարձակման անցան Կարաբուլաղ և Սոգուբլի գյուղերի վրա: Ամբողջ օրը տեղի ունեցան թեժ կռիվներ: Երկուստեք անընդհատ որոտում էին թնդանոթները: Թշնամու գերազանց ուժերի ճնշման տակ հայկական ուժերը նահանջեցին մինչև Արաքս, սակայն հաջորդ օրը դիմեցին հակահարձակման և հակառակորդին հետ շարտեցին՝ տալով սպանված և վիրավոր երկու սպա և 60 զինվոր:

Դարձյալ ըստ նույն հեղինակի՝ հոկտեմբերի 24-ին կատաղի կռիվներ սկսվեցին Քուլլուկ, Կարակալա, Վերին Զարուխչի, Դաշբուռուոնի շրջանում: Վաղ առավոտյան Իգդիրի և Մարգարայի ռազմությամբ հարձակում սկսեցին թուրքական մեկ կանոնավոր դիվիզիա և բազմաթիվ քրդական խմբեր: Սկսվեցին արյունահեղ կռիվներ, սակայն թշնամին բազմաթիվ գրոհներից հետո հետ շարտվեց: Թուրքերն ամեն գնով

ծգտում էին գրավել Մուրմալուն, իսկ հայերը վճռել էին մեռնել, բաց տեղի չտալ: Կռիվները շարունակվեցին երեք օր: Տեղ–տեղ սպանվեց կամ վիրավորվեց հայկական ուժերի մինչև կեսը: Հայ սպաները՝ գնդապետ Խուդաբաշյան, Մամաջանյան, Գալուստյան, Հովասափյան, Թարվերդյան, Թարխանյան, Մակ–Մալիցկի, Թոփչյան, Աբգարյան, Պետրոսյան, Ղանբարյան և ուրիշներ, ցույց տվեցին անձնական հերոսության փայլուն օրինակներ: Դրանցից բնորոշ է հետևյալ օրինակը. կռվի երկրորդ օրը Դրոյի հրամանով Քանաքեռից չորս բեռնատար ավտոմեքենաներով օգնության շտապեց Կուռ Թարխանյանի ջոկատը: Մարգարայում պարզվեց, որ խճուղին գրավված է թշնամու կողմից, և այլևս առաջ գնալու հնարավորություն չկա: Առանց երկար մտածելու Կուռն ինքը նստեց առաջին ավտոմեքենայի վարորդի կողքին և չորս մեքենաները միմյանցից 50–ական մետր հեռավորությամբ սրընթաց շարժվեցին առաջ՝ միաժամանակ երկու կողմերից գնդացրային մրկածուփ կրակ տեղալով ճանապարհը բռնած թշնամու վրա: Հանկարծակիի եկած թուրք զինվորները սարսափահար թաքնվեցին ճանփեզրյա առուներում: Նման անձնագոհ եղանակով Կուռոյին հաջողվեց ճեղքել թշնամու շղթան և օգնության հասնել օրհասական վիճակում հայտնված Դալիզդաղի ճակատամասի մարտիկներին: Այդ հիրավի հերոսական ճեղքման ընթացքում վիրավորվեցին Կուռոյի 8 մարտիկներ, իսկ գնդացրային դասակի հրամանատար Մակ–Մալիցկին զոհվեց (Սիմոն Վրացյան, նշվ. աշխ., էջ 506–507):

Այնուհետև Ս. Վրացյանը վկայում է, որ հոկտեմբերի 26–ին Սուրմալուի ճակատամարտում հայկական զորքերն անցան հակահարձակման, և թշնամին բոլոր կետերում, կատաղի դիմադրությունից հետո, բազմաթիվ դիակներ թողնելով, դիմեց խուճապային փախուստի՝ անցնելով Բարդոյան լեռների մյուս կողմը: «Երևանը, — գրում է Ս. Վրացյանը, — որ մի քանի օր ապրում էր Սուրմալուից հասնող թնդանոթների ուրտի տակ և սարսափահար սպասում էր ճակատամարտի ելքին, հանգիստ չունչ քաշեց: Թշնամին այլևս Սուրմալուի ճակատում կենդանի գործունեություն ցույց չտվեց (Ս. Վ., էջ 508)»:

Ս. Վրացյանի նկարագրության համաձայն՝ բոլորովին այլ, անբարենպաստ ընթացք ստացան մարտական գործողությունները Կարսի ճակատում: Այստեղ գործում էր գեներալ Հովսեփյանի բրիգադը, որի մեջ մտնում էին գնդապետ Մազմանյանի առաջին, գնդապետ Միրիմանյանի 4–րդ, գնդապետ Շաղուբադյանի 5–րդ գնդերը, Սեպուհի բրիգա-

դը, որի մեջ էին գնդապետ Իշխանյանի 7–րդ և փոխգնդապետ Բաղդասարյանի 8–րդ գնդերը, գնդապետ Դորդանյանի հեծյալ բրիգադը, Փիլոսի, Մուրադյանի, Սմբատի և մի քանի ուրիշ կամավորական խմբեր: Այստեղ էր նաև «Ազատամարտ» գրահագնացքը, մի քանի սավառակներ: Կարսի բերդապետն էր գեներալ Դանիել Բեկ–Փիրումյանը: Կարսի ճակատի ընդհանուր հրամանատարն էր գեներալ Մ. Սիլիկյանը, շտաբի պետը՝ գնդապետ Վեքիլյանը:

Ս. Վրացյանը վկայում է, որ Կարսի ճակատում զորքերը թույլ էին կազմակերպված, վատ էին սպաների և զինվորների, ինչպես նաև առանձին հրամանատարների փոխհարաբերությունները: Ձինվորների մեծ մասը նորակոչիկներ էին: Ձինվորների մեծ մասը զինված էին Անգլիայից նոր ստացված «Ռոս» տիպի հրացաններով, որոնց դեռ չէին վարժվել: Վատ էր կազմակերպված թիկունքը:

Ձորքերի ոգին բարձրացնելու նպատակով հայկական բարձրագույն հրամանատարությունը որոշեց անցնել ընդհանուր հարձակման, որը, ցավոք, հաջողություն չունեցավ: Թշնամու ուժեղ դիմադրության հետևանքով հայկական զորքերը նահանջեցին մինչև Կարս:

Այնուհետև նախաձեռնությունն անցավ Թուրքերի ձեռքը: Քայլ առ քայլ ճնշելով հայկական ուժերի դիմադրությունը՝ հոկտեմբերի 28–ին թուրքերը գրավեցին Վեզենքոյի բարձունքները: Ամբողջ օրը թեժ մարտեր ընթացան: Գնդապետ Մազմանյանի գունդը ձգտում էր հետ խլել Վեզենքոյը: Այդ կռիվներում երկու կողմերն էլ մեծ կորուստներ ունեցան:

Հոկտեմբերի 30–ի առավոտյան հրաման տրվեց հայկական զորքերին՝ անցնել հակահարձակման և գրավել Վեզենքոյը: Սակայն գնդապետ Մազմանյանի 1–ին գունդը չենթարկվեց հրամանին և տեղից չշարժվեց: Բոլորի աչքի առջև գնդապետ Մազմանյանը մաուզերով ինքնասպանություն գործեց: Սակայն դա էլ չազդեց զորքի վրա:

Օգտվելով ստեղծված իրադրությունից՝ նույն օրը՝ հոկտեմբերի 30–ին, մեծ ուժերով հարձակման անցան թուրքերը: Հայերը դիմեցին խուճապային փախուստի: Կարսն ընկավ թուրքերի ձեռքը: Գերության մեջ հայտնվեցին գեներալներ Փիրումյանը, Արարատյանը, գնդապետներ Շաղուբադյանը, Վեքիլյանը, Բաբաջանովը, փոխգնդապետ Տեր–Առաքելյանը, մոտ 30 զանազան սպաներ, մոտ 3000 զինվորներ, նախարար Ա. Բաբալյանը, Գարեգին Արքեպիսկոպոս Հովսեփյանցը, փոխնահանգապետ Զալխուշյանը, քաղաքագլուխ Նոիրատյանը և Կարսի ազգաբնակչության մեծ մասը: Երեք օր անընդհատ թուրքերը

թալանեցին, բռնաբարեցին, սպանեցին և ամեն տեսակ վայրագություններ կատարեցին գրավված քաղաքում:

Կարսում թուրքական զազանություններին զոհ գնացին շուրջ 6.000 հայեր: Փախած հայերի տներում տեղավորվում էին բազմահազար մահմեդականներ:

Կարսի անկումից հետո հայկական զորքերը համախմբվեցին Ղզլչախչախի տակ, որտեղ նոյեմբեր 4-ից վերսկսվեցին թեժ մարտերը վրա հասած թուրքերի դեմ: Թշնամին ձգտում էր կտրել կիրճի բերանը և գերել հայկական ուժերին: Սակայն «Ազատամարտ» զրահագնացքի սպանիչ կրակով թուրքերի պլանը ծախտղվեց: Մեծ կորուստներ տալով թշնամին կանգ առավ:

Միաժամանակ խուճապ առաջացավ Ալեքսանդրապոլում: Նահանգապետը հեռացավ քաղաքից՝ անպաշտպան թողնելով այն: Փախուստի դիմեց քաղաքային պաշտոնության մեծ մասը: Բանտից ազատված բոլշևիկները ստեղծեցին Դեղկոմ: Սակայն Ա. Ջամալյանի, Անպոլիի և այլոց ջանքերով ստեղծվեց քաղաքային իշխանություն, Լ. Սարգսյանը նշանակվեց քաղաքագլուխ:

Կարսի անկումից հետո Անկարայի և Գր կառավարությունները համարյա միաժամանակ հաշտության առաջարկ արեցին:

Նոյեմբերի 6-ին Քյազիմ Կարաբեքիրը առաջարկեց զինադադարի պայմաններ, որոնք Գր կառավարությունն ընդունեց: Սակայն նոյեմբերի 8-ին թուրք հրամանատարը իր կառավարության անունից ներկայացրեց հետևյալ նոր պահանջները. 24 ժամվա ընթացքում Ալեքսանդրապոլում հանձնել բոլորովին նոր 2000 արագահարված հրացան, 20 ծանր և 40 արագահարված գնդացիր, երեք մարտկոց թնդանոթ, 4000 ջորի, 1000 սնդուկ հրացանի փամփուշտ, 6000 թնդանոթի արկ, 2 շոգեքարշ, 50 վագոն: Գայկական ուժերը պիտի քաշվեն Արփաչայ-Ալազյազ կայարան-Նալբանդ կայարան-Վորոնցովկա գծից արևելք՝ երկաթուղագիծը թողնելով անվնաս: Երեք օրվա ընթացքում հայկական զորքերը պիտի քաշվեին նաև Մուրմալու-Արաքս կայարան-Ալազյազ լեռ-Դանագիրմազ-Լոռի գծից արևելք: Սանահին-Ալեքսանդրապոլ երկաթուղագծի վրա ռազմական փոխադրումները պիտի դադարեն: Տրվում էր յոթ օր պայմանաժամ:

Գր կառավարությունը վճռականորեն բողոքեց այդ նոր պահանջի դեմ և մերժեց դրանք, ուստի ռազմական գործողությունները նոյեմբերի 11-ին վերսկսվեցին:

Նոյեմբերի 14-ին թուրքերը հարձակվեցին Ջաջուռի ուղղությամբ: Գայկական զորքերը նահանջեցին դեպի Գամամու: Թեժ կռիվներ տեղի ունեցան նաև Ադինի շրջանում, սակայն դրանք արդեն վերջին կռիվներն էին:

Գր կառավարությունը համաձայնեց թուրքերի պահանջներին, կնքվեց զինադադար և նոյեմբերի 22-ից նրանց հանձնվեց պահանջվածը:

Գր կառավարությունը դիմեց Մոսկվայի միջնորդությանը: Չիչերի-նը Բուդու Մոլիվանիին նշանակեց հայ-թուրքական բանակցությունների մասնակից:

Միաժամանակ Թիֆլիս ուղարկվեց Ալ. Խատիսյանը՝ դիմելու դաշնակից տերությունների ներկայացուցիչներին: Սակայն գնդապետ Ստոքսը պատասխանեց, որ Անգլիան ոչնչով չի կարող օգնել, և հայերին ոչինչ չի մնում անել, քան իբրև չարյաց փոքրագույն՝ հաշտվել Խորհրդային Ռուսաստանի հետ (Ս. Վ., էջ 514-515):

Եվ էլի կարծատեսությունը սկսում է նեղել Ս. Վրացյանին, երբ խոսք է գնում Ռուսաստանի մասին: «Գաշտվել Խորհրդային Ռուսաստանի հետ,— գրում է նա,— բայց ո՞ր էր նա՝ այդ Ռուսաստանը և ի՞նչ կարող էր անել տվյալ պայմաններում, երբ թուրք բանակը կեցած էր Ախուրյանի և Արաքսի եզերքներին՝ ամեն վայրկյան ներխուժելու պատրաստ (Ս. Վ., էջ 515):

Գր կառավարությունը Ալեքսանդրապոլ ուղարկեց հաշտության պատվիրակություն հետևյալ կազմով. Ա. Խատիսյան (նախագահ), ներքին գործոց նախարար Ա. Գյուլխանդանյան, Կարսի նահանգապետ Ստ. Ղորղանյան, Խորհրդարանի անդամներ Վ. Մինախոյան, Լ. Ջարաֆյան:

Նոյեմբերի 23-ին Ալ. Խատիսյանի գլխավորած պատվիրակությունը մեկնեց Ալեքսանդրապոլ և նույն օրն էլ վարչապետ Գ. Օհանջանյանը Խորհրդարանին ներկայացրեց իր գլխավորած կառավարության հրաժարականը:

Գայ-թուրքական պատերազմի շարժառիթների վերաբերյալ կարևորագույն հետևություններ է արել ակադեմիկոս Գալուստ Գալոյանը: Այսպես՝ հրապարակելով «Արևելքի ժողովուրդների գործունեության քարոզչության խորհրդի» նախագահության 1920 թ. սեպտեմբերի 17-ի որոշման գրգռիչ դերը թուրքերի կողմից Գայաստանի դեմ ձեռնարկված ագրեսիայի հարցում, համաձայն որի թուրքական զորքերը պետք է սկսեին հարձակումը Գայաստանի վրա, իսկ Խորհրդային զորքերը հայ-թուրքական նոր կոտորածներին վերջ տալու նպատակով պետք է

մտնեին Հայաստան և այնտեղ հաստատեին խորհրդային իշխանություն, Գ. Գալոյանը միանգամայն իրավացիորեն գտնում է, որ այդ որոշումը չի կարելի համարել որոշիչ: Չլիներ այդ որոշումը, միևնույն է, թուրքերը հարձակվելու էին Հայաստանի վրա (Գ. Գալոյան, Հայաստանը և մեծ տերությունները 1917–1923 թթ., էջ 293):

Գ. Գալոյանը պատերազմի սկիզբը համարում է սեպտեմբերի 22–ը, երբ թուրքական զորքերը Օլթին գրավելուց 9 օր անց, առանց պատերազմ հայտարարելու, Կարսի և Մուրմալուի ուղղություններով անցան ընդհանուր հարձակման: Նրա շարադրանքի համաձայն՝ հոկտեմբերի 1–ին Լեզրանը տազնապով հաղորդում է Չիչերինին՝ Կարսը գրավելու թուրքերի մտադրության և դրա՝ Ռուսաստանի համար վտանգավորության մասին, սակայն Չիչերինը առանձին նշանակություն չի տալիս դրան: Այստեղից Գ. Գալոյանը եզրակացնում է, որ այն, ինչը 1878 թ. հասկացել էր Ռուսաստանի վարչապետ Ա. Գորչակովը, 1920 թ. չկարողացան հասկանալ խորհրդային ղեկավարները:

Գ. Գալոյանն այն կարծիքն է հայտնում, որ եթե Մոսկվային հայտնի Սարիղամիշ–Շահթախթ գծից թուրքերի անցնելուց հետո խորհրդային կառավարությունը վճռական պահանջ ներկայացնեի թուրքերին՝ դադարեցնելու հետագա առաջխաղացումը, գուցեև դրանով կավարտվեր հայ–թուրքական պատերազմը, սակայն խորհրդային կառավարությունը այդպիսի բան չպահանջեց (Գ. Գ., էջ 300): Նա գտնում է, որ խորհրդային Ռուսաստանի և Անտանտի տերությունների միջև եղած անհարթահարելի հակասությունները ճակատագրական եղան Հայ դատի համար (էջ 304):

Այնուհետև Գ. Գալոյանը ցույց է տալիս, որ խորհրդային Ռուսաստանի կառավարությունը պահանջում էր ՀՀ կառավարությունից՝ պաշտոնապես հրաժարվել Սևրի պայմանագրից և դրանով հավաստել, որ ինքը Անտանտի ձեռքին գործիք չի դառնում: Այդ նախապայմանով Ռուսաստանը խոստանում էր հանդես գալ իբրև տարածքային սահմանազատման միջնորդ և հարկադրել թուրքիային՝ տարածքային որոշ զիջումներ անել Հայաստանին: Սակայն ՀՀ կառավարության խանդավառ ռզնորությունը դեռ չէր սառել և նա դեռևս պատրաստ չէր հրաժարվելու Սևրի պայմանագրից: «Հայաստանի կառավարությունը,— գրում է Գ. Գալոյանը,— զրկված լինելով ստույգ ինֆորմացիայից, չէր կարողանում ճիշտ կողմնորոշվել ստեղծված իրադրությունում: Ոչ առանց հիմքի կասկածամտորեն վերաբերվելով Ռուսաստանի կառավարության ա-

մեն մի առաջարկին և իրական դաշնակիցներ ձեռք չբերելով Արևմուտքում, նա ըստ էության, մնաց մեն–մենակ թուրքական մինչև ատամները զինված հրոսակների դեմ (Գ. Գ., էջ 305)»:

Գ. Գալոյանը նկատում է, որ երկրի պաշտպանությունը կազմակերպելու ուղղությամբ կառավարության ջանքերն արդյունավետ չեն եղել և վկայակոչում է Թ. Նազարբեկյանի հեռագիրը վարչապետին, ըստ որի՝ նոյեմբերի 14–ին ռազմաճակատում կար 3000 զինվոր, իսկ հաջորդ օրը մնացել էին ընդամենը 600–ը: Այնուհետև Գ. Գալոյանը ներկայացնում է տերությունների բռնած աննպաստ դիրքը Հայաստանի նկատմամբ, պարզաբանում, որ Վրաստանի «չեզոք» դիրքը հօգուտ Թուրքիայի էր:

Ակադեմիկոսը նշում է, որ եթե պատերազմի առաջին երեք շաբաթներին քեմալականների առաջխաղացումը չէր անհանգստացնում Ռուսաստանի կառավարությանը, ապա հոկտեմբերի կեսերից այն խիստ անհանգստություն էր առաջացրել, որովհետև մտավախություն կար, որ Ռուսաստանը կարող է ներքաշվել ռազմական գործողությունների մեջ: Իսկ թուրքերի առաջխաղացումը կանխելու հնարավորություն, ինչպես գրում էր Չիչերինը, Ռուսաստանը չուներ: Քեմալին հայտնի էր այդ հանգամանքը, և այդ պատճառով էլ այդ օրերին նա կտրել էր տվել հեռագրական կապը խորհրդային Ռուսաստանի կառավարության հետ և ոչ մի բանի առաջ կանգ չառնելով՝ վերջին հարվածներն էր հասցնում պատերազմում փաստական պարտություն կրած Հայաստանին (Գ. Գ., էջ 317):

ՀԱՅ–ՌՈՒՍԱԿԱՆ ԲԱՆԱԿՑՈՒԹՅՈՒՆՆԵՐԸ ԵՐԵՎԱՆՈՒՄ: ՀԱՇՏՈՒԹՅԱՆ ՊԱՅՄԱՆԱԳՐԻ ՀՈԿՏԵՄԲԵՐԻ 28–Ի ՆԱԽԱԳԻԾԸ

Մոսկվայում ընդհատված հայ–ռուսական բանակցությունները վերսկսվեցին Երևանում, հոկտեմբերի 12–ին, երբ արդեն սկսվել ու խորացել էր քեմալական թուրքիայի ագրեսիան Հայաստանի դեմ:

Երևանի բանակցությունները պետք է շարունակեի հուլիսի 19–ին Հայաստանում խորհրդային Ռուսաստանի լիազոր ներկայացուցիչ Բորիս Լեզրանը, որը մինչ այդ, չընդունվելով ՀՀ կառավարության կողմից, մեկնել էր Թիֆլիս, այնտեղից էլ Բաքու՝ մասնակցելու Արևելքի ժողովուրդների համագումարին:

ՀՀ կառավարության անուսից բանակցությունները շարունակում էր վարել սեպտեմբերի 14-ին Մոսկվայից վերադարձած Լևոն Շանթի պատվիրակությունը:

Հայկական պատվիրակության անդամ Համբարձում Տերտերյանի հուշերի համաձայն՝ Բ. Լեզրանը բանակցությունների հենց սկզբում վերջնագրի ձևով հայկական կողմին ներկայացրեց հետևյալ նախապայմանները. 1. Հրաժարվել Անիի պայմանագրից, 2. Թույլ տալ խորհրդային զորքերին՝ Հայաստանի երկաթուղիներով ու խճուղիներով միանալու Մուստաֆա Քեմալի զորքերին՝ Անտանտի դեմ կռվելու նպատակով, 3. Հայաստանի և հարևանների միջև գոյություն ունեցող սահմանային վեճերի լուծումը հանձնել խորհրդային Ռուսաստանի իրավասությանը («Հայրենիք» ամսագիր, Բոստոն. 1954, թիվ 5): Դրանք ընդունվեցին ՀՀ կառավարության կողմից:

Գ. Գալոյանը նշում է, որ բանակցությունների առաջին իսկ օրվանից ՀՀ պատվիրակությունը հաղթողի կեցվածքով պահանջում էր, որ պեսզի ռուսները ստիպեն թուրքերին՝ զորքերը հետ քաշել մինչև Երզնկա, իսկ հայ-ադրբեջանական տարածքային վեճերը լուծեն հօգուտ Հայաստանի:

Հարկ է նկատի ունենալ նաև, որ հայ-ռուսական բանակցություններն սկսվելուց երկու օր անց՝ 1920 թ. հոկտեմբերի 14-ին, ՌԿ(Բ)Կ Կենտկոմի քաղբյուրոն որոշում էր ընդունել համաձայնել Հայաստանի կոմկուսի Կենտկոմի և Կոմբյուրոյի կարծիքի հետ՝ Հայաստանում խորհրդային իշխանություն հաստատելու անհրաժեշտության մասին: Ռոշվել էր նաև խորհրդայնացած Հայաստանին քաղաքական օգնություն ցույց տալ՝ թուրքերի հետագա առաջխաղացումը կասեցնելու համար, ինչպես նաև պաշտպանել Հայաստանի խորհրդային կառավարությանը:

Նորահայտ փաստաթղթերի հիման վրա Գ. Գալոյանն արձանագրում է, որ ՀՀ կառավարության վրա ճնշում էին գործադրում նաև Անտանտի երկրները, որը և հարկադրում էր խորհրդային Ռուսաստանին՝ չչտապել Հայաստանի խորհրդայնացման հարցում՝ Կոմկասում Անտանտի հետ ռազմական բախման մեջ չմտնելու համար: Նա նշում է, որ հոկտեմբերի 24-ին հատուկ առաքելությանը Երևան էր ժամանել Ստոքսը՝ թույլ չտալու, որ Հայաստանը պայմանագիր կնքի Ռուսաստանի հետ:

Նման պայմանագրի կնքման հեռանկարը անհանգստացրել էր նաև ԱՄՆ-ին: Ամերիկյան արխիվներից հայտնաբերած նոր փաստաթղ-

թերի հիման վրա Գ. Գալոյանը ցույց է տալիս, որ Կ. Պոլսում ԱՄՆ-ի դեսպան Մարկ Բրիստոլը իր զեկուցագրերում կոչ էր անում ամերիկյան կառավարությանը՝ ձեռնպահ մնալ Հայաստանի Հանրապետությանը օգնելուց, որովհետև այն անորոշ երկիր է, այնտեղ բոլշևիկների նկատմամբ ուժեղ բարյացակամություն կա, և առաջին իսկ հարմար առիթի դեպքում Հայաստանը կդառնա բոլշևիկյան: «Նորահայտ այս փաստաթղթերը.— եզրակացնում է Գալոյանը,— բացատրելի են դարձնում հայ-թուրքական պատերազմի ժամանակ դաշնակից տերությունների գրաված դիրքը (Գ. Գ., էջ 323)»:

Երևանում ընթացող բանակցություններն ավարտվեցին 1920 թ. հոկտեմբերի 28-ին: Մշակվել էր Հայաստանի և Ռուսաստանի միջև հաշտության պայմանագրի նախագիծ, որը կողմերը պետք է համաձայնեցնեին իրենց կառավարությունների հետ:

Փաստերը վկայում են, որ պայմանագրի նախագիծը Լեզրանը չէր համաձայնեցրել խորհրդային Ռուսաստանի կառավարության հետ: Նախագիծն չէր ծանոթացել նաև Ի. Ստալինը, որին հանձնարարված էր տնօրինել Կովկասին վերաբերող բոլոր հարցերը: Պայմանագրի նախագիծն համաձայն՝ խորհրդային Ռուսաստանը անվերապահորեն ճանաչում էր ՀՀ անկախությունը:

— ՌԽՖՍՀ-ը արդարացի էր համարում թուրքահայաստանի միակցումը Հայաստանի Հանրապետությանը և պատրաստակամություն էր հայտնում բարեկամական աջակցություն ցուցաբերել նշված մարզերը կամ նրանց մի մասը Հայաստանին միացնելու հարցում:

— Հայաստանը համաձայն էր, որպեսզի Ռուսաստանը իր երկաթուղիներով ռազմական հանդերձանք ու զորամասեր տեղափոխեր, պայմանով, որ թուրքիային տրվող զենքն ու ռազմական հանդերձանքը չէր օգտագործվելու ՀՀ դեմ:

— Հայաստանն ընդունում էր Ռուսաստանի միջոցորդությունը Արևմտյան Հայաստանի տարածքային հարցերը լուծելիս: Փոխարենը Ձանգեզուրը և Նախիջևանը ճանաչվում էին իբրև Հայաստանի անբաժանելի մասեր: Հայաստանը հրաժարվում էր Դարաբաղի նկատմամբ իր պահանջներից:

— Հայաստանի տարածքով տեղափոխվող ռուսական զենքի և ռազմական հանդերձանքի 25 տոկոսը թողնվելու էր Հայաստանին:

— Ռուսաստանը Հայաստանին անվերադարձ հատկացնելու էր 2.5 միլիոն ռուբլի՝ ոսկով:

— Հայաստանի կառավարությունն ընդունելու էր Ռուսաստանի միջնորդությունը հայ-թուրքական կոնֆլիկտը կարգավորելու հարցում, պայմանով, որ Թուրքիան դադարեցնելու էր ռազմական գործողությունները և իր զորքերը հետ էր քաշելու մինչև 1914 թ. ռուս-թուրքական սահմանագիծը: Թուրքիան պաշտոնապես պիտի հրաժարվեր 1918 թ. Բրեստի պայմանագրից և վերը նշված սահմաններում պիտի ճանաչեր ՀՀ սուվերենությունը:

— Հայաստանի տարածքով փոխադրվող զենքն ու ռազմական հանդերձանքը պիտի ուղարկվեր Տրապիզոն-Էրզրում-Մուշ-Բիթլիս գծից այն կողմ, իսկ Հայաստանը Ռուսաստանի շահագործմանն էր հանձնելու Շահթախթ-Մակու նեղոցի երկաթուղին:

Բանակցությունների եզրափակիչ միտում ստորագրվեց նաև արձանագրություն, որով կողմերը պարտավորվում էին ստորագրել հաշտության պայմանագրի նախագիծը:

Արձանագրությունում նշվում է, որ Նախիջևանի և Զանգեզուրի նկատմամբ ՀՀ իրավունքը ՌԽՖՍՀ-ի հետ միասին ճանաչում է նաև Ադրբեյջանը: Պայմանագրի նախագիծն ու բոլոր լրացումները կցվեցին արձանագրությանը:

Սակայն, ինչպես նշում է ակադեմիկոս Գ. Գալոյանը, պայմանագրի նախագծի ստորագրման օրերին Ռուսաստանը շրջադարձ էր կատարում Անդրկովկասում վարվող քաղաքականության տակտիկայում, ըստ էության վերանայվում էր ՌԿ(Բ)Կ կենկտոմի քաղքյուրոյի որոշումը: Նախագիծն ստորագրելուց մեկ օր հետո՝ հոկտեմբերի 29-ին, Լեզրանին ուղարկած հրահանգում Չիչերինը գրում է, որ ներկա պահին չարժե խոսել վերջնագրերի լեզվով: Իսկ խորհրդային զորքերի կողմից զբաղեցված վիճելի տարածքները Հայաստանին, թե Ադրբեյջանին տալու հարցը պետք է ձգձգել և սպասել ավելի նպաստավոր ժամանակների:

Պատասխան մամակում Լեզրանը պնդում էր, որ Ռուսաստանի համար խիստ շահավետ կլիներ Հայաստանի հետ պայմանագիր կնքելը: «Եթե այդ պայմանագիրն ուժի մեջ մտներ,— եզրակացնում է Գ. Գալոյանը,— կբացառվեր Կարսի և Ալեքսանդրապոլի անկումը, թուրքերը ստիպված կդադարեցնեին հետագա հարձակումը և զորքերը հետ կքաշեին մինչև 1914 թվականի ռուս-թուրքական սահմանը (Գ. Գ., էջ 327)»:

Մինչդեռ պայմանագրի նախագիծը դեռ Մոսկվա չէր հասել, իսկ Ստալինն արդեն իր բացասական կարծիքն էր ներկայացրել: Գ. Գալոյանը գտնում է, որ Ստալինի և Օրջոնիկիձեի, ինչպես նաև Ադրբեյջանի դե-

կավարության բռնած դիրքը բացասական հետևանքներ ունեցավ: Հայ-ռուսական պայմանագրի ստորագրման հարցը մնաց անորոշության մեջ, մինչդեռ Հայաստանի վիճակը վատանում էր ոչ թե օր օրի, այլ ժամ առ ժամ:

Բրիտանական արխիվներում հայտնաբերած նոր փաստաթղթերի հիման վրա Գ. Գալոյանը ցույց է տալիս, որ հոկտեմբերի 27-ին Հայաստանի կառավարությունը վերստին թախանձագին դիմել է Անգլիային՝ խնդրելով օգնել ռազմական հանդերձանքով, ինչպես նաև կազմակերպել դաշնակիցների հարձակումը Տրապիզոնի վրա: Հոկտեմբերի 29-ին Քերզոնը հեռագրով հայտնել է Թիֆլիսում գտնվող գնդապետ Ստոքսին, որ միակ օգնությունը Հայաստանին կարող է լինել զենք և ռազմական հանդերձանք տրամադրելը, սակայն ոչ մի խոսք չի կարող լինել Տրապիզոնում կամ մեկ այլ վայրում ռազմական օգնություն ցույց տալու մասին:

Հայ-ռուսական պայմանագրի նախագիծն ստորագրելուց մեկ օր առաջ օգնության խնդրանքով Անգլիայի կառավարությանը դիմելու փաստը թույլ է տալիս Գ. Գալոյանին եզրակացնելու, որ Հայաստանում վստահություն չկար հայ-ռուսական պայմանագրի ուժի մեջ մտնելու մասին (Գ. Գ., էջ 328):

Սակայն հատկապես Կարսի անկումից հետո (հոկտ. 30) Հայաստանում անհամբեր սպասում էին հայ-ռուսական պայմանագրի ստորագրմանը, մինչդեռ այն ուշանում էր և ժամ առ ժամ կորցնում էր իմաստը: Նախագծի ստորագրումից անցել էր արդեն մեկ շաբաթ, սակայն Լեզրանը այն դեռևս չէր ներկայացրել իր կառավարությանը, որովհետև նախ պարտավոր էր այն համաձայնեցնել Ստալինի հետ և այդ կապակցությամբ նոյեմբերի 4-ին մեկնել էր Բաքու:

Պայմանագրի նախագիծը Օրջոնիկիձեի և Լեզրանի հետ քննարկելուց հետո նոյեմբերի 5-ին Ստալինը հեռագրեց Մոսկվա և հայտնեց, որ այն չի կարող ստորագրվել անմիջապես և կարիք ունի էական փոփոխության, իսկ բացատրություններ տալու համար անհրաժեշտ է Լեզրանին կանչել Մոսկվա: Իսկ պայմանագրի ստորագրման ձգձգումը հավասարազոր էր այն չեղյալ հայտարարելուն: Գ. Գալոյանը գտնում է, որ Ստալինի թելադրանքով խորհրդային Ռուսաստանի կառավարությունը լուրջ սխալ էր թույլ տալիս՝ հնարավորություն ընձեռելով քեմալականների ամրապնդելու իրենց դիրքերն Անդրկովկասում: «Լեռնինը չփորձեց հակառակվել Ստալին-Օրծոնիկիձե-Չիչերին եռյակի կարծիքին,—

գրում է Գ. Գալոյանը,— քանի որ խոսքը «Ամտանտի դաշնակից» Յայաստանի մասին էր, որի հետ մեծան պայմանագրի կնքումը հակասում էր Ռուսաստանի «բարեկամ» քեմալական Թուրքիայի և Խորհրդային Ադրբեջանի շահերին (Գ. Գ., էջ 332)»:

Հայ-ռուսական պայմանագրի վերաբերյալ խիստ բացասական կարծիք է հայտնում նաև Խորհրդային Ադրբեջանի կառավարությունը:

Նոյեմբերի 7-ին Չիչերինը հեռախոսով հայտնում է Բաքվում գտնվող Լեզրանին, որ պայմանագրի նախագիծն արդեն հնացել է, մնում է միայն միջնորդությունը, որպեսզի կանգնեցվի թուրքերի հարձակումը:

Երևանում կայացած հայ-ռուսական բանակցություններին լայնորեն անդրադարձել է պրոֆեսոր Էր. Չոհրաբյանը՝ «1920 թ. թուրք-հայկական պատերազմը և տերությունները, Երևան, 1997» մենագրությունում: Նա նշում է, որ բանակցություններն ընթացան հոկտեմբերի 13-28-ին: Հայաստանը ներկայացնում էին Մոսկովյան նույն պատմիրակները՝ Լ. Շանթը, Լ. Ջարաֆյանը, Գ. Տերտերյանը, քարտուղարն էր Յակուլովը, իսկ Ռուսաստանը՝ Բ. Լեզրանը, Ս. Տեր-Գաբրիելյանը, Օ. Սիլինը, Ա. Բորիչևը, քարտուղարն էր Լ. Շիֆֆերսը:

Ելնելով փաստից՝ Է. Չոհրաբյանը եզրակացնում է, որ Հայաստանի կառավարությունը ոչ միայն առանձնապես չի ձգտել Լեզրանի հետ համաձայնության գալ, այլև Երևանում գտնվող անգլիական կոմիսար Ստոքսի խորհրդով անընդունելի պայմաններ է առաջադրել ռուսական կողմին: Այդ փաստը հաստատելու համար է. Չոհրաբյանը վկայակոչում է դաշնակցական գործիչ Մարտին Շաթրյանի դիմումը Աբրահամ Գյուլխանդանյանին, որտեղ նշված են Լեզրանին ներկայացված պայմանները՝ ճանաչել Հայաստանի անկախությունը, Նախիջևանը և Ջանգեզուրը տալ Ռուսաստանին, թուրքական գործերը հետ քաշել մինչև Երզնկա, Թուրքիա տարվող զենքի և զինամթերքի կեսը թողնել Հայաստանին, տալ 5 միլիոն ռսկու օգնություն և այլն:

Շաթրյանը գրում է, որ մեծան պայմաններն առաջադրվել էին այն հույսով, որ Լեզրանը դրանց չի համաձայնի: Ծանոթանալով այդ պայմաններին՝ Ստոքսը գոհունակությամբ ասել է. «Եթե ինձ առաջարկեին այսպիսի պայմաններ, ես 24 ժամվա ընթացքում կհեռանայի ձեր սահմաններից և կկտրեի բանակցությունները: Լեզրանն էլ երևի այդպես կվարվի: Այս պայմանները շատ լավ են. սա ապացուցում է, որ դուք համաձայնություն չեք փնտրում սովետական իշխանության հետ, առա-

ջարկեցեք այս պայմանները և վստահ եղեք, որ մենք ամեն աջակցություն ցույց կտանք ձեզ (Է. Չոհրաբյան, էջ 228)»:

Սակայն, հակառակ սպասածի, Լեզրանը չընդհատեց բանակցությունները և խիստ բարյացակամ վերաբերմունք ցույց տվեց, չնայած ոչ բոլոր պահանջներն ընդունեց:

Է. Չոհրաբյանը կետ առ կետ ներկայացնում է ՌԽՖՍՀ և Հայաստանի Հանրապետության միջև հաշտության պայմանագրի նախագիծը՝ բաղկացած 17 հոդվածներից և պայմանագրին կից երկու լրացումներից (Է. Չ., էջ 232-234):

Օ. Սիլինին թողնելով Երևանում՝ նոյեմբերի 1-ին Լեզրանը մեկնում է Բաքու՝ ՌԽՖՍՀ և Ադրբեջանական ԽՍՀ կառավարությունների համաձայնությունն ստանալու նպատակով: Սակայն, ինչպես նշում է Է. Չոհրաբյանը, նոյեմբերի 4-ին Բաքվում գումարված ՌԿ(Բ)Կ Կովկասյան բյուրոյի և Ադրբեջանի կոմկուսի Կենտկոմի քաղբյուրոյի միացյալ նիստը, որին մասնակցում էր նաև Բաքու ժամանած Ի. Վ. Ստալինը, մերժեց պայմանագրի նախագիծը՝ հիմնական պատճառ վկայակոչելով Ջանգեզուրը և Նախիջևանը Հայաստանին հանձնելու վերաբերյալ կետը:

Նոյեմբերի 6-ին պայմանագրի հատուկ քննարկման առարկա դարձավ նաև Ադրբեջանի հեղկոմի նիստում՝ Ն. Նարիմանովի նախագահությամբ, որտեղ որոշում ընդունվեց այն համարել միանգամայն անթույլատրելի և առաջարկել հրաժարվել պայմանագրի ստորագրումից: Փաստերի վերլուծությամբ Է. Չոհրաբյանը գտնում է, որ Գ. Չիչերինը շատ թե քիչ հայանպաստ դիրքորոշում ուներ, և զուցե այլ ելք չտեսնելով, փորձում էր իր երկակի դիրքորոշմամբ փրկել Հայաստանը վերջնական ջախջախումից: Նա վճռակամորեն մերժում է նաև երբեմն-երբեմն հոլովվող այն թյուր կարծիքը, թե իբր Լեզրանը խաբում էր Հայաստանի կառավարությանը և բանակցությունները ծառայեցնում ժամանակ շահելուն, Հայաստանի վրա Թուրքիային մոր հարձակման հնարավորություն տալուն (Է. Չ., էջ 237-238):

ՊԱՏԵՐԱԶՄԻ ԱՎԱՐՏԱԿԱՆ ՓՈՒԼԸ: ՀԱՅԱՍՏԱՆԻ ՊԱՐՏՈՒԹՅՈՒՆԸ

Հայ-թուրքական պատերազմի երրորդ՝ վերջին շրջանն սկսվեց հոկտեմբերի 28-ին, երբ Կարաբեքիոի գործերը Կարսի ճակատում եր-

կու թևերով անցան հարձակման և ամբողջ օրը տևած թեժ մարտերից հետո ծախս թևում կարողացան գրավել Վեզենքոյի բարձունքները:

Հայկական բանակի հրամանատարությունը աջքաթող էր արել Կարսը հարավ-արևելքից շրջանցելու և թիկունքից հարվածելու հնարավորությունը, որից էլ հմտորեն օգտվեց տեղանքին քաջ ծանոթ Կարաբեքիրը: Նա կենտրոնից՝ Բեզլի Ահմեդի ճակատից, երկու գունարտակ՝ շուրջ 2000 զինվոր, աննկատ փոխադրեց դեպի Սուբատան գյուղը և Մեծ Մազնի լեռը: Հայկական հետախուզությունը չկարողացավ պարզել, թե ինչ եղան կենտրոնից հանված թուրքական ուժերը:

Գեներալ Դ. Փիրունյանը Վեզենքոյի դեմ ուղարկեց գնդապետ Մազմանյանի գունդը և Սիլիկյանից օգնություն խնդրեց՝ Մեծ Մազնիին թիկունքից հարվածելու համար: Սակայն այդ նպատակով ուղարկված գնդապետ Հասան-Փաշայանի զորամասը ճանապարհին ուշացավ, իսկ Մազմանյանի գունդը հարձակվեց Վեզենքոյի վրա, սակայն պարտվեց և դիմեց նահանջի: Չկարողանալով կասեցնել գնդի զինվորների ամոթալի նահանջը՝ գնդ. Մազմանյանն ինքնասպան եղավ: Այսպիսով, էդ. Ջոհրաբյանը ժխտում է Ս. Վրացյանի հաղորդածի իսկությունը, թե իբր հոկտեմբերի 30-ին հայկական զորքերը հակահարձակման չեն դիմել և գտնում է, որ ծրագրված հակահարձակումը տեղի է ունեցել, բայց ավարտվել է անհաջողությամբ (է. Ջ., էջ 254):

Հայկական զորքերի անհաջողությունների պատճառներից մեկը էդ. Ջոհրաբյանը համարում է այն, որ եթե Կարաբեքիրը անձամբ էր դեկավարում ռազմական գործողությունները, ապա թ. Նազարբեկյանը նստած մնաց երեսնում, իսկ ճակատի հրամանատար Ս. Սիլիկյանի շտաբը գտնվում էր Ալեքսանդրապոլում՝ Կարսից 70 կմ հեռավորության վրա: Հոկտեմբերի 30-ի առավոտյան թուրքերն ընդհանուր գրոհ ձեռնարկեցին բոլոր երեք՝ Հարամ-Վարդանի, Բեզլի-Ահմեդի և Վեզենքոյի ուղղություններով, և սկսվեցին համառ ու դաժան կռիվներ: Հարձակման առաջին ժամերին Կարսը պաշտպանող հայկական զորքերը հաջողությամբ հետ էին շարտում իրար հաջորդող գրոհները:

Սակայն մի քանի ժամ տևած հերոսական դիմադրությունից հետո հայկական զորքը հանկարծ սկսեց նահանջել: Թուրքերին հաջողվել էր գրավել Կարսի բերդի Ռադիսկու ամրոցը և այնտեղից հրետամային ու գնդացրային կրակ էր տեղում նահանջող զորքերի վրա:

Բավարար չափով փաստական տեղեկությունների հիման վրա պրոֆ. էդ. Ջոհրաբյանը ժխտում է ժամանակին պատմագրության մեջ

արձատացած այն տեսակետը, թե իբր Կարսը թուրքերին է հանձնվել առանց կռվի, և չկա որևէ արձանագրված փաստ, որ հայկական այս կամ այն զորամասը կամավոր հանձնված լինի թշնամուն: «Մինչդեռ ականատեսների վկայությունների, արխիվային փաստաթղթերի և այլ վավերագրերի ուսումնասիրությունը ցույց է տալիս,— գրում է էդ. Ջոհրաբյանը,— որ այդ տեսակետը հակապատմական է, որ պետք է խոսել ոչ թե չկռվելու, այլ վատ, անկազմակերպ կռվելու մասին, որի մեղքը, հասկանալի է, ոչ թե զինվորներինն է, այլ հրամանատարությանը (է. Ջ., էջ 266)»:

էդ. Ջոհրաբյանը, անհամաձայնություն հայտնելով որոշ հեղինակների, գտնում է, որ բոլշևիկյան պրոպագանդան չէր կարող վճռական դեր խաղալ բանակի պարտության գործում և հիշեցնում է, որ Կարսի անկման ժամանակ որևէ գործիչ բոլշևիկներին չի մեղադրել: Այնուհետև հեղինակը թվարկում է Կարսի անկման հետևյալ իրական պատճառները. 1. Թուրքական զորքերը քանակով և մարտական ու բարոյահոգեբանական պատրաստվածությամբ ու կոփվածությամբ գերազանցում էին հայկական զորքերին, որի պատճառով վերջիններս չէին դիմանում լարվածությանը և բռնում էին նահանջի ճանապարհը: 2. Բարձրության վրա չէր Կարսի դաշտային և բերդապահ զորքի հրամանատարությունը, քաղաքի և բերդի պաշտպանությունը վատ էր կազմակերպված: 3. Հրամանատարությունը հակամիջոց չգտավ թուրքերի կիրառած թևային շրջանցումների դեմ: 4. Չապահովվեց հայկական զորքերի թիկունքը (է. Ջ., էջ 271-272):

Ինչպես պարզաբանում է էդ. Ջոհրաբյանը, Կարսից նահանջած հայկական զորքերը հոկտեմբերի 31-ի գիշերը կանգ առան Ալեքսանդրապոլից 18 կմ հեռավորության վրա գտնվող Կալչախչախ գյուղի մոտ և դիրքավորվեցին: Գեներալ Հովսեփյանը գրեթե անկորուստ Կարս-Ալեքսանդրապոլ խճուղի էր դուրս բերել իր զորքերը, կանոնավոր և քիչ կորուստներով նահանջել էին նաև Սեպուհի բրիգադը և Սմբատի կամավորական հեծելազորը: Կարսից նահանջել էր շուրջ 10 հազար զինվոր, սակայն դասալքության հետևանքով Կալչախչախի դիրքերում նրանց թիվը հասնում էր հազիվ 5 հազարի:

Նոյեմբերի 4-ին թուրքական զորքերը ընդհանուր գրոհ ձեռնարկեցին Կալչախչախի ուղղությամբ՝ նպատակ ունենալով ճեղքել ճակատը, դուրս գալ Արփաչայ և վտանգել Ալեքսանդրապոլը: Սակայն ամբողջ օրվա ընթացքում ծավալված թեժ մարտերը թուրքերին հաջողություն չբերեցին: Մեծ դեր խաղաց «Ազատամարտ» զրահագնացքը, որը

հմուտ տեղաշարժերով և գնդացրային ու հրամոթային կրակով թույլ չտվեց թուրքական հեծելազորին անցնելու երկաթգիծը: Աջ թևում թշնամուն հետ շարտեցին Սեպուհի գործնասերը, իսկ ձախ թևում՝ Հասան—Փաշայանի և Ղորղանյանի գնդերը: Միայն երեկոյան, երբ վրա հասավ մութը, թուրքական անընդհատ գնդացրային կրակի ճնշման տակ հայկական զորքերը թողեցին Կալչախչախի դիրքերը և նոր դիրքեր գրավեցին Ալեքսանդրապոլից 10 կիլոմետրի վրա: «Կալչախչախի մոտ տեղի ունեցած այդ համառ կռիվները, — գրում է Էդ. Ջոհրաբյանը, — որտեղ թուրքերը բավականին կորուստներ կրեցին, և որի մասին Կարաբեքիրը իր հուշերում գերադասում էր լռել, մի անգամ ևս ցույց է տալիս, թե ինչքան սխալ են բոլոր նրանք, ովքեր գրում ու խոսում են, որ իբր հայկական բանակը թուրքերին դիմադրություն չի տվել, չի կռվել, կամավոր անձնատուր է եղել և այլն, և այլն (Է. Ջ., էջ 274)»:

Նոյեմբերի 1—ին ռազմաճակատ այցելեցին Հ. Քաջազունին, Լ. Շանթը, Ռ. Տեր—Մինասյանը, Թ. Նազարբեկյանը և ուրիշներ: Ռազմաճակատի հրամանատարներ Հովսեփյանը, Սեպուհը, Սմբատը Միլիկյանի հարցմանը պատասխանեցին, որ բանակը քայքայվում է, և պատերազմը շարունակել հնարավոր չէ:

Կալչախչախի նահանջից հետո անմիջակաճորեն վտանգվեց Ալեքսանդրապոլը: Միլիկյանն իր շտաբը տեղափոխեց Ջաջուռ, իսկ քաղաքի պաշտպանությունը հանձնարարեց գնդապետ Արսեն Շահնազյանին: Ալեքսանդրապոլի անկման դեպքում Միլիկյանը Սեպուհին հրահանգեց նահանջել դեպի Ջաջուռ, Հովսեփյանին՝ դեպի Արագածի փեշերը, ձախ թևին՝ երկաթգծի ուղղությամբ դեպի Ադին—Անի:

Ալեքսանդրապոլում խուճապ սկսվեց: Պետական պաշտոնյաները, հիմնարկությունների ղեկավարները դիմեցին փախուստի, ծայր առավ թալանն ու անտերությունը: Փախավ ճակատի պարենավորման կոմիտար Արեշյանը, իսկ քաղաքագլուխ Պ. Լևոնյանը և նրա տեղակալ Ա. Մակարյանը անհայտացան՝ գանձարկղից գողանալով մեծ քանակությամբ թանկարժեք իրեր և 22 միլիոն ռուբլի:

Բանակում ծայր առավ մասսայական, խմբային դասալքությունը: Նոյեմբերի 5—ին ռազմական նախարար Ռուբեն Տեր—Մինասյանը Ալեքսանդրապոլից հեռագրում է վարչապետ Հ. Օհանջանյանին, որ զորքը կռվել չի ցանկանում, հաշտություն է պահանջում, ուստի նման պայմաններում անհնար է պատերազմը շարունակել: Նա առաջարկում է անհա-

պաղ բանակցություններ սկսել թուրքերի հետ և հաշտություն կնքել, այլապես ամեն ինչ կորած է:

Ուշագրավ է Հ. Օհանջանյանի՝ դեռևս հոկտեմբերի 31—ին Ստոքսին ուղարկած հեռագիրը, որտեղ ասված է, որ եթե Անգլիան անմիջապես օգնության չհասնի, ապա դաշնակիցների ճակատի այն մասը, որը պաշտպանվում է Հայաստանի կողմից, ամխուսափելիորեն կձեռքբլի: Ստոքսը պատասխանում է, որ ինքը շատ է հեռագրել իր կառավարությանը, բայց ոչ մի պատասխան չի ստացել, ուրեմն Անտանտը կամ չի կարող, կամ էլ չի ցանկանում օգնել Հայաստանին: Միաժամանակ Ստոքսը խորհուրդ է տալիս համաձայնության գալ թշնամիների հետ:

Տիգրան Բեկզարյանը անհետաձգելի օգնության խնդրանքով դիմում է նաև Ֆրանսիայի ներկայացուցիչ Կորբեյլին, որը նույնպես խուսափողական պատասխան է տալիս: Իսկ ամերիկյան հյուպատոս Մոզերը Նոյեմբերի 6—ին հայտարարեց, որ ԱՄՆ—ը չի մասնակցել Սևրի պայմանագրին, ուստի երբեք իր վրա պարտավորություն չի վերցրել ռազմական օգնություն ցույց տալու հայերին:

Այսպիսով, Հայաստանը թուրքական վտանգի առջև մնաց բոլորովին միայնակ, իր բոլոր դաշնակիցներից խաբված:

Թողնելով Ալեքսանդրապոլը և նահանջելով դեպի արևելք՝ հայկական ուժերը այնուհետև բաժանվեցին երեք մասին. աջ թևը Սեպուհի հրամանատարությամբ բռնեց Ջաջուռի բարձունքները՝ դեպի Ղարաքիլիսա տանող ճանապարհը փակելու նպատակով, ձախ թևը գնդապետ Ղորղանյանի հրամանատարությամբ դիրքեր գրավեց Ադին կայարանի շրջանում՝ Արարատյան դաշտ տանող երկաթուղու ուղղությամբ, կենտրոնի զորքերը գեներալ Հովսեփյանի հրամանատարությամբ բռնեցին Արագածի փեշերը: Այստեղ էր նաև 700 ծիավորներից բաղկացած Ամբատի խումբը:

Իգդիրի ճակատի հայկական զորքերը նույնպես թողեցին Արաքսի աջ ափը և, այրելով Մարգարայի կամուրջը, հաստատվեցին գետի ձախ ափին: Դրոյի շտաբը հաստատվեց հենց Մարգարայում:

Նոյեմբերի 16—ին ՀՀ կառավարությունը որոշում է ընդունել զինադադարի թուրքական պայմանները: Նույն օրը ռազմաճակատ է մեկնում ներքին գործոց նախարար Մարգիս Արարատյանը: Նոյեմբերի 18—ին Ալեքսանդրապոլում Ս. Արարատյանը ստորագրեց զինադադարի համաձայնագիրը՝ 7 օր ժամանակով:

ՊԱՐՏՈՒԹՅԱՆ ՊԱՏՃԱՌՆԵՐԸ

Պրոֆեսոր Է. Չոհրաբյանը մանրամասնորեն ներկայացնում է հայ-թուրքական պատերազմում Հայաստանի պարտության պատճառները, որոնցից մենք նպատակահարմար ենք համարում համառոտակի թվարկել հետևյալները.

1. Թուրքական բանակը իր կազմով, սպառազինությամբ ու մարտական պատրաստվածությամբ զգալիորեն գերազանցում էր հայկական բանակին: Թուրքական հեծելազորի յուրաքանչյուր հեծյալ գինված էր ձեռքի զնդացրով:

2. Հայկական բանակի վատ կազմակերպվածությունը և նրա հրամկազմի թուլությունն ու անկարողությունը: Բավական է ասել, որ բանակ զորակոչված հայ զինվորին գյուղատնտեսական աշխատանքների եռուն պահերին թույլատրում էին տուն գնալ: Ցածր էր մարտիկների հայրենասիրական դաստիարակությունը, մեծ չափեր ընդունեց դասալքությունը:

Վատ էր կազմակերպված բանակային հետախուզական ծառայությունը: Հրամանատարությունը տեղյակ չէր, թե ինչ է կատարվում սահմանի այն կողմում:

Թույլ էր կապը հրամանատարության և ռազմաճակատի միջև:

3. Կառավարության թույլ տված սխալները ներքին և արտաքին քաղաքականության բնագավառում:

Կառավարությունը հանցագործ անտարբերություն ու անգործություն ցուցաբերեց բանակում տեղ գտած թերությունները վերացնելու գործում: Ռազմական նախարար Ռուբեն Տեր-Մինասյանի խմբապետական մեթոդներով կառավարելը զգալիորեն նպաստում էր բանակում անկարգապահության արմատավորմանը:

Սխալ էր Ջանգիբասարի, Վեդրբասարի և մուսուլմանական մյուս շրջանների հնազանդեցման գործում բանակի օգտագործումը, քանի որ այդ ընթացքում կատարվող թալանը նպաստեց կարգապահության թուլացմանն ու բանակի կազմալուծմանը:

Այլ է ընկնում կառավարության ոչ ճկուն արտաքին քաղաքականությունը: Ամբողջովին կոդմորոշվելով դեպի արևմուտք, հույսը դնելով բացառապես այսպես կոչված «դաշնակիցների» վրա, երբ վերջիններս բացահայտորեն դավաճանում էին, կառավարությունը չտեսավ

ու չզնահատեց տարածաշրջանում Ռուսաստանի օրեցօր աճող դերը և քեմալականների պատերազմական նախապատրաստությունները, չկարողացավ սթափ գնահատել ստեղծված իրադրությունն ու ուժերի հարաբերակցությունը, քեմալականների հետ կոնֆլիկտի մեջ ներքաշվեց Օլթիի շրջանում: Նման ռոմանտիկ քաղաքականությամբ հնարավոր չէր երկրի ղեկավարման նավը խաղաղ նավահանգիստ հասցնել (Է. Չ., էջ 347–355):

ԿԱՌԱՎԱՐՈՒԹՅԱՆ ՓՈՓՈԽՈՒԹՅՈՒՆԸ

1920 թ. նոյեմբերի 23–ին ՀՀ խորհրդարանը արտակարգ միստ գումարեց՝ քննարկելու համար կառավարության հրաժարականի հարցը:

Խորհրդարանն ընդունեց Հ. Օհանջանյանի կառավարության հրաժարականը և ընտրեց նոր կառավարություն՝ Սիմոն Վրացյանի գլխավորությամբ:

Նոյեմբերի 24–ին խորհրդարանը շարունակեց իր արտակարգ միստը, որին Ս. Վրացյանը ներկայացրեց նոր կառավարության կազմ. Ս. Վրացյան (վարչապետ և արտգործնախարար), Դրաստամատ Կանայան (Դրո, զինվորական նախարար), Համբարձում Տերտերյան (ֆինանսների նախարար), Արշամ Խոնդկարյան (արդարադատության նախարար), Վահան Մինախոյան (հանրային կրթության և արվեստի):

Ինչպես նշում է Ս. Վրացյանը, Հայաստանի խորհրդարանի վերջին, ողբերգական միստն էր դա, որից հետո խորհրդարանը այլևս միստ չունեցավ (Ս. Վ., էջ 525):

Նորընտիր վարչապետ Ս. Վրացյանը խորհրդարանի վերջին միստում հույս հայտնեց, որ «պատերազմը կվերջանա հաշտությամբ և մեր հարևան տաճիկ ժողովրդի արդարացի իրավունքների նույնքան արդարացի բաշխումով: Մեր գործունեության նշանաբանն է լինելու անկեղծ հաշտություն Տաճկաստանի հետ և համերաշխություն ու խաղաղ համակեցություն բոլոր հարևանների հետ (Ս. Վ., էջ 522):

Գ. Գալոյանը նկատում է, որ Ս. Վրացյանի այս արտառոց քաղաքական ճամարտակությունը ոչ ըմբռնվեց և ոչ էլ լուրջ քննարկման առարկա դարձավ պառլամենտում:

Մինչդեռ Յ. Տերտերյանի վկայությամբ Ս. Վրացյանի կառավարության գերագույն խնդիրն էր օր առաջ թուրքերի հետ հաշտություն կնքել՝ Հայաստանը խորհրդայնացումից փրկելու համար (Գ. Գ., էջ 358):

Նոյեմբերի 24—ին Ս. Վրացյանի կառավարությունը դիմեց Թուրքիայի Ազգային մեծ ժողովին՝ հաշտության բանակցություններ սկսելու համար: Դեռևս նոյեմբերի 23—ին Ալեքսանդրապոլ էր ժամանել Հայաստանի պատվիրակությունը, և նոյեմբերի 24—ին բանակցությունները սկսվեցին:

Ս. Վրացյանը հանդիպում ունեցավ նաև Բ. Լեգրանի հետ, որով հետև, ինչպես ինքն է գրել հետագայում, այդ օրերին բոլորի համար պարզ էր, որ Հայաստանը կամ Ռուսաստանի հետ պետք է լիներ, կամ պետք է դառնար թուրքերի ձեռքին խաղալիք, եթե, իհարկե, չքնաջնջվեր իսպառ: Սակայն, ինչպես նկատել է Գ. Գալոյանը, Վրացյանն այդ բառերը գրել է հետին ամսաթվով, տարիներ անց, իսկ երբ իշխանության գլուխ էր կանգնած, վարում էր հենց Հայաստանը թուրքերի ձեռքին խաղալիք դարձնելու քաղաքականություն (Գ. Գ., էջ 359):

Որպես Հայաստանին օգնելու պայման Լեգրանն առաջարկում է Վրացյանին՝ Ալեքսանդրապոլից հետ կանչել Ա. Խատիսյանի պատվիրակությանը, մերժել թուրքերի պահանջները և խորհրդային զորքեր մտցնել Հայաստան:

Պատմական տվյալ պահի իրադարձությունները ճիշտ ընկալելու առումով բանալի նշանակություն ունի ակադեմիկոս Գ. Գալոյանի հետևյալ եզրահանգումը. «Այս պայմաններում, — գրում է նա, — Հայաստանի միակ փրկությունը կարող էր լինել Ռուսաստանի հետ ամուր դաշինքը, անկախ նրանից, թե ինչ քաղաքական ռեժիմ էր տիրում այնտեղ: Դրանով է բացատրվում այն փաստը, որ Հայաստանի խորհրդայնացման գաղափարն արդեն ընդունում էին ոչ միայն կոմունիստներն ու նրանց հարողները, այլև բնակչության լայն խավերը, ինչպես նաև Դաշնակցություն կուսակցության ծախս թևը: Պատմական այս պայմանները անխուսափելի դարձրին կոմունիստների իշխանության գլուխ գալը (Գ. Գ., էջ 365)»:

ՀԱՅԱՍՏԱՆԻ ԽՈՐՀՐԴԱՅՆԱՑՈՒՄԸ: 1920 թ. ԴԵԿՏԵՄԲԵՐԻ 2-Ի ԵՐԵՎԱՆԻ ՀԱՄԱԶԱՅՆԱԳԻՐԸ: ԱԼԵՔՍԱՆԴՐԱՊՈԼԻ ԴԱՇՆԱԳԻՐԸ

ՀԱՅԱՍՏԱՆԻ ԽՈՐՀՐԴԱՅՆԱՑՈՒՄԸ

Հայ-թուրքական պատերազմում քեմալականների տարած հաղթանակը կտրուկ կերպով փոխեց դաշնակից տերությունների վերաբերմունքը Հայաստանի նկատմամբ:

Իսկ Հայաստանը ճգնաժամային վիճակում էր: Վարչապետի պարտականությունը ստանձնելուց հետո Ս. Վրացյանը անմիջապես հանդիպում ունեցավ Բ. Լեգրանի հետ, ինչպես ինքն է գրում՝ խորհրդային Ռուսաստանի հետ սերտ բարեկամություն հաստատելու և նրա աջակցությունն ապահովելու նպատակով: «Ամենքի համար պարզ էր այն օրերին, — գրում է Ս. Վրացյանը, — որ Հայաստանը կամ Ռուսաստանի հետ պետք է լիներ, կամ էլ պետք է դառնար թուրքերի ձեռքին խաղալիք, եթե չքնաջնջվեր իսպառ (Ս. Վ., էջ 529)»: Այդ, այդ ճգնաժամային օրերին էր միայն ՀՀ ղեկավարների համար պարզ դարձել, որ քեմալականների առաջխաղացումը Անդրկովկաս կատարվել է Բրիտանիայի հետ կնքած պայմանագրի համաձայն, որի նպատակն է Անդրկովկասից կոմունիստներին դուրս մղելը (տե՛ս Գ. Գալոյան, էջ 361):

ՀՀ վարչապետ Ս. Վրացյանը Լեգրանի առջև հարցը դնում է հստակ՝ կարո՞ղ է Ռուսաստանը օգնել Հայաստանին այդ ճգնաժամային պահին, և եթե այո՞ ապա ինչպես:

Ի պատասխան նման հարցադրմանը, Լեգրանն առաջարկում է հետ կանչել Ա. Խատիսյանի պատվիրակությանը Ալեքսանդրապոլից, մերժել թուրքերի պահանջները և խորհրդային զորք մտցնել Հայաստան: Վրացյանի անհանգստությունը, թե ինչ երաշխիք, որ մինչ այդ թուրքերը Մարգարայից չեն շարժվի Երևանի վրա, Լեգրանը վստահեցնում է, որ նրանք նման քայլի չեն դիմի: Ինչպես գրում է Ս. Վրացյանը,

Լեգրանի հետ բանակցությունները դրական արդյունք չտվեցին, որով հետև կառավարությունը վախենում էր, որ եթե Կարմիր բանակը Հայաստան մտներ հյուսիսից, ապա թուրքերը առաջ կշարժվեին հարավից և ռուսների հասնելուց շատ առաջ կգրավեին Երևանը:

1920 թ. նոյեմբերի 29-ին Լեգրանը վերջնագրի ձևով ՀՀ կառավարությանը հայտարարեց, որ ՌԿ(Ք)Կ Կենտրոնական կոմիտեն որոշում է կայացրել Հայաստանում մտցնել խորհրդային կարգեր: Այդ նույն օրը Բաքվում ստեղծված Հայաստանի ռազմաօդակառավարական կոմիտեն, որի կազմում էին Սարգիս Կասյանը (ճախագահ), Սահակ Տեր-Գաբրիելյանը, Ասքանազ Մռավյանը, Ալեքսանդր Բեկզադյանը, Իսահակ Պովարյանը և Ավիս Նուրիջանյանը, խորհրդային Ռուսաստանի 11-րդ բանակի զորամասերի հետ Ղազախի կողմից մտան Քարվանսարայ (այժմ՝ Իջևան): Հեղկոմը հրապարակեց դեկլարացիա, որտեղ ասված էր. «Հայաստանի ապստամբ ժողովրդի կամքով ու ցանկությամբ Հայաստանի կոմունիստական (բոլշևիկյան) կուսակցությունն այսօրվանից Հայաստանը հայտարարում է Սոցիալիստական խորհրդային Հանրապետություն: Այսօրվանից խորհրդային Հայաստանի կարմիր դրոշակը պաշտպանելու է նրա աշխատավոր ժողովրդին ճնշողների դարավոր լծից» (Հոկտեմբերյան սոցիալիստական մեծ ռևոլյուցիան և սովետական իշխանության հաստատումը Հայաստանում. Փաստաթղթերի և նյութերի ժողովածու, Երևան, 1960, էջ 403):

Ճիշտ է, աշխատավոր ժողովրդի ապստամբություն, ինչպես ասված է դեկլարացիայում, որպես այդպիսին տեղի չէր ունեցել, դա պարզապես տարբեր վայրերում խորհրդային իշխանություն հաստատելու ժամանակի գործելակերպն էր, բայց որ ստեղծված ճգնաժամային իրադրության մեջ Հայաստանը և հայ ժողովուրդը այլընտրանք չունեին, դա անտարակույս է: «Այսպես, ուրեմն,— այդ առթիվ գրում է Ս. Վրացյանը,— մի կողմից թուրքերն էին սպառնալիքով և վերջնագրերով խոսում, մյուս կողմից՝ հայ և ռուս բոլշևիկները: Հայաստանն ընկել էր երկու կրակի միջև: Կառավարությանը ուրիշ ելք չէր մնում, բայց եթե ընտրելով փոքրագույն չարիքը, տեղի տալ և հասկացողության գալ խորհրդային Ռուսաստանի ներկայացուցչի հետ: Հայաստանի խորհրդայնացումը այլևս դառնում էր անխուսափելի (Ս. Վ., էջ 531)»:

Մի կողմ թողնելով խորհրդային Ռուսաստանը «երկու կրակներից» մեկը կամ «փոքրագույն չարիքը» որակելու վրացյանական մերժե-

լի մտածելակերպը՝ սույն քաղվածքով կամենում ենք ընդգծել նրա կողմից Հայաստանի խորհրդայնացման անխուսափելիության ընդունումը:

Հայաստանի խորհրդայնացման համապարփակ ձևակերպում է տվել ակադեմիկոս Գ. Գալոյանը: «Այս պայմաններում,— գրում է նա,— Հայաստանի միակ փրկությունը կարող էր լինել Ռուսաստանի հետ ամուր դաշինքը, անկախ նրանից, թե ինչ քաղաքական ռեժիմ էր տիրում այնտեղ:

Դրանով է բացատրվում այն փաստը, որ Հայաստանի խորհրդայնացման գաղափարն արդեն ընդունում էին ոչ միայն կոմունիստներն ու նրանց հարողները, այլ և բնակչության լայն խավերը, ինչպես նաև Պաշտակցություն կուսակցության ձախ թևը: Պատմական այս պայմանները անխուսափելի դարձրեցին կոմունիստների իշխանության գալը (Գ. Գ., էջ 365)»: Սույնով ժխտվում է Ս. Վրացյանի այն պնդումը, թե հայ ժողովուրդը համակիր չէր Հայաստանի խորհրդայնացման (Ս. Վ., էջ 530):

Նոյեմբերի 29-ի դեկլարացիայում այնուհետև ասվում էր, որ խորհրդային Ռուսաստանը շատ անգամ փորձեց դաշնակցական կառավարությանը պոկել իմպերիալիստական պետություններից, բայց այդ փորձերը ապարդյուն անցան: Հեղկոմը համոզմունք է հայտնում, որ խորհրդային Հայաստանը խորհրդային Ռուսաստանի օգնությամբ կվերականգնի երկրի ավերված տնտեսությունը և կկառուցի նոր կյանք:

Նոյեմբերի 30-ին Հայաստանի հեղկոմը և խորհրդային ուժերը, որոնց հետ էր նաև Մայիսյան ապստամբության մասնակիցներից կազմված հայկական զունդը, մտան Դիլիջան, որտեղից Հեղկոմը հեռագրով Լ. Ի. Լենինին հայտնեց Հայաստանը Սոցիալիստական խորհրդային Հանրապետություն հռչակելու մասին և խորհրդային Ռուսաստանից օգնություն խնդրեց (Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում, փաստաթղթերի և նյութերի ժողովածու, Երևան, 1960, էջ 408):

Դեկտեմբերի 2-ին Հայաստանի հեղկոմի ճախագահ Ս. Կասյանի անունով ստացվեց Վ. Լենինի հեռագիրը, որով խորհրդային կառավարության ղեկավարը ողջունում էր իմպերիալիզմի ճնշումից ազատագրված աշխատավորական խորհրդային Հայաստանին: Գ. Գալոյանը նշում է, որ դրանով խորհրդային Ռուսաստանը ճանաչում էր խորհրդային Հայաստանը:

Այնուհետև Հայաստանի հեղկոմը և խորհրդային ուժերը Դիլիջանից շարժվեցին դեպի Երևան: Ինչպես նշում է Գ. Գալոյանը, կարմիր

գործերի և բնակչության միջև ռազմական որևէ ընդհարում տեղի չունեցավ: Դիմադրություն ցույց չտվեց նաև ԳԳ բանակը: Հայաստանը դարձավ խորհրդային հանրապետություն:

1920 Թ. ԴԵԿՏԵՄԲԵՐԻ 2-Ի ԵՐԵՎԱՆԻ ՀԱՍՆԱԶԱՅՆԱԳԻՐ

1920 թ. նոյեմբերի 29-ին Հայաստանում հռչակվել էր խորհրդային իշխանություն, սակայն ԳԳ կառավարությունը դեռևս հրաժարական չէր տվել: Ստեղծվել էր բարդ իրավիճակ: Նոյեմբերի 30-ին Լեզրանը բանակցություններ էր սկսել Դրոյի և Համբարձում Տերտեռյանի հետ, որոնք կողմնակից էին իշխանությունը բուլշևիկներին հանձնելուն: Սակայն կառավարության աջ թևը շարունակում էր ապավինել դաշնակից տերություններին և դեմ էր առանց կռվի իշխանությունը բուլշևիկներին հանձնելուն:

1920 թ. դեկտեմբերի 2-ին Հայաստանում ՌԽՖՍՀ ներկայացուցիչ Բորիս Լեզրանի միջև մի կողմից և ԳԳ կառավարության ներկայացուցիչներ Դրոյի և Համբարձում Տերտեռյանի միջև՝ մյուս կողմից, երևանում ստորագրվեց համաձայնագիր:

Ինչպես նշում է Գ. Գալոյանը, Լեզրանի կողմից թելադրված այդ համաձայնագրի հողվածները վերջնագրի բնույթ ունեին, սակայն արյունահեղությունից խուսափելու այլ տարբերակ չկար (Գ. Գ., էջ 371-372):

Համաձայնագիրը բաղկացած էր ութ հոդվածներից, որի լրիվ տեքստը բերված է Ա. Վրացյանի գրքում (Ա. Վ., էջ 534-535): Այն գետեղված է նաև «Հոկտեմբերյան սոցիալիստական մեծ ռևոյուցիան և խորհրդային կարգերի հաստատումը Հայաստանում. Երևան, 1957» փաստաթղթերի ռուսերեն ժողովածուում, սակայն սխալմամբ վերնագրված է «Համաձայնագիր ՌԽՖՍՀ և Հայաստանի Սոց. Սով. Հանրապետության միջև» (էջ 441-442): Ցավոք, այդ փաստաթուղթը տեղ չի գտել հիշատակված ժողովածուի հայերեն տարբերակում՝ հրատարակված 1960-ին, երևանում: Մեր կարծիքով, կարևոր այդ փաստաթուղթը, որով ամբողջանում է Հայաստանի խորհրդայնացման գործընթացը, և որի հետ սերտորեն առնչվում են 1921 թ. փետրվարյան իրադարձությունները, անհրաժեշտաբար պետք է տեղ գրավեր նաև «Հայաստանը միջազգային դիվանագիտության և սովետական արտաքին քաղաքականու-

թյան փաստաթղթերում. Երևան, 1972» մեծարժեք ժողովածուում, սակայն, ցավոք, դա չի արվել: Համաձայնագրի տեքստն առաջին անգամ հրատարակվել է Մոսկվայում, 1928-ին (Պրոֆեսոր Յու. Կյուլչնիկով, պրոֆեսոր Ա. Սաբանին. Նորագույն ժամանակաշրջանի միջազգային քաղաքականությունը պայմանագրերում. Նոտաներում և դեկլարացիաներում, Մոսկվա, 1928, հատոր 1, մաս 3-րդ, էջ 75-76, ռուսերեն): Տեքստում արված են որոշ կրճառումներ՝ Ա. Վրացյանի հրատարակած տեքստի համեմատությամբ:

Համաձայնագրի առաջին հոդվածով Հայաստանը հայտարարվում էր անկախ սոցիալիստական խորհրդային հանրապետություն:

Երկրորդ հոդվածով ամբողջ իշխանությունը Հայաստանում անցնում էր ժամանակավոր Ռազմահեղափոխական կոմիտեին:

Երրորդ հոդվածով ՌԽՖՍՀ կառավարությունն ընդունում էր, որ ՀԽՍՀ կազմի մեջ անվիճելիորեն մտնում են Երևանի նահանգը..., Կարսի մարզի մի մասը..., Ջանգեզուրի գավառը..., Ղազախի գավառի մի մասը... և Թիֆլիսի նահանգի այն մասերը, որոնք Հայաստանին էին պատկանում մինչև 1920 թ. հոկտեմբերի 23-ը (ըստ Ա. Վրացյանի՝ մինչև սեպտեմբերի 28-ը):

Չորրորդ հոդվածը հայկական բանակի հրամանատարական կազմին ազատում էր պատասխանատվությունից՝ մինչև Հայաստանում խորհրդային իշխանության հաստատումը կատարած գործողությունների համար:

Հինգերորդ հոդվածով դաշնակցության և Հայաստանի մյուս սոցիալիստական կուսակցությունների անդամները որևէ բռնաճնշման չպիտի ենթարկվեին՝ այդ կուսակցություններին պատկանելու համար:

Վեցերորդ հոդվածով Ռազմահեղափոխական կոմիտեի կազմի մեջ էին մտնելու հինգ անդամներ՝ նշանակված կոմունիստական կուսակցության կողմից և երկու անդամներ ծախ դաշնակցականների խմբից՝ կոմունիստական կուսակցության համաձայնությամբ:

Յոթերորդ հոդվածով խորհրդային Ռուսաստանի կառավարությունը միջոցներ պիտի ձեռնարկեր՝ ՀՍԽՀ անկախությունը պաշտպանելու նպատակով անհապաղ զինվորական ուժեր կենտրոնացնելու ուղղությամբ:

Ութերորդ հոդվածով համաձայնագիրն ստորագրելուց հետո Հայաստանի Հանրապետության կառավարությունը հեռանում էր իշխանությունից, այն ժամանակավորապես, մինչև հեղկոմի ժամանումը, անց-

նում էր գինվորական հրամանատարությանը, որը հանձնվում է Ղրոյին, իսկ Յայաստանի գորահրամանատարությանը կից ՌԽՖՍՄ-ի կողմից կոմիսար է նշանակվում Օ. Սիլինը:

Միաժամանակ համաձայնություն կայացավ, որ իշխանությունը Ղրոյին և Սիլինին հանձնվի 1920 թ. դեկտեմբերի 2-ի գիշերվա ժամը 12-ին: Համաձայնագիրն ստորագրելուց հետո ՀՀ կառավարության վարչապետ Ս. Վրացյանը, նախարարներ Ա. Հովհաննիսյանը, Ա. Խոնդկարյանը, Հ. Տերտերյանը, Գ. Կանայանը (Ղրո), դիվանապետ Հ. Թումանյանի վավերացմամբ, ստորագրեցին ակտ իշխանությունից հրաժարվելու և այն գորաբանակի ընդհանուր հրամանատար Ղրոյին հանձնելու մասին՝ նկատի ունենալով արտաքին հանգամանքների շնորհիվ երկրում ստեղծված կացությունը: Ակտը հեռագրվեց գավառական իշխանություններին ու գորամասերի պետերին՝ ի գործադրություն, ինչպես նաև փակցվեց Երևանի փողոցներում:

Ինչպես նկատել է ակադեմիկոս Գ. Գալոյանը, Երևանի դեկտեմբերի 2-ի համաձայնագիրը և վերոհիշյալ ակտը հետփաստային իրավական ձևակերպումներ էին, որոնք պայմանավորված էին 1920 թ. նոյեմբերի 29-ին Հայիեղկոմի կողմից Յայաստանում խորհրդային կարգերի հռչակումով (Գ. Գ., էջ 373):

Իսկ Ս. Վրացյանի արտահայտությամբ այդ փաստաթղթի շնորհիվ Յայաստանը խորհրդայնանում էր բոլորովին խաղաղ կերպով, առանց որևէ հեղափոխության, առանց մեկի քիթը արյունոտելու (Ս. Վ., էջ 535):

Այսպիսով, Յայաստանի խորհրդայնացումը մի կարճատև գործընթաց էր, որն սկսվեց 1920 թ. նոյեմբերի 29-ին Քարվանսարայում (Իջևան) Հայիեղկոմի հրատարակած Դեկլարացիայով և ավարտվեց 1920 թ. դեկտեմբերի 2-ի Երևանի համաձայնագրի ստորագրմամբ, որով այդ ակտն ստացավ իրավական ձևակերպում:

ԱԼԵՔՍԱՆԴՐՈՒՆԻ ԴԱՅՄԱՆԱԳԻՐԸ

Յայաստանի խորհրդայնացումից հետո ծառայած գլխավոր հարցը Յայաստանի և Թուրքիայի միջև հաշտության պայմանագրի կնքումն էր:

Ս. Վրացյանի հաղորդած տեղեկության համաձայն՝ դեռևս նոյեմբերի 30-ին Քյազիմ Կարաբեքիրը, որն ուշի-ուշով հետևում էր Յայաս-

տանում ծավալվող իրադարձություններին, Յայաստանի պատվիրակյանը ներկայացրեց թուրքական պայմանները և հաջորդ առավոտյան վերջնագրի ձևով, ռազմական գործողությունները վերսկսելու սպառնալիքով պահանջեց դրանց ընդունումը:

Թուրքական պահանջները քննարկելու կապակցությամբ նոյեմբերի 30-ի գիշերը իրավիճակը հատուկ ժողով, որին մասնակցում էին խորհրդարանի և կառավարության անդամներ, ՀՀԳ բյուրոն լրիվ կազմով, անհատ գործիչներ և գինվորականներ: Լսվեց գինվորական նախարարի և գինվորական մասնագետների, ժողովականներից շատերի կարծիքը: Չնավորված ընդհանուր տեսակետն այն էր, որ եթե մերժեին Կարաբեքիրի պահանջը, թուրքական բանակը անձնայն հավանակա-նությամբ առաջ կշարժվեր և միջև ռուսների հասնելը կգրավեր էջմիածինն ու Երևանը: «Հանուն իայ ժողովրդի փրկության,— գրում է Ս. Վրացյանը,— պետք էր ստանձնել պատասխանատվությունը պատմության առջև և ստորագրել դաշնագիր: Եթե բոլշևիկները, իրոք, այնքան ազդեցիկ էին թուրքերի առջև, նրանց համար դժվար չէր լինի մերժել «Ղաշնակների» ստորագրությունը և Յայաստանի համար ավելի նպաստավոր դաշնագիր կնքել:

Եթե բոլշևիկները այդ կարողությունը պիտի չունենան վաղը, նշանակում է նրանց խոստումները անարժեք էին:

Այս նկատառումներով և այս գիտակցությամբ ժողովը որոշեց լիազորել Ալեքսանդրապոլի պատվիրակությանը՝ ընդունելու թուրքական պայմանները և ստորագրելու հաշտության դաշնագիրը:

Կասկած չկա, որ բոլշևիկներն էլ, Մոսկվայի ճնշումով, ստիպված պիտի լինեին ստորագրել Ալեքսանդրապոլի դաշնագիրը, ինչպես մոտ մի տարի վերջը ստորագրեցին Կարսի ավելի խայտառակ դաշնագիրը: Ազգային տեսակետով Ալեքսանդրապոլի դաշնագիրը պատմական անհրաժեշտություն էր, դժբախտ, բայց անխուսափելի (Ս. Վ., էջ 535-536):»:

1920 թ. դեկտեմբերի 2-ի լույս 3-ի գիշերը ստորագրվեց Ալեքսանդրապոլի բազմաթիվ առումներով խայտառակ, ստրկացուցիչ ու թալանչիական պայմանագիրը, որի տակ, առանց այդ իրավունքն ունենալու, Յայաստանի Հանրապետության անունից իրենց ստորագրությունները դրեցին Ալեքսանդր Խատիսյանը, Ա. Գյուլխանդանյանը և Ս. Ղորղանյանը, Թուրքիայից՝ Քյազիմ Կարաբեքիր փաշան, Համիդ բեյը և Սուլեյման Բեջարի բեյը:

Պայմանագիրը բաղկացած էր 14 կետերից: Առաջին կետով պատերազմը Հայաստանի և Թուրքիայի միջև համարվում էր ավարտված:

Երկրորդ կետով որոշվում էին Հայաստանի և Թուրքիայի սահմանները: Թուրքիային էր անցնում Արևելյան Հայաստանի 1914 թ. սահմաններից ավելի քան 20 հազար քառակուսի կիլոմետր տարածք, այդ թվում՝ Կարսը, Սարիղամիշը, Արդահանը, Օլթին, Սուրմալուի գավառը, Կաղզվանը, Ալեքսանդրապոլը (Գ. Գ., էջ 376): Նախիջևանի, Շարուրի և Շահթախթի շրջանները ժամանակավորապես դրվում էին Թուրքիայի պաշտպանության տակ, մինչև այնտեղ հանրաքվեի անցկացումը, որին Հայաստանը չպիտի միջամտի: Դա փաստորեն նշանակում է, որ այդ շրջանները տրվում էին Թուրքիային (Գ. Գ., էջ 377):

Առավել քստմենլի էր երրորդ կետը, որտեղ նշվում էր, որ ներկա պայմանագրով Թուրքիային զիջված շրջանները անվիճելի, պատմական, էթնիկական և իրավական կապ ունեն Թուրքիայի հետ:

Չորրորդ կետով Հայաստանին թույլատրվում էր ունենալ 1500 զինվորից բաղկացած ջոկատ՝ 8 լեռնային կամ դաշտային հրանոթով և 20 զնդացրով, իսկ զինապարտությունը Հայաստանում պարտադիր չպիտի լիներ:

Հինգերորդ կետով Թուրքիայի կառավարությունը պարտավորվում էր զինված օգնություն տրամադրել Հայաստանին, երբ այդ պահանջի արտաքին կամ ներքին վտանգը, և երբ Հայաստանի Հանրապետությունը դիմի իրեն մատնանշված խնդրով:

Վեցերորդ կետով արգելվում էր իրենց բնակավայրերը վերադառնալ այն գաղթականներին, ովքեր արտաքսվել էին համաշխարհային պատերազմի ընթացքում և թշնամու բանակի շարքերում կռվել իրենց կառավարության դեմ: Դա նշանակում է, որ Արևմտյան Հայաստանից ցեղասպանության հետևանքով իրենց օջախներից զրկված հայերին արգելվում էր վերադառնալ հայրենիք:

Յոթերորդ կետով Թուրքիայի կառավարությունը հրաժարվում էր պատերազմի հետ կապված ծախսերի հատուցումից, «պատերազմ, որ նա ստիպված էր ձեռնարկել» Հայաստանի դեմ: Դրանով փաստորեն արդարացվում էր թուրքական ագրեսիան Հայաստանի դեմ:

Կողմերը հրաժարվում էին նաև համաշխարհային պատերազմի ժամանակ կրած վնասները հատուցելու ամեն տեսակ պահանջներից: «Մինչդեռ հայտնի է,— գրում է Գ. Գալոյանը,— որ հայերի ցեղասպանության ընթացքում թուրքերը թալանի են ենթարկել հայերի ողջ ունեցված-

քը, որը կազմում էր Թուրքիայի ազգային հարստության մոտ կեսը... Թուրքիան հրաժարվում էր նաև փոխհատուցել նյութական այն հսկայական վնասները, որ կրել էր հայ ժողովուրդը քեմալականների՝ Արևելյան Հայաստան կատարած ագրեսիայի հետևանքով (Գ. Գ., էջ 377)»:

Իններորդ կետով ՀՀ կառավարությունը համաձայնում էր Սերի պայմանագիրը, որը կտրականապես մերժել էր Թուրքիայի կառավարությունը, համարել և հայտարարել անվավեր, պարտավորվում էր եվրոպայից և Ամերիկայից ետ կանչել իր պատվիրակություններին, որոնց Անտանտի ինպերիալիստները դարձրել էին իրենց մեքենայությունների գործիք, «պետական կառավարումից հեռացնել այն բոլոր անձանց, ովքեր հրահրում և հետապնդում են ինպերիալիստական խնդիրներ», այսինքն՝ նրանց, ովքեր ձգտում էին հայկական տարածքներ վերադարձնել Հայաստանին:

Տասներկերորդ կետով Թուրքիան իրեն իրավունք էր վերապահում վերահսկել Հայաստանի երկաթուղիներն ու հաղորդակցության մյուս ճանապարհները՝ 4-րդ հոդվածում մատնանշված նորման գերազանցող զենքի ներմուծումն արգելելու համար:

Կողմերը պարտավորվում էին նաև արգելակել Անտանտի ինպերիալիստական կառավարությունների պաշտոնական և ոչ պաշտոնական ներկայացուցիչների մուտքը: Տասներկուերորդ կետով Թուրքիան իրեն իրավունք էր վերապահում ռազմական միջոցներ ձեռք առնել Հայաստանի տարածքում:

Տասներեքերորդ կետով ՀՀ կառավարությունն անվավեր էր ճանաչում այն բոլոր պայմանագրերը, որ կարող են կնքվել և առնչություն ունենալ Թուրքիայի հետ, կամ կկնքվեն ի վնաս Թուրքիայի շահերի: «Դրանով,— ինչպես գրում է Գ. Գալոյանը,— Հայաստանը զրկվում էր նախ և առաջ Ռուսաստանի հետ որևէ պայմանագիր կնքելու իրավունքից: Հայաստանը մեկուսացվում էր Ռուսաստանից (Գ. Գ., էջ 377)»:

Վերջին 14-րդ կետը, վերաբերում էր կողմերի միջև առևտրական և դիվանագիտական կապերը վերականգնելուն (Ալեքսանդրապոլի պայմանագրի լրիվ տեքստը տես «Հայաստանը միջազգային...» ժողովածու, էջ 683-687):

Ս. Վրացյանը ճակատագրի հեգմանք է համարում այն հանգամանքը, որ 1918 թ. հունիսի 4-ին, Բաթումի դաշնագրով Թուրքիան եղավ առաջին պետությունը, որ ճանաչեց Հայաստանի անկախությունը: Այժմ Հայաստանը առաջին պետությունն էր, որ ճանաչում էր քեմալա-

կան թուրքիայի անկախությունը: Նա պնդում է նաև, թե «Միջազգային օրենքի և փաստական կացության տեսակետով՝ Հայաստանի կառավարության ընթացքը հակաօրինական հանգամանք չունեն (Ս. Վ., էջ 538)»:

Ավարտելով Ալեքսանդրապոլի պայմանագրի մասին իր խոսքը՝ Ս. Վրացյանը գրում է, որ դաշնագրի պայմաններից մեկն էլ այն էր, որ ստորագրումից հետո, մեկ ամսվա ընթացքում, դաշնագիրը պետք է վավերացվեր Հայաստանի խորհրդարանի և թուրքիայի Ազգային մեծ ժողովի կողմից, որը տեղի չունեցավ, և դաշնագիրը ինքնըստինքյան կորցրեց իր օրինականությունը: Նրա կարծիքով միայն այդ փաստը բավական էր, որպեսզի Հայաստանի հեղկոմը չճանաչեր Ալեքսանդրապոլի դաշնագիրը, սակայն բուլշևիկները չուզեցին կամ չկարողացան օգտվել այդ փաստից (Ս. Վ., էջ 539):

Ալեքսանդրապոլի ամոթալի պայմանագրի կապակցությամբ շատ որոշակի է ակադեմիկոս Գ. Գալոյանի դիրքորոշումը: «Հայաստանում, խորհրդային կարգեր հաստատվելուց հետո, — գրում է նա, — Հայաստանի Հանրապետության կառավարությունն այլևս լիազորություններ չունեն որևէ պայմանագիր ստորագրելու թուրքիայի հետ: Սակայն Ալ. Խատիսյանը, չունենալով խորհրդային Հայաստանի կառավարության լիազորությունները, իր ստորագրությունը դրեց թուրքերի կողմից պարտադրված արխիոնեակցիոն և թալանչիական պայմանագրի տակ: Եթե թուրքերի համար խիստ ձեռնտու չլինեին այդ պայմանագրի տակ Հայաստանի՝ իշխանությունից հեռացած կառավարության ներկայացուցչի ստորագրությունը, նրանք առանց վարանելու կհենվեին միջազգային ընդունված նորմերի վրա և կմերժեին այն, ինչպես վարվեցին սուլթանի կառավարության կողմից: Սևրի պայմանագրի ստորագրման դեպքում (Գ. Գ., էջ 378)»:

Ի դեպ, սփյուռքահայ հեղինակ Ռուբինա Փիրումյանի մոտ հետաքրքիր տեղեկություն կա այն մասին, որ Ալեքսանդրապոլի դաշնագրի ստորագրումից առաջ Հայաստանի հեղկոմի նախագահ Ս. Կասյանը Դիլիջանից հեռագրել է Կարաբեքիրին և նրան հաղորդել Հայաստանի խորհրդայնացման լուրը: Կարաբեքիրը պատասխան շնորհավորական հեռագիր է ուղարկել Կասյանին և իր ուրախությունը հայտնել այդ առթիվ: Սակայն դա չէր խանգարել Կարաբեքիրին՝ հարկադրել Խատիսյանին՝ ստորագրելու պայմանագիրը (Ռուբինա Փիրումյան, Հայաստանը Հ.Յ.Դ. — բուլշևիկ հարաբերությունների ոլորտում (1917–1921), Երևան, էջ 295):

Գ. Գալոյանը մերժում է նաև Ալ. Խատիսյանի արդարացումները, թե իբր ղեկտեմբերի 2–ին, Երեկոյան ժամը 6–ին ուղիղ հեռագրաթելով Դրոն իրեն ասել է. «Հեղափոխական կառավարության անունից հայտնում եմ Ձեզ, որ դուք ազատ եք ստորագրել դաշնագիրը կամ ոչ... Գործեցեք համաձայն ձեր հասկացության»: Նա վկայակոչում է արխիվներում պահպանված Դրոյի ղեկտեմբերի 1–ի հեռագիրը:

«Ըստ այդ փաստաթղթի, — գրում է Գ. Գալոյանը, — Դրոն ղեկտեմբերի 1–ին հաղորդել է Ալեքսանդրապոլում գտնվող ՀՀ պատվիրակությանը, որ Հայաստանի Հեղկոմի կողմից Հայաստանում խորհրդային իշխանություն հռչակելուց հետո, ղեկտեմբերի 1–ից սկսած հին կառավարության կողմից նշանակված պատվիրակությունը ոչ մի իրավունք և իրավասություն չունի բանակցությունները թուրքերի հետ շարունակելու համար (Գ. Գ., էջ 379)»:

Նշելով, որ ռազմավարական առումով Ալեքսանդրապոլի պայմանագիրն ուղղված էր նաև Ռուսաստանի դեմ, Գ. Գալոյանն ավելացնում է, որ Ալեքսանդրապոլի իրավական ուժ չունեցող պայմանագիրը չճանաչվեց ոչ խորհրդային Հայաստանի և ոչ էլ խորհրդային Ռուսաստանի կառավարությունների կողմից, և դրա չեղյալ հայտարարելը դարձավ նրանց անհետաձգելի խնդիրներից մեկը (Գ. Գ., էջ 381):

Մեր կարծիքով, եթե անգամ ինչ—որ տեղ ընդունելի համարենք Ս. Վրացյանի և Ա. Խատիսյանի փաստարկները՝ Ալեքսանդրապոլի պայմանագրի ճակատագրորեն անխուսափելի անհրաժեշտության մասին, այնուամենայնիվ, չպետք է մոռանանք, որ հետագայում թուրքերը Լոնդոնի, Մոսկվայի և Կարսի կոնֆերանսներում անընդհատ վկայակոչում էին այն, հանգամանք, որը որոշակի խոչընդոտներ էր հարուցում հայանպաստ վճիռներ կայացնելուն:

Ինչևիցե, բացվում էր հայոց խորհրդային ժամանակաշրջանի պատմության առաջին էջը:

Եվ, այնուամենայնիվ, կամենում ենք Հայաստանի առաջին հանրապետության ժամանակաշրջանի պատմության շարադրանքն ավարտել այդ հանրապետության առաջին մեծության պատմագրի՝ ՀՀ վերջին վարչապետ Սիմոն Վրացյանի հուզիչ խոսքերով. «Այսպիսով, — դեռևս 1958–ին գրել է նա, — պատմական իրողություն է, որ ներկա խորհրդային Հայաստանը շարունակությունն է Հայաստանի Հանրապետության: Եթե տեղի չունենային այն մաքառումները, որոնք հանգեցին հայկական անկախ պետության ստեղծման 1918 թ. մայիսի 28–ին, եթե գոյություն

չունենար Հայաստանի Հանրապետությունը իր ազգային կազմով ու նկարագրով, այսօր գոյություն չէր ունենա և հնորիդային Հայաստանը ազգային կազմով ու դիմագծով...

Վարչաձևերը ժամանակավոր երևույթ են: Ժամանակավոր են և վարիչները: Հավերժական են ազգերն ու հայրենիքները՝ հայրենի հողի վրա նստած ժողովուրդները: Հավերժական է ազատատենչ հայ ժողովուրդը, որ մահվամբ մահը կոխելով կերտեց հայրենիքի անկախությունը:

Ժամանակները հղի են դեպքերով: Պատմությունը վերջացած չէ: Մենք հավատում ենք, որ Հայաստանը նորից կլինի ազատ և անկախ, ավելի լայն ազգային սահմաններով...

Հայաստանի Հանրապետությունը շարունակում է ապրել հայ ժողովրդի սրտում, որպես մշտական հուշ անցյալի և իբրև կենդանի հույս ապագայի (Ս. Վ., էջ 608–609):»:

ՕԳՏԱԳՈՐԾՎԱԾ ԱՂԲՅՈՒՐՆԵՐԻ ԵՎ ԳՐԱԿԱՆՈՒԹՅԱՆ ՑԱՆԿ

1. Փաստաթղթերի և նյութերի ժողովածուներ

1. Հայաստանը միջազգային դիվանագիտական և սովետական արտաքին քաղաքականության փաստաթղթերում, պրոֆ. Ջ. Ս. Կիրակոսյանի խմբ., Երևան, 1972:
2. Հայերի ցեղասպանությունը Օսմանյան կայսրությունում, Փաստաթղթերի և նյութերի ժողովածու, Մ. Գ. Ներսիսյանի խմբ., Երևան, 1991:
3. Հայերի ցեղասպանությունը ըստ երիտթուրքերի դատավարության փաստաթղթերի, ԳԱ հրատ., Երևան, 1988:
4. Հայաստանի Հանրապետությունը 1918–1920 թթ., Փաստաթղթերի և նյութերի ժողովածու, Երևան, 2000:
5. Великая Октябрьская социалистическая революция и победа советской власти в Армении, Сб. документов и материалов, Ер., 1957.
6. Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում, Փաստաթղթերի և նյութերի ժողովածու, Երևան, 1960:

2. Գրականություն

1. Հայ ժողովրդի պատմություն, ԳԱ հրատ., հ. 6, Երևան, հ. 7, 1967:
2. Հայ ժողովրդի պատմություն, Բուհական դասագիրք, Երևան, 1979:
3. Անտոնյան Ա., Մեծ ոճիրը, Երևան, 1990:
4. Արզումանյան Մ., Հայաստան 1914–1917, Երևան, 1969:
5. Արզումանյան Մ., Արհավիրքից վերածնունդ, Երևան, 1973:
6. Ալպոյաճյան Ա., Պատմություն հայ Կեսարիո, հ. Բ., Գառիբե, 1937:
7. Աստվածատրյան Ա., Սարդարապատի պատմաշինությունը, Բեյրութ, 1966:
8. Աղայան Ծ., Հոկտեմբերը և հայ ժողովրդի ազատագրական պայքարը, Երևան, 1982:
9. Աֆանասյան Ա., Սարդարապատի հաղթանակը, Հայաստան, Մայիս 1918, Երևան, 1991:
10. Ավետիսյան Գ., Հայկական հարցը 1918 թվականին, Երևան, 1997:
11. Աբրահամյան Գ., Արցախյան գոյամարտ, 1991:
12. Բաղդամյան Գ., Իմ հիշողությունները, Երևան, 1979:

13. Գալոյան Գ., Հայաստանը և մեծ տերությունները 1917–1923 թթ., Երևան, 1999:
14. Գևորգյան Հ., Դրո, Երևան, 2000:
15. Եսայան Ա., Հայաստանի միջազգային-իրավական դրությունը 1920–1922 թթ., Երևան, 1967:
16. Ջոհրաբյան Է., 1920 թ. թուրք-հայկական պատերազմը և տերությունները, Երևան, 1997:
17. Թուրչյան Հ., Սարդարապատի հերոսամարտը, Երևան, 1969:
18. Լեո, Անցյալից, Թիֆլիս, 1925:
19. Լազյան Գ., Հայաստան և Հայ դատը հայ և ռուս հարաբերություններու լուսին տակ, Երևան, 1991:
20. Լեփսիուս Յո., Հայաստանի ջարդերը, Կ. Պոլիս, 1919:
21. Կարապետյան Մ., Հայոց 1915–1916 թթ. ցեղասպանության հարցերը հայ պատմագրության մեջ, Երևան, 1998:
22. Կարապետյան Մուրադ, Հայաստանի Հանրապետության բանակը 1918–1920 թթ., Երևան, 1991:
23. Կարապետյան Մուրադ, Հայկական կամավորական խմբերը և ազգային զունարտակները Կովկասյան ռազմաճակատում (1914–14 թթ.), Երևան, 1999:
24. Կիրակոսյան Ջ., Երիտթուրքերը պատմության դատաստանի առաջ, գիրք 2, Երևան, 1983:
25. Հարությունյան Ա., Թուրքական ինտերվենցիան Անդրկովկաս 1918 թվականին և ինքնապաշտպանական կռիվները, Երևան, 1984:
26. Հախվերդյան Լ., Թումանյանը և իր ժամանակը, Երևան, 1995:
27. Հարությունյան Ա. (Հարենց), Արևելքի ժողովուրդների առաջին համազումարը, Երևան, 1960:
28. Հուշամատյան մեծ եղեռնի, Բեյրութ, 1965:
29. Հերոսապատում մեծ եղեռնի, Բեյրութ, 1978:
30. Հայկազ Ա., Շապին-Պարահիսար ու իր հերոսամարտը, Եյու Յորք, 1957:
31. Հովհաննիսյան Լ., Հայկական հարցը և մեծ տերությունները 1914–1917 թվականներին, Երևան, 2002:
32. Դազարյան Հ., Ցեղասպան թուրքը, Բեյրութ, 1968:
33. Մորգենթաու Հ., Հայկական եղեռնի գաղտնիքները, Երևան, 1990:
34. Մարյան Ջ., Երեք դաշնագիրներ (Ալեքսանդրապոլի, Մոսկվայի և Կարսի դաշնագիրները), Բեյրութ, 1979:
35. Նանսեն Ֆ., Հայաստանը և Մերձավոր Արևելքը, Երևան, 1993:
36. Նազարյան Ա., Հայկական զորամասերի կազմավորումը Կովկասյան ճակատում (1914–1918 թթ.), Երևան, 1999:
37. Պալաքյան Գ., Հայ գողգոթան, Երևան, 1991:
38. Սիմոնյան Հ., Անդրանիկի ժամանակը, գիրք Ա., Բ, Երևան, 1996:
39. Սիմոնյան Ա., Ջանգեզուրի գոյամարտը 1920–1921 թթ., Երևան, 2000:
40. Սարգսյան Ե., Թուրքիան և նրա նվաճողական քաղաքականությունը Անդրկովկասում, Երևան, 1964:

41. Սասունի Կ., Պատմություն Տարոնի աշխարհի, Պեյրութ, 1956:
42. Վրացյան Ս., Հայաստանի Հանրապետություն, Երևան, 1993:
43. Վան-Վասպուրականի հերոսամարտը, Երևան, 1990:
44. Տեր-Պետրոսյան Եղիշե քաղ., Տարոն ինքնապաշտպանությունն ու ջարդը 1914–1915 թթ., Ֆրեզնո, 1920:
45. Փիրումյան Ռ., Հայաստանը Հ.Յ.Ռ.–բուլշևիկ հարաբերությունների ոլորտում 1917–1921, Երևան, 1997:
46. Ուրվագծեր Սովետական Հայաստանի պատմության, պրակ 1, Երևան, 1954:
47. Армянский вопрос. Энциклопедия. Ереван, 1991.

3. Պարբերական մամուլ

1. Ավետիսյան Հ., Գեներալ Հակոբ Բագրատունի, ՊՀԲ, 1997, թիվ 1:
2. Կիրակոսյան Ջ., Սահակյան Հ., Սան Ռեմոյի կոնֆերանսը և Հայաստանը, ԲՀԱ, Երևան, 1972, թիվ 3:
3. «Հայրենիք» ամսագիր, Բոստոն, 1954, թիվ 5:
4. «Հայրդղի. Սովետական Հայաստան և պատմական ճշմարտություններ» փաստերու լույսին տակ», Բեյրութ, 1949:
5. Սողոմոնյան Ա., Ջ. Հարթրդի զինվորական առաքելությունը և Հայաստանի մանդատը, ԳԱ Լրաբեր հաս. գիտ., Երևան, 1985, թիվ 9:

ՀԱՊԱՎՈՒՄՆԵՐԻ ՑԱՆԿ

1. Գ. Լ. — Գարբիել Լազյան	14. Հ. Թ. — Հարություն Թուրչյան
2. Հ. Ս. — Հրաչիկ Սիմոնյան	15. Ե. Ս. — Երվանդ Սարգսյան
3. Ա. Հ. — Աշոտ Հարությունյան	16. Ծ. Ա. — Ծատուր Աղայան
4. Ս. Վ. — Սիմոն Վրացյան	17. Մ. Կ. — Մուրադ Կարապետյան
5. Հ. Գ. — Հանլետ Գևորգյան	18. Ս. Ա. — Սերժ Աֆանասյան
6. Հ. Ղ. — Հայկազ Դազարյան	19. Հ. Ա. — Հրանտ Աբրահամյան
7. Ա. Ա. — Արամ Անտոնյան	20. Ա. Ե. — Աղասի Եսայան
8. Մ. Ա. — Մակիչ Արզումանյան	21. Է. Ջ. — Էղիկ Ջոհրաբյան
9. Գ. Պ. — Գրիգորիս Պալաքյան	22. Ռ. Փ. — Ռուբինա Փիրումյան
10. Հ. Կ. — Ջոն Կիրակոսյան	23. Ա. Ս. — Արամ Սիմոնյան
11. Ջ. Ա. — Հրանտ Ավետիսյան	24. Հ. Ս. — Հենրի Մորգենթաու
12. Ա. Ն. — Արամ Նազարյան	25. Լ. Հ. — Լիլիթ Հովհաննիսյան
13. Գ. Գ. — Գալուստ Գալոյան	

Մեր Ստեփանի Կարապետյան
ՀԱՅԱՍՏԱՆԸ 1912–1920 ԹՎԱԿԱՆՆԵՐԻՆ
Ուսումնական ձեռնարկ բուհերի համար

Мгер Степанович Карапетян
АРМЕНИЯ В 1912–1920 ГОДАХ
Учебное пособие для вузов
(на армянском языке)
Издательство «Зангак-97», Ереван, 2003

«ՏԱԹԵՎ ԳԿԳ»-ի գլխ. տնօրեն՝	Ս. Ե. Մկրտչյան
Դրատարակչուք. տնօրեն՝	Ս. Վ. Սնացականյան
Գեղ. խմբագիր՝	Ա. Ա. Քաղդասարյան
Սրբագրիչ՝	Ա. Ա. Սելջուճյան
Վերստուգող սրբագրիչ՝	Ն. Ն. Փարսադանյան
Գեղարվեստական ձևավորումը՝	Գ. Ա. Գարոթյունյանի

Տպագրությունը՝ օֆսեթ: Չափեր՝ 60x84 1/16: Թուղթը՝ օֆսեթ:
Ծավալը՝ 25 տպ. մամուլ, 18.84 հրատ. մամուլ, 23.25 պայմ. մամուլ:
Տպաքանակը՝ 500 օրինակ: Գինը՝ պայմանագրային:



«ԶԱՆԳԱԿ-97» ԴՐԱՏԱՐԱԿՉՈՒԹՅՈՒՆ
375010, Երևան, Վարդանանց փակուղի 8, հեռ.՝ 54-89-32, 54-05-17
Ֆաքս՝ 54-06-07, էլ. փոստ՝ zangak@arminco.com
Տպագրվել է «Զանգակ-97» հրատարակչության տպարանում